

梅亭四六標準
下

梅亭四六標準
上

3-5


梅亭四六標準

內閣文庫			
重三	函	一七四二	特四十二
五	架	一十九冊	類

合世昇

內閣文庫		
番號	漢	11742
冊數	19 (1)	
函號	3	5

重 3 - 5



梅亭先生四六標準卷之一

言時政

上史丞相

嘉定丙子

新宮城言藏

索長安之米擬就辟書伏光範之門尚干賓謁特
有惓惓之意未敢察察而言輒以萬分寫之四六
儀圖愛助此周人待山甫之情翕受敷施亦虞舜
舉皋陶之意他無求者公幸聽之竊惟國家間暇
之時當思文武長久之術况外夷之雲擾貴內治
之日嚴詎云行李之通可緩包桑之慮國虛難動
民困易搖豈待謀國之數公知諱用兵之兩字然

三
四
五
能應則乃可謂定故欲翕者未始不張今徒千里而畏人未思四境之不治一氣先竭百爲弗開羣材付之乍佞以乍賢正論聽其自鳴而自息耳目之受旣狹心腹之委亦偏爲赤子爲龍蛇未始得敵情之實以皮幣以犬馬但云量事力之宜軍籍旣隱於蔽蒙將材又阨於媚嫉舟師未練馬政不脩鑿斯池築斯城豈可無九攻之具鍛乃戈厲乃刃孰能遏再鼓之衰仰而思之無非事者上作而下不應朝廷每有是言外呼而內不聞郡國亦爲此論惟事事備乃可無患言人人殊何以成功周

得上漢得中策將安決蠡治內種治外責恐宜分試考先朝立四總管之謀及觀諸儒分三大鎮之說皆欲取之人望從而假以事權一用孔明陸遜之規模力行鼎錯充國之論議移江上之屯於淮上實關表之粟如關中使權守禦之方漸講招懷之略衆犬方信則養威持重兩虎旣傷則取亂侮亡是爲屈羣策以共圖奚至無寸功之可論與其待一朝之患始出於茲孰若折千里之衝早爲之所若任人而疑疑人而任則聞事不實實事不聞何怪草野之私言動違槐棘之成筭日月逝矣風

變不足慮人言不足從庶幾君子
所畏恭惟某官堪輿間氣社稷世
元回平原黃河之決終風且曠洗咸池
白日之光力調更化琴瑟之弦復享和戎金石之
樂如將道古今而譽德亦可紀簡策以垂功然太
師維垣輔隆興不滿一歲今西平有子相嘉定行
且十年此非門戶之私榮實負乾坤之重寄用藥
莫先於無病止車當在於未奔相亦惟終邦其無
斁如某者拙由地稟狷不時宜獨竊考治亂之原
知當謹幾微之會貧賤不能以達志憂患又從而

熏心昔在服中欲上范文正之書而無路今來闕
下願作石徂徠之頌而難言薦之吾相者欲令主
金耀之書謀及乃心則姑願應銅梁之辟等勤大
播盍進小忠敢輸肺腑之微誠盡告腹心之元老
一毫有補萬坐亦甘平津之招賢有三惜難受汲
生之黷洛陽之太息者六實欲全周勃之功

上鄭參政

昭先

干祿選曹未遂斗升之食修容政府率須四六之
文循例之常非頌則禱然古者執可殺之贄而今
則獻無用之言反欺闇人謂有已見輒輟贄山譽

斗之佞移爲雨露增海之忠某聞夷夏貴賤名位
不同南北動息機緘相繫兩庭分而漢室弱五胡
擾而晉事多嘗試攷古以驗今恐當制治于未亂
然而內備外禦之計墮在文恬武嬉之中民力中
乾邦儲內滲以人材則弗競以士氣則不揚將多
庸人軍半虛籍縱無敵國之外患已非盛世之遠
圖設有赤白囊之馳必貽赭黃織之慮天大地大
託之真無敵之儒人謀鬼謀當爲不可勝之備無
非事者必有先焉折衝樽俎之間固貴矯情而鎮
物銷患廟堂之上要須從衆而廣謀徹去私情力

行實政培植根本振刷精神大勢旣張何事弗立
當機不發雖悔莫追執政之猶股肱相尊等耳憂
國之如飢渴公早圖之恭惟某官學本六經氣鍾
五緯涵今茹古曾藏有本之源泉揭德振華身作
不清之玉雪自其不辭小官於州縣之日已知可
以大受爲社稷之臣人交惜其用遲帝已嗟於見
晚致身兩社倒指六年自生民以來未有盛於夫
子任天下之重時則有若阿衡三台色齊萬物氣
吐惟保我子孫黎民之衆則格于皇天上帝之心
如某者鹿鹿無奇魚魚何筭謬塵一第濫厝百僚

惟悴之吟湘濱孰爲之地嗟吁而攀蜀道竟失所
天旣銜弗洎之悲漫作爲貧之仕適之謂材堪之
謂力不足乎揚薦之吾相致之吾君皆非所異但
願王者之佐每先天下而憂儀圖之莫助之斐然
僭躡其進也與退也惟所指搗

上曾樞密

從龍

讀阿房之賦早累殊知投光範之書今無他覲特
以門墻之舊得觀鼎鼎之新欲輸愚慮之千往抵
賀錢之萬璧諸大海豈有待而增加然在細流固
不嫌於傾寫某聞交鄰有道寢兵固帝王之功制

勝無形銷患在廟堂之上今犬羊之交噬久蚌鷸
以相持殘虜僅甦怒將移於水解新酋稍偏殃易
及於池魚至如歸附之民亦是紛爭之費戰守和
之未決難察察言兵食信之何先宜事事備今徒
懲創已往之失遂致闊略方來之憂本惡張皇事
反流於怠弛初求鎮靜弊乃至於蔽蒙最是民困
易搖仍覺兵虛必潰言之唇腐識者心寒城非不
高池非不深險誰與守飢者欲食勞者欲息怨豈
在明藉令有效死之民亦未見決勝之將外憂縱
緩內蠹已多願察積薪厝火之形亟爲徹桑未雨

之計通民氣於士氣參天心於人心收拾羣材懷
張衆志戒牧守之忒刻斥將帥之驕殘亟厚邦儲
速蒐軍實無非事者綱旣舉則目張不早圖之枝
未害而本撥和羹固異於濟水同舟况迫於遇風
公輔居兩社之間相尊等耳大臣不四方之慮人
望謂何恭惟某官恭懿而惠和弘深而肅括榮進
素定夙瞻魁下之曰台昭晰無疑豈待日中之見
斗信儒者有益於國見天之將任是人未嘗揚己
以取名殆欲格王而正事自參宥密益懋彌諧古
所謂鄰哉之臣人將責賢者之備誠能歸草茅之

公議置在本朝從而散廊廟之泰和達之溥博此
真漢相矣豈憂匈奴哉上將恨無官以酬公公亦
可有辭于永世如某者竊由氣稟拙不時宜頃因
場屋之文特蒙偉視繼修竿牘之敬又沐賞音回
回州縣之塵落落功名之夢本謂伯樂之旣顧羣
馬可空寧知烏獲之難逢匹雛莫舉竊料黑頭之
宰相亦憐白脚之門生然願廣萬間以庇寒詎敢
私斗升之活涸捲珠簾於未老勿疑驚燕之呢喃
今江水方安流庶遂閑鷗之浩蕩

梅亭先生四六標準卷之一

梅亭先生四六標準卷之二
贅見

見趙茶馬

彥紹 全篇用茶馬事

訪火井於臨邛偶逃水厄望星槎於仙漢行拜月
題尉江湖渴夢之深瞻原隰華鑣之沃伏念某地
寒而根淺年運而骨高斟酌胃中固欠可人之風
味局促轅下粗知範我之馳驅與其包裹供權倖
之鑽不若蹭蹬任風塵之老况乏揮毫之百斛固
應病顙之十年懶問蓬萊羣仙之司遂叱邛徕九
折之馭其甘如薺豈必衆嘗言刈其萋願爲君御

恭惟某官雲龍氣局天驥風標架屋桃源三桃流
五千之卷乘輶轅道一雄將十萬之雌却笑前丁
後蔡之籠加安得超范軒轅之繳繞加臭味而厚
賓客漫令策兔褐之功盡骨相而遺毛皮諒必察
驪黃之外如某者不持圭璧未洗袴袍特窘城南
晏食之謀遂入冀北暮取之數味已輸於第一價
敢望於倍三草茶無賴空有名敢妄希於湔袞塞
馬未必不爲福或可備於走趨

上魏運使

了翁

聞宇宙之大名如瞻喬嶽抱江湖之渴夢今在下

風乏紹介以爲容修辭誠而求見某聞士之任重
固不止獨善其身儒者道高先當知有貴於己若
靡然斷趾以適履必至於舐痔以求車操行既卑
國家何賴有能卷舒之際不爲燥濕所移如蘇文
忠之違熙豐亦不苟同於元祐若劉忠肅之惡章
蔡然非強附於伊川是名蜀珍可重趙鼎觀公氣
象視古等倫茲故賦明月烏鵲之詩亟欲快景星
鳳凰之覩恭惟某官眼高四海曾着千年漢相有
真宜居蕭曹丙吉之冠鄭公所願蓋在稷契臯陶
之良當炙手可熱之時凜掉頭不往之節長卿車

還於巴路元濟已叛於蔡城神山可巢固自薄蓬萊而不即撓捨未落必欲借荆楚以同功雖卒成孺子之名然已立懦夫之志一麾而出十暑于茲回視獨對三千字之人誰肯甘頓十九年之刃萬牛不能回立山之重四牡又復勤原隰之馳要路在前聊養韓忠獻之器榮進素定何必王文正之門然海內所以屬望於公蓋天下尚有可爲之事幸昌其志以濟斯民惟功名當久遠之看則富貴乃緒餘之事如某者居貧甚肆從仕難任夫汗漫九垓之期分甘控地逐侏儒一囊之俸豈必鑽天乃遠隨黃鵠之梯蓋願事碧雞之使雖神索於大巫之側當氣蘇於君子之前嗟遠道胡爲來哉幸將在此居是邦事其賢者儻或許之

上任中書

希夷

披雲漢之天章夙見舍人之掾勒山林之俗駕來瞻學士之真極知大匠之門難飭小夫之牘顧無藉手輒用引吭竊聞師儒並世之難類有今古殊時之歎^并昌黎之於太白漫夜夢以晝思陳後山之於大蘇恨江空而歲晚今有文章之伯實在邦域之中公求士甚士之求公旣聞命矣後視今猶

今之視昔盡往拜之伏念某氣懦弗張骨凡難操
一科十年之不補愧在無聞半通五兩之甚甘止
於爲養曾幾何日竟失所天陷皆腐膺僅能逃死
磨肌戛骨奚暇送窮祥琴翁忽以成聲塵甑睢盱
而望賜心口相語但欲從小宰之銓面目可憎未
敢作大鈞之問惟是忍見賢之渴所當修覲德之
恭或聞庸下之姓名已辱暗中之摸索逢人必項
斯之說幾於神比而天同伴直難浩然之呼特以
職親而地禁仰高山之景行感流水之賞音樂莫
樂兮相知安有又傲翰林之理見所見而後去姑

慰不願封侯之心恭惟某官學冠儒纓道航聖蹟
家故雄於四蜀誰敢齒於諸任騎鯨暫駐於九龍
振鬣遂喑於萬馬周情孔思心傳先聖之不傳宋
艷斑香文到古人之未到久於詳試昨乃遄歸士
則快於覩先帝已嗟於見晚能典朕禮咨伯直清
肯從吾兒煩君調護玉堂草罷又吟紅藥之翻金
匱紬餘還對紫薇之伴彼智效一官而不足此身
兼數器而有餘人望一條之冰其容已肅公傍九
霄之月所樂不存豈非爲天子之私人實持公議
行且作清廟之近弼尤佩遠憂今外夷訐阻之時

正中國圖回之日天地亦大矣保邦當在於未危
人物方眇然求才不嫌於太廣與其待倉猝而市
三年之艾不若及間暇而滋九畹之蘭時來爲之
天下幸甚某貌無可贅輒誦所聞幽桂遺榛管底
敢累犯嚴之口江梅託桃李但欲薰自潔之香

上吳宣撫獵

祭主簿之竈揆分已庠升侍郎之階見賢有耀末
之藉手率爾修辭竊以平生識元魯山便無他憾
於人見歐陽子乃謂竒逢三復師儒並世難之詩
再歌生世何用早之句江濤如此孰能百斛而獨

扛人物眇然誰可一洗乎萬古疑山川之沉寂恐
宇宙之沈寥適我願兮在此行矣恭惟某官肝膽
一劒精神五兵言行擇君子之中庸德業得賢人
之久大涕唾富貴談笑功名蜀道天高久已放龜
而縱鶴長沙地褊不妨狎鷺而馴鷗新詔祿於壽
宮表眷懷於宣室今天下尚有可爲之事無競維
人凡海內所謂不獲之夫豈勝其衆能風霆於庶
物必霖雨於四方天將大任是人恐不免耳道之
將行也命孰能止之某鹿鹿無庸狙狙有志半生
拙學已不計班賞之崇庠一世偉人所願觀道德

於前後騷騷忍渴貿貿望塵然李生之從事湖南
知會計當而已矣果吳公之召置門下豈遙增擊
而去之

上曾運使槃

一行作吏俗莫俗於簿書六轡觀風華孰華於禮
樂恃在鎔之所鑄忘躍冶之不祥斐然修辭持此
徼福伏念某材庠莫亢質窳無奇長鑱掘黃獨之
苗只傷地脉短檠喧綠幕之讀徒損天和苦無計
以養親遂強顏而干祿一科不補漫得雉於喝盧
五技已窮欲屠龍而單產騷屑倚門之望卑陋祭

竈之謀趨鎗閣前之鈴僅逃箠楚倚賴天涯之釣
大隔波濤我有二天今既數月幸樓臺之近水盍
桃李之託根薰南豐之香人爭出其門下認西江
之派我未免於鄉人試伸仰首之鳴庸卜終臭之
遇恭惟某官眼高四海筆落九天惟其有之種種
文清之似由來遠矣源源忠恕之傳宜供奉於軒
墀顧驅馳於原隰無波古井浸秀水之芙蓉有脚
陽春轉光風於蘭蕙雲開衡嶽星聚壽沙治不收
聲各使安其田里民無遺便皆自得於湖山六條
遠愴於風稜百吏莫逃於水鏡尚念某頃嘗執贄

處辱賞音無地置錐慙處囊之非穎留渴待井愧
汲綆之不脩與其索大寒之裘不若乞來年之麩
涓人買死馬首亦繫招徠上天不生鶴翎盡歸啄
抱歸投之切敷叙奚殫

上董制置

居誼

四年再累於大鈞非言可謝萬里重瞻於小隊有
喜難名竊聞沒階之趨又須銜袖之贄獵較固難
於違俗效顰安得而成妍伏念某意廣才踈名浮
實淺諸公過聽雖欲挽之振鷺之羣一飽難諳敢
望富於屠羊之肆徒感招徠之厚遂忘跋履之勞

經瞿塘灩澦之危寸心欲折上梁山桂林之峻雙
脚已低不自意全得至公側就新儒而悼前猛詎
應寄歛退於趨營酬知己而效小忠或可因蹉跎
而束縛茲蓋伏遇某官求士爲國与物爲春網羅
蜀珍旣厚楓柞枏櫨之蓄收拾鄭璞欲置璆鐵銀
鏤之間况如鄉里之小兒乃是門墻之舊物撰書詞
具馬幣旣加繾綣之誠防瘴癘養形神仍委駢蕃
之况肺腑固知於銘德頂踵何足以酬知某敢不
思稱使令圖惟忠益在元戎所自辟於天子豈欲收
定雀之恩惟先生無圖利於大夫庶或盡犬雞之報

上李侍郎臺

捧從事之檄假道不專升侍郎之階見賢有便闕
然藉手率爾修辭恭惟某官心契九秋文黻萬丈
二螭坳處非仁義不陳於王前五鳳樓中有言語
必妙於天下方餘色石忽觸佞山遂橫野水之舟
歸屹中流之柱道之將行也命孰能止之天將大
任是人恐不免耳暫輟北門之鑰來分東梓之符
棠棣之華固已生光於五馬棟梁之器詎應回首
於萬牛會乘閭闔之風亟對罌魚之月某久於竊
蔭甫此望塵異人異書不但慰望梅之渴同姓同

業尚或希按茹之征

見李提刑

至

系成紀之望敢論繼別之宗受月湖之知抑有同
門之契假道得見賢之便修辭爲執贄之先恭惟
某官一卅儒宗三朝壽俊田里之無愁嘆幾森畫
戟之香原隰之有光華仍揭繡衣之節使登表著
不究猷爲豈惟朝廷賴有德之尊抑使海宇蒙不
知之潤不謂解彭門之組便欲挂神武之冠正恐
蒲輪之迎難遂橘鰕之隱即觀詔下入對席前某
久於傾心方止望履雖吾宗之老孫子未知所裁

然是邦之賢大夫或與之進

上梁運使 綸

手捫參井冒希入幙之賓身近斗牛喜見乘槎之
使竊循禮例再具贄緘伏念某不自力田乃謀耕
祿長風引去固應違汗漫之期平地尚多亦可逐
侏儒之俸必欲勇乘灩澦之象幾何不餒巫峽之
魚百丈牽江失勢頓成於千丈萬夫拱手納溝知
耻於匹夫不自意全僅以身免汨俱其出粗見平
生忠信之功痛定而思可爲行險僥倖之戒召驚
魂而復幹企英節以修容營吻無竒汗顏有覲恭

惟某官盛名如晝和氣猶春四牡勤原隰之咨三
鑕巴火萬牛回丘山之重共託蘇天人但知河內
借寇之情誰能識關中留蕭之意邊陲旣靜足稱幙
下之冰壺吏道當澄尚託胸中之水鏡特恐魚鳬
之國難稽龍馬之圖會當紀日月之常亟入聽星
辰之履尚念某不辭險遠求備走趨使臣之載馳
載驅或小留於斧繡辟客之且喜且懼尚迄託於
幘幘

代上安撫

去民畝而就車夙歸坏冶之中聞仁政而受塵今

在併轡之下久榮榮而在疾難僕僕而望塵逮茲
祥除敢以贊謁恭惟某官直方而大智勇且仁應
西山之石移果崑崗之玉出識其小者數虎榜之
十年誰其似之扛龍文之百斛付榮進於素定屢
勇退於急流怡然野水之孤舟屹若頽波之砥柱
於皇更化副帝登庸弥綸兩社之間弼亮萬機之
務騰身跨汗漫豈料羣兒之愚濯足歌滄浪少警
衆人之醉假泰階六符之照措長沙千里之平少
留蔽芾之甘棠庸展切磋之淇奧公歸無所即有
袞衣繡裳之詩我儀圖之請繼濃墨大字之頌伏

念某名在屬籍實則寒儒朝齏暮鹽長兀窮年之
燈火夏絃春誦恐孤傳世之詩書方小丈夫偕計
之時適大參政登朝之日對硯中龍蛇之影遙識
璇魁接天邊鴻鴈之行偶聯金榜所恨拘貴賤之
分未由觀道德於前天惠仁侯曉行湘水赤舄几
几雖嘗再拜於車塵素冠纓纓何敢數干於閭吏
賴廩人之繼粟活孝子於寢苫幸周踰月之期敢
廢披雲之敬十年不調或欲爲再命之圖一氣轉
鈞願更使匹夫之被

齒塵埃之下吏夙感大恩拜雲漢之上台輒裁小
櫝戴德有丘山之重修辭無月露之工斐然搖毫
滂若流汗伏念某妄庸晚進艱苦早孤念昔先人
固嘗拜龍虎之榜不腆後嗣何敢吐蝸蚓之科然
徒用外家之恩始得塵下士之列頂踵實歸於陶
鑄肺肝嘗切於鏤銘甘辭曹掾之優聊適步兵之
隱經禮三百亦嘗偕計吏之行進士五千獨未中
太常之第猶蒙藏疾獲遂養痾侵尋二考之書瀆
落再命之計然念長伯樂之廐苟不自鳴縱或抱
和氏之珍誰其見賞敢伸九頓首之請併祈一轉

手之仁恭惟某官直大以方清和而任時則有若
伊陟實繼阿衡之覺先公其惟時成周足邁伯禽
之拜後積卜六載更弦之化收七十城憑軾之功
營東函西煩整頓乾坤之手燕南越北知扶持宗
社之心方將恢萬世之基益廣開衆正之路有如
門下桃李之數或堪籠中參朮之儲是能容之非
敢望也尚念某難留冰幕盍返糟丘一氣之轉洪
鈞儻拜成終之賜萬間之庇寒士敢忘報國之心

代上丞相

代趙惟綱謝夫

綴京幕之下僚茫無操挾瞻宰衡之上相敬布依

歸惟其恃我公之如昔賢故敢提孤生而進門下
蓋臯陶之弼舜以翕受爲規模至伊尹之佐湯以
旁招爲事業下至蕭曹丙魏之於漢以及房杜姚
宋之在唐皆因收拾四海之材用能輔成一代之
治載在信史是爲元勲至如先正越王之忠實開
孝宗隆興之業張子公服其汲引之量沈德和愧
其用之言不惟國以得士而昌亦是家有達賢
之後故國非謂喬木實倚世臣成績紀于太常益
光先烈恭惟某官忠貫日月誠塞天淵溫乎得聖
人之和毅若任天下之重人見伯禽之拜後依然

無驕士之風誰知孔鯉之異聞得之自趨庭之日
垂紳正笏不動聲色強本折衝自得精神齊城旣
入於地官周寶乃歸於天府然且厚樹蘭茝楔之
蓄幾於無毫髮絲粟之遺是乃傳禹稷之心豈但
接韋平之武伏念某強名厲籍本實寒儒旣無長
吉之文章又乏更生之學問幼年筆硯燈無太喜
之花繼世簪裳袍已半枯之葉一尉南昌而奚補
再丞廣信以徒勞雖亦蒙臺府之吹噓然終厄銓
曹之選調茲贅負於冰漕實隸役於日畿幸逢大
匠之鈞陶誰非躍冶正恐無言之桃李下自成蹊

敢因三吐哺之餘輒伸九頓首之懇譬諸草木安能醕雨露之恩刈爲薪芻亦是報乾坤之造



代上丞相

代鄭司理

觸五嶺之熱叨李掾以終更企六符之光趨槐庭而執贄旣快鳳凰景星之覩輒謀烏鵲明月之依修辭斐然犯分愧甚伏念某簪裳墜緒場屋老生再鼓而衰已蹉跎於壯志三獻不刖乃塵綴於末科初無進取之狂粗識簡書之畏味我自愛桐鄉之句謾試弓刀誦人誰送臨賀之詩往司狴犴粗知勿誤于庶獄初無可折之片言歲厄閏年良勳

故人之念天憐孤迹偶逃新恩之羣竊聞大鈞之無垠雖占小善而必錄譬猶草木雨露無甘苦之分雖在江湖潢潦願消塵之助恭惟某官道先民覺忠結主知聖朝之相頻頻已過中書十四秋之數閱宮之詩奕奕方開異姓五百年之封無敵知真儒之功可久見賢人之德問鄧禹而披輿地蓋將膺萬國之貢珍得伊尹以格皇天詎止俘三朶之寶玉惟有邦有家九德咸事則無怠無荒四夷來王豈以洵故官冗耶願善鄭以勸來者尚念某固望斗升之活亦希尺寸之垂猶泥在釣猶金在

銘是全託一陶之造若川作舟若旱作雨諒欲遂
萬物之宜



梅亭先生四六標準卷之二

梅亭四六標準



合
北
興

內閣文庫			
書	號	漢	11742
冊	數	19	(2)
冊	號	3	5

梅亭先生四六標準卷之三

薦舉

謝董侍郎

居誼

舉狀

隨驃騎之幕濫備執鞭剡公車之章遽蒙推轂心
感恩於破白面抱媿而發紅伏念某稟生多艱從
宦尤拙貴人令其出門下既不善於走趨大夫羅
而致幕中亦倍勤於收拾豈謂半年之內復爲千
里之行治法征謀紛紛未定幕府檄筆錄錄無奇
然白日實照其精誠則赤雲可占於勝氣况值旬
奴百年之運必復春秋九世之維
進 馳聲札而咤聲

旄在此行矣封龍額而獵麕月年不望焉曾未輸
橫草之勞何遽辱采蘋之薦之吳下阿蒙之學顧
曰淹該無江南子布之詞反云典麗裨益之功甚
寡獎予之實何多茲蓋伏遇某官以社稷臣爲詩
書帥孤忠可貫於日月至誠足達於天淵一龜一
琴人皆望清獻之出萬牛萬甕賊必待崇文之擒
佇觀十乘之行大作三軍之氣繫單于之頸慰祖
宗在天之靈犁匈奴之庭爲蠻夷猾夏之戒于以
侈旂常之績歸而策鼎鼎之勲凡在紅蓮綠水之
間必入赤箭青芝之用某敢不力磨其鈍圖稱所

蒙插羽銘山敢銜文章之小技冶金伐石願歌竹
帛之大功

謝魏運使

了翁舉狀

據地承顏非有豚蹄之祝爲天啓齒廼蒙蟲臂之
收勞軍將之打門發函書而驚坐難道今人之不
古但虞吾黨之累公伏念某於道無聞甚愚不肖
每思名教之樂地何必事功亦知富貴之浮雲不
如貧賤徒緣一第之彊爲三釜之謀中罹弗泊
之悲甚悔未信之仕以風爲解遂回蓬島之舡幹
流而遷徑泛瞿唐之冰旣元自辟於天子非

先生敢圖利於大夫綴錦城等語之觀未容黔突
廁天水祁山之役濫佐青油方深國事之憂遑復
身謀之恤車輪四角何敢累推轂之人夏屋萬間
亦莫認捲簾之處敢謂誠心之傾倒竟煩強箭之
吹噓茲蓋伏遇某官學者泰山國之元氣年不可
及寧妨待天下之清時來則爲終必得聖人之任
引扁舟於蓬島閱十暑於岷山人疑魁枕參首之
淹公無瓶居井眉之悔卿自用卿法吾親屬吾思
駭聞渡瀘之行倏罹陟屺之變故者無失其故夫
能致唁於生芻誅之不可勝誅敢望噓枯於死草

忽辱遺我雙魚之寵見貽駕彼四牡之章學落質
凡顧謂識高而韻邃氣凋力腐反云才瞻而意新
近功缺然遠業安在初不敢異緇衣之改何爲過
蒙華袞之褒師魯之從事陝西容有知之而弗薦
永叔之退居穎上乃虞賢者之不聞所忻吾道之
有歸豈獨小人之受賜某不知所報當勉其頑氣
象未可攀但感幽桂榛管之薦歲月坐成晚尚託
江梅桃李之香

謝鄒運使

孟卿

舉狀

王事靡盬未敢懷歸使臣見

山

叨論薦况沐戎

終之賜尤銜引之之恩伏念之之隨行狙狙何
算少始知學亦有立功立言之心壯不如人已作
爲貧爲養之仕偏親弗洎百念頓消漢庭諸公漫
惜斯人之憔悴魯國男子自知吾意之蹉跎引舡
既遠於蓬萊鼓枻試觀於滌瀕沐浴而戒行李人
謂斯何飢渴之歌采薇歲亦陽止雖連收棄矢之
發恐未免一簣之虧豈無他人欲令出其門下不
有君子寧可弃之道傍茲蒙四牡之章遂足五紕
之數在繡衣六條之察定匪徇私然華袞一字之
褒却疑過實蓋經邦本諸政事而緯國取於文章

游夏求賜之異科雖孔門而難

難

備董賈龔黃之殊

傳在漢世而罕全自視

然前言戲耳士固伸於

知己蓋非搖尾而後怜德不待於成身却合銘心
而自厲茲蓋伏遇某官人今而心古行峻而氣平
分閫乘輅欲轍環於四海揚金斂璞真鑑別於九
流尚煩入蜀之星來卜擒胡之月子午之奇可出
但當飽戊己之屯甲寅之報未來何以寬庚癸之
呼尚啗餽餉關中之手且圖轉輸渭上之功諒思
人物之眇然僅有征夫之邇止劔外之官易冷聊
借吹噓幕中之辯非傾謾加也

習謹佩味言號門生而知恩
國士之遇我誓當小異於馬牛

謝衛參帥經舉關陞

小子狂簡之成章無能爲役大鈞塊北而播物有味其言幸辱備於使令亦足謂之遭遇不應論薦便累吹噓伏念某受質亡竒望世亦狹童而強學粗知萬物之皆塵壯不如人縱得一科而何補舍對白抽黃之業爲出朱入墨之謀人言棲枳之官決無鸞鳳渠知求芻之志固異馬牛不圖賈子之泛湘偶際召公之分陝望塵雅拜孰非夾道以疾

馳敷祗陳詞獨念此君之小異今以竿牘小夫之智效於詩書元帥之前一年于茲五技窮矣可以止則止方願返於屠羊莫之爲而爲駭忽勞於薦鶚亟嘗輸款願且避賢豈期刺史之天決爲將軍之地識字有數敢當淹博之稱了事亦癡寧有踈通之實非相國賜之大禮之過詎至是耶使天下洋然動于然來其必由此古之所以求士今者於是見公恭惟某官身佩安危力關造化兒童之誦君實父佚丘園夷狄之問路公暫司管鑰察湖南之從事欲異北之空羣雖有絲絲三且揚糠粃四

恥匹夫之不獲欲其收多士以收奔無以我公可
展伊周之業豈惟委吏得專文武之功某既累公
知寧當自弃少留東閣難掩人言魏勃之庸更遶
南枝或備臣客馬周之對

謝曾運使槃舉關陞

墨綬主書苦之曳裾之譽繡衣察吏忽承推轂之
言況下考之用書曾微勞之未效便辱吹噓之送
允爲特達之知伏念某何足控搏不堪位置抱鉏
犁而餓空谷乃無端以讀書裹章服而揖上官還
不習於爲吏解后六條之察吉蠲一辦之香祝甌

窶而操豚蹄不夸而狹見九彈而求鴉炙匪躁斯
狂不謂蘇天尚爲李地燈花夜報奏葉崇朝馳誦說
云乎顧謂文章之典雅會計而已反稱政術之疏
通難當一字之褒乃辱八珍之牒小草之有遠志
但欲深根老芋之爲茯神誰欺精鑒伏遇某官家
傳忠恕嫡嗣文清游疇剖竹之庸繼著握蘭之望
濡轡而馳原隰疑若小然聽履而上星辰恐不免
耳尚念斗升之噉嚼若爲分寸之躋攀自其貌耳
其言雖乏同進之交譽知其主信其客姑令從事
以流聲鶚薦一飛馬價三倍某雖無以報敢辱所

知始與筮楚辭儻遂少陵脫身之願尚煩左右筆
請歌昌黎薦牘之詩

謝林提舉

有知舉關陞

抱會計之簿書安知鰲釣瞻光華之禮樂忽拜鶚
書曾微扳援之緣何自聽聞之誤伏念某性徒是
古學不前人尋墜緒之茫茫我之懷矣踵常途之
役役誰者念之坐違汗漫之期遂逐侏儒之飽主
簿四十亦知鄧禹之笑人公車三千登乏鄭莊之
薦士未有不求而得者吾非惡此而逃之馬失之
瘦士失之貧其來已久牂生於奧鶉生於突彼各

有由甘心妄校尉之行間絕意諸貴人之門下忽
繡斧之問俗如緇衣之好賢察之進旅之間寵以
關陞之剡妄庸人耳顧稱履行之端詳誦說云乎
反謂詞章之典雅一字已榮於華袞八音何有於
爰居其求士甚士之求公公無愧古不即人而人
自即我我則覲顏伏遇某官歛經濟材攬澄清轡
衆人皆醉揩醒眼以旁觀萬物走圓改方心而不
忍念天地之大矣懼人物之眇然顧以毛髮絲粟
之長悉在權度錙銖之內有如齷齪亦與吹噓惟
今之謀人念不到此雖古之庸使何以加諸某敢

不策不肖身爲必報計馬僕既增於三倍驢技更
勉於一鳴大夫薦人與之大夫固無是事國士遇
我報以國士惟既厥心

謝衛參帥臣特薦

周公還贄僅收三士之材毛遂備賢輒在一人之
數不求而獲其得也榮切惟范蜀公之封章七輩
皆爲名勝呂文靖之賓客三朝賴其儀刑殆勸相
國家之功自旁招俊乂而始然主擇客客擇主亦
各有宜故公求士士求公苦難相值裴晉公於韓
愈至公僅使之就閑歐陽子於聖俞素交乃忘於

推薦况在踈賤何與品題某殖學多荒賦姿不穎
偶綴一科之底強爲三金之謀入墨出朱職甚安
於祭竈依紅泛綠夢不到於轅門敢圖前茅采及
下菲迄今數月無補報於絲毫未始一言乞躋攀
於分寸小人屬饜而已非惡此而逃之大鈞坎北
無垠果何修而得此欲使塵埃之吏進爲館學之
儲受德者不待成身感知而已盡已者謂之確論
揣分謂何伏遇某官以社稷臣爲詩書帥傳說之
輔台德宜揖巨川君陳之和厥終暫藩王室式篤
緇衣之好庸爲夾袋之藏故令驚才亦玷鶚表某

敢不激昂大節感刻異知諾侯薦人與之諸侯固
無是理國士遇我報以國士請事斯言

謝曾安撫

從龍特薦

伏蒙鈞慈露章特薦者竊以儀曹論秀舊累殊知
帥聞舉能今叨亞選負留連之藻鑑辱根柢於朽
株施重人輕感深言淺伏念某不堪位置何足控
搏少而恥有道之賤貧冒焉干祿壯欲行所知之
學問愚不適時今難望不龜之封聊爾監無螭之
郡由貳攝長無儋石之儲晏然粗廉且平信蠻貊
之邦行矣初無詞藻何有聲名周公欺我哉還贊

僅收於三士韓愈亦人耳願忠豈後於百官濫吹
其間循涯而懼茲蓋伏遇某官爽邦良弼命世元
臣暫勤分竹於武安共徯聽麻於文德曉行夜醉
已開南嶽之雲暮捲朝飛又作西山之雨雖自湖
入海是亦東歸之兆然望魁與台亟還北落之樞
庶不戰可屈於人兵見用儒無敵於天下一莊荒
甚亦思向花木之陽半刺芬然詎意入蘋蘩之薦
維昔武侯之一表實同說命之三篇首焉推向寵
之淑均繼則舉費禕之忠實今以二難并之美併
於一不肖之身自愧欲然公言過矣然士固伸於知

己則德豈待於成身諸侯薦人與之語侯久無是
事國士遇我報以國士當厲乃心某敢不剗礪鈍
頑鞭磨庸惰號門生而不知恩者非人也詎敢弭
忘視匹夫不獲其所者若推之更祈終惠其爲感
槩罔旣鋪荼

謝林寺丞

行知特薦

素鞞御祥夢空懷於故宇綉衣薦士選猶及於陳
人睽離恍隔於累年屯蹇旣濱於九死廼蒙記憶
尚迭吹噓始而驚疑終則慙懼人弃而已獨取此
心定異於常情今無而古則聞茲事實關於世道

非言可謝於禮敢違伏念某命固不猶材亦無似
湘濱樵悴安得自高蜀道嘒噓固爲親屈彼蒼有
罰莫白此心棘人藥藥勞心忉忉幸而終制達官
紛紛諸公衮衮誰實恤孤忽聞一節之趨寧及十
夫之猷漫令廁九人之後材難不其然至謂冠一
路之賢吾斯未能信豈固察驪黃之外憐其困牛
皂之同人謂斯何公言過矣舊游門下旣已玷一
株之挑今去籠中乃猶取三年之艾恩淪於髓媿
溢其肝茲蓋伏遇某官德與春和氣如秋杳方淳
熙之雜然並進固不乏於特材惟簡蒿之老而愈

剛實見稱於聖主今賢者識其大者蓋有之是以
似之不然再轉而爲丞誰能三已而無愠徧持使
盪始入郎闈君不行方夷猶羌難得而覩縷廣帥
之重唐制已然上弄印以選賢公聞命而就道何
恙弗已盡興則歸得之傳聞似恐昔疾而今愈恬
於出處豈非人醉而我醒然天下之所少者非材
則海濱之來歸者有日勸相我國謹簡乃僚勉令
進進不已之人皆動于于然來之意某敢不請事
斯語力勉其頑德不待於成身豈但叙柳河東之
感士固伸於知己自當發韓昌黎之狂

謝瀘帥楊尚書

汝明

屬城受察已感跼身帥閫簡僚更叨舉首得固榮
於券外愧有玷於牘端嘗觀七篇之包羅頗考五
人之名數齊王爲都之知罪惟孔距心獻子取友
之難忘必樂正子使下駟或當於上駟則後魚或
謂於前魚矧某不才舉世所鄙坐力田之傷地脉
迄不逢年欲養生以息天黥未能絕粒得郡豈嫌
於如斗蹊田適值於奪牛有土此有財貧於近鹽
豈井不改邑窮乃無錐不幸千里之旱可哀竟無
斗升之水以活蒙袂弗勝其貿貿納溝瀆覺其累

累挾火暇問大人只得焦頭而爛額無麵欲爲巧婦但知剜肉以醫瘡思飢實自於已飢忍痛難思於方痛非惡其聲也實關鄉人孺子之心何誕之節兮固賴方伯連帥之惠鶴膝蜂腰尚未全復牛溲馬渤何足兼收此蓋伏遇某官德與春融氣如秋杳閭闔之開黃道夙高北闕之星辰斧鉞之下青冥暫養南山之霧雨七年可即戎矣九戩以公歸兮觀察急於賦刺吏私於民洞知委折今夕飲者恩來日按者法未忍舉行閔其存活數千之羸寵以治平第一之薦然饑饉扎瘡之甫定熙洽謂何且文詞學問之久荒博深安在尚書拔十得五矣孝廉聞一知幾耶德不待於成身士固伸於知己某敢不懲羹吹沸求牧與芻諸侯失國託於諸侯無使飢餓於吾土國士遇我報以國士敢忘佩服於斯言街荷惟深敷宣罔旣

代謝衛參帥

浮食畫墁又占芙蓉之幕飛章推轂遂依桃李之門請裁小子狂簡之章少謝大鈞垓北之賜伏念某地寒無挾天巧亦慳膽落穹廬莫繼忠宣之衣鉢力扛洪鼎又慙文惠之箕裘徒藉義方獲沾卅

祿雖幸挂名於秋賦未能得雋於春闈盤旋州縣之勞祇慚簡書之畏偶終墨綬獲近碧幢適泰堦六符之光擁元戎十乘之寄生匠石之園長伯樂之廐固可卜其終身挹浮丘之袂拍洪崖之肩復自怜其凡骨聊作斗升之活敢希分寸之攀況西山行地之仙有八百輩而旌陽同日之舉僅十二人不應妄庸亦預推薦茲蓋伏遇某官三朝元老四海真儒魁下雨星付榮進於素定曾中五色補造化而不言靡辭三命之滋共要歷四方之維翰自洪移福辦香續派於南豐由登入京夾道寄聲於司馬閩閩休歌於來暮吳儂莫切於去思陝而東陝而西方欲弘周召之化洛之南洛之北務多收溫石之材包荒得尚于中行采菲何嫌於下體致茲孤進亦累一陶某敢不退自激昂勉圖報稱滕王閣之台賓佐既辱異知翹材館之招賢人應無棄物

代謝帥座

契家子弟謝合京大

塵埃委吏夙依夏屋之萬間造化全功遂拜春風之一紙受知襍積懷感輪囷竊以山巨源之念遺孤吾聞語矣柳子厚之記先友誰實圖之非遲遲

於抃死之八珍則淺淺於蘇枯之一漑有如念故
人之子擢之於莞庫之中成始成終不進不止以
此稱於天下豈當求之今人伏念某窺管識卑挈
瓶知小備太史牛馬之走終覺駑庸讀先人科斗
之藏卒無象似羌爲貧而出仕君將母之不遑倚
門之望旣深對床之歡亦廢雞鶩爭食難舒狷者
之懷烏鵲無枝漸作歸歟之計豈謂荆潭之裴均
首求漚穀之石洪總角北方憐其進拜於床下厥
齒長矣不應曳尾於塗中假之寵靈長其光價遂
從數月卒獲四章譬如爲山實易虧於一簣其志在

流水誰能寫之五弦忽逢公車之交遂合浮圖之
穎父書是讀果何有於家聲兒事已癡豈真明於
吏治伏讀八字足華一生外而翼之所謂如天之
福我顏之厚矣未知何地以報公此蓋伏遇某官
藩屏重湖準繩百吏埭北播物大鈞運於無垠追
琢成章小子至於有造憐宣孟之無後撫叔敖以
如生褒華袞之一言器蟠木於萬乘遂令長往之
興亦入旁招之儲重惟此恩將何以謝某敢不恪
共爾位惟旣厥心我有二天已幸厠七十家之舉
士更三日猶希與八百吏之除

代謝茶漕司

需次糟丘敢圖內舉贅負油幕使效稟言昉茲服役之初敢廢修辭之敬竊惟中興重藩宣之寄故於機事置書局之官當建炎羽檄之交實許陪於贊畫迨紹興鞬橐而後始無預於文移雖曰閑曹然亦異數如某者志雖自好學未知方爲筆爲裘亦自勉家傳之業不狩不獵居然承世祿之恩未敢荒筆硯之耕然已負懷綳之愧一行作吏甚安筦庫之卑萬里侍親忽有從軍之命猥容浮食使與內籌幸雖出於天然恐有爲之地者恭惟某官

氣資凝遠風調浚明黃鍾爲宮散作人間之和氣大玉不琢中藏天下之至文肯爲入蜀之星實卜擒胡之月周爰咨度暫煩四壯之馳薄言旋歸即護六飛之馭凡叨氣類例沐吹噓致令疵賤之蹤獲隸走趨之數某敢不靖共爾位洗濯其心詩禮聞於過庭敬修可願孝友施於有政增益未能

代謝茶使與合尖

綴玉鈴之冷幕已迫踐更飛金節之薦函偶成合穎功莫崇於引重惠無大於成終洎吉日以修辭順下風而請謝竊惟選舉旣弊授受俱難相易則

從之輕已發蘇老泉之嘆用決者恨其早可考黃山谷之詩君驕士而士亦驕君主擇客而客或擇主故達官多寡助之恨而志士無苟合之期兩不相逢一至此極況如大正可謂小知緬思舊學之碑有慙元獻不傍貴人之戶却似小山第恐荒簪笏之家未免厲布韋之業藝藝十載於太學僅竊末科草茅一介之狂言幾投大僇甫息浮湘之拙冒隨諭蜀之車錄錄無奇安有幕中之辯沾沾自喜若爲席上之珍偶蒙諸臺共剡棄矢爲山九仞極知一簣之虧撞鍾千鈞此豈寸筵之力誰其從

吏辱此吹噓樂莫樂兮相知何敢急於自銜遲之遲而又久諒欲察其所安好不改於緇衣褒果踰於華衮退惟內撲反稱疑重之姿正媿中乾何取純深之學殆假點睛之筆俾舐換骨之丹人訝其通籍之階宜淹而速自恐負親民之寄雖寵若驚此蓋伏遇某官風鑒精明天機沉邃逶遲苞栩盍周道之端歸蔽芾甘棠殆召公之是似峻東壁圖書之領專西秦摧牧之司相馬舉肥恐小駟有足乘之理煎茶有味思大匠無可弃之材欲令轅下之駒謾備籠中之物故雖弄印迄使在鎔某敢不

謹佩此恩力鞭其鈍公車薦士諒不收私報之情
直道事人持此答曲成之造

代董侍郎謝史丞相

六年百謫託大造以全生一旦異恩錄微勞而贖
過盡復官階之舊仍沾祠廩之新毫髮不出於他
人頂踵皆歸於化地伏念某夙無操挾積有僥逾
州縣常才既躡從甘泉之橐藩垣重寄更濫分益
部之符指心願報於寵光量力終牽於分量體廟
謨安靜之意何敢動兵承宣司減汰之餘又難增
戍然盡地而守之策亦無日不討諸人會殘虜欲

竄身於三秦聚重兵專垂涎於四蜀計我師之籍
無八萬人分邊面之屯幾二千里上藉朝廷之威
德下憑將士之忠誠首殄渠魁既奏皂郊之一鼓
繼殲羣醜不留蟠冢之隻輪偶興元偏帥殞於挑
兵致散關諸卒潰而挺盜雖在葦臯去鎮之後難
逃孔明貶秩之辜投畀囚山甘作浯溪之老適逢
沛澤遂叨汝水之歸茲遇飛龍之御天曲念病駒
之屬地錄其尺寸跼許復於雁門活以斗升涸足
蘇於鮒轍孰主張是遂登濟茲此蓋伏遇某官柱
石九筵網維八極談笑洗咸池之日從容封函谷

之泥博陸之益戶萬七千諱足報伊周之烈汾陽之書考二十四自應徧齊晉之功方藏疾以匿瑕務厲世而磨鈍復其官爲子孫之計見此恩乃父母之心某敢不仰佩殊私益磨晚節誘我松桂未敢勒北山之移收之桑榆庶幾補東隅之失

代陳帥機

元勳謝衛參帥

細書成文蒐實材於公舉大鈞播物挈冗吏以名聞雖嘗備於使令初無堪於選錄况受及瓜之代難徼采菲之恩不謂三人之占乃使匹夫之被一陶異甚再省矍然伏念某頑疎之資浮沉於世塵

容俗狀果何有於詳華綿力薄材豈具能於強濟門蔭只宜於平進閭僚自合其官勞粗奉文書無可言之功狀非有方略難曲盡於事宜是真常鱗九介之匹儔何計乘鴈雙鳬之多少矧入幕之日淺而歸袖之風披三匝彷徨不識捲簾之意一封覩縷忽聞推轂之言得之駭然望不及此旣非請謁而得是謂特達之知公求士甚士求公久無是事子生孫復孫生子難報此恩伏遇某官直大而方清和且任與人不求備此心即孔孟之心乃言底可行所論合禹臯之論暫甘棠之美召即淇澳

之相周雖俊乂始入於旁摺而巧拙或容於雜進
遂令遯尾之客亦入需頭之章某敢不銘刻鴻私
鞭磨驚鈍藉使百無逢於世亦有一回顧之榮指
心圖報於品題滕口難論於報效然稱於天下曰
知已今者非耶使遇以國士報衆人天厭之矣

代章監倉謝衛安撫

琢

下士代耕之祿僅守積倉上臣事君以人忽騰薦
擢憐其出自於幽谷使之陟彼之高岡愧在盧前
感從隗始切以筦庫七十家之舉古道久衰法筵
第一義之觀今聞尤聳有嚴十乘所部九州鳳翼

龍鱗孰不希於攀援牛溲馬渤皆有望於蓄藏及
下車之云初乃推轂於綦賤其爲銜戟實倍等夷
伏念某質窳亡竒材庠莫抗服箱以走渠憐滿脰
之黃鍾按劍無因誰肯先容於白璧強折腰於爲
米真眯目於簸糠今蒙需章可使升秩父書是讀
果何有於家傳兒事已癡豈真堪於世用一字之
褒已過兩喜之溢何多伏遇某官以社稷臣爲詩
書帥與人不求備収毛髮絲粟之微嘉善矜不能
無絲麻蒯管之間有如頑頓首辱甄陶九戔之魚
鱉魴即遄歸於周室千里之馬騏驥會交獻於燕

庭某敢不增所未能修其可願常爲委吏已蒙葑菲之收寘彼周行尚幸兼段之采

代趙撫屬

汝謂

謝衛安撫

木流行久汙芙蓉之幕岸花飛送漸違桃李之蹊重感眷留倍深銜戀更裁四六少謝萬分伏念某再省妄庸一何僥倖當大參政十乘啓行之日適小丈夫三年垂滿之時惟其樂莫樂方相知是以遲之遲而又久敷施翕受更無假於先容前輓後推真不遺於餘力居然穿縞之末迄成合穎之謀感溢瓶罍功歸爐冶乃瞻衡宇情已迫於忻奔

及告油幢恩數勤於盼睞謫將滿百辭不免多今蒙慨然允爲幸甚鷗鵬水擊強希萬里之圖烏鵲月明采結一枝之戀恭惟某官東郊道洽西陝化成展長沙千里之平民無遺便對宣室半夜之問王曰遄歸凡今日毛髮絲粟之才皆他時樽櫨侏儒之用欲作大鈞之問又虞小器之盈敢陳掄謝之詞更致依投之悃常擬報一飯柰何回首於南山可以觀四方自此馳神於東閣

代趙撫屬

汝謂

上提刑

油幕綴負漸迫終更之候繡衣察吏鼎來剡奏之

章初非光明俊偉之材又無假借拔援之勢古之
所以薦士今者於是見公伏念某名爲宗支實本
士檢取懷綳之簪笏恐受衆疑隨韋布之縑緗偶
叨一第慨念勉峴程回之術業終愧毛原周召之
等夷何以亢身莫如殖學方以此自厲於已何敢
輕受知於人細楠大桀壹冥心於輪扁長箋短檠
肯請命於子公來事元戎實叨未屬適鼠竊狗偷
之盜蕩搖我疆奪鳥飛魚泳之驩劬勞于野濫承
渙渥許緘常負然風憲之一削不圓則天門之九
關難扣解后行露之聽寅緣宿霧之披甫及褰帷

遽蒙推轂旣不爲有力負舟而走又不生無因按
劍之疑伯氏壘仲氏虜安得齊名之寶臺中評幕
中辯初何贊畫之功猥借溢言特加吹送捷爲之
磬十六大似無心而得之公車之牘三千誰有不
求而至者內則感國士之遇我外則賀天下之有
公輪囷在肝緘封於髓伏遇某官人今而道古內
介而外通嘉善矜不能所學皆孔孟之學舉直錯
諸枉此心同伊傳之心駢駢六轡之載馳落落萬
物之吐氣有懷鴛鴦之序及識鵲鵲之原參以旦
評慨然露奏振雲天之高誼策塵土之孤蹤暴公

子之薦不疑昔聞其語揚湖南之信陳子今媿斯
言某敢不深自佩銘痛加砥礪謝恩私室敢矜小
技之文章不辱公門願勉大閑之節誼

代趙撫屬上衛參帥求合尖

汝諱

一官頂踵冒假借之深恩三沐肺肝乞品題之終
惠恃在有容之大忘其取數之多伏念某雖出天
潢初無地望燈花何喜一科不補於遺餘袍葉半
枯萬事已甘於濩落浪爾依芙蓉之幕下誰其采
薜荔於水中適逢先十乘於偃藩遂得底百僚而
隸役不虞一見便辱異知識元方而用季方久無

此事謀石子而羅溫子不曰非才借以齒牙付之
羽翼知我莫如鮑叔逢人必說項斯遂令虧簣之
山迄作合尖之塔惟是過屠而大嚼難忘見麴以
流涎兼幸生匠石之園託根未正縱欲附翹材之
館張本已踈豈無列薦之負亦有十科之目或蒙
送上竄謂成終大釣無垠技士不遺於餘力小子
有造歸恩豈在於他門恭惟某官以社稷臣爲詩
書帥喬嶽之蓄雲泄霧人蒙潤而不知滄海之包
乾括坤物何歸而不得尚念碧油之屬欲舐丹竈
之餘縹緲孤鴻漸恐回頭之斷漏差池歸燕寧能

絕望於捲簾幸從昌黎弟子之負徑實陸氏門生之列茅茹以其征吉今朝已免於西曹桃李悉在公門他日尚希於東閣

代陳縣尉愷上衛參帥求舉

酸寒深尉古須強箭之吹噓憔悴湘濱今累大鈞之坎北百無操挾萬有狂愚然而恃大參政之寬洪必不責小丈夫之躁妄切以三吐哺三握髮而下士周公豈欺我哉一舉手一投足之乞憐韓愈抑亦人耳况幸在犀甲熊旂之下乃無與狶苓雞羣之中恐虛此生何用於世是以頃者之詣府敢

於冒焉而呈身溫乎其和可知既蒙異顧粲然有文相接實激懦衷惟是下考之垂成猶冀上天之吹送懼捲簾之或晚忘躍冶之非祥伏念某鹿鹿亡庸狙狙何取砥節礪行不能窺前輩之藩籬種學績文且未識古人之糟粕半生一第寸祿八年茅舍聽雞猶是儒酸之氣味竹弓射鴨安知吏隱之風流然粗覺無媿於心幸以此不惡於下慨念一寒之迹若爲再命之階得拜馬前已遂執鞭之無爲牛後遂興見彈之思然記碧油之幢頗辱黃金之諾以其時則可矣敢不長鳴異乎人之求

歟真成自鬻伏遇某官直方且大清任而和公路
垂紳即正槐廷之面侯方賜履暫爲蘭畹之滋遇
民猶兒求士如渴東山瓜苦共思零雨之遄歸南
國棠甘未若敷天之純被顧以棖闌居楔之細皆
在毛髮絲粟之中欲善鄭來請從隗始某敢不激
昂驚鈍報稱鴻私桃李悉在公門旣感東風之鼓
舞葑菲無以下體尚幾秋露之均沾

代趙縣丞

善倪

上撫州林守

洽

求舉

贊長官之雨不善避嫌戴刺史之天風蒙假蔭惟
是斗升之活若爲分寸之躋流涎久動於麴車病

顙輒希於箕秣印利果否冶躍可乎切以竊戚之
歌黻明之言雖賢不免匠石之園伯樂之廐所係
尤深旣辱在於使令且已叨於識察將以知己稱
於天下乃使勤子至於他人縱欲冥心何以藉口
伏念某號爲宗姓實則儒生束髮所期豈念祖宗
之簪笏摘髭不力竟慙伯仲之填簞怵於食貧遂
爾諾仕一行作吏已徒勞州縣之間再轉爲丞眞
覺出薄尉之下顧惟蹇拙粗守公勤不利走趨寧
免長官之罵尚能拜起孰非太守之恩試以代庖
幾於環轍莽誰欺於揆牧復攝事於子男柰何五

章漢無寸援得不得之有命當安造物之鑪錘樂
莫樂兮相知更傍誰家之門戶伏遇某官眼高四
海氣蓋諸公千佛姓名早宜登於文石三神步武
晚猶會於郎星載馳子子之旗有偉皇皇之轡胡
然歛惠復此專城公不嫌旋馬於蟻封士則嘆烹
雞於牛鼎雙旌屬爾五袴暖然謝康樂之文章尚
餘此地顏平原之氣節如見其人竊窺帥之文
可見察吏之意不知庸下還入選中既旁無蟠木
之容姑且作大鈞之問盡拚去牙角雖無種學之
泓澄託根借恩光或許孤芳之皎潔

代黃主簿

夢得

上樓倉求合尖

觀

瞻使槎於霄漢無地修容抗簿領之塵埃以身得
察聞高標之成削絕末俗之膏緣遂忍恥以自鳴
望微恩於回顧切以爲山九仞正虞一簣之虧持
綆百尋斯動三途之望故功莫崇於引重而恩無
大於成終必以爲無益而舍之則末有不求而得
者伏念某崎嶇百戰濩落一科棲枳棘之叢中但
合出朱而入墨攀芙蓉兮木末安知泛綠以依紅
偶效役於轅門遂贄負於幕府文書堆按真成俗
吏之爲獄訟如絲粗了癡兒之事兩蒙連率交剡

公車惟是緇衣之三章尚須華衮之一字月明繞
樹自憐烏鵲之何依海上問津或謂斗牛之可訪
惟是夙蒙於廉察未嘗得效於使令冒然有言可
謂不韙然苟以平昌之言足信則或知尹公之取
必端徑援筆以點睛當勒銘於刻骨恭惟某官盛
名如畫和氣猶春自其甲進士之科即合庚佐王
之學百川既倒屹砥柱之固存萬木盡僵凜嶺松
之獨秀由曲臺之議禮謂直筆以記言居然偏城
歛此大惠田里之無愁嘆有偉民庸原隰而有光
華亟將使拍福星所照旱魃已消然設有膠東三
萬戶之流民必將勾江西斗升水而活我尚煩周
度爲此曲防然後遑四牡之歸于以苞六飛之馭
思天地之大矣念人物之眇然欲善鄭來請從隗
始主簿能令公喜今謂斯何使者或不汝容信乎
命矣

代回楊評事洪之謝求薦

具一鷗之表方有待焉遺雙魚之書何其駛也不
能辭璧又愧報瓊恭惟某官騰茂蜚英閔中肆外
十事九律備知小大之情千條萬端未容上下其
手見何晚也愛莫助之僅寬食麩之期敢愛拔茅

之力此亦公舉安用謝爲某報國無功知賢不早
翺亦云審知足下矣豈復寘疑起在此敢勤他人
乎更祈加察

回資官王縣尉謝舉狀 昌大

某謹簡乃僚因剡公車之牘寘升在上詎收私室
之恩從而謝焉非所望也伏惟某官器能瓌碩趣
造端溫紫電神鋒夙志屠龍之學青其強箭暫閑
射鴨之弓今大夫羅而置幕中宜諸公爭令出門
下亦意飛黃之去何憂破白之難勤子至它人乎
輒復吹噓而送上見我有此客否定皆摸索於暗
中某過辱貽箋良高陳誼蘋蘩可薦其何恨行潦
之濱桃李不言度即有成蹊之日

回郭僉判謝舉狀 仲洪

謹簡乃僚輒效吹噓之送非相爲賜何勤駢儷之
詞銜袖鳴謙開緘擊節恭惟某官器資凝遠文獻
靖共大夫不均我獨賢游子男於四國陛下用少
臣已老尚賓客於諸侯所聞止一簣之虧然又閱
千帆之過陟彼北山而憂父母慕有切於終身失
之東隅而收桑榆恩冀沾於錫命有嘉懇款合令
那融用是采焦尾之桐初非有換鼻之木觀其志

觀所爲主幸可免勢利之嘲簡厥修簡其不修願
不負品題之意

回成副將謝舉狀

行三軍則誰與正賴戎昭舉一人焉拔尤亦維世
選何勤私謝更以文爲恭惟某官揚歷甚詳據慨
自許執干戈衛社稷克稱其家安邊境立功名不
聞亦式是堪勇往爰以名聞某獲共扞城敢忘推
轂霸陵醉尉呵李廣不足爲懷成都猛將右花卿
正須努力

回史郡僉謝提刑舉狀

使家選衆所舉惟賢記室修辭何爲至我自合卷
還於鯨錦又疑已費於麝煤伏惟某官揆材不貲
藏器有用暫作糟丘之主屈爲氷幕之賓奮迅驥
程何慮缺書馬之一飛騰鶚表便當足鳴鹿之三
是爲特達之知豈俟吹噓之送某誤勤稱謝但切
負慚同僚未嘗聞知人遐不謂矣貪天之功以
爲己渠敢爾耶

代回楊評事

洪之許舉狀

助國薦賢我已慙於不武飛牋陳誼公何富於斯
文進而三熏敢不重拜恭惟某官居官能大折獄

惟良廣夏萬間徒啓之才之歎陽春一曲反成寡
和之音頃珠璧之暗投恨衣裘之晚索深恐遠井
之待有孤時夜之求汔濟云初踐盟敢後子若無
言幾失子况又崔李之繼至交說耶君家所有更
贈君無忘孔孟之養氣傳道者某粗緣然諾俯辱
詞華得古磬於犍爲君言過矣獻天球於清廟予
日望之

代回高承直 不倚謝舉

奉一札以推賢徒得君重合衆言而剡奏安用謝
爲貽賤惠然爲禮過矣恭惟某官蜚英戚畹策雋
儒林翠竹碧梧籍甚名家之秀紅蓮綠水藹然入
幕之聲國人曰賢然後用之君子之道焉可誣也
某與籍紙尾甚覩面顏遣介奉咫尺書良感渠渠
之意今子使萬里外敢懷惻惻之憐

代回危教授謝列薦

積及第經年未脫選調入京注受幾年而未得闕

舉爾所知不如鄉人之善者於我乎館今爲有力
者奪之隨衆笑而笑焉非所謝而謝也恭惟某官
十收名第獨振妙聲坐廣文之壇似成一十四考
待公車之詔行及三百六旬所賴金玉之相不改
簞瓢之樂昔二人占而汝則逆用靜爲宜今八音

諧而人以和來儀可必其甚腐於力徒味其言苟
文若之不進不休於予媿甚吾夫子之可久可遠
惟君裁之

代回崇仁潘知縣

方謝舉

代何月湖

比剡需章聊紀陟明之績鼎來巽積碩捐投暗之疑
受言臧之無可謝者恭惟某官刃有餘地琴不下堂
君子學道則愛人計望風而成俗小人難事而易說
肯違道以近名作新鷄泮之好音餘事虹隄之奇觀
是爲實茂當以名聞某推轂力縣投簪心棘潘令君
之桃李度已成陰何將軍之山林惟當託蔭

代回涂察推

以今

求舉未允

通家講好托年契以爲多助國薦賢惜歲負之無
幾裘不供於晚索璧仍負於暗投所幸在邦域之
中必能察形骸之外恭惟某官槐根之芷蘭茁其
芽俊逸叅軍已露囊中之穎逍遙嘉客竟歸幕府
之羅乃今懷黃拖紫之人半是泛綠依紅之客寧
須盡餅更助譟旗某有味其言甚腐於力請待來
年之麪時則易然恐及往戍之瓜風斯下矣

梅亭先生四六標準卷之三

梅亭先生四六標準卷之四

舉科目

謝劉閣學

光祖

舉節操方正可備獻納科

遠客從軍自分塵埃之內近臣薦士許司雨露之
邊以仞墻則未窺且尺牘之不貢敢謂暗中之摸
索忽蒙送上以吹噓此難求之今人斯可稱曰知
己竊以爲臣止於敬皆有陳善閉邪之心事君致
其身豈無明目張膽之志自方正爲賢良之號而
獻納歸侍從之班視嘉言罔伏之時無不諫亦入
之意然元祐十科之創建不落第三至紹興五

之選掄以此居一蓋象龍亦有致雨之理而不
實餘愛禮之心儻非其人難稱此意如某者學未
聞道年不後人好論古今未離舉子之習氣僂說
得失不過處士之大言本浪爲錦城雪嶺之觀乃
輒與祈山天水之役空有幕中之辯竟無堂上之
奇誰誤聽聞忽蒙論薦我於辭命則不能也謾稱
春藻之葩人之彥聖其心好之浪許秋竿之節平
生失在小丈夫之悻廼今亦有大君子之知所可
貴者遇大賢韓子所以賀侯喜不待求而後施德
柳侯於是感崔卿不謂古心復見今世茲蓋伏遇

某官四朝壽俊一世儒真本本元元所學皆周孔
之學孜孜汲汲此心即禹稷之心曾中風月之無
邊筆下源泉之不擇使天下之大老二盡歸乎來
則匈奴之長技三亦何所措方居家而爲善思報
國之以人若爲控地之飛亦入戕天之剡某敢不
圖惟報稱益自激昂待以國士待以衆人何敢作
廁中之報不負天子不負所學庶免爲門下之羞

謝李參政壁舉獻納科

塵纓解縛方將發興於雲山宗袞垂褒欲使司存
於雨露喜固多於溢美耻乃在於過情其殆私

之私豈容不德其德竊以士無賢不肖均欲有一
世之知德不孤有隣亦樂道諸人之善蓋近來仕
進之徑蓋罕由薦舉之門心肯命通底勞介紹言
甘幣重自有寅緣宗臣之考十科本爲何事家宰
之計羣吏不出此途遂令牋天之章僅作畫地之
餅然某所見與衆則殊樂莫樂兮相知止願出大
賢之門下得不得之有命寧湏商小利於褚中矧
如不腆之蹤可謂所持者狹識字有數學何有於
多聞了事亦癡才豈周於庶務質不足以望粹然
之器文不足以窺作者之藩宜諸公臺省之登任

此士江湖之落莽誰欺於鑒裁羌忽累於明揚方
正乃賢良之稱必名門而後稱獻納蓋侍從之事
豈俗吏之能爲况去國十三年之餘閱人多矣今
起家二千石之薦舉世觀焉不應凡材猥玷異日
此蓋伏遇某官清朝良弼名世真儒鍊色石以補
天親揮九日觸佞山而還里坐閱一星甫尋川路
之風煙適值岡巒之烽火內嚴殄捕外示招懷賊
憚崇文之名若杵投曰民誦西平之子惟我有臣
俊又宜在於旁招巧拙猥容於雜進有如庸下亦
備數中某敢不勉自激昂圖惟稱塞有吏才也

事愧非臨川老子之倫絕當世追古人敢忘肩山
端明之薦

謝任尚書

希夷

舉著述科

上命公以納言甫膺隆委公報上而薦士宜首異
材是何濡滯出晝之人辱此吹噓上天之賜名充
著述實發兢慙某聞簡厥修簡其不修古不謂之
恩地觀其主觀其所主近反類於市區然而推賢
揚善之盛心乃是輔世長民之元氣眇然一世知
此幾人司馬公請建十科本爲何事崔祐甫盡除
羣吏不假此途謾勤爲天啓齒之勞間有畫地作

餅之笑如僕所見與衆則殊蓋伯牙之絕朱弦特
爲知者如虞卿之取白璧是有命焉第令收名定
價於大君子之門何必商功計利於賤丈夫之隴
况歐陽公不能挽聖俞之達而東坡老亦難拔方
叔之窮物固假於氣噓命實通於心肯况某無狀
觸事多畸荷鋤而耕寬閑只傷地脉乘槎而游汗
漫又犯天河無端讀書有時爲養既痛三千鐘之
弗泊又瀕四五十之無聞小材不離於小官已知
安分大慙或謂之大好人自過情馴致誤執事之
知欲令備弟子之列先唱之矣又唱之矣肯引去

蓬島之風舡昔謂斯何今謂斯何却回作瞿唐之
煙棹旁觀千丈之落自計三寸之存心不同兮媒
勞委禽勿強射有似乎君子正鵠是求敢圖進退
之間偶合高明之見徑持典麗舉及妄庸皇帝曰
嘻往贊碧幢之帥翰林爲主入言墨客之卿不以
昧於時宜爲俗儒是可稱於天下曰知己茲蓋伏
遇某官眼高四海曾着千年盛之白玉堂辭足以
鼓天下之動拜于青瑣闥學足以格君心之非龍
墀引聽履之星辰鶴禁賓重離之日月是固見耐
官之器孰能窺憂世之心大厦非一木之枝故櫻
闌店楔與蒨櫨而並蓄小市無千金之藥故芝苓
參朮合薑桂以兼收急求燭武則無以重朝廷近
捨皇甫則無以勸巖穴雖隻字片言之無用亦三
光五嶽之所閔不忍弃捐力加收拾何其久也必
有以也知己在於遣中我儀圖之愛莫助之亦漫
爲之言上感知而已勿謝得乎某敢不圖稱所蒙
力鞭其後舍文章之小技勉節義之大閑孔明之
栢四十圍香葉試尋於鸞鳳任公之竿五十牂大
鈎會掣於鯨鯢

代虞制參謝劉閣學舉科目

光祖

梧幕綴貞曾微寸善荷囊薦士猥玷異科予之豈
以爲私受者未能無愧蓋知祔而稱獻納嘗聞摩
詰之詩若依劉而增感傷已發仲宣之賦殆主擇
客則客亦擇主使官求人則人不求官自甘桃李
之不言誰識蘋蘩之可薦矧如剛簡藉是迂踈山
東山西不能世將相之業水南水北居然仕賓客
之聯雖學問粗知德性之尊然英華恐非和順之
發蛙拘墟而局促何所見聞燕巢幕以徘徊若爲
材識徒以固窮之力頗知尚志之功反觀寸心粗
識無邊之風月洞視萬古略知不廢之江河所願

就有道而正焉未得事大夫之賢者曾掘衣之不
敏已推轂以見收元祐宗臣之立十科本爲何事
紹興宰相之計羣吏尚出此途今徒有存羊之名
或者發畫餅之嘆然受德者不待成身而拜賜柳
子厚固已言之既有知方又欲識路而疾驅韓退
之亦安取此所感大矣無謝得乎此蓋伏遇某官
道純粹精德直方大羽翼孔孟學傳先聖之不傳
黼黻卿雲文到古人之未到碩果何嫌於不食匏
瓜自得於含章人之爲言何得焉特祝承明廬之
三入天之未喪斯文也故應靈光殿之獨存時來

爲之民生幸甚豈謂誠心之傾倒肯收孤迹之沈
冥得於不求亦可自賀某敢不佩所品題銘之衷
曲歲月坐成晚且熏坡老之香江湖永相忘更勉
後山之報

謝曾尚書

喚

舉著述科

裁小子而成章亡能爲役觀近臣而爲主有味其
言予之豈以爲私受者未能免愧切以十科薦士
著述難堪八坐舉賢銓綜尤重唐文章之錄登者
幾人晉人物之甄拔於一字使品題之太過恐稱
塞之易孤伏念某命固不猶才亦無似萬卷未供

於啜飲一科何補於遺餘結柳送窮仍覓語言之
無味剖瓜乞巧不堪豪傑之跪呈雖庚桑父役於
老聃然毛遂無聞於趙勝不圖科薦特辱名聞惟
才董班馬之香乃名秀發非李探舒向之海莫號
淵深至求英詞能配古作自李杜韓柳之不出殆
歐蘇陳黃爲庶幾何者妄庸得此獎拂前言戲耳
不待智者而後知小子識之則欲假之而自厲考
古人之所佩仰盛德之安窮非盡讀三萬軸之牙
籤難仰答十六枚之古磬恭惟某官國之喬木學
者泰山公方引韋世康而告休士皆知杜如晦之

必相平生五色線豈皖織女之襄向來一瓣香不
廢嫡孫之行滿期開閣早與捲簾某敢不仰體鴻
鈞俯鞭駑鈍著作前列之餘事豈足疇知節誼天
下之大閑持此誓報

謝趙尚書舉可備著述科

汝述

小子成章無可薦揚之實近臣爲主猥騰典麗之
褒未嘗敢請於墻藩乃辱徑收之篋櫝感知而已
懷愧柰何切以一字拔人今古稱山公之啓十科
舉士兒童誦司馬之賢幸猶愛禮以存羊誰復按
圖而索駿著作雖前列之餘事文季亦先聖之末

科珠玉不補於飢寒豈堪混泥塗之辱干羽無取
於戰陣猶足備宗廟之容有如一藝之不庸亦是
匹夫之弗獲昔趙尚書垂德於不報柳侯嘗感其
收撫之恩至李從事因文而得交韓子又念其飢
寒之聚不圖今日復見古人如某者蠢蠢隨行狙
狙何取徒守寒素之氣習尚持文墨之生涯居於
大江之濱甘見笑於獼獼行乎劒閣之險幸偶脫
於豺狼旣銜三釜弗泊之悲又罹二子更死之禍
兩髦已雪百念俱冰學業實負其初心精深安在
詞華甚慙於大手炳蔚謂何今屢爲丞相而言蓋

甚愧丈人之厚枚臯之窮且忍何敢躁耶孟郊之
久無成會且歸矣不虞科薦又累甄收伏遇某官
氣杳秋天愛深冬日作納言之喉舌惟山甫克舉
之用夾輔之股肱則周公其人也長慮却顧爲根
本之計兼收並蓄无葑菲之遺凡今傳羽翼而飛
誰非借齒牙之助尚念朝廷半老儒之日無弃文
章一小技之人必令綢繆於束芻廉耻缺矣故雖
參差之苻菜左右筆之某敢不勉自激昂圖爲稱
塞上不負天子下不負所學日監在茲待之以國
士報之以衆人天厭之矣

謝成都帥黃侍郎疇若舉科目

旅床爭席夢難蜀道之登軍將打門驚報禰書之
至世固有十科之薦士公獨能萬里而舉人愧在
其肝感深於髓伏念某至愚不肖素賤且貧無端
讀書遂奪耕田之樂有時爲養不供啜菽之懽猛
思萬物之皆塵彌覓一科之不補汗漫卓蹕欲尋
墜緒之茫茫勃窣嬰跼尚踵常途之役役雖大慙
必謂大好然小材不離小官安得自高聊復爾耳
能令公喜定未必然行搴湘水之芙蓉誰托江梅
之桃李今作禁門鍵要須百年幾見之人君如雙

井茶真副衆口一償之願願持著述猥舉妄庸經
學無游夏之源修明安在文詞之屈宋之艷秀發
謂何然經品題敢自暴弃孰云畫餅初無益於飢
腸如入太倉亦莫不有飽意伏遇某官斗牛間氣
奎壁清躔筆裁霧而縫雲不作人間煙火之語身
馭風而騎氣直依天上日月之光倦持上雍之囊
出草諭巴之檄雪山增重天府益腴斯人乃德星
頓釋冕旒之西顧用汝作霖雨共觀袞綉之東歸
諒勸相於國家先旁招於俊乂兼收馬渤曲抱鶴
翎仰盛德之安窮望夫人方已遠主簿乃有分職

縱欲福以難功侍郎非通神明曷不祈而得施某
敢不謹佩恩意自鞭古心諸侯薦人與之諸侯寧
有是事國士遇我報以國士請誦斯言

代趙撫屬謝衛參帥

汝謹

百舍治任已問征夫之前路十科取士又勞播物
之大鈞頂踵知恩肺肝懷感切以賓筵有秩古歌
衛武之功藩翰多賢舊說湖南之客今已時移而
事異誰堪德舉以言揚况如日夕之牛羊會且歸
矣相彼月明之烏鵲愛莫助之又勤科薦之榮允
謂陶成之厚伏念某一寒無挾百拙有餘偶躡末

科非有宗英之禮樂來依大府適逢元帥之詩書
假以三能之光借以九鼎之重從骨而肉如翼斯
飛肅肅宵征久馳心於魏闕遲遲晝出終戀德於
膺門果蒙吹噓薦以科目取其材術固无師友之
淵源旌以勤勞是亦塵埃之職分政事之可觀安
在館閣之稱選謂何強名器采之詳華浪應文章
之典麗前言戲耳不待智者而後知小子識之敢
不假茲而自勵伏遇某官清廟一柱泰階六符虛
己受人不厭蒙再三之瀆承天載物真得坤六二
之方暫爲召畢之保釐聊續荆潭之唱和牛溲馬
報

代回舒尉謝科目

從臣十科之薦一歲三人牧夫庶獄之難千變萬
狀茲以盡公而舉又何私謝之爲恭惟某官遠抱
甚都賢勞已久居然前跋而後寔誰其右挈以左
提今歸幕下之羅定脫囊中之穎比來科選擬用
名聞深疑詐木鶴之仙豈復尋蕉鹿之夢然此本

畫地之餅何以假爲果能受去墜之斤徑當削入
不然時夜之早計無乃明月而暗投某疾讀來函
病頓去枕家君作宰好吟孤鶩之齊飛客食加餐
持報雙魚之遠遺

謝座主

謝中書舍人

曾從龍

五芒色正夙瞻柱史之躔一刺字漫始見舍人之
樣仰高山而景行感流水之知音由其願一識之
未償是以身十返而不悔切惟去民就吏牛堪未
始謝於門負業歸家齊皞亦不非其上惟是筆硯
荒涼之業實受鑪錘特達之知說戰場文人還迷
於五色讀刑賞論公放出於一頭若揆門生坐主
之常當辨國士衆人之報伏念某學未至古年不
後人少也好脩強記輒數千字長而無述覓舉凡

二十年雖有道則耻賤貧亦無心於圖富貴可堪
親老又着儒冠而忍羞寧試有司不願君門之徑
入冒陳三策略吐寸衷自知明主可爲忠言特恐
貴人不喜生語頭顱自揣口吻益悲卒猛吐其狂
愚竟僥說於得失不謂暗中之摸索遂蒙送上之
吹噓既有詞意皆精妙之褒復加筆力可敬服之
語喘竹筒於儕輩增紙價於京朝人亦有言衣鉢
恐成於故事我則無勇鼓旗空譟於後塵旣經品
題敢自暴弃遺餘不補十年任韓子之窮名節苟
全一第真魯山之溷身未可許人也猶欲與後死

之斯文子亦來見我乎政恐事先生之有罪伏遇
臬官求士爲國事君以人言動必書今立二螭頭
而和墨汁榮進素定寧止四龍首之至黃扉切聞
滿籠之參差豈少一株之桃李然勸相國家之業
自旁招俊乂而基公求士甚士之求公會湏連茹
子絕長非長者絕子自合負荆某一莊未荒萬間
是苾向來辦香之敬真爲南豐此去翹材之延願
觀東閣

謝宗縣尉炳

薦書下士徼君子之異知奏記中消缺門生之庸

敬扣馬周實淹於逆旅非牛堪敢傲於有司末之
負荆遐不削櫝恭惟某官眼高四海筆落九天緇
十二經尤有取太平之典對三千字謂當冠秀士
之羣馬小殿於及門鰲固安於戴石孜孜甘旨屈
爲孟東野之官懇懇忠精方抱梅南昌之節淒其
風木越在塊苦諒朝祥之琴成聲則暮召之蓋相
望某頃偕鄉計嘗累公知由庶士而登司徒不知
恩者非人也去民畝而就吏祿豈進謝則爲私乎
顧迷京洛之塵寰隔蓬萊之水故者无失爲故乃
不知儼然衰經之中誅之不可勝誅自當即麾之
門墻之外顧勤一介先枉雙魚旣倒植之可斬復
暗投而失報青衫短笏漸從矮屋以着身紫磨真
金尚負洪鑪之定價然已長伯樂之廐敢逐荒陸氏
之莊某無以報恩期於強學其行己若有愧於道
何以文爲雖無報而不辱其門請從今始



梅亭先生四六標準卷之四



梅亭四六標準



合刊

內閣文庫			
番號	漢	11742	
冊數	19 (3)		
圖號	國	3	5

梅亭先生四六標準卷之五

謝到任

帥到任謝任參政

代鄒給事

輿轎踰嶺方營三徑之謀鼓枻浮湘又玷十連之
寄在相國知之至矣殆鄉人善者好之昉泣事之
云初豈修辭其敢後恭惟某官人今而心古氣勁
而貌和學問淵源得尊主庇民之道緒餘土苴爲
開物成務之才自翊輔於天樞迄規恢於土宇晉
參大政益播壯猷天將降任是人庸釋高文之宿
憤予惟克邁乃訓共觀周召之同心某分閭罔功

歸田已幸敢意躋班於延閣更令承惠於价藩惟
是清淑扶輿之區尚多愁恨嘆息之俗鼠窮已甚
蚊負奚堪必先達之士爲之前焉旣感裏言之賜
有刺史之榮無其難者尚祈終惠之私

帥到任謝鄭參政

代鄭給事

籲天還印甫辭五嶺之炎易地剖符遽得三湘之
勝將毋固諧於安便拊躬但愧於叨逾冒再僂而
弗俞知一陶之有自恭惟某官才弘而毅器博以
周駸假無言贊一日萬機之運柔嘉維則聳六服
羣辟之瞻人固料代何之用參上亦知安劉之必

勃兩地碧雲之暫駐旣厚仔肩九天黃道之安行
亟膺顙面某守藩弗績席蔭終更所願歸田徑返
林鳥之哺敢期易鎮竟爲檣燕之留惟一重一掩
號淳古之江山而九辨九歌餘芬香之草木豈小
材之能任由大造之曲成謂國小不足回旋此豈
爲我輩而設使政平而無愁嘆庶不爲門下之羞

太守到任謝丞相

權武岡軍

竊以邊郡負丞愧何功於涉筆中朝改牧命以次
而設麾雖時暫以從權亦日虞於非據重感大造
陶鎔之賜敢廢小吏竿牘之恭伏念某全抱迂踈

倍勤技拭廣文轍軻既保全茅屋之歸半刺翔翔
又減縮葵丘之代無蟹易嫌於監郡不龜敢望於
封侯方圖下考之書恪布中涓之謝日君乏使故
侯攬轡以疾驅夜枕不安新尹懷章而未上勤廟
堂之軫念慮獄市之擾姦姑令副貳之車且護方
寸之印鶉芳胡瞻於不獵馬也詎可以守閭正使
五日京兆之間亦有千里宅生之寄科瑣邊吏非
蒙真漢相之知申畫郊圻安得假齊王之命茲者
伏遇某官得聖之任爲帝者師萬億年敬天之休
豈止書郭中令之考五百歲名世者出蓋欲傳孟
軻氏之宗更新紹定之初元遴選神爵之良吏謨
友邦必立之亞旅正欲充虛幸督郵未逐於黿丞
不妨借聽雖小人乘器終於必奪然大鈞播物允
矣無垠某敢不三思而行一日必葺雖斬尸祝越
尊俎而代庖人之勞當籍吏民封府庫以待將軍
之至

滎州到任謝丞相

佐黔巫之東鄙甘半刺之翔翔守巴轅之南滎累
一陶之坯冶幕府十年之未久角巾兩火之可逃
間關半碁辛苦萬狀甫茲領事率爾裁牋伏念某

才不瘠人學徒泥古招諸生於館下幾毀于隨處
別駕之治中無材可展姑俟及瓜之代式遄行李
之歸敢圖分銅獸之符猥使展石龜之郡惟和義
之僻壤實光廟之潛藩升軍開府獨未沾恩視邦
選侯率多就近蓋民田歲租止五千石而公使年
計僅六百緡財匪鬼輸全仰作鹹之潤郡資井養
詎堪竭澤之漁比緣花破於皂胥今遂草薶而赤
立欲俾尋常之外頓增十萬之輸數畧入池寧保
四郊之無擾強弩射市但嗟薄命之先穿上下交
征公私可痛弗獲於上不可治矣欲加之罪其無

辭乎恭惟某官師保萬民弼亮四世天欲吾君繼
壽皇之聖帝賚我公紹忠定之勲禹以功皐以謨
適全絕德絳之果霍之勇抑又餘收不惟垂紳正
笏而措泰山之安且復守志厲操而抗浮雲之節
勤勞二紀無寸畧之敢休懇避三公至累年而不
受戒謹恐懼之如此熾昌耆艾以固然周公仰而
思之不迷勤教伊尹聖之任也尤務旁招肆令愚
儒來效凋郡尚念某進退維谷兢戰履冰思庶民
所以安恐有負十行之賜得一事可自罷庶幾免
百謫之盈輒修謝上之緘併控申中之悃

太守謝史丞

眉州到任

伏以乘榮隱之障方幸終更分通義之符濫叨詳
試適值賓賢而觀國又令主試於坤文既徹棘圍
遂趨瓜戍伏念某賦資蹇淺觸事坎艱學術荒卑
弗知深造之以道技能譾薄又非適用之謂才出
幕十年一登文石奉祠三載半刺武岡曾未蒲秩
之間倏奉專城之寵跨犍犍之微命與仇謀求牛
羊之芻心勞政拙得以理去不自意全丙穴維舟
徑欲歸耕於谷口庚書傳置顧令改牧於我眉惟
是四蜀之封疆重在三蘇之鄉國然好文而慕權

勢至今餘西漢之風其事守如古君臣近世異北
壩之記比緣兵潰轉覺民流歎既獻賢能之書甫
及理愁恨之嘆伋去誰守猶幸滴博之雲收超願
乞歸孰念玉関之人老茲蓋伏遇某官箕裘輔弼
祉角君臣精神峻嶠嶽之瞻談笑回狂瀾之倒大
鈞播物實細別於九流直柄當權亦曲成於萬物
有念一寒之蹇剥已成十暑之睽離更以一麾試
之再鼓某敢不謹固封守宣布中和前江陵後洪
農詎能及劉昆之政治南陽如上蔡仰在中召父
之規感棟唯深敷陳罔既

榮州到任謝扶制置

假守三榮叨塵統部牽江萬里既見吏民比嘗奏
記以徹名復敢修辭而謝上惟和義之斗絕寔夜
郎之奎隈事簡地偏舊稱道院吏貪俗悍今類法
場蓋一歲止五千石之經租而諸司近八十萬之
折估郡資并養財匪鬼輸屬因權攝之多馴至綱
維之敗壯哉崔鼠公肆侵牟翩彼鴟鴞交騰喧譟
致連帥括三井之羨爲屬縣代兩稅之輸上閔閭
制之聽聞下籍吏胥之專擅去其螟螣始云歛此
以錫民信及豚魚今則改之而備塞莫非王事均

是邦財黔其廬赭其垣正足爲參元之喜馬若羊
金若粟初何與張奭之家不才之某嘗仕於蜀亦
知風寒之數處何止日費於千金與其捐潤下之
鹹徒滋它族孰若助攻苦之淡以張吾軍然一郡
四邑之間有百孔千瘡之費得斗勺之水斯活矣
庶逃涸轍之枯無尺寸之膚不愛焉實恐剥牀之
及恭惟某官弘深而肅括簡要而清通後勁中權
文武作萬邦之憲外鎮內附精神折千里之衝定
不奪牛於蹊田但欲捕蝗之害稼有憐薄命值雷
轟薦福之碑或辱寬征使乳復零陵之亢乞從舊

額以惠疲氓某敢不祗通寬條布宣隆拍修慘怛忠利之實銷愁恨嘆息之聲可以言未可以言歟亦持有仁人之在上哀之命不哀之命也更惟恕躁者之多辭歸倚惟深敷宣罔既

通判到任謝參政

宣
薛

蒲神圉之祠廩無繼粟贊夫吏之長戍偶及瓜題興佐岳以安能伐輻實河之有愧輒裁小牘少謝大鈞伏念某全抱迂踈平沉庸俗徒有黽俛六九年之歎尚何扶搖三萬里之圖頃由掌故之官猥分齒胄之教大風有隧俄然電掃以雷驅古井無

波幸爾水清而石見特畀治中之任俾從方外之游維時都梁之區乃昔槃瓠之境歲租仰於永邵峒窰接於辰沅元和遣兵惡其置魁而立伍崇寧升郡猶未建牧而立參蓋一歲止萬石之租而四郊無百金之子然而事簡鴈鷺之左右亦稀況已食浮螳螂之有無何計儻水火不交於百姓則風月亦足以平分此蓋伏遇某官弼亮天功平章人品謂柳子而在臺省未必如司馬之可傳使趙溫而果丈夫又何患郡丞之能伏况黔東嘯呼之已靖有湖南清絕之可親使自謀之何以過比某敢

不謹脩厥職勉旣厥心思曹王踔騎之功無羞宗
派哦杜老化鯤之句更問詞源

通判到任謝簽樞葛

誨館下之諸生夙蒙采菲補黔中之止佐茲遂及
爪揣弱念以易盈撫窮途而致感伏念某學末聞
道才無瑜人負米爲親飽固悲於弗泊析薪無子
賤亦覺其有涯願平生竊祿以代耕乃三歲賣文
而求活頃申以抑易播之請遂忘得隴望蜀之嫌
愧在其肝悵莫追於駟馬言提其耳甘束味於孤
雄旣待牧羝詎容展驥茲出回天之力竟諧縮地

之謀鮑叔不以我爲貪傷哉資也伊尹耻匹夫不
獲真若推之公豈謂長史之有材僕固感國士之
遇我茲蓋伏遇某官爽邦良弼輔世真儒欲立立
人所學實資於孔孟匪求求我此心胸合於義文
然韓魏公自恨用明允之太遲而歐陽子亦愧知
聖俞而不薦雖昔何如今今何如昔願公之求士
甚士之求公庶皆有突兀大夏之驩斯不但屬饜
小人之腹某敢不俯安雌伏仰任爲飛文儒申申
詎能繼巫嶠之公綽武岡矯矯尚及見江左之夷
吾

通判到任謝臺諫

李趙留梁汪

別洛下之諸生久歸來於茅屋補黔中之上佐偶
及代於葵丘既滌籀以服勤盍濡毫而貢謝伏念
某地寒寡挾天巧素慳鹵莽而耕鹵莽而耘已慙
學落鼓譟以入鼓譟以出更愧名浮頃從文學掌
故之聯躡綴國子先生之後經笥之嘲未發謗篋
之惡已盈鄉人不善者惡之成是貝錦相國之賜
也大矣止於甌吏荏苒三年僥倖貳郡軫之旁鶻
之尾不惟非螳解蟹之宮丹之穴犀之顛近又築鯨
鱓之觀然以非材之典午固在協恭而同寅水火

弗與百姓交寧湏餞別風月不用一錢買何必平
分茲蓋伏遇某官道格君心識通治體進務閑邪
而陳善退思激濁以揚清天豁露繁南嶽要聞於
鳴鳳冰清霜潔北臺自肅於棲鳥姑試治中且游
方外某敢不修其可願勉爾遁思聳且何傷正欲
不聞於黜陟噤不得用又當且止於吟哦

除兩浙運幹謝趙尚書

汝述

舐淮南之丹久辱青冥之送涸江西之轍仍爲綠
水之依非公實與之主張此事亦幾於濩落旣祗
賤役盍控謝牋恭惟某官北海脩身東平樂善禮

樂三雍之對卓爾不羣文章萬丈之光飄然無聲
密勿星辰之履彌縫天地之爐當江濤如此之時
思丞徒揖之之計汲引不遺於片善繫維長恐其
遐心潤物之澤無聲既優既渥推轂之言有味不
進不休斷度收羅欲細摘大宋之各得又負偃植
將震風凌雨而後知能令此意之常存豈獨于今
之受賜如某無用所向多艱未能茹商嶺之芝還
復索長安之米誰其知者公獨惻然本欲化鯢以
爲鵬不料喝盧盡而成雉然感恩固在於知己則受
德豈待於成身但令古路之未荒敢恨吾盧之獨
破愈幸甚三爲屬吏矣相國知之起在此勤至他
人乎執事責也

代石僉判

孝理

到任謝丞相

絃歌學道偶得代於瓜期造化爲工俾充負於蓮
幕待闕之日旣淺陪京之地甚雄偏親有就養之
驩數口無啼飢之苦孰主張是遂濟登茲全出大
鈞鑪錘之功敢廢小夫竿牘之敬伏念某粗勤家
學尚缺世科揆材僅可以龕供涉世敢萌於厚望
惟宵人之乃祖乃父與先生則非故非親辱收夾
袋之姓名力加論薦凡今懷綢之簪笏實出挈

家世受知已四十年兄弟感恩非一二數茲偶當
百里之債亦欲干半刺之除然而母老家貧難需
久次矧是望輕資淺當避勝流適聞僉掾之虛輒
致緘詞之請亟蒙中入非有裏言尋承繼粟繼肉
之頒又沐載笑載色之遇由東所請如響之從人
或謂分寸之躋攀何其廉也自不翅三百之距踊
惟恐失之捧檄而歸倚門亦喜伏遇某官相邦哲
輔經國元勲喬木有臣既世襲格天之業泰山若
厲將代膺裂地之封惟元老克壯其猷故人兵不
戢而屈寧王遺寶復遠受命之符匈奴奉珍行納
稱藩之款諒深綢繆牖戶之計不廢收蓄搏檻之
材有如龍蟠虎踞之邦豈但魚泳鳥飛之樂因其
粗更於民事使之往贊於藩條某敢不滌濯其心
靖共爾位石生羅致於幕下已叨從欲之仁越王
胎養於國中終冀亢身之賜

幕官到任謝丞相

掃曹相之門慙非齊俊趨嚴公之幕已次蜀都仰
銜坯冶之陶退整韋弦之佩輒干涓史肅布謝牋
伏念某竊薄無堪欽崎可笑弱於材腐於力絕知
天巧之慳加其膏希其光又覺已功之淺徒緣循

古之力未忘及物之心然既更憂患之嘗亦漸入
賤貧之耻漢庭諸老誤欲招之使來魯國一男何
所恃而敢傲豈謂沒階之進洊勤吐哺之勞誨之
以先正之規模未嘗忘虜勉之以中權之謨畫莫
若審機趣令沐浴以宵行不容濡滯於晝出南浮
江漢既聞克敵之聲西望岷峨僅獻養威之策只
今疆場粗立藩籬要恃吾有以待之則雖來無能
爲也維是受禕允之任居然乏羣博之材大鈞塊
圯以無垠寧忍匹夫之求備小枝卷曲而不中徒
勞巧匠之旁觀每念食浮倍成顏厚此蓋伏遇某

官直方而大智勇且仁王曰惟爾君陳率由舊典
時則有若伊陟克對保衡積十年調鼎之功成四
海覆盂之勢豈謂魚潰之虜尚爲鼠竊之謀未煩
十乘之啓行已使隻輪之不返破竹數刃之後當
無留難取果旬日之間不妨持重願徇金城之略
勿貪石堡之功周公方且膺之勝於天定昆夷維
其喙矣必以地降如某者戰野非長銘山猶勇觀
我奇士極知東閣之多賢裕乃父功只頌西平之
有子

代回鄒泉州

應龍

到任

執草東臺憇棠南國言求諸道駁正之氣凜然惠
歛一州牧御之材裕矣恭惟某官弘深而肅括明
允而篤誠魁下三台付榮進於素定曾中五色肯
噤默以求容名蒲四海而守之以謙忠結兩宮而
退然不恃露門晚講緝熙日月之光明天禁夕趨
鼓舞風雷之號令念含飴之樂力抗陳情之章
萬牛挽之首不回六鰲去而山爲重前驅盡戟出
鎮清源海道無虞雖京師蒙九里之潤天子有詔
則刺史乃三公之儲某夙托同寮尤深贊慶燭之
武老矣無能爲矣一力謀歸仲山甫舉之愛莫助
之萬祈自重

代回史吉州

定之到任

選侯相閱作牧价藩除目初傳道路知其辨治建
牙伊始氣色益以精明恭惟某官材應時須美由
世濟踈廣與受早承給侍之恩謝安有元當是後
來之慶有華分竹倣載戍瓜幹白粲之連檣驅紅
旗而破賊帶牛佩犢漫游魑魅之鬼鋒蝟斧螳佇
築鯢鯨之觀印金斗大詔璽星馳某快覩未先賀
成已後烹魚拜貺良深藏去之榮挿羽奏功預卜
端歸之慶

代回張建昌嵩到任

入覲本朝出藩支郡朱轡皂蓋分竹使之半符碧
澗紅泉壯麻源之三谷雙旌戾止五袴煖然恭惟
某官濟美篤誠受材膚敏神俊一鳴之表萬馬皆
瘖躊躇四顧之間全牛自解需章交上渙渥留中
忽願奏於民庸遽勇收於朝蹟江滑闡徽盱爲佳
麗之邦顏記謝詩公有按行之便無嫌十絕會即
升迁某漸欲投簪歸聽擊柝有山房三萬軸之私
積託在部封願刺史二千石之公餘賜之覆護

代回楊贛州長孺到任

坐分龜組卧護虎城世選爾勞上固望象賢之媿
皇揆余度公肯孤熊夢之邦建牙有初交口相慶
恭惟某官麋珠果腹珮璐潤身素所自期豈止二
中而四下見於歷試真覺一洗而萬空甫畢素冠
聿來朱紱即家以拜得郡也榮清冰在壺決不作
繭絲之計丹砂點鐵復何憂薤本之強若作霖雨
則無咨怨之民如臨父母則有慘怛之愛惠而好
我更以贈君願觀清白之子孫大慰華顛之父老
崆峒日麗姑暫歌挂子之香閭闔天開即歸報麥
岐之熟某罔功分閫有幸卜隣屬州之得陽公同

業也司道也便道而至滕閣爲記之爲賦之

謝解任

太守解任謝丞相

權武岡軍

補上佐以罔功叨書下考攝邊城而非據又遂合
符虔控謝於大鈞併修辭於小櫝伏念某至愚不
肖多病早衰壯不如人紛兩髦之已雪老而無子
寒百念以成冰徒依突兀之萬間尚獲翱翔於半
刺夜聽統如之五鼓頗似官蛙曉聞欸乃之一聲
便如野鹿偶挈瓶之缺守暫越俎以代庖敢言田
里便無於歎愁似覺蠻貊可行其忠信淺有蒲蓮
深有葭葦小不虺蜺大不鯨鯢胡瞻爾庭人固疑

其鶉突此非子坐自亦愧於象環幸新尹之鼎來
許陳人之退屏竹齋藥竈尚堪清風明月之分桂
掉蘭舟已夢秋水長天之共蒲秩雖無於多日庇
身尚假於一雲恭惟某官直大以方清和而任天
以 寧皇同符於 孝廟帝賚我公濟美於越王
繼今文子文孫宜用汝而作霖雨乃立太師太傅
真於我而如浮雲竟回渙汗之揚可見謙撝之確
邴侯病瘳合從陰德以受封富公年高固有本朝
之故事諒益耻匹夫之不獲必思遂萬物以攸宜
尚念某何足控搏不堪位置雞壘也豕苓也亦嘗
累藥籠之收鼠肝乎蟲臂乎斯固在化鑑之運其
爲頌後罔旣編摩

代林提管呂謝五府

抱管摧之文書真成爲米守踐更之歲月有幸及
瓜帡幪曲免於震凌川數密藏其汗疾孰主張是
遂濟登茲良勞大造之鈞陶敢廢小夫之竿牘某
箕裘有緒筆硯不靈勃窣盤跚僅脫身於選穽嶽
崎歷落姑策足於縣灘盍求泥軾之榮却落銅官
之冗聚鐵成錯未能羨泉府之泉餉糟獨醒豈善
會酒人之酒冒依行缺聊復坐曹二親高年一則

以喜而一則以懼三釜微祿時乎爲養而時乎爲
貧誰爲元帥之謀載復步兵之餽歲糜月費不共
桂玉之爨炊冬煖年登未辦布荆之包裹有懷覲
省屢願汰歸日食太倉之陳亦皆帝力人言長安
之樂豈爲我曹不自意全遂得善罷伏遇某官彌
綸天緯涵養人材揆闡居揆各得宜與其進也風
雨霜露無非教栽者培之福遂及於容容考亦書
於下下某自非木石亦有肺腸烏獲力足爲氣足
施維其時矣伯樂過不睨遇不顧亦有命焉

○梅亭先生四六標準卷之五

梅亭先生四六標準卷之六

通交代

代董侍郎

居誼

回聶制置

子述

聯鑣北闕不得同父母之邦分關西垂茲又託子
孫之契頓足欲舞盥手修辭恭惟某官節稟松筠
識高著蔡有謀猷則順于外孰窺省闥之功非仁
義不陳於前親結冕旒之眷茲峻登瀛之步載馳
諭蜀之車騎火照山紅奏功易邇雪嶺界天白借
重方深佇展壯猷進膺顯冊某久於蚊負甚矣鼠
窮糠粃在藟安得有告新之政山藪藏疾尚或希

議故之恩

通項運使 寅孫

星臨玉壘永解金城王人之上諸侯宜復次地官
之屬使臣之拜五善乃肯來天府之雄江漢頓清
岷峨增重恭惟某官忠爲國許學富家傳聖門服
十歲之師兵法擅萬人之敵矧在鯉趨之日已聞
禽拜之風筆鋒萬馬之交奔才刃千牛之立解廉
而不劇出幕府之十年直哉惟清典容臺之三禮
出登郡最入庀郎闈旋爲一節之趨盡司六路之
餉生財有道立武足兵爰趣觀於嚴宸謂亟登於

禁甬師旅因之飢饉天顧在西禮樂遠而光華水
焉得北爰進木天之直重尋蓬雪之游歷井捫參
昔旣依蓮於綠水張箕舒翼今將轉粟於青天寧
湏漕輶之淹即報賦輿之總月升金掌天近玉京
某一介無它八年于外何幸故人之至可容老我
之歸糠粃揚前愧無補庚癸之諾樵蘇爨後知可
飽戊己之營願及戍瓜亟戒行李遣信使諭蜀道
已騰父老之驩與將軍皆楚人亦有子孫之託其
爲欣幸罔旣編摩

通眉州趙開國 希濬

魯衛弟兄之政班固後於先茅召杜父母之歌揚
更慙於前批肅迎千騎敬遣雙魚恭惟某官卓爾
不羣飄然無敵更生寶苑蘊金淵玉海之奇長吉
錦囊挾陣馬風檣之逸三峽游依於綠水連鑣決
勝於赤雲寰內五等之侯游揚已徧腰間六國之
印滌濯方新今得墓頤大似雞肋然四蜀衣冠之
郡宜煩禮樂之英在三蘇翰墨之場合着文章之
守尚念黎侯之晚賦無爲叔度之暮來千里之駒
原隰每懷於靡及九戔之鱗朝廷何患其不知某
夙託門朋連依鄰蔭豈料託子孫之契又將合郡
國之符綈袍戀戀願見故人步櫟村村久誇新尹
恐鞭其後俾營斜谷之木牛幸疾其驅式慰并州
之竹馬其爲忻幸罔旣敷宣

通徐架閣

天麟

隨冠蓋於京華昔焉託契主文書於几閣今乃爲
寮偶因越尊俎而代庖人之勞又可封府庫以待
將軍之至不容禮緩敢用書先恭惟某官南州高
士之家西園先生之子通介寧隨世俗不煩孟德
之疑名位豈肯卑微真符釋氏之送蔚然三館之
望已在八年之前誰令甲科亦補文學之掌故聊

復庚約即是翰林之主，其偶獲交，豈真成附驥
合而離離而合，詎知有聯事之期，同自異異自同
又當廣結交之句

通魏府判峽

李膺非昔自應陪澤畔之大夫，魏相有孫碩亦補
黔中之上佐，將託交龜之契，盍修致鯉之恭。恭惟
某官家本黃扉，心如白屋，風烈挺挺，稱故國之卅
臣，領袖堂堂，成外家之宅，相聞墳簞之伯仲，皆規
矩於高曾，白眉最良，黑頭必貴，願屈閣風之步，來
監巫水之州，此地之峻嶺崇岡，昔罕羣賢之至，同

坐之清風明月，近方別駕之添公，胡爲乎來哉！民
何修而得此，但恐傍觚稜之月，難久淹緹屏之星
不俟突黔，即迎泥紫，某一寒竊祿，再暑負丞，北山
久笑於驚猿，南岳忻迎於鳴鳳，半載之期，非遠尺
書，二月之文，暗願察來何暮之謠，及瓜而代，庶幾推
不去之令，以而行

通武岡權通判譚知錄良弼

湘濱試吏，綴寮案於元昆，黔郡轉丞，附交承於貴
介，既共飲玻璃之水，又並馳琬琰之山，託契良多
修辭敢後，恭惟某官，魯沂華也，震學高流，所謂傑

然摘領不難於取第式相好矣匹心尤

屈從樾蔭之清良見棣華之厚茲借糾曹之

隆監郡之權行矣章交亟其主觀某里閭晚出閤

閱早凋昨倚席之不才投閑乃分茲題輿之有命

佐治何走一規矩之陳前可容瓦石之在後友

一鄉之爭舊正賴於告新歌別駕之功今敢希於

勝昔

通李制機元龍

望太白於岷峨知登上佐辭石洪之瀍穀來託底
寮漫期飛逐於溟鴻敢耻弃餘之竹馬斐裁手畢

敬控心期恭惟某官飛輿隱鉉揆材良實大科異
等一翁二季之相望鉅典雄編三史六經之可亞
君陳父祖固存世績越公兒郎信有家風滿腹精
神燭照數計而龜卜撐腸文字日光玉潔而蛟翔
若爲碧落之功名淹此青油之談笑辟書薦墨一
飛皆可以冲天檄筆幙謀三進顧遲於及雷諒惟
中幄正借前籌斟酌損益必盡忠言治法征謀抑
有主出竊聞機筦徑即州麾君薄淮陽耶寧吏迂
朱幡之駕誰踰仲卿者會即趨丹掖之班某無挾
而窮不殖以落上青天而仰脅漢逢三峽之倒流

瞻白日於舉頭還望九門而却走偶丈翁剖符之
再駐許于思弃甲而復來舊政既幸於告新大事
又忻於從長豈無他人不如同姓後先兩託於交
承既見君子庶幾有臧蚤夜一期於規誨

通吳運幹

彬

登畿入幕濫同賓客之聯授印合符將託子孫之
契恐以我而爲簡敢修辭而立誠恭惟某官學業
醇明器資疑遠長鄉凌雲之氣入室何難與公擲
地之聲摩空有素自來歸於韶石謂徑上於瀛洲
顧煩上界之官更贊中部之漕駕輕車就夷路聊

養脩名入太學招諸生請觀近比某不堪索米又
復泛蓮敢圖解后之間適有交承之好隴西李博
與處者所敬惟賢河南吳公嘗學焉自今以始

通兩浙林運幹

良顯

湖船一笑夙傾解后之心冰幕同僚強附交承之
契望荀輿而來止飭竿牘而斐然恭惟某官秀出
三山譽騰四海摩空作賦能瘖萬馬之聲發策決
科卓踞六鼇之首采魯芹於泮水燃楚竹於清湘
藉末爲國子之先生亦合入文學之掌故顧屈清
廟之器來贊皇華之光飄氣凌雲肯久依於綠

水舉頭見日便應直上於青霄
亦折襪短絛濫巾
末屬偶然承乏遂供越俎之勞正爾失真久抱佩
環之愧屬聞行李之問道喜至捲書而欲狂江漢
以濯之豈但慰懷賢之渴草木吾味也庶幾安承
教之私

通潭州劉教授時可

祭孫寶之竈既竭吾財倚仲尼之墻此非子坐懷
哉解去賢者鼎來是雖期會之偶然強曰交承亦
可也恭惟某官學有源本行無瑕疵自題千佛之
姓名宜展三神之步武居官能大何嫌枳棘之棲

匪我求蒙思樂藻芹之采槃槃潭府萃萃楚材人
非生知之其必由學教亦多術矣先致其知道本
諸身士速哉肖舞雩沂水共觀夫子之循循發軔
天津即繼諸公之衮衮某強顏越俎矯首望塵佩
有若之環此難久假叱王尊之馭所冀疾驅

通善化盧縣丞補之


請隣祭竈不知枳棘之棲越俎代庖定匪竹松之
對懷哉解去賢者鼎來請從臭味之同試論踐更
之代恭惟某官曾蟠萬卷學綜九流人見千佛之
名經有垂誕者渠知一第之溷子真摘領然惟其

具大受之規模故不辭小官於山陰九年考績再
轉爲丞亟辭禹穴之雲煙來慰湘江之草木守經
据古寧肯破崖岸而爲文騰實飛聲會即登瀛洲
而入直某非據而據時行則行顛倒衣裳公豈嫌
於李下簞揚糠粃我真愧於盧前幸叱馭而疾驅
即裹章而送上子生孫孫生子且強負於交承余
負丞丞負余姑別容於商搢

梅亭先生四六標準卷之六

梅亭山標準

梅亭山人



合

內閣文庫			
書號	漢	11742	
冊數	19	4	
函裝	3	5	

梅亭先生四六標準卷之七

謝除授

內除

代魏兵部

丁翁

除編修檢討謝丞相

郎省真除叨綴夏官之屬史闡假寵仍紬東觀之
書曾微共二之材况冒兼三之寄一陶厚甚重拜
悚然竊以兵書之在史家近分四種文事之有武
備古號二塗故長槍大劍雖有毛錐之嘲而亂臣
賊子難免麟筆之懼欲兼美職宜屬全材如某者
見謂迂踈貌無操挾少徒志科名之苟得壯始知
事業之無窮頃因去蓬島之船甘回泛瞿唐之棹

既徧塵於藩閫亦游駕於輶軒州縣十七年詎曰
暮年之去國水陸八千里寧論千里而見王敢圖
三朝之會同煥蒙一札之收召義難俟駕禮合造
朝甫入覲於朶雲端進班於列宿載惟文昌之務
尤嚴武部之司蓋五材民並用之古無去兵之理
而多壘士之耻也今當整旅之時矧不崇朝之間
兼綴編年之職昔楊雄經歲餘之待詔僅試郎負
至韓愈願年老而著書尚辨史事蛙固難於語海
蛟詎可以負山恭惟某官柱石九筵權衡庶彙合
臯陶合稷契天知許國之心苦伊陟若巫賢人仰

傳家之學調十五載更絃之化收七十城憑軾之
功雖當百志之惟熙益思九德之咸事必欲與天
地以相似不容委人物以眇然猥挈孤蹤亦汚高
選某敢不勉思厥職惟既乃心乏姚崇奏決之材
恐空塵於戎部成魏收直筆之願當圖勉於策書
代鍾監丞

震

除祕書省著作佐郎謝丞相

涉筆膠庠正覺永哉之負濫竽冊府復叨儒者之
榮蛻凡骨於高明聳危肝而感激切以圖書之府
實通天上之星辰英雋所躔不受人間之風日未
能免俗何自爲郎左太冲之賦三都始求此職岑

文本之奏二頌六稱是官况黃道日月之明值紫
皇春秋之富鏘韶鈞而蔚虎鳳邁漢九流充棟宇
而汗馬牛過唐四庫職固隣於書蠹名亦近於郎
烏是爲清資宜擢素望伏念某楚狂一介鄭重半
生世科不補於遺餘家學僅安於淡泊三仕甘廣
文之冷若將終焉一朝拔從事之尤聊復爾耳敢
意大鈞之播真無鈍鑛之遺因其就湏入之章華
之以不次之擢籍田之芟載祚旣沐三重博士之
冗不治更榮再轉但欲乞治中而去詎敢窺廣內
之藏蓬弱風波敢望接三神之武藝藝鹽朝暮初無
送五鬼之文忽從米廩之間驟綴蘭臺之屬孰主
張是遂濟登茲伏遇某官命世真儒爽邦哲輔載
萬物以坤元之厚飪百度於鼎寶之和李贊皇五
十四歲而相君其年如父王文正一十八載之當
國惟德之符方宏翕受之規益廣旁招之路有憐
冗散亦玷超遷某敢不讀未見之書求多聞之友
總一百三家之略益深稽古之功撫五三載籍之
遺或上得賢之頌

代江淮陳制幹

韓

除監丞謝丞相

烏幕充貲方驟通於閭籍維工列屬更躡造於朝

紳不三閱月之期乃兩承天之寵感恩踰分拊已
增慙切惟國朝立法之至公人材循序而後進欲
其脫選必限以六考而舉以五貢至若轉丞非內
之列院則外之諸郡縱有特頒之殊渥亦難盡越
於常規蓋須得百年幾見之人乃可稱一歲九遷
之命詎容異數猥及凡材如某者稟質顓蒙賦材
迂滯蚤記教忠之訓未知造道之方摘句分章粗
耻空談而無用陳力就列豈敢大言以爲欺容貌
不能以勝衣智略何有於湊輻適吏主際中興之
運而遺黎懷內附之思遂令白面之書生往贊碧

幢之元帥雖戎政無能爲役然君命寧敢辭難齊
人歸疆正可閔離離之黍周行多士詎容伐坎坎
之檀敢圖稟議之來游沐超遷之寵甫離七階之
選遽參貳監之聯家人蓋有嚴君昔居是職癡兒
未了公事乃出此官旣材能不及於中庸又名實
未孚於上下挈提至此稱塞謂何恭惟某官命世
宗工奕邦碩輔積十五年秉鈞之績成七十城憑
軾之功謂明王立政惟人當廣開於塗轍而宰相
代天理物難純用於規繩將收度外之材用作邊
隅之氣必使蒙泉比以出姑爲買馬首之謀故略

等夷特加簡拔其敢不仰銜恩意退激懦衷拍心
誓報於寵靈臨事益思於忠力得人朝廷得人幕
下無愧石洪溫造之流遇我國士遇我衆人明辨
中行智伯之報

除國子錄謝丞相

金耀疋司愧乏主書之最璧流選屬叨升糾事之
聯非有清資而致然夫何素望之及此一陶厚甚
三省矍然切以化民成俗由學乎其來已古授業
傳道解惑也必惟其賢况風化之本原尤國人之
矜式雖居小職亦選鉅儒在元祐間實用張橫渠

之輩至紹聖末亦取游建安之流此豈庸虛所能
稱塞伏念某稟姿苦窳殖學踈蕪小人可以小知
無廣大高明之見大慙謂之大好乃瑣碎俳偶之
辭矧至四五十之無聞重感三千鍾之弗泊兩鬢
已雪百念皆冰敢意登畿獲齒莞庫陳人無用苟
安掌故之蹤名士滿前詎堪首善之職忽蒙分席
莫遂循墻有先達者爲之前尚恐後生之可畏占
小善者必以錄益知大播之無垠伏遇某官柱石
九筵權衡百度粉米山藻之色別繪以衮章鹽梅
水火之味殊飪之鼎寶雖當青衿刺學之後不替

緇衣好賢之心有鑒鯨魚之專俾致螟蛉之祝天
位與共天職是豈出王公之私人患好爲人師特
恐犯聖賢之戒某敢不益磨行檢加飭禮維懲創
孝先之晝眠追隨昌黎之晨入命汝教胄豈徒教
小技之文章匪我求蒙願勉求放心之學問

除國子錄謝執政

抱關金耀已汙掌故之科分席璜宮初乏知新之
學進非有德遷不以勞永言小善必錄之由全出
大鈞無垠之造所感厚甚無謝可乎切以太學風
化之本原其來已古大夫國人所矜式必立之師

故雖尾僚亦關首善道出義皇而過屈宋猶曰於
我何有哉文規姚姒而逮莊騷尚聞有笑于列者
不善螟蛉螺贏之祝寧無驪駒狗曲之嘲伏念某
學不知方仕未能信呻其佔畢缺師友之淵源著
之話言皆童孺之糠粃冒昧登畿之綬追隨篋庫
之家甲第梁肉之紛紛豈爲我設窮年膏油之兀
兀反教人爲敢意成均獲齒糾錄居然從國子先
生之後何以報王公大人之知伏遇某官該輔天
功奮庸人望收歛攻教恐驚馬有十駕之材搜攬
流離謂鱗魴皆之戩選亦旣招諸生而立館下

不嫌養萬鍾而教國心憐其役役之常課以循循之誘某敢不益磨行檢謹飭廉隅孝先晝眠正恐嘲師之無筭昌黎晨入詎應詰匠以爲楹

除國錄謝給舍臺諫

補文學掌故之官何心高位崇京師首善之化乃尾下僚是名清資非有素望躡進金闥之秩仍依璧水之流三省踈庸一何僥冒切以成均合國之子弟爰立之師簡書畏我之友朋必歸之錄官曹雖小職任不輕在元祐間則伊川橫渠其選至紹興後則建安龜山之流今雖乏人何爲至我伏念

某志雖語上材不逮中幼而學之亦欲垂竹帛之尺寸齒之長矣初未離溝瀆之尋常甘心此士之江湖絕意真人之官府敢意主文書於几閣又獲陪冠帶於橋門鄭虔無羶亦懼官長之罵邊韶有筭尚貽弟子之嘲碩敢招諸生以來前亦恃有仁人之在上伏遇某官綱維國論管攝文盟存先覺覺後之心推欲立立人之學雖當青衿挑闥之後不改緇衣館祭之誠念聖人之及萬民亦惟養士思君子之有三樂無若育材故宮商執爨之桐以規矩登場之木某敢不靖共爾位滌濯其心業精

于勤荒于嬉同當檢校學行之上言之次无願琢磨

除國錄謝葛祭酒

洪

掌故無文學之實正覺覩顏首善蓋風化之原猥容箝尾環顧其中未見可者先達之上爲之前焉忻然小官之不辭樂在君子之易事切以授業傳道解惑也既立之師同寅協恭和衷哉必率其屬思昔呂正獻長成均之日實舉張橫渠居正錄之官今茲尋墜緒之茫茫詎宜用餘子之碌碌阜螽草蟲非得其類奔蜂蠹蠹難奏爾庸如某者鹿鹿凡材魚魚末學賦資寒淺迷高明廣大之天淵涉

世坎艱多患難賤貧之日月漫焉未能信之仕事其不足畏之年茲由儿閣之文書躡綴橋門之冠帶出羲皇過屈宋猶曰儒術於我何有哉規姚姒逮莊騷尚聞諸生有笑于列者况無所挾何恃而前亦惟親大司函丈之間可以習小雅隸三之業伏遇某官以耆壽俊爲社稷臣天下之達尊三公難他遜君子之所教五帝曰汝諧資自治治人之準繩垂先覺覺後之桀獲天之高也星辰之遠也今幸立弟子之行陽以暴之江漢以濯之初何畏官長之罵某政不尊其瞻視審所步趨商財賄之

有無計班賢之崇庫返不謂矣觀道德於前後聽
教誨於左右願卒成之

除國錄回諸州

掌故金耀已愧曠竊首善璧流誤叨糾錄載省吹
噓之自一歸披拂之仁恭惟某官以欲立立人之心
推先覺覺後之學黼黻溝中之斷宮商爨下之焦
致茲一寒之蹤分此獨冷之席某未由面謝先辱
手牋有感輪囷無詞稱塞

除架閣謝丞相

十年出幕迷舊跡於新蹊一氣轉鈞納陳人於故

府拔之喧囂倥偬之役賦以棲遲偃仰之間蛻凡
骨以漸輕聳危肝而知感切以周九職之任既重
司書唐六典之分已存掌故至若版曹之籍專之
金耀之藏在昔時特曰堯庫之官至聖世則爲儲
材之地栽培拱把備震風凌雨之帡幪追琢璵璠
供方澤圓丘之琮璧豈應庸下偶玷選中伏念某
質竊無奇學落不殖少時磊隤尚抱風雲之壯懷
中歲蹉跎稍除湖海之豪氣漫焉未能信之仕已
是不足畏之年生辰挹斗而揚箕竟失餘而得少
奴星結柳而送鬼柰驅去以復還周行萬里之關

山復累一陶之坯冶馬伏轅而蜷局直爲仰秣之
謀燕巢幕以差池猥沐捲簾之顧南宮攷藝濫廁
使令東閣望塵曾微懇禱忽使接紳綏之武遽令
司几閣之文蠅頭牛腰姑備朝廷之遺忘鼠牙雀
角僅防吏胥之謾欺白日青春了無公事黃簾綠
幕宛是儒生非大鈞妙播物之仁則小人無得與
之理茲蓋伏遇某官經邦碩德濟世元勲竊窺堯
舜君民之心豈數韋平父子之業寶鼎九廟以衣
裳之會金城四方於樽俎之前元齡入相二十三
年求賢則如一日吉甫薦士三千餘輩流澤蓋在

異時顧慙孤賤之蹤亦綴收羅之數某敢不溫尋
宿學討理初心商財賄計班貲恐孤德懋懋官之
意厲廉耻行禮義圖報先覺覺後之恩

除架閣謝五府臺諫侍從

賓冰漕之筵正虞誦滿主地官之度猥玷恩除有

憐軟掌之勞少佚筋骸之束此大鈞

侍從大造

妙播物

之巧然小人有乘器之慚切惟周設司書旣任版
圖之職漢立掌故實崇文學之流馴至皇朝率儲
清望元豐設庫已重此官紹興正名益艱其選况
三司併歸民曹之後以獨負專庀金耀之藏英俊

聚于闕庭多由此出文書盈于几閣初不爾煩士
當利吾器以俟時上亦慨其根而食實詎容瓠落
獲預茹連伏念某意廣才踈名浮味薄韓子四十
八以後轉負初心柳侯五六從以來無爲朝士矧
可憎之面目仍不利於走趨從軍無分寸之功失
勢幾千丈之落燕巢于幕固非丹穴之羽毛蛙拘
於壚亦豈青冥之脚手孰爲之地有隕自天拔之
輶軒咨度之餘付以按牘文書之寄開門羅雀得
鼯鼠不食之倉充棟汗牛皆鴈鷺所籍之紙或容
暇日稍理陳編此流俗所謂寂寞之濱而愚儒則
爲藏修之計伏遇樞密弼諧兵柄參輔政機強本
朝以折千里之衝舉明主以建萬世之策綢繆牖
戶收义負偃植之材絺繡衣裳辨藻火黼黻之色
肆令謏聞之士亦入旁招之儲某敢不跼伏寬閑
溫尋廢忘歐永叔之辨曲直或得於陳按之觀魏
弱翁之條便宜亦願助故事之奏

代陳架閣

登

謝丞相

贊使指於計臺曾微素望主吏文於民部猥玷清
流未論分寸之躋攀且遂斗升之饒嚼少安三公
實感一陶惟天朝嚴法令之藏不遺片紙而地官

專版圖之掌又異他曹凡財貨之本末源流與夫
家之施舍戒令悉從閣東特設司存故凡守金耀
之明多以儲玉班之彥汗牛充棟雖同鴈鷺之生
涯待兔守株或綴鴛鸞之步武欲諧衆口必取譽
髦如某者才不瘠人學徒是古崎嶇一第志其目
而中眉奔走四方困於心而衡慮亦念聖賢之所
立底須爵位而後傳彼正已而不求於人此言何
謂然居下而不獲於上吾道難行冒焉爲東閣之
選志在便南陔之養索長安之米衆固擲掄對昆
明之荷再逢搖落敢意篤豚魚之信不肯遺蟣蝨

之微竟挈陳人俾滂故府雀角鼠牙之案牘善而
藏之牛溲馬渤之階梯庶其在此伏遇某官乾坤
間氣社稷世臣寸心結人主之知一力任天下之
重使宅百揆久著經邦論道之功茲惟三孤始膺
貳公洪化之寄文武萬邦而爲憲精神千里而折
衝章章已見於歸疆汲汲不忘於求士殆欲市燕
人之駿故先揖越國之蛙知某親老家貧難以待
三年之艾憐某身勤事左無使虧一簣之山姑令
守几閣之文書庶或備朝廷之遺忘某敢不靖共
爾位增益未能芽甲根荄固已累洪鈞之一氣猥

闌店楔尚希託廣厦之萬間

代舒架閣祐除藉田令謝丞相

故府抱書安分百僚之底新畬載耜庀司千畝之
間絲綸始拜於王言耕鑿詎忘於帝力頂踵出生
成之造肺肝深銘鏤之私竊惟周立甸師漢爲田
令中古不常於廢置本朝獨厚於優崇端拱親耕
猶附九農正之本元祐著令已班五監簿之前用
爲羽儀湏清流而後畀取諸閥閱必素望之已高
如某者學旣紕糠才尤蕪穢早荒家訓不自策力
田之科晚藉世資乃就食代耕之祿一官漫尉再

轉負丞會逢除吏八百之恩偶玷筦庫七十之數
心雖同於白水夢不到於青雲適金耀之虛負濫
角巾而承乏小人屬饜食而已旣慙地位之高大鈞
塊北無垠更陟天田之峻東吏文於高閣習容典
於曲臺矧當大亨之丁辰聿嚴裸鬯其在先農之
乙地正給粢盛使之參保介之間于以聞籩豆之
事漸階閨籍可齒朝紳載祚載芟何敢耻有道之
穀不稼不穡所愧取無功之禾伏遇某官柱石九
筵權衡百辟明堂以序五位適觀四海之會同少
保茲惟三孤實任兩儀之寅亮謂臺閣之儀正湏

子弟庶宗廟之器可交神明不歲八窻四達之儀式講三公五推之典肆令駑鈍猥備駿奔某敢不滌濯其心靖共爾位誕后稷之稼有相當益虔晨正之司帥甸師之屬而耕尚終託天官之造

代舒架閣除藉田令謝五府侍從

故府綴負粗謹吏文之守容臺列屬叨陞帝藉之司跼綸綍之王言齒簪紳於京秩寵踰望表愧溢情涯惟漢家田令之官實周制甸師之職歷代不常於廢置本朝獨厚於優崇元祐定班蓋在五監簿之上端拱歲事猶附九農正之中馴至中興始

歸宗伯禮樂以俟君子惟寅又欲其惟清籩豆則有司存弗仕則幾於弗問豈圖庸下偶玷選中如某者

同前謝丞相啓

伏遇某官當世真儒斯民先

覺文武爲萬邦之憲精神折千里之衝朝夕輔台有猷必告于我后夙夜基命不戰可屈於人兵方將厚鹽梅麴蘖之功諒必廣芝木參苓之蓄肆令駑鈍猥效駿奔某敢不欽乃攸司修其可願八政一食勤身敢怠於共盥三公五推拭目尚觀於載

耜

代范文思

應銓

謝史丞相

試邑三年之民庸之善狀入京一月玷工尹之異
除身未登光範之門夢非到文石之陛非求而得
何德以堪竊以半面之異孟嘉非相求於未面一
言而得駿蔑亦幾失於無言次焉須左右之與言褒
否則出公卿之論薦今者絕蚍蜉之援驟而綴鶴
鷺之行是爲特達之知未有報酬之計伏念其一
愚自信三仕無庸初隱弓刀不敢學上書之尉繼
逃麴蘖偶叨舉筦庫之家當父母喜懼之年效子
男附庸之役取田疇而伍早知有殺之之歌聞弦
歌之聲晚乃多莞爾之笑偶成善罷能安有去思身

未可以許人仕有時乎爲養已干小宰題治中別
駕之輿敢問大鈞錄時文思索之量誰實吹噓而
送上遽蒙摸索於暗中天生五材古豈容於一闕
國有六職今未廢於百工然宮室苑囿之無增且
律度量衡之已正惟服食器用間屬尚方在梓匠
輪輿率多居肆是雖虛轄蓋得實材猶泥猶金固
豈逃於陶冶不稼不穡果胡取於困墨雖銜郊翼
肉骨之恩實負血指汗顏之愧茲蓋伏遇某官鹽
梅家學袞冕出臣一柱擎天獨扶千萬間之廣廈
三槐蔭地詎數十八載之中書每翕受以敷施務

兼收而並蓄惟是其所非非其所是既杜閉羣枉之門故求者不予予者不求以恢洪志士之氣某敢不仰思識拔誓竭糜捐赤水無心詎敢作還珠之語白雲在目願終怜負米之情

代衛運幹

樸

除太社令謝丞相

計幕終更方俟通班之命容臺置屬遽叨司社之除非鈞播之無垠知爨餘之必弃恩淪骨髓感鏤肺肝切惟太祝奉禮之攸司實與正字校書而相埒禮樂自天子出義先郊社之明邊豆則有司存職在典章之習非取簪紳之素望必先闕閱之清

流庶存子諒之心克贊寅清之職詎應庸下遽玷選中伏念某累舉無成孤蹤何取三仕庇身於內幕無足策名一官主畫於外臺僅知守法惟是日畿之奔走實多風浪之侵陵獨憑郊翼之恩曲全羈迹盡出齒牙之賜遂足薦章既可脫離選調之灘便使屬厭食小人之腹適值糟糠之在褥小稽松菊之迎門除書有隕以自天愧汗滂流而至地身如病鶴詎容陪鵷鷺之行技止黔馿何足玷麒麟之楨此大丞相所謂采葑之意在小丈夫則懷據疾之慚摩頂放踵而知恩糜骨捐軀而難報伏遇

某官棟桴九廟坯冶萬殊少保茲惟三孤獨任兩儀之寅亮氛宰掌建六典並收四海之賢能惟俊又宜在於旁招何巧拙亦容於雜進曲念一門之父子甚如異姓之弟兄輔翼之振德之不遺餘力吹噓是披拂是倍費元功憐某在伯仲之間獨補選階之冗恐某試子男之邑未閑吏道之師必令致曲以有成不忍徑麾之使去天生地育尚難回霜雪之餘嶽峻海深何嘗假涓塵之助受知如此揣分謂何某敢不退省內愆甘求外補成終成始得蒙亟屏之四方使過使功猶願少殫於一得

代董惠州

居誼

除鼓院謝丞相

負丞支郡冒分千里之符承命本朝俾典四方之軌恩逾望外愧溢情涯切惟聖王量能授官寧無差擇君子居易俟命惟有靖共傳明戒於鄙夫史大書於巧宦苟睥睨孔鸞之集皆覬覦雞犬之僊材固難全官亦有限牛溲馬渤雖待用於醫師虫臂鼠肝盍冥心於造化如某者材真樗散性實棗昏科名不補於遺餘塵俗敢辭於抗走楚萍試邑僅逃製錦之傷古枯佐州濫竊代庖之譽冒然乘障許以造朝既得郡於南交漸理裝而西返常鱗

凡介之儔匹自分泥沙雙鳬乘鴈之去來何心渤
澥碩惟推鈍乃辱甄收其求士甚士之求公寥寥
斯道不即人而人自即我愧愧此恩伏遇某官忠
結主知道先民覺大鈞播物惟隨器以剴裁直柄
當權肯徇情而俯仰察某之蟻子之援知某無鵠
炙之求特使啞鍾入司路鼓爰鵬聞樂不勝疑駭
之情罔象得珠殆匪經營之力某敢不仰承殊渥
勉策孤蹤守虎豹之關無使君門之壅達玃豚之
訟必思民瘼之通

代回鄒泉州賀新除

應龍

夏辟三千參聯弗績冬官六十攝長何庸非幘幘
實免其震凌則川藪密藏其汙疾恭惟某官儒者
給事王之蓋臣海水數弄明月珠茲亦奇矣曉漏
追隨青瑣闥誰其似之曲爲蟠木之容未許槁梧
之暝然以挂冠之歲月居然曳履於星辰恐嘖人
言誰併予美欲乞骸骨而去更借齒牙之餘某視
蔭可驚託根自喜望崦嵫而勿迫漸爲歷吉日之
謀驅豐隆以寄聲敢致登閭風之祝

代回諸路賀新除

旅小宰之班深慚久假渙大昕之號猥遂爲真雖

參筆豪之華實懼瓶罍之溢未遑推謝先辱飛牋
鏘然韶鈞杳默咸池之奏粲若藻火扶持夜燎之
光徒深篋衍之藏莫效檐榆之報

代回衆官賀新除

攝事貳卿閱時無補蒙恩進律滿歲爲真曾巽謝
之未遑辱謙撫之先及燁然駢麗寵比畸涼牘制
有嚴不克視施而爲報襟期甚厚惟當永矢以勿
諉

梅亭先生四六標準卷之七

梅亭先生四六標準卷之八

謝除授外任

代潭州鄒帥 應龍 謝丞相

守藩離水莫奏膚公分閩湘流又承嘉惠仍進璧
奎之直益華翼軫之旁知勤洪造之甄陶敢廢小
夫之竿牘恭惟某官乾坤間氣社稷世臣一日萬
機殫輔贊弥縫之力九州四海知親附鎮撫之心
故齊人章又有侵疆之歸而魏地糾又方樂郊之
適非用儒無敵於天下何不戰可屈於人兵惟公
克成厥終永息四夷之警俾予從欲以治允爲萬

世之功况方中二十四考之書詎容專五三六經之美某以違東閣幸宅南交徒以奉萱草之親難於戀梅花之外所祈便養徑歸綿上之田亦欲投閑稍養漳濱之疾豈意大鈞之塊北復容小袖之回旋爵祿兩崇敢但襲荆潭之唱和中和並布庶無傷衡嶽之扶輿

除成都漕到任謝史丞相

伏以再命典州愧偏城之玩愒六條遣使玷本道之轉輸不由推轂之功全出轉鈞之賜恩隆頂踵感激肺肝竊以益部夙繫使星星詎知其隕石成

都舊稱陸海海鳥料其揚塵蓋自利路之荒殘尋至潼川之剽掠督責惟深於西道邠勞良慘於北山巧婦尸之尚難責無麪之餅老農墮其若為取不稼之禾伏念某多病不材至愚極陋少年躁妄夏蟲語冰而不知中歲險艱吳牛見月以猶喘進既乏大雞之效退已孤鷗鷺之盟天宇浮眉尚青眼逢迎之舊雪山到面驚白頭彼此之新比聞驪駕之虛大有鸚書之薦蜀人題柱頗榮弩矢之前駟吳客思尊恐負樵蘇之後爨駭采封於下舛孰蟠木之先客人則擇官官則擇人上恩異其用者

不才才者不用外議謂何此蓋伏遇某官柱石九
筵權衡六幕恩帝載使宅百揆燮和歷二紀之間
立太傅茲惟三公辭遜閱十年之久蓋欲復文武
之境然後受周畢之封帝王出萬全率由先正
典之式春秋大一統迄還寧久有指之疆率土莫
非王臣皇天既中中國始由孤棘出正韻槐窺於
我如浮雲之心豈貪富貴有迨天未陰雨之責尚
克綢繆眷言黑水之惟梁正審青天之轉粟飛芻
既急刻楮尤艱知其熟魚鳧之游念其無蚍蜉之
援特加識察俾效馳驅某敢不思廣咨諏力圖任
負三十鍾致一石無敢辭難百畝分食九人亦當
加念惟知黽勉皇恤驚庸流馬木牛僅可息民而
休士豢龜籠鶴終希置散以投閑

除成都漕謝政府

連四千石之任茂聞蜀郡之歌餽十萬竈之屯仍
玷益州之分由支郡馳駟於本路恐短材弊孽於
長塗令先甲以惟行命重申而莫避竊以雲門陸
澤夙稱要害之膏腴石棧天梯素忌吮磨之牙血
六步七伐周不愆於庸蜀十鍾一石漢實散於西
南兵不寓農今益異古三逢單闕之歲壹無強禦

之人萬夫莫當之劍關跋跋奔走五百餘里之石
穴綽綽去來戰不因糧敗必仇餉剋心醫眼忍能
閉眼而不醫推髓剥膚安有曼膚之可剥此際把
天隅之繡何術流地上之錢伏念某不材之人無
用於世教胄乏祝嘏之效監州無展驥之功三暑
棘侯分終身之不齒一寒庀屋甘俛目以爲眉未
能消愁嘆之聲更異玷禮樂之遣依蓮而泛綠水
况當傍籌邊之樓轉粟而上青天又可訪支機之
石然造幣則刻楮難於刻玉調夫則鑄人重於鑄
金刈葵已覺其傷根緩步又難於拯溺跋胡蹙尾

劇目鉢心昧於一來瞠若四顧恭惟某官基命兩
社棟國九筵太微三光風霆閔流形之用洪鈞一
氣雨露無甘苦之分己欲立而立人道先覺以覺
後謂江漢朝宗于海必導岷而導嶓當荆益跨有
之時欲保吳則保蜀重載必歸於牛負畏塗何止
於鳥飛雲深怜滴博之邊冰解思先零之漕乾矣
嘆矣遇人之艱難矣輔之翼之又從而振德之某
敢不盡力鞠躬愛人節用安危之意注將相使臣
弗敢與聞錢穀之問至廟堂君子惟能通志

除成都漕謝侍從

無中和之歌轉上聞於太學有禮樂之雅獲下拜
於少城十年出幕之孤鴻萬里題橋之駟馬超迁
寵甚稱塞關然靖循表選之由定出裏言之賜竊
以收蜀而給轉漕史稱蕭何之功諭巴以擅運輸
文見相如之檄非天府前腴而後瘠殆雪山昔重
而今輕萬甕萬牛窘韋臯之去鎮一琴一鶴欠清
獻之乘輅况從漢棧之囂闐不見秦兵之耐戰益
州疲敝民不聊生劒閣崢嶸君誰與守飛鳥挑虫
當亟徵於後患木牛流馬詎宜付之庸人如某者
志本熊熊才終鹿鹿蒲頭素髮意本蕭條眯目黃

塵法當憔悴進猗於館下以冗見治希驥足於
治中無才可展火燄生於兩角月影轉於半輪雖
游擁於雙旌悄無聞於五袴適承驪駕之缺驟蒙
龍節之盼來者不子而子者不待求此恩厚甚食
以足兵而兵不足於食茲事奈何冒哀籲而弗回
恐顛隲之難免茲蓋伏遇某官國之元氣學者泰
山倦二先天下之憂卓卓得聖人之任論思獻納
精神折千里之衝取度詢謀採訪十道遴之選萬
里東溟之隅導江河以朝漢十年北風之涼閔岷
峨之悽愴行二且止避御史難麻并以捫參皇二

者華遣使臣且翕箕而挹斗某敢不問民疾苦察
吏否藏寧損食以節衣無剥廬而豐屋成蓬婆之
雪謹操蘇武之節旄跂織女之星徐問張騫之石機

徐成都漕謝檢正都司

分江鄉之符偶綴益州之分出澤國之節就令周
道之馳輕孤熟路之車大乏生財之道循墻莫避
叱馭知慚竊以中和布宣金馬亦煩於遣使疲敝
危急木牛尚困於餽師蓋著十餘鍾一石之輸頗
仰三百萬斛穀之糴比既失丘山之暴二乃專責
原隰之皇二琴鶴清規或又似劈琴而焚鶴繭絲

拙計今不待成繭而取絲委之驚庸何以黽勉伏
念某秉心抗直涉世迂踈綿力薄材位合居於人
下虛悲空警憂乃犯於衆先甘以狂愚老於廢棄
慨一寒之去國驚十暑之浮家晨入太學而招諸
生投閑乃分夜發清溪而向三峽假守非才方弄
月於峨眉濠觀風於海眼誦詩授政敢曰使四方
而不能咨難為謀是當拜五害以求獲此蓋伏遇

檢正

司存雨露身逼雲霄

檢詳

彌綸省闈弼亮廟廊

編修

司存雨露感會風雲

詳定

燮和帝載翊贊天樞

左右

身為國史君舉必書推轂多有味之言蒙霧

不知之潤謂吳蜀相約唇齒當廣咨諏得信布以
任爪牙亦資餽餉有可福虛危之次諒多憚參井
之捫病駒弗稱於文羈老馬或諳於故路藐然外
服假以裏言乘白露以采葭俾青天之轉粟某敢
不愛人節用盡力鞠躬勉千里之羸糧甘三年之
刻楮然公車實無希於暮召任錦城能不願於早
還四牡還歸而苞栩載飛且謹成西山之雪萬象
皆春面孤槎自客何因近南斗之星

除成都漕謝李制置

守江鄉之符正慙玩惕出澤國之節濫備將輸亟

控需章異回渙汗茲奉大元帥之承制必欲小行
人之疾驅冒昧滌紅凌兢布白伏念某百無操挾
獨有迂踈學無所成空敝精神於蹇淺仕未能信
僅存肝膽之輪囷立館下招諸生一鳴輒斥坐堂
上稱太守再鼓已衰獨感吾選韓厥之知皇顧孰
殺子產之怨止湏書考力乞投閑敢圖清朝驟畀
漕事惟成都夙稱陸海海已近於揚塵而益部舊
號使星星今同於隕石熬波無潤刻楮難成百畝
食九人寧忍奪金於白晝十鍾致一石尤難轉粟
於青天此豈庸奴所能黽勉聞將軍之令不聞天

子之詔敢不膝行急觀察於賦與急刺史於民尚
祈指教恭惟某官識弘且毅氣直以方學廣而聞
多才全而業鉅光猗蘭之葉世載其英勁前茅之
摧帝嘉乃績受任危難之際折衝談笑之間夷虜
膽寒士民心服薦吳起薦西門豹悉送吹噓咨向
寵咨郭攸之尤加摸索有如整饬亦俾驅馳某敢
不恪奉六條圖拜五善維駒維騏維駟維駘敢自
怠於鞭笞我任我輦我車我牛願少寬於轡策其
為頌俟罔既敷宣

謝黃制副賀除成都漕

某受容察於偏城正虞謫滿界將輸於一道安得
誤除知必出於流言廼遽蒙於往記蠅雖貪於附
驥犬不足以續貂使萬一如傳聞當再三而懇避
區區之懇續續以陳比羞頰繁其愧施輕而報重
茲奉竿牘不覺情過而禮踰百感稠重尺牋勃率
亟具申稟仰乞丙原

謝順慶李知府賀除成都漕

某蕭然塵土殊乏郡庸聞之道塗謂有使命知流
言之難信省孤跡之不堪正使誤除亦當請免敢
圖采聽便辱品題某有感歟揚實無被受不稼蔑

取禾之理負乘惟致寇之憂先布尺牋少攄寸悃
嗣規申控敢幸內原

代羅制機

壘

改除太守謝史丞相

假守漢源冒控陳情之請改麾晉嶺實諧便養之
諸寬庭闡萬里之懷出坯冶一陶之力福如天而
徼受感無地以寄言伏念某殖學疎蕪賦材蹇淺
詩書門戶所求無忝於父兄塵土簪裳其實徒勞
於州縣倚閩山而製邑攀蜀道以籌邊過灩澦百
牢之関甚安蓮幕叱叩徠九折之坂忽冒竹符惟
此沈黎界在雪嶺綏懷六詔安有竒功荏苒二年

僅無乏事起家至二千石萬有餘榮倚門有九十
親一則以懼敢謂洪鈞之轉復容畫戟之森許叩
笏之還轅拍衡湘而易組蓋范史之傳循吏僅十
數人如桂陽之有治聲乃二三輩尚詭圖於後效
期力企於前修有民人焉有社稷焉姑俟及瓜之
成熟主張是孰綱維是俾全啜菽之驩揆厥所元
亶知其自恭惟某官名垂宇宙力負乾坤作室而
歆子肯堂有偉相門之相若金而用汝作礪是維
功令之功談笑却萊人之兵咎係制單于之命陰
陽和而在內附何難外撫於四夷上下交而其志

同尤欲曲成於萬物故知椎鈍亦預甄收某敢不
刻骨藏恩指心誓報乃瞻衡宇快林鳥反哺之情
當走京師窺槐龍額面之拜

代董通判

居誼

除知惠州謝丞相

佐州東輔偶計日以合符乞郡南荒忽何天之從
欲雖云小壘亦出大鈞請裁狂簡之章少荅生成
之造伏念某蠢書淺學鴈塔末科自役俗吏之塵
始習癡兒之了依蓮何有薦屢剡於公車種秫既
登政偶安於田里冒昧題輿之座聊息吾黥解后
越俎之庖偶調衆口煩需章之交上冀渙渥之留

中人豈不自知耶小才未容於大用仕者行其義
也分憂亦所以近君輒從五嶺之間乞乘一障而
去蹉蹉儀鳳鵠自分於退飛跼跼爲馬何辭於
後殿鵝城駟大鯨穴淵深飽惠州之飯讀淵明之
詩茲亦奇矣使渤海之民沾宣帝之化所願學焉
恭惟某官佐王經邦量能授職雖馬渤牛溲兼收
並蓄何所不容然蠅營苟苟驅去復來奚其爲政
凡千內補悉與外除求仁得仁我則異於是以德
報德公其許之歟某尚遠戍期敢忘政學一麾乃出
守孰非大丞相之恩庶民所以安願課良刺史之效

除武岡通判謝丞相

散人細蒲干續食於本朝宰物曲成特轉丞於支
郡詎能希展足之驥賴未廢病賴之駒愧溢情顏
感踰分願伏念某平沉庸俗全抱拙疎骨相既屯
乏雲雷經綸之學丘園自責非河漢黼黻之文猥
蒙養士之仁濫綴教胄之屬經筵之嘲未發謗篋
之惡已盈先生學雖勤言雖多譽難酬毀相國禮
之過知之至罪上從疑俾奉叢祠實爲寬典掘雲
而破嶺嶠歸尋黃獨之苗乘月而弄潺湲飽飲紅
泉之水倏三周於歲籥冒一問於化甄茲蒙天恩

俾貳斗壘都梁樂土巫水舊嶠崇寧拔縣而升軍
甫百餘歲嘉定握僉而置倅方一二貢及瓜之戍
雖遙種漆之謀有待威爲龍蛇思爲赤子當贊郡
條小不虺蜮大不鯨鯢仰憑國力恭惟某官得聖
之任爲帝者師父子繼世三公邁史丹仕漢朝之
績明良慶會六字紹越王輔 孝廟之勲益梅水
火鼎寶惟和粉米締繡衮章亦別存竹頭於舸艦
拾桐尾而宮商念推鉞之無他嘆陸沈之已久日
月出矣時雨降矣將令萬物之得宜江漢濯之秋
陽暴之寧忍匹夫之不獲因其素出於門下使之

姑試於治中某敢不滌濯其心靖共爾位思稱屏
星之重圖爲杯水之消魚尾旣頽詎敢急斗升於
東海烏頭可白儻或憐三匝於南枝

除武岡通判謝宣參政

續

祝釐秩滿千續食於大釣宥過恩深俾轉丞於小
壘得逾券外愧溢情涯伏念某全蹈拙疎見謂庸
俗乾愁漫解初非了事之癡虛警空悲直坐信書
之誤偶蒙光範擢糾成均韓愈之赤箭之材徒勞
晨入鄭虔荒蒼苔之屋端合早歸獲領叢祠允爲
寬典青精可飯居然之大藥之資黃獨無苗聊爾

託長鑱之寄三年于此百念蕭然誰爲推轂之言
忽有題輿之命青袍朝士之最困遽借牙緋黃紙
除書之無名特加齒錄雖尚俟數年之成亦強名
半刺之官伏遇某官弼亮天功辨章人物贊一氣
洪鈞之橐籥覃萬間廣廈之帡幪天地爲鑪造化
爲工力扶公道江漢以濯秋陽以暴洞見物情閔
其嘗誨館下之諸生使之姑試治中之別駕初無
驥足之可展姑見牛溲之不遺某敢不銘骨鏤心
洗腸滌胃七年之病三年之艾未容急祿以代耕
百畝之田五畝之桑且合力農而報國

除武岡通判謝葛僉書

洪

奉祠秩滿學士祿於天朝起廢恩深轉爲丞於斗壘自匪推當時之轂何由題仲舉之輿拜渥自天
歸恩有地伏念某材真無似命亦不猶冀壤孤豚
初豈願犧於太廟榆枋斥鷃抑難附鳳於高岡與
能藏畔以自埋猥取入朝之見嫉館下之誨言未
既粗免嘲師臺中之評以爲傾渠能原毀兩年雲
卧百念冰消負米爲身飽只增於多感析薪無子
賤亦覺其有涯任諸公臺省之登甘此士江湖之
落獨嘗侍夫子之履舄頗辱知小人之肺肝方通

國稱康章之非乃逢人說項斯之

言一已件於

已况受殊知身未可以許人詎容弗許伏遇某官
四朝元老一代真儒自治治人所學皆周孔之學
先覺覺後斯民即堯舜之民從容取日於虞淵談
笑作霖於商野耆壽俊在服精神真足以折衝救
寧武固功夙夜密陪於基命獨念江濤之如此深
思人物之眇然與其倚信於詐忠不若收羅於賢
直留何蕃於太學昔誰從祭酒之言處士元以治
中今端出將軍之力有感在此無謝得乎某敢不
銘鏤殊私激昂晚節上忍飢而待虀無乞酒以厭

乃辱綴太常之屬亟令脫小宰之銓計校平生擢
髮固難於數罪躋攀分寸吹毛宜速於求疵牽牛
自分於奪牛失馬敢期於得馬適嚴君之引疾從
神圉而祝釐懷眷亦庭闈之情欲甘啜菽願出宰
山水之縣少俟及瓜忽蒙一陶之仁超墜半刺之
任宜春多勝蓋具見韓昌黎之詩尔袁得賢亦足
考李泰伯之記詎應伐輻猥玷題輿拔之沸湯烈
火之中分以清風明月之寄子來幾日我有二天
伏遇某官心契禹臯道侔伊呂書汾陽二十四考
事方半於古人取河朔一百餘州功已高於今日

璇璣密運而屢躋豐稔寶玉來歸而重見泰平時
惟萬世永賴之功尚恥一夫不被其澤老老幼幼
皆重費於保全子子孫孫將若爲而報稱某敢不
銘恩鏤膺圖報誓心肉骨之勿翼之可坐湏於泥
軾吹噓是披拂是尚終托於化爐

除兩浙運幹謝丞相

掃門執贄冒干相國之知得闕登畿俾贊使家之
畫免待及瓜之次足寬索米之憂頓令小人之屬
饜實感大鈞之塊北伏念某學落不殖器窳無奇
一科玷鄉老之賓三仕作諸侯之客鉢心摧胃僅

來始逃僉擬似若取禾於不稼然當肯播於厥畝
如某者百拙無堪一愚自信耻襲懷綳之簪笏妄
希弓冶之箕裘豈知下俚之音不中儀曹之度能
門有矜式也獨無公貺之科有司豈枉我哉姑利
齊生之器欲返邯鄲之步更爲湘水之行適是親
闈旣移他鎮姑求筦庫之節以慰倚門之思敢意
甄收曲加器使猥從新府復得舊除畫棟朝雲此
非吾事短檠夜雨姑與心謀不勞奔走於顏行賸
可周旋於膝下碧幢整暇更無可奉之文書綵服
雍容此外何求於造化茲蓋伏遇某言道先民覺

漿不利走趨梅福難班於文石尚能拜起李臯願
躋於武岡

代衛太社

撰

除袁州通判謝丞相

徵恩改秩誼難社下之留乞闕養親許待治中之
次川藪密藏其汙疾幘幪曲免其震凌終始生成
後先超躡全出大鈞塊圯之造請陳小子狂簡之
章伏念某天巧素慳地寒寡挾父書是讀願載續
於世科門蔭可羞空屢偕於計吏崎嶇三仕蹉跎
七階獨蒙公相之憫憐不翅子姪之覆育燕巢于
幕方欣得近於樓臺魚潛在淵敢望上汙於池沼



梅亭四六標準

內閣文庫			
漢書	特四十二類	一七四二號	一九冊

合

內閣文庫			
書號	漢	11742	
冊數		19 (5)	
品號	四	3	5

梅亭先生四六標準卷之九

謝辟置

再辟制幹入蜀謝丞相

遮日而走長安幾穿破履登天而攀蜀道忽得舊
羶知塊土之無垠難趲趲而不進輒修贄見併吐
謝衷伏念某骯髒亡竒睢盱有志一科不補隨身
溝瀆之尋常萬物皆塵妄意簡編之尺寸繇頃年
之從辟抵中道而遭艱跨海涉湖痛尤未定捫參
歷井夢不敢尋故因祥除甘就部闕適於西清之
衆論許爲東閣而一言遂令索米之人或動乞漿

之興礪礪而售乾璞誰適爲容翹材以待大材汝
非所及猶賴益州之元德尚思吳下之阿蒙羅而
致之兆足行矣幾葬魚腹固嘗回孝子之車又過
羊腸益合叱忠臣之馭切聞殿西之顧頗及雲南
之師要是四蜀之可憂殆匪一端而遽止雖托重
固在詩書之帥然拔尤宜得文武之才置諸鄒枚
之間蓋有禕允之任豈應庸下可在選中伏遇某
官身佩安危功存開濟獨揮九日再爲天地以立
心八荒一雲復令山澤之通氣行政如彼其久樂
不存焉當今捨我其誰聖之任也粵從更化專務

調元三階旣平元首有股肱之喜五胡方擾中國
無疥癬之憂然欲折千里之衝是必開衆正之路
得人朝廷得人幕下寧有重輕誠死城郭誠死封
疆要加儲養如有所試俾勉此行某敢不體認一
陶攀緣九折堪其事者謂之力藉莫酬相國之知
遠而使之觀其忠詎敢作衆人之報

謝董制置

居誼

辟充成都撫幹

簿領抗塵自分湘濱之憔悴帥幢辟屬許令蜀道
之攀緣初無待於懇祈便力爲之振拔請裁四六
少謝萬分切觀我宋帥蜀之臣無若後趙前張之

忠定之薦辟必方廉恬退之人清獻之奏惕皆
鯁敢言之士欲濟其美在簡乃僚伏念某殖學
不豐聞道尤淺休於爲養強營三釜之謀拙不適
時竟墮一科之底謂屠龍之可學又畫虎之不成
孫寶安得自高且棲矮屋王珣能令公喜偶傍轅
門其實出朱入墨之材終非泛綠依紅之器駭從
臣之出牧拍尊選以見招我猶未免鄉人固應累
陶鎔之造翁真善幹國事何至須斗筭之材聞已
戕閭闔之風欲共泛瞿塘之水成都萬事好每歌
誰能委珪幣之詩長沙千里平恐發忍著主衣裳

之笑進退維谷偃僂循墻及見文移不容控避鮑
叔真能知我他復誰知政身未可許人盍爲公許
恭惟某官含弘光大明允篤誠親結冕旒進儀筆
橐晝日三接而天心默契終歲九迂而人望尚奢
一節使燕言面無幾微之見三刀夢益氣色歸號
令之明欲擇幙賓必先朝彥况幾兩幾駟而出定
多驥尾之攀何一琴一龜之餘亦取鶴翎之短以
識字有數爲敏贍淹該之學以多言數窮爲貫穿
通達之材自視歉然公言過矣然已入朝取良馬
之數難更作夕避長蛇之疑某敢不澡雪此心鞭

磨所學銘諸肺腑惟國士遇之國士報之借以齒
牙乃執事事也執事責也縱使盡無用於世亦將
求不辱其門舉李生何辭當謹佩愛直之贈爲董
公從事豈但陪合樂之嬉

代趙主簿

希坡

謝衛參帥辟撫屬

黃綬抗塵幸蒙恩而受代碧幢率屬辱剡奏以充
負雖未占天問之果酬豈不假人言而後得頂踵
皆歸於特達肺肝倍激於輪囷伏念某名爲皇宗
實本素士先人存趾嘗首列於儒科元舅拊頭謂
必成於宅相遭家多難欲仕無津躡屩擔簦輕別

家園之松菊懷鉉抱槩甘依學舍之藁蠶鹽偶爾登
名漫而試吏會計而已初無出位之思名實未加
濫竊代庖之譽不堪位置何足控搏泰堦六符忽
擁旌麾而至明堂一柱不遺店楔之微曲假存全
屢令任使及瓜而代詎希東閣之留繞木何依空
結南枝之戀不圖裁鑒忽辱薦揚錐之處囊中初
無見穎羅而致幕下欲使空羣重惟蟣蝨之官憂
乏蚍蜉之援一齊衆楚豈能回莊岳之音九舜十
堯不敢望隆冬之穀知賢而舉惟斷乃成縱寄牋
閭闔之風未知利鈍然銘心泰華之石豈易銷磨

伏遇某官四海真儒三朝舊弼文章有 再見武
公之賢招選無遺一洗將軍之陋自元戎十乘之
啓至長沙千里之平苟有寸長悉入大鈞之播不
遺餘力復收小子之狂欲令奔走於顏行力借吹
噓而送上萬一所請或不見却尋常之恩豈可並
言某敢不銘佩異知激昂晚節將母來諗身雖未
可以許人懷德惟寧士固必伸於知己

代盧尉

仲雋

謝諸司辟知資興縣

簞楚塵埃之微福偶幸代更繭絲保障之謀人猥
勤特辟戴使天之私覆循材地以中慙惟義擲據

楚之上流而資興號晉之古縣數百年瓦礫之迹
猶有劫灰五六載鋒鏑之餘肇稱新邑俗多鼠嘯
財欠鬼輸欲其賣劍以買牛相與抱孫而歌犢是
在撫字之職宜得通練之材歷數部封何限囊中
之穎豈期庸委遂蒙送上之噓雖未占天問之果
酬然敢不星言而夙駕伏念某起於寒遠持是空
踈三年飲墜露於湘濱一念繞落霞於滕閣下車
攘臂敢嬰搏虎之嘲學道愛人難奉割雞之笑不
虞製錦輒使代庖此蓋伏遇某官大鈞無垠小善
必錄耻納溝不被其澤欲惠遠黔出推轂有味之

言不遺寒素或者封囊之露許還假印之真借以
聲光寬其轡策其敢不力摩凋俗盡布教條不鄙
夷其民當使烏言夷面之俗事慈惠之帥如在熊
旂金節之前

舉自代

謝李侍郎臺舉自代

玉堂圖舊趣四輩以來宣寶閣冠班舉匹夫而爲
代止流言於智者發泚記而信然感固感於相知
慙則慙於不稱竊以伯禹固遜于后稷曷嘗稽首
于父斯宣尼謂不如顏淵何與及肩之子貢蓋惟
善能舉其類然擬人必以其倫未聞取原隰馳驅
之夫謂可備軒墀供奉之數鳳兮巢閣方將揚覽
德之輝馬也守閭正恐累知人之鑒伏念某嶽崎
萬狀拓落一官器竊識凡安能超卓學荒術陋何

有深醇當先皇之末年教胄子者數月一鳴輒斥
刺天不羨於羣飛四國于宣見雪幸逃於衆吠十
暑貫岷山之葛一寒仍范叔之袍乏四騏四駱之
咨諏端方烏有無一鶴一龜之風采登按何功豈
謂我家侍郎之賢曲念吾宗孫子之老惟學士學
先王之道況敷文敷國典之華兩命以起知章足
爲光寵一字之拔叔夜却恐龔疎德不待於成身
士固伸於知己此蓋伏遇某官四朝元老一世真
儒奉命任危難之間固國還封疆之界南人不復
反矣東山以公歸兮然神旗戟燾旣久長於魏師
則光祿金紫當即封於晉國走卒知司馬顧今領
嵩陽崇福之宮胡兒問大蘇亦知起元祐眉山之
學宜煩泥檢來趣脂車幸舍人之治裝副天子之
虛佇帝乃誕敷文德正藉臣鄰王惟圖任舊人適
登丞弼藉令念小草之有遠志何至引老芋而替
伏神某敢不銜佩異知磨礪晚節集賢以待侍讀
固使臣不敢與聞征夫豈不懷歸願君子惟能通
志

代回董惠州

居誼

謝舉自代

咨垂共工自當申稽首之遜舉康自代得無笑炙

背之疏銜袖惠然開緘愧甚恭惟某官有致遠之器無欲速之心要薦不入官姑取一麾而去三宿而出晝無勤千里之追難進易退我不如見賢不薦誰當耻聊復尔耳止或尼之某欲爲王留徒得君重得隴望蜀戲已驗於前言召鄒延枚客正觀於末至

代回倪告院千里謝舉自代

稟令推賢得公爲重袖箋委貺陳義甚高文則其文謝非所謝恭惟某官學有源本行無瑕疵委蛇結綵之珍是宜廟序騰踏飛黃之駿而伏鹽車使在論思獻納之班必有輔贊弥縫之益某濫持荷橐謬廁李官守正奉公實不如於戴胄明刑弼教義當遜於臯陶不謂高情猶勤私謝惠而好我皆謁如仁義之言更以贈君願力蹈中庸之正

宣賜

賀黃制置

伯固

賜金帶

分閫疇庸錫鞶䟽寵三品百鍊焜煌內府之盼萬
釘九環褒表中權之勁不勤使請弼覺道存恭惟
某官追琢其相柔惠以直言忠信行篤敬學素得
於書紳極高明道中庸強何虞於衽革上嘉羊祜
輕裘之緩欲厲田單伏鍾之橫肆分紫磨之真昭
示黃河之信爲兵餽之何不受從革作辛匪伊垂
之則有餘在師中吉向來衆口之鑠曾不累月而
銷賜爾通天略吐曾中之十萬用汝作礪便看腰

下之兩重某聳聽夫揚阻陪旅賀寬營平先零之
漕倘免累屍賜贊皇于闐之珍尚祈拭目

賀魏侍郎

了翁

賜金帶

賜爾褒賢橫金增秩書盈于閣進思緯國之文華
帶錫之輦昭示立朝之賓客登庸有漸賚爾非常
恭惟某官根柢六經光芒五緯忠信篤敬學素得
於書紳高明中庸強何關於衽革一笑微生於偃
月十年良耻於倚冰上應念徙薪之言人望還采
薇之帥姑盼芝檢仍進松班申錫九錮誰曰有常
而循故庚金百鍊式彰從革之作新垂則有餘服

無不數裏躋麟趾不由郿塢之貯儲鳳閣鸞臺端
屬趙家之世界無勤使請更覺道存橫安平之金
不難破狄解武侯之帶寧久渡瀘袞以公歸礪資
汝作某聳聞郵報切賀厦成兩赤重黃自異佩苑
蘭之葉千紅萬紫寧能對松栢之柯頌詠惟深敷
宣罔既

代回嗣秀王

師揆

謝賜玉帶

揚庭渙號分寶展親追琢其章璀璨簪紳之長溫
潤而澤彰施袞綉之光恭惟某官德濬濬源望儲
琳館合宮薦瑞恪陪主邸之恭御府闡珍寧假玉

人琢萬釘錯落六服焜煌某未能造朝猶稽走賀
揚休屹立更勤珠璧之投病骨難堪莫辦瓊瑤之
報

被召

賀綿州高知府赴

召定子

疇庸廉水奏計甘泉駕朱兩轡去載屹頽波之柱
奉尺一詔茲辰趨文石之塗用人如斯通國幸甚
恭惟某官參旗孕秀井絡載英師友鄉雲黼黻交
輝於河漢伯仲伊呂羽毛盡在於雲霄言從磊落
之州茂著蕃宣之最適貔貅之狼狽委鴻鴈於犬
羊一人之情千萬人之情親援桴而立鼓百步而
止五十步而止紛棄甲以曳兵公獨作張睢陽之
守城上不識顏平原之何狀茲令四輩趣覲九宸

此行登仙富貴乃緒餘之事惟公懋德功名留久
遠之看某屯蹇百罹睽離半世玷征夫之濡轡幸
君子之得輿有德進則朝廷尊既聞耳矣所任賢
則功施普當拭目焉

回諸處賀 召命

匹雛無力久動歸去來兮之思四牡何功誤叨詔
行在所之命方切循孔墻之避未皇謝鄭轂之推
敢意雲箋先馳霧驛恭惟某官爾書增秩斧綉生
輝德既厚於蘇枯道仍隆於拔茹噓是拂是起死
享之華風繫之維之怜生芻之空谷齒牙所借羽
翼斯成顧某欲拜威顏既術膂力不能者止詎堪
再傍於九閔兆足以行或許退專於一壑徒勤褒
飭但愧感藏

謝趙制置

彥呐

安總領

癸仲

賀辭召不允

漕水未解敢希全璧之歸成雪將更誤玷予環之
寵偃僂再三而引避威顏咫尺之難違此非左右
之先容孰與吹噓而送上伏念某志隨學落氣與
年凋虛警空悲皆信書而成誤乾愁漫解覺行道
之猶非自再泝於岷江已九鎖於巴火奉法循理
柰倡矣而莫隨節用愛人愧行之之未盡每覺匹
雛之無力敢言四牡之有功招大夫以旌豈爲我
設越小臣諸節亦廁旁招未敢隨召駟之塵但乞
返屠羊之肆詎期異櫝莫返渙揚此蓋制置某官

以禮樂英爲詩書帥十七年干城之底績數百戰
尊俎之折衝迄厲二矛重弓之威俾無疋馬隻輪
之返章尺書而招贊普聞已請降獎三軍而定中
原即觀奏凱每借齒牙之餘論不遺毛髮之謏材
致茲無用之人亦有罔功之奏此蓋總領某官卅
濟膚公家傳遠略鄉月高升於金掌陣雲連捷於
玉關智運木牛師不憂於左次權兼茗駿貢爭效
於右牽佇積勲庸徑登駸假每借齒牙之重不遺
毛毳之微致此湮淪許令敷奏某敢不益加黽勉
後集驚庸雖無治聲塞海內寡二之問願陳民隱

當雲中第一之歌

謝利路高提刑

稼

賀辭召不允

冰漕終更誤玷予環之寵露章未允難從俟駕之
私退循頂踵之歸皆出齒牙之借至勤下問尤佩
高情恭惟某官曾看千年材兼數器人或劫劫而
不足公獨恢恢乎有餘纘之維之惟恐生芻之空
谷噓是拂是能吹死草之華風德旣厚於蘇枯道
亦隆於拔茹致茲頑鈍亦預招徠某敢違威顏旣
衍膂力不能者止詎堪再傍於九閔兆足以行或
可退休於一壑

梅亭先生四六標準卷之九

梅亭先生四六標準卷之十

進職

賀董侍郎

進職

雜李除李士

制垣晉秩寶閣升班諭蜀良勞勉旬假留之國登
瀛固寵况加真拜之榮綸綍載揚紳縷交慶恭惟
其官清如秋刷和若春陽雲夢胸寬平吞一百八
盤而無險天風背厚獨負三十六郡而有餘三年
有成萬物吐氣不見賈誼固深半夜之思願借冠
君難抑庶民之請仍魚鳧之開國峻龍馬之負圖
一札細行增井鉞參旗之重三謨大訓貫奎文壁

府之華歡動兩衙瞻寒西賊李士象八節不過一
歲之少留刺史入三公便在五雲之多處何限麒麟
之盡滿期龜鶴之還某何足控搏游蒙料理白水
魚竿之入暮竟作退飛青天鳥道之撫膺又勤
羅致与其徒索長安之米不如來賦灑灑之堆直
爲文翁再剖符兆足行矣安得仙人九節杖亟往
從之

賀陳提刑

天宜

進職

懋賞外臺升班中祕激西江之水已驗澄清貫東
壺之星有光臨照恭惟某官載揚淑問誕受嘉師

方當攬轡之初適有跳梁之寇無煩獮薶竟折萌
芽爲赤子爲龍蛇各安汝迹不縣鯢不虺蜮時乃
之功簡于楓陛之知華以蓬山之直雲煙縹緲暫
煩俯章貢之流朝夕論思行即遂承明之謁某切
聞成命輒布賀緘何敬非刑諒益謹五辭之聽有
功則悅行將勞四牡之還

代回趙茶馬

彥綰

謝進職

賢儲進直璽命諭留經河緯洛之文書官由人重
控蜀通秦之權牧功以久成何更爲計其有試矣
恭惟某官天潢擢秀奕葉飛英禮樂凌二而光華端

車言邁忠信行於變貺思馬斯臧茲言因任之榮
仍拜加恩之寵歲九遷其自此晝三夜以必然某
越在師屯例蒙巽謝翦白鹿坡前之草中夜枕戈
對碧雞坊裏之花何時樽酒

轉官

代董侍郎轉官謝三府

守關山之戍愧乏殊勲序歲月之勞猥升華秩無
功報上有愧積中伏念某一出西垂六逢朔易惟
是窮日之力粗守封疆不敢貪天之功輒僥爵賞
茲蒙恩紀俯錄年勞揆厥所元豈無其自恭惟某
官翼扶萬化器使羣工天地爲炉每曲成於萬物
山藪藏疾豈求備於一夫致此孤蹤亦叨異數誓
殫駑力仰荅鴻休

轉朝請郎謝黃侍郎

伯固

荒服輦輸何益樵蘇之後副郎銖積叨升糠粃之
前曾微入奏之功僅守年勞之叙然於踈拙亦是
僥踰自昔就第之侯號奉朝請本朝維端之職頃
視班聯自官制正名之餘寄貲郎前行之祿遙瞻
粉省知隔幾塵近視土山不容一蹴顧某無似知
命不猶載馳載驅曾何裨於苞栩不稼不穡亦胡
取於廛禾偶成鑽貲外之天誰實爲將軍之地茲
蓋伏遇某官以大司馬爲冠軍侯養民以致賢人
開誠而布公道河以南皆爲晉土爭擊楫以渡江
挾而東主之周公且徹桑於未雨藉腹中之兵甲

戍塞上之金湯燕人悅則取之昆夷維其喙矣猶
念獠猴騎土牛之鈍欲試奔蜂化藿蠋之奇下至
斗量尚叨寸進某所慙骯髒不足控搏吾愛吾廬
詎敢希於軒冕我任我輦願少緩於鞭笞

轉朝請郎謝監司

內服輦輸何益樵蘇之後外郎銖積叨升糠粃之
前曾微日奏之功僅守年勞之次然於庸謏亦是
僥逾自昔就第之侯號奉朝請本朝橫榻之任實
視班聯其爲貲外之前行蓋在官制之改後遙瞻
粉省知隔幾塵仰視土山詎容一蹴顧某無似知

命不猶水馬之走徒勞自甘退舍土牛之騎宜鈍
何敢着鞭偶成鑽貪外之天誰實爲將軍之地茲
蓋伏遇某官仁深引類義重噓枯怜其剪寵中之
翎假之羽翼憫其困轅下之輓借以齒牙既費挈
提又加獎勞愧無成績可書日月之常尚託餘庥
歸守煙霞之痼

回趙司戶等賀轉官

斗壘藏衆曾微歲最天朝懋賞俾叙年勞是爲平
進之常難講同寮之謝敢圖高誼見畀屬辭恭惟
某官義篤官聯情親事契胥保惠胥教誨有味其
言孰披拂孰吹噓不愛其力有怜邊賞躡綴外郎
笑猴騎土牛之蹤真成鈍滯觀雀化水蛤之變要
是沈淪或承之羞不知所賀某未能辟穀久已思
葺士夫爭磨勘而殺人幸容苟免將軍以告身而
易醉行可勾歸

改官

改官謝丞相

璧水綴貧已抱罔功之愧金閨登籍復叨寓祿之
恩此聖世優職事之常而愚儒無功狀之實全出
鑪錘之造敢忘竿牘之恭切以祿至宣德之階雖
八品秩俗羨通班之寵號再登科舉必五貧職湏
六考貳卿爲之進卷萬乘至於臨軒使百里或九
十之差則分寸有千丈之落幸獲通於班筭又免
待於成瓜惟甄異於庭紳許帶行於職組以此刈
薪於翹楚斯亮天功如其不稼以取禾曷孚人望

如某者起於素賤加以朱愚自安鸞鳩斥鷃之棲亦乏蚍蜉蟻子之援隨材官蹶張之後不自意全補文學掌故之職已逾分願感大鈞無垠之播物欲小子有造於成人進之東膠告于南面如絲如綸而如綽有墮自天在汴在陵而在阿孰爲之地伏遇某官坤厚載物鼎亨養賢耻一夫之納溝中欲得其所招諸生而立館下恐毀于隨故雖糾錄之曹亦假超遷之渥某敢不修其可願欽乃攸司卑者止高者流當益厲六館之仁勇直而溫寬而栗庶可助九德之敷施

改官謝喬司業

行簡

同第七卷除國錄謝葛祭酒啓頭

伏遇某官道航聖瀆材棟儒林左史讀五典三墳蓋將倚相國子學九德六舞暫假司成當江濤如此之時軫根本眇然之慮欲作成於六館以表厲於四方有灌者淵不嫌葭葦之衆言刈其楚蓋爲薪槁之儲况素出於門墻尤願承其模範某敢不尊其瞻視識所步趨雖藻火粉米之不同貴賤位矣儻蘋蘩錡釜之可薦左右髦之

回劉教授

大川

謝舉改官

綴曲江之題知賢已久玷直指之寄察士爲先方
蹶踏於循牆遂蹉跎於削牘有來巽謝良仍謙光
伏惟某官行有宮庭文爲輦輦吹更生之藜杖孰
非鴻寶之書裁夢得之桃花不作大鈞之問淹回
如此靜退恬然茲雖騰一鷄之章恨未足五紆之
數某蠢願無政龍節非材下車而舉慈明豈種私
門之桃李築臺而招郭隗欲開公道之荆榛惟慙
程力之繇更辱摛文之綺

宮觀

賀瀘帥楊尚書

改明進職奉祠

元帥賢勞清都均逸文昌八座昔倡九牧以阜民
幕府十年今解伍符而還里顯拜綠綈之寵峻加
紫殿之班歸哉歸哉幸甚幸甚恭惟某官柔嘉維
則從容以和節槩抗岷峨之橫淵源深江漢之濯
高塵迅步不受人間風日之塵緩轡徐驅徑曳天
上星辰之履五月瀘溪之入九鑕巴火之新大國
十連民無遺便細書一札王曰遄歸乃思晝行之
榮欲就晚賦之樂日出而作皆言倦飛則知還夜

行不休誰作急流之勇退偉公高節立我懦夫孔
幾耳目未覺衰力控二宜之疏溫公肺腸爲已有
暫營獨樂之謀况幾兩幾駟羨巨源之歸而一壘
一區足子雲之樂南方已定足可從赤松之游東
征是皇尚當爲蒼生而起某夙蒙異顧輒布賀忱
既羨公未老而得閑又愧我每懷之靡及挹浮丘
之使尚願執鞭登黎侯之樓或家援筆

賀李侍郎進秩敷文閣學士提舉嵩山崇

福宮

扶杜勞還崧高均逸大行臺之保大載績武功真

學士之拜真誕敷文德有偉急流之退式觀晚節
之香恭惟某官博極羣書洞視萬古用之禮義講
唐虞於細旻詰爾戎兵撻秦楚之堅甲昔者狂瀾
之倒屹然暢轂之堅遠揚邇昭外鎮內撫盡護諸
將不聳一塵王曰遄歸將運籌帷幄之內我戍未
定且收身矢石之間學士象四時光祿正二品祝
釐太室真聞呼萬歲之三詔祿禁廬又可襲六藝
而七班接西京之鸞鶴歡騰北墅之龜魚名與身
而孰親事隨憂而共減起視當世允謂全人某聳
聞除書亟裁斐語起溫公於崇福不無願公入相

之人迎老子於函關且致爲我著書之請

賀安觀文

丙

除節使開府宮觀

代董制置

元老求閑清朝疏寵齋壇授鉞新大將之威儀揆
路黻纓等上公之體貌仍峻竹宮之領用華梓里
之歸綸綽載揚紳綏胥慶恭惟某官材弘且毅器
博而周所守匪親化爲豺狼頃幾失劍門之壯無
禮於君誅如烏雀公迄回沔水之朝是爲非常之
功宜受不次之賞况尅復四州於談笑而撫摩八
載之瘡痍若時登庸遂典樞機之貳聞命就道又
成藩屏之留方深虛佇之思忽控養恬之請橐橐

戟纛儼十乘以啓行衡統絃縱視三階而命秩仍
從神圉以佚安期是爲地上之仙何愧山中之相
向也雲無心而出岫今則水有時乎回淵惟出入
將相之榮雖聖賢而難必至功名終始之際尤今
古之罕全貫一節於行藏知百年之壽考從容甲
第寧肯甘田宅之汙笑傲午橋自可窮園林之勝
某聳聞盛事敬仰高風季鷹思吳亦欲爲適志之
舉司馬還蜀何當效負弩之迎

代秘丞林郎中

夢英

謝丞相得祠祿

老而妄動自速煩言罪以疑輕尚沾微祿重惟踈

謬倍費保全戴洪造之難名撫孤蹤而增感伏念
某狷弗諧世戇獨愈人少而耻有道之賤貧妄希
干祿壯始悟不義之富貴亦足辱身固嘗把江海
之麾惟不願冰山之倚用違繒繳便入林泉食神
圍之祠凡五六任頃暑坦之刃幾十九年自量叔
夜之不堪任笑仲連之強作母友不如已者乃師
教之以義強委重焉則君命也自層羊之反肆即
殺馬而毀車誰誤聽聞忽加擢念士非其招而往
孔子奚取焉苟傲無所恃而行韓愈亦人耳抗辭
不罪引疾爲欺冒然扶僂以奉承識者逆暴其顛

沛清班難僭顧再轉而爲丞素行久愆非一鳴而
輒斥旣云欺世安所避刑竊鈇無往而非疑聚鐵
不容於鑄錯乍賢乍佞身已變於三期僞行僞言
誅何逃於七日投荒已幸續食謂何豈老芋之似
茯苓元非罔市而遠志之爲小草失在出山無墜
諸淵姑予之金輿而召毀而去聖則何心吉之先
動之微汝曹不悟致勤大播如此曲成伏遇某官
謙虛受人坤厚載物謂士非梁巽之賓客謾與招
徠至人言盧杞之姦邪固難覆護怒猶疑其溢惡
殺寧失之不經疾雷震霆於物無存全之理蓋天

容地乃今知寅亮之功見大德之好生豈匹夫之
受賜某仰銜厚施已迫頽齡斗升之活波臣固貪
舊物七十而致君事正在新年與其身後重作僞
之愆不若生前瀝析哀之悃澗愧林慙之無盡悔
不可追鍾鳴漏盡而不休行將焉入得反初服實
出大鈞小人之過必文何嗟及矣君子之愛以德
願卒成之

代李制機

大有得祠謝丞相

幕府效愚猥蒙重効公朝宥過特畀真祠感無地
以寄言德如天而難論伏念某才固無似命亦不

猶門戶百年難問庭前之雀科名二紀真同竿上
之魚幸且安百里之子男誰使作諸侯之賓客既
叨贊畫安敢隱情堂上之兵未可屈人於不戰幕
中之辯真乃以我而爲傾怒因水蟹之移殃竟池
魚之及言如綸綍固疑乍佞以乍賢法猶權衡寧
免則筆而則削奪其兩秩倏已暮年適逢肆眚之
恩輒動問鈞之請賜之大知之至前感已多閱其
窮察其愚茲恩尤厚過蒙復玷特賜祝釐疾雷震
霆於物無存全之理祥風甘雨乃今有覆露之功
恭惟某官杜稷世臣鼎彝家學以一二日萬幾之

無曠乃十五年獨力而有餘得伊尹以格皇天亦
既俘三驩之寶玉問鄧禹而披輿地行將膺萬國
之貢珍諒欲四海之會同益思九德之咸事矧惟
孤迹夙累一陶茲加拔拭之仁殆有發生之漸其
敢不銘心圖報沒齒銜恩桃李尽在公門豈終使
一株之慘淡葑菲無以下体尚希發寸草之華滋

致仕

回李致政

坤載

聯事少城一星終矣懷章仁里數月于茲未皇致
擁篲之恭猥先辱踵門之見恭惟某官盤根仙種
發藻儒英夷夷惠可否之間夙播仲元之譽達榮前
後之舉莫回令伯之高終難縮手於袖間竟出摘
冠於額下一第直溷子終嫌識路之疾驅再轉不
負丞甘作急流之勇退尋橘中之四皓見林下之
一人致爲臣而歸良可厚近古之俗從邦君其上
尚爲賦遠景之樓某爲長於斯得人焉耳車幾兩

馬幾駟孰不羨楊侯之賢薤一本水一盂更願聞
任崇之誨

回彭致政

琛

謝致政

壬仲

一經教子人服義方五福錫民天頒仁爵未皇走
慶先沐陳箋伏惟某官典刑老成魁壘耆艾漢庭
用少功名雖恨於蹉跎周王作人壽考固同於飛
躍蔚秋蘭之流馥忻春草之隨袍貴老爲近於親
式稱綵衣之養乞言以成其祿會聞黃髮之詢某
及交阿戎還識叔夜壽胥與試此何與魯侯之功
盍歸乎來行即顯文王之卅

卷之十

梅亭四品標準

內閣文庫			
漢書	特四十二	一一七四二號	一九
卷	頂	號	冊

合

內閣文庫			
冊數	漢	11742	
冊數	19	(6)	
冊數	3		5

梅亭先生四六標準卷之十一

雜謝

代林運幹

良顯

謝丞相

書考求文字

千大播於一陶俾登畿幕積小成於三考獲進遷
階頂踵歸塊土之功肝膽極輪囷之感敢因摧謝
更叙依歸伏念某材無瑜人學未聞道半世寒慙
之燈火中年太學之塵壘篆刻雕蟲覺兔毛之欲
禿銜枚戰蟻偶雞口之先鳴遂采魯芹出燃楚竹
未滿成瓜之代忽纏家棘之悲隙駒之制易終林
鳥之哺益切上書光範初無蟠木之先容得闕長

新嘉坡書藏

安乃辱采薪於下體竭來半載何有寸勞夏屋督
工粗逃曠敗春闈考士獲厠使令及大庭聞魁三
之傳則本房有簋貳之數然雖有依紅之樂尚未
霑破白之章七十偏親一則以喜一則以懼斗升
微祿時乎為養時乎為貧茫然寸步之謀甚矣分
陰之惜鼠肝蟲臂固難躁進以妄圖馬渤牛溲或
恐兼收而並蓄恭惟某官鼎彝家學袞冕世臣撫
五辰於泰階之平載萬物以坤元之厚復文武之
境已昭元老之壯猶歸鄆謹之田足見真儒之已
效然益旁招於俊乂欲令聚在於闕庭故凡絲粟
得之情

代察判徐

愿

謝史丞相

得五帑文字

補京兆之掾曾微贊畫之長交公車之章茲拜成
終之賜自匪載驅於四牡何由一發而五祀毫髮
不假之他門頂踵皆歸於化治有言雖淺進謝敢
稽伏念某才乏線長力尤綿薄十年太學身嘗百
甕之壘一第集英袍已半霜之葉昨終素鞢重累
洪鈞泛綠依紅猥使近長安之日草玄尚白誰肯

牋閭闔之風始焉一鶚之飛繼以乘鴈之集再而
衰三而竭孰與點晴二之下四之中正須合穎况
當百里九十之半更覺分寸千丈之強忽蒙雷電
下取之勞遂有埃風上征之路何物不由於洪造
此身獨拜於全功茲蓋伏遇某官八柱世臣三槐
家學方當鯉趨過庭之際已傳虎拜稽首之心更
化十六年無匹夫不被其澤關國數千里復寧王
有拍之疆益閔翕受之規不廣旁招之意里仁爲
美似怜桑梓之偶同舉能其官特取蘋蘩之可薦
感一力挈提之厚增寸心銘鏤之私某敢不勉自

激昂圖惟報稱雞犬舐鼎難更干點化之功
飲河當自詭承流之效感藏不盡敷述奚殫

代吳省倉

謝丞相

維次

貧累清時許守漢倉之粟老須遠次忽臨齊戍之
瓜此恩夙出於大鈞於義宜伸於小牘伏念某身
勤事左意廣才疎家世占寶唐之濱學問皆環溪
之訓少而有志頗欲就博習修潔之科壯則無奇
亦屢玷德行道藝之貢歲不我與命與仇謀烏帽
黃塵凡五排於禮部青衫白首又兩進於計臺終
然蹉跎成此遲暮漫作兵厨之隱聊爲簿竈之依

青天鳥道之拊膺雖嘗奏辟白水魚竿之入幕何
敢疾驅如此頭顱淒然脚色奚敢作堂除之夢猶
難干京局之除時方張更化之弦公實權造化之
柄冒爲治躍便辱甄收使守九年之儲令待四政
之闕櫝梨橘柚大非老人所種之宜薌櫝侏儒偶
在宰相兼收之列聊裝鋪席歸老林泉不謂俟河
之清乃成縮地之脉洛中親舊書傳犬耳之黃吳
下官曹事報烏頭之白僮奴欣怪里巷驚疑高下
在心只合避賢者之路進退維谷反恐負相國之
知尚堪一行不遠千里然非恃無垠之塊土亦寧

免將進而趑趄恭惟某官清任以和直方而大手
麾九日太陽行黃道之中坐鎮八年微物出洪鈞
之播雖風霆不言流形之利然天地能照許國之
心外撫四夷內熙百度收毛髮絲粟之細入竹頭
木屑之藏晉卿之舉七十家不遺筦庫祐甫之除
八百吏皆是舊知冒焉而來恃此無恐某敢不靖
共爾位洗濯其心却日揮戈收效在桑榆之景涓
辰擁篲奉身歸桃李之門

代饒運幹

誼謝史丞相

改任

幹茗事於畚禺妄求易地贊漕輸於湘浦竟辱回

天俾依青草之湖庶免黃茅之瘴此恩渥甚何感
猶之伏念某樸學無竒散材不腆踏槐半世幾隨
兔目之黃采藻十年似守烏頭之白偶叨終秩未
及問鈞五嶺聞其皆炎初無去志諸公怜其獨冷
誤有辟書元戎欲處之油幢之中真宰遂寘之茗
寮之末等勤大播徑合疾驅惟是孤榮之蹤寸勇
尺懦實聞疫癘之地十室九空率爾陳情期於避
禍媒身無策難空冀北之士夫換骨有方乃綴湖
南之賓客獲避飛鳶之跼姑從檣燕之留茲蓋伏
遇某官秉國之鈞熙帝之載更政化當更之琴瑟
續聖賢難續之鼎彝益贊禹而格苗誕布舞干之
化尹相湯而伐夏迄垂典寶之書然猶耻溝中之
推必欲濟天下之溺印趣銷而趣刻足昭從善之
仁衣改造而改爲益表好賢之意某敢不敬其可
願欽乃攸司綠水紅蓮已感移栽之惠青芝赤箭
尚希並芻豢之恩

代李總幹

伯長

改任謝史丞相

回馬首於鹽亭不良擇地護鼠牙於粟庾有渥自
天當赳赳將進之間拜垓北無垠之賜謫焉孤賤
辱此一陶竊惟京口之積倉實切邊頭之仰哺總

司創闢裹粮兼坐甲之司堂選掄材弄印致閑時
之久蓋戰德戰謀之際惟去兵去食之難爲米折
腰雖不離於祿仕歟糠眯目易有誤於軍須必爲
官而擇人庶因能而任職伏念某一寒無挾百拙
有餘伯父取之庭階補以京秩弟兄習乎弓冶志
在世科偶尺寸之蹉跎漫斗升之噉嚼中嬰家難
復詣吏銓煮海爲鹽妄欲供富媼之役無麪作餅
或謂非巧婦之能况當避嫌不免易闕自笑鮎魚
之上竹何翅羝羊之觸藩一指之不若人猥勤伯
氏之請匹夫之失其所亦閔造物之憐迄蒙倉庫

氏之除全出光範門之造恭惟某官鼎彝家學社
稷世臣巫賢之繼巫咸不但底王家之又伊陟之
紹伊尹真足格上帝之心雖九德敷施均不遐遺
而一門小大尤蒙器使烏鵲遶樹真同撼木之蚍
蜉牛羊求芻乃肯發機於鼯鼠某敢不修其可願
欽乃攸司錢穀甲兵問於廟堂當識士大夫之職
猥闡店楔成其室屋無忘明宰相之功

謝丞相書考

補上佐於黔嶺偶書下考貢空函於黃閣莫報實
恩偶暫攝於竹符尤倍希於樾蔭忘其喋喋布此

惓惓伏念某殖學踈蕪涉道短淺青泥盤足每思
範我之馳驅白雪滿頭寧復初心之邂逅進之犬
雞之效退從鹿豕之遊辱坏治之一陶俾翔翔於
半刺牂牯爲微雖非監鰲螭之州盤瓠見容偶免
築鯨鯢之觀竹齋藥竈不礙雲山芝製荷衣無邊
風月適挈瓶之缺守又越俎而代庖胡瞻爾庭人
固疑其鶉突此非子坐自亦愧於象環所祈新尹
之疾驅庶遂陳人之退屏明年今日固可歸三涇
之荒凌雨震風尚合假萬間之茆恭惟某官得聖
之任爲帝者師衡統紘紘增鼎鉉九元之重箕裘
乃治協泰階兩兩之符行由絕席之尊徑陟維垣
之峻人主聃論一相具瞻槐面之專太傅府有三
才詎棄竹頭之細所祈全度非異超遷某敢不補
拙以勤謹終如始深懲往轍跡分寸而落千丈之
強雖踵常塗視九十爲行百里之半其爲歸倚罔
旣敷宣

謝魏侍郎

了翁

爲先祖先父作墓誌

先美無傳凜負子孫之責幽鑄有託蔚爲祖考之
光屬拘柱後之文莫布堂下之武敬裁儼啓恪布
謝悰竊惟隧刻罕見於先秦之前墓碑似昉於後

漢之末正而斃斯亦已矣身將隱焉用文之如郭
林宗尚可免伯喈之愧若陶元亮又何待延年之
辭降逮李唐竄崇韓柳韓銘正曜定非諛墓以攬
金柳表文通亦豈遺人之矻石蓋覓良工之獨苦
有怜沒世而不稱發其幽光時乃天道重惟先祖
父之孝不事今科第之謀一門千餘指之肅雍是
亦爲政九流百三家之貫穿止以潤身不徒稱鄉
里之善人實有得名教之樂地維廉藺固不羨曹
蜍之無恙然夷齊要是得夫子而益彰恭惟某官
有德立言以文貫道粹若出六經之正凜然寒五

緯之芒寒芙蓉而賦詩洞識陰陽之消長傍梅花
而讀易詎忘天地之彌綸頗哀墜緒之茫茫恐与
常流而泯泯既取贊皇之實錄以誌楚金復叙奕
城之世家就銘明允仍加篆書八分之賜俾免不
稱三服之羞一門存亡百世感激某敢不昭告屏
攝表刻墓埏儻得保首領從九京之遊庶無泚面
目達中心之愧微薄不以廢其礼何足爲碑板之
酬夙夜無忝爾所生用此爲師門之報其爲感鏤
罔既鋪菜

謝衛參政

涇

差校正書籍

小材出位願歸朱墨之勾稽大府量能留備丹鉛之點勘少振塵埃之冗倍勤坏冶之陶竊以三館文書固遴讎正編摩之選諸侯賓客率多獄訟財賦之司寧有伺候公卿之門更容休息篇籍之圃憐韓愈之非賤俾就閑官期呂蒙之讀書非爲博士沫濡鮒轍啄抱鶴翎使養是氣而塞天地之間將和其聲以鳴國家之盛知花於見根之始乞漿有得酒之恩求之古人豈在今日伏念某少諧平側長識偏傍不深石室之紬僅曉金根之讀遺經獨抱未辨豕渡河之三良史博觀粗知馬与尾而

五有時北窻高卧之夢頗思東觀未見之書三神渺在於海中五鬼難驅於坐上插架三萬軸但當守鄴侯之書家集二百篇幸皆是撫州之寫然作吏此事便廢亦有命焉惟投閑乃分之宜傷哉貧也久留戲下宜在遣中遽冒小朝廷之除使策行祕書之職茲蓋伏遇某官榮分湘閫並用楚材義負偃植各安所施耻匹夫之弗獲稷闡店楔惟器是適無一藝之不庸試黃閣之規模收碧油之人物至如狂簡之小子亦勞塊北之大鈞某敢不祗此簡書呻其佔畢珥貂分陝已收下體之菲葑給

札登瀛願備一株之桃李

代表子固謝縣宰

寬假

筆楚之下何求知難全璧縲絏之中非罪迄就罰
金敢不持咫尺之書少謝寬一分之賜惟越人之
相攻擊蓋其俗然而長安之羣殺傷各有主者况
已過都而歷塊誠難被髮以纓冠儒者好高未免
爲役而耻役隸也不力又可與言而不言但催科
未動是閑人豈期會不報爲大政所謂行人失者
乃使吾身親之方入聞言偃之弦忽使受曾參之
杖主人讀未知主人罪也自怪其頑天下寶當爲

天下惜之誰與此念惟體膚受之父母而衣冠耻
在國家馬遷腐刑何面上先人之墓孫臍刖足快
心蹶上將之軍故滕公釋韓信之囚而小白解夷
吾之縛知其不可復續所以寧失不經向使當時
淫及善人安得異日報以國士如某者詩書門戶
燈火生涯

非其職矣千乘之

邑百乘之賦切願學焉惟是受滕一墨敢辭于役
然且去齊二宿難疾其驅偶隣境之胥戕坐家人
之失告鶴非有祿徒以鶴警之失期鴈或不鳴要
亦鴈奴之有罪不虞投足卒禍及身業已逮於圻

揚勢難逃於撻楚自度受李日知之杖又當變余
安道之名然使撻之市朝得無傷於冠帶無小人
無君子宜玉石之俱焚有里胥有大夫

伏遇

某官堯族俊德周家懿親粹然麟角之

祥屈此牛刀之試謂重士所以重國要當躰朝廷
長育之心知察獄先於察情又豈容胥吏上下其
手况開設學校方將馴化於鴟梟則愛惜人才何
忍鞭笞於鸞鳳致此爨餘之棄亦從金作之刑某
敢不策髀肉之功名勉皮膚之學問痛懲臨難之
苟免益思學道以愛人儻許國之可期當措刑於
不式自此不復贖矣安用以撻記之鞭笞越而立
威名既知免於東海出鄒陽而爲上客尚有望於
梁園

謝曹直學賀雨

伏以和巴歌之二闕遏雲足繼於謳青贈唐律之
七言喜雨宛同於醉白莫辦雙金之報徒深十襲
之藏

謝曹直學喜雨詩

伏以瘴我以旱良窘望雲有志乎民辱書皇恩徒
切誦清風之穆未遑和白雲之高

回平江府沈侍郎送酒

杓斡龍躔日又賓於暘谷香凝燕寢地孰勝於蘇
州矧惟荷橐之賢宜介椒盤之祉恭惟某官德參
陰騭道配陽休奉行寬大之書繭絲免矣宣布中
和之樂襦袴煖然諒報政於吳門即歸班於魏闕
其一寒寡與獨冷何辭猶幸太歲之在申例容乞
酒遙祝壽星之出丙莫遂稱觴

回岳總領

珂送酒賀正

天躔回甲聿新曆數之盼歲紀在申將應酒泉之
讖時維層使日進湛湛恭惟某官德配陽休功多
陰騭漕下冰解師有宿飽之期掌上月升日佇辰
猷之告聊暫紆於羔袖即徑上於雞翹某家本一
寒官宜獨冷窮年兀兀只自慙廩粟之糜清夜沉
沉賴肯續燈花之酌

回新都廖宰

子材

送酒及石榴

伏蒙郇翰寵賁陶籬餉以乘壺定有可人之味侑
之碩果中存多子之祥續歡伯之風流洗醋兒之
酸楚已從竹葉獲觀令尹之清尚想榴皮可頌中
書之考

代回安撫趙尚書送物

共六尺之輿同寅良幸分丈二之組先甲已頒悵
遂告違顧勤亟餽惠而好我慚取數之孔多卻之
不恭敢下拜而登受區區衷謝續續面陳

又同前

一麾出守漸可解維同官爲寮蒙加折俎維多維
旨且感且慚敢貢記室之辭少致兵厨之謝

代回趙京尹餞送

已辭軒陛漸理舳舻更勤加餽之稠重采芻大寮
之篤叙既醉既飽腹不勝其屬饗載忻載奔面無
由而控謝

代回臨安府七夕送物

抱拙終身倦乞犬牙之巧未能免俗頗安犢鼻之
貧臺餽鼎來尹釐意厚酒醪醇壹况加雞柘之甘
餐餌馨香仍儋螺甲之旨備此四美跂彼七襄莫
宣銜戢之私但劇嚅噤之感

回塞學諭賀得粟九穗

一莖九穗昔嘗疑司馬之諛異壟同榮今顧辱昌
黎之頌雖君子之政不以物恠然太師於詩可見
民風要非于祥而于仁恨弗以規而以頌民曰太
守太守不有何敢當儒館之歌秀升司馬司馬辨

材請以旅天子之命

回李僉判賀瑞粟

某導九穗於漢庖此真偶爾歌五言之唐律何德當之不敢續貂恐譏集鵠唐叔之得同穎安敢望周公之歸劒南之進嘉禾亦難上柳子之表姑藏佳句以俟豐年

回王監酒提督修城

伏以三里之城不修則壞一日必葺欲罷不能擬煩督戊己之屯相與營甲戌之築龍見而畢不妨飲用以使民隼射于墉亦可待時而藏器

代回運使賀雪

黃雲紀瑞肇新魯觀之書白雪效祥遄應梁園之賦能令公喜不在我先恭惟某官德配陽和氣排冬凜有功使臣歌四牡兼此二難省事天公厭兩回併成一賀方圖面慶又辱手牋不成報章尚幾幸察

回陳術士

某適勤枉顧寵畀僊箋不但知五行之精抑又窺多文之富其爲感佩罔旣報酬

梅亭先生四六標準卷之十一

梅亭先生四六標準卷之十二

謝惠詩文

謝張祕校

晉臣

投詩

並代月湖

蒙以契家之舊贈之佳句之新昔人三百篇世寡
和矣古詩十九首君突過之但深中筭之藏莫效
謚榆之報

謝汪祕校

莘

惠詩

方味大篇又號長句冠切雲佩明月正自不凡濟
白水登閭風居然相導恭惟某官抱負奇志屈摺
壯圖文采離離猶可和其聲而鳴國家之盛詩律

坎坎何至虛其腹而藏天地之愁子亦來見我歟
僕未有可師者參橫月落不堪喚夢於羅浮目擊
道存何必相期於汗漫區區衷曲續續面陳

謝監鎮陸

子適

惠詩

今早特勤古風見畀句有家法信他日之聞詩老
無喜機羨故人之有子恭惟某官爽貫眉目清入
肝脾昌黎門庭未免金根之誤杜陵衣鉢僅存玉
案之吟郎君於此勉之放翁爲不亡矣某幸蒙委
重愧乏報嘉欲俎豆予我父周旋寧作我願金玉
女君家所有更贈君

謝林秘校

季熊

投詩

伏勤枉顧寵惠名篇曾前惠之未酬已厚章之游
至雲巢有子不孤珠玉之編月湖無詩可作瓊瑤
之報聊以數語寫此寸誠

謝盛登仕

夢弼

長書

寵示長牋就貽大冊非至篤好何能多如是耶所
謂立言亦甚似而幾矣愧乏檐榆之報徒華巾笥
之藏

謝許新恩

裕

惠詩

茲勤佳句良感高情或疑年使之年此事可念以

吾老及人老何力可施徒參患脚之禪莫救旋渦之佛

謝蘇祕教

丙

杜門具奏方此乞骸叩戶論詩失於倒屣恭惟某官長材素蘊餘事清吟觀秋月之兩章羨春雲之多態天未喪斯文也復聞永嘉之音子亦來見我乎應認江西之派某亦聿旣髦兆足以行贈我綺琴之雙南之報答乞君霞珮請萬里以頡頏

謝程監丞

準

荐勤真蹟加貺名篇對秋月之兩章仰春雲之多

態爲施厚矣無謝可乎恭惟某官一世典刑三朝壽雋雖老子婆娑自安於橘鰕然此翁矍鑠猶可必蒲輪誰知幽桂之遺榛常坐令積雪之困桃李咀冰嚼玉戲刻畫於無鹽洗醎傾樽巧噤吟於唐舉惠而好我何以報公某久倚長松竟成小草借君詩而消永夜自不成眠期吾王之召將軍更宜善飯

謝朱新恩

遜

投書

比辱訪存特勤書况雖過情之可耻然荷意則甚勤恭惟某官學踵乃翁氣吞餘子襟懷磊落不專

紙上之蟲魚談笑從容遂覺草中之狐兔當季康
子患盜之日正班定遠封侯之時乃援古人以方
我輩一之爲甚四者難并人豈不自知耶今願竊
有復也殺賊奴取金印何待明年縛單于寘橐街
更期他日

謝吉州楊司理

彭年

惠詩

比勤三顧寵惠六詩巧刻畫於無鹽力扶持於夜
燎不知所報當贈以言恭惟某官自策英躔宜收
名第青衫白首氣碑兀而未降丹筆墨曹翅翩翩
而方展不謂睡龍之寶猥加羅雀之門銜盃酒接
慙勤且承至止遣一介奉咫尺更幸亮之

謝周祕校

鹽之

惠梅詩

叢桂移文問周倫之好在官梅動興笑何遜之重
來非吾之故人耶所見者今我也恭惟某官城市
大隱山澤真癯拍洪崖挹浮丘疑遊八極召鄒生
延枚叟又客諸侯茲辱顧存未遑迎肅終然不可
口過勤黃山谷之詩殊不類其人殆似宋廣平之
賦某甚安斗食焉用鼎羹月落參橫荷喚起羅浮
之夢水邊雪後願更續和靖之篇

謝會稽趙宰

善韻

委刺見臨袖書爲誓惟是事契之有素豈假文字而後明恭惟某官仕有長材政多善狀製劍池釀丹井又樂林居探禹穴上會稽猶須瓜戍雖淵明不辭五斗之屈然士元豈是百里之材兆足以行改之爲貴某緬懷先契幸及英游主司疑則辨之此情可亮相國知之至矣何說之云

謝石祕校巖

比勤下顧寵示高文贈盈把之瓊瑤拜嘉已腴列成編之鍾磬取數何多恭惟某官水北名聲山西家世耻懷綑之簪笏服韋布之縑緇儉父機雲欲

上規於姚姒衙官屈宋肯平到於陰何藉少低建隆之功勲足可備慶曆之諫諍公等安在吾道非耶遺我明珠皆映骨而睡驪目乞若飛佩會刺手而拔鯨牙某得非所蒙願竊有復文章小技計已空處士之羣節誼大閑願不替純臣之教

回劉進士

日起

惠書及封事藁

代月湖作

惠以長書將之奏藁一介而言天下古亦有之十漸之當帝心人誰辦此恭惟某人山澤志士畎畝忠臣范希文之居憂不忘國計張齊賢之獻策會即面陳某久已語離忽勤言贈吾愧之不敢恨也

徒抱朝飢公安在何見晚耶佇觀暮召

代回謝祕校耘投詩

代衛參

寵投短刺就貺長篇梨非飮坐之珍豈能抵玉桃
匪蟠枝之實敢辱報瓊至於濁醪亦如惡札不敢
詠酌君之語乃先辱起予之詩占此奉酬察之良幸
回吳教授投啓和詩
伏勤巧思見和拙詩細窺秋月之兩章備見春雲
之多態迫斯可以見矣敢疑識面之遲忠焉能勿
誨乎安用過情之譽

代回朱上舍

中有

餉以新詩儼之舊藁蕭然四立之壁得此兼乘之
珠藏去爲榮不知所報恭惟某人曾蟠古學手挾
天章茲遙賦於高唐已洗空於下蔡詳味三四篇
之健語載觀十九首之遺音失餘子於牛毛發寒
光於驪日惠而好我雋甚逼人某愛莫助之顏之
厚矣開張篋笥諒無須津筏之求劃豁垠崖所願
見琳琅之取

回前蘄春陳尉

格惠詩

昨日伏勤古風見惠論文既久陳誼甚高恭惟某
官服襲典刑緒餘翰墨太丘遺愛多池上之鳳毛

季方難爲蓋眼中之犀角猶怜綠水紅蓮之舊客
曾陪碧梧翠竹之英游春容大篇刻畫老醜如猛
起約世故之句顧不偉歟抑擇術無小用之言猶
相憶否王何必假更爲綵捧之淹儒果用真會復
青氈之舊某過勤投壁莫辦報瓊登樓而憶侍郎
旣無及矣拍廳而坐縣尉何幸見之

回張上舍

端道

博我以文竊承嘉惠愛人以德何至溢言請以屬
辭報其盛意恭惟某官勇高六館學綜九流觀其
宗論欲議之間眇然深思長慮之計以道相盟茲
意甚深覺民之先此言何爲至我任士之重所有
更以贈君某有幸納交願安承教凡是俎豆予之
意固已拜嘉亦有金玉汝之情尚幾見亮

回羅省元

垂琳琅於金薤得所未曾報瓊琚以木瓜闕然無
有敢修儷語略謝盛心恭惟某官蘭菊之家梗枿
其質一經接踵不難俯拾於紫青萬卷蟠曾安得
長嘲於玄白時來爲耳人謂斯何有來秋月之兩
章足見春雲之多態然下有千歲苓之意雖東坡
尚不敢當至向來一瓣香之恭惟南豐乃爲無愧

其自知不武難與斯文借聽於聾求道於盲正恐無益於賢者加膏而光養根而實其敢有愛於言乎

回熊省元投贈

漫刺下臨極慰仰高之想屬辭光賁能無投暗之疑恭惟某官學富家傳美宜世濟桑弧有志豈徒糊口於四方簞路何憂蓋將友士於千乘茲沐檐榆之贈但深巾衍之藏某德愧多涼官甘獨冷厚意慰楚然之喜何敢或忘虛名誤賢者之來不知所報

回徐殿幹

暄

投四六

登畿入幙榮不揜慚趨隅摳衣幸堪親教甫諧望履端辱鳴謙藹然仁義之言既聞之矣豈以筋力之禮望長者哉重勤四六之貽莫效萬分之報輒裁狂簡少謝高明

代回張祕校

子賢

惠詩

比勤謁入尋辱詩來良深感荷之情敢虛往復之義恭惟某官湖海豪氣風雲壯懷諫批逆鱗昔嘗長太息者六工歌鳴鹿今將肄宵雅之三得句驚人以文博我卿言大好能無夜光暗投之疑民可小康當在朝奏暮召之後

回吳判院北惠詩

榮被新除寵貽佳句脫身枳棘來監公子之倉回
首芙蓉寧戀假王之印我厭朝班之綴公方故步
之尋判院不比尋常惟當拭目山莊元無呵殿更
望垂情

回屈學正投書詩

丞哉負余余負丞哉殊乏吟哦之伴長者絕子子
絕長者抑何交際之遲振履鼎來鳴謙泰過恭惟
某官莫敖華胄正則故家宗派西江識快閣千山
之大僑居東鄙開遠軒三尺之明茲終素鞿之祥

行奉丹墀之對龍飛九五庚桑盍早於贏糧鵬擊
三千子木何勞於東甲茲蒙布武見賁雄文加之
仁義之七篇華此蓬蒿之三徑不知所報藏去爲
榮某爲州治中在

固恨何相見之晚也猶

欲就有道而正焉友其士之仁子若無言幾失子
文以氣爲主君家所有更贈君

回呂將仕

某伏蒙紆顧寵賁長牋未先覩於景星幸茲小尉
辱暗投之明月復此大慚但深篋笥司之藏莫效瓊
英之報

回衆官袖啓

伏蒙銜袖見賁儷牋合璧連珠於榮光芒之正編
鍾列磬了非世俗之音良欽墨妙以筆精但覺禮
踰而情過兩喜而多溢美曷克堪任七襄不成報
章但深愧負

回官員學職袖啓

洊承厚意疊貺儷牋墨妙筆精仰窺瞻麗禮踰情
迥洊極感慚嘗修造謝之恭僅奉留名之命惟息
肩之方始覺脫腕之頗勞七襄不成報章良孤隆
施兩喜之多溢美仰懼瀆辭

回學職士人

茲蒙盛刺見賁屬辭竊闕四六之工良重再三之
嘆亟嘗造謝僅辱留名退深巾衍之藏莫效檐榆
之報

回景省元

夙勤臨顧見賁儷牋偶缺肅迎退深誦味辱引前
賢之跡俾爲後學之師佩意甚勤拊躬曷稱尚規
晤語敬布謝忱

回宗子

與銓

伏勤屢顧見畀屬辭極欽著語之工但重過情之

愧恭惟某人天潢濯秀風調軼羣上方重歆向之材錫之蕃庶君宜勉賀白之學副此簡求佇觀千里之駒亟振九苞之鳳某濫膺郡寄幸託里仁承焚林竭澤之餘若爲共理有拔薤置水之警切幸告忠

回王省元

徒復迎門喜接雙鳬之舄文書銜袖辱摛孤鶩之詞既見異人頓忘九折恭惟某人譚高玉塵材擅瓊杯逃狗曲之譏暫且謝諸生而還舍依鹿鳴之樂行當頌聖主之得賢結襪以須彈冠伊邇某十驅當圖請益

回李叔璋

伏蒙銜袖寵賁駢珠知爲河北之相家且接江西之宗派欣逢若士何啻似人惟是過情之褒殆非望賜之意它人不如同姓願聞拔薤之規終日雖則七襄莫稱投桃之報

回合同王將仕

茲蒙寵顧見畀雄文竊窺四六之工良重再三之

感恭惟某官人門具美地位夙高淹回筦榷之累
培益事功之會某過勤獎予彌切兢慙徒勞篋笥
之藏莫效襜褕之報

回王進士

伏蒙紆顧寵賁長書味藹如仁義之言知賢者深
遠之慮宿蠹正難於驟革頽瀾未易以亟回苟有
祝規更希忠告區區衷曲續續面陳

回黃將仕

伏蒙下顧損賁長篇知宗派之由來信家風之不
墜見似人而喜真足慰蓬蒿之迹和此君之題會

更洗箏琶之俗

回王進士

茲佩高情見貽佳句歌刺史之頌愧非西京二千
石之良繫諸侯之風乃合召南十四篇之數報於
何有藏以爲榮

回楊貢士

伏以樂正論士而升之末皇請益公等何見之晚
也忽辱鳴謙非所宜蒙願竊有復恭惟某官詞章
炳蔚器度端溫得意狗監之官肯輕進取子雲羽
獵之賦行有吹噓試觀屬辭比事之文足見發策

決科之學某濫分守印獲託士鄉非浮橋之魚迫斯可以見矣哀涸轍之鮒忠焉能勿誨乎

回蘇祕校

材

吳蜀萬里夙知益者之多聞蘇李五言良愧倡焉而寡和近古之三信在得名之雙謂何地下日月光應察驥箱之服江空歲年晚誰爲馬口之銜

回史機宜

大異

一門三秀未見長公之波濤七言五章始窺幼婦之機杼喜故人之有子爲老成以賦詩但深巾衍之藏莫效瓊瑤之報

回程祕校

以南

辨蘆服之獄夙知績陰騰之功謁筵本之規未及望陽休之色有勤枉駕更賁屬辭伏惟某入德裕乃身世濟其美待時藏器冠蜀都沈冥之珍它日趨庭寔漢朝方正之學若爲公等之見晚真覺我輩之厚顏某未皇款門先辱傾蓋自衛尉將軍之宿契是可通家藉翰林墨客以報章別圖問政

回見任官袖賀

承流支郡曾微牧御之方出節本朝誤被將輸之命已伸免牘亟奉俞音敢圖銜袖之書特枉編鍾

之奏恭惟某官風猷俊茂天韻碩膚齒牙秋露之
甘手筆春雲之藹噓物以氣可回燕谷之溫贈人
以言何翅楚珩之重遂令載馳載驅之任猥及不
狩不獵之夫某畏此簡書蕭然疲役某水某丘某
樹願歸遂於釣遊我任我輦我車希別謀於咨度

回史秘校公誨獻策

迷日五色智良愧於失人置水一盂惠足占於好
我屬辭爲教陳誼益高恭惟某人直哉史魚飄然
司馬遐想六王畢之作必無萬物茁之疑大樂正
詔王升諸宜登春講諸弟子隨臣久矣竟坐冬烘

敢謂愛忘不加督過有來論事益見憂時三言非
無益之談鑿鑿皆可行之策顧恨挈瓶之守不敢
越畔而思前茅中權今皆鄉人之善者積薪上寢
自可纓冠而救之幸疾其驅且忠以告某一麾乃
出再鼓而衰磨牙殺人未覺早還家之非計泣涕
陳策何待夜前席而後言

回楊普州

伯雨

袖詩啓

千古在前萬古後僕安知栗陸之書六字常語一
字難公真得柏梁之體所慙佳句適重愧情恭惟
某官氣抗岷峨文濯江漢子雲河東之賦天自吹

三九
嘯伯起關西之聲家傳清白所居民富而畏人知
行登鵷鷺之班安用蚍蜉之援金鑾論事之語何
至我哉釣天無人之悲今召君矣


回趙進士

大正

大率郇公之翰知爲韓國之家社稷世臣自合襲
山河之爵箕裘夙學亦應遙俊造之班茲窺筆下
雲煙可見曾中之湖海願安承教不成報章

梅亭先生四六標準卷之十二

梅丘亭四六標準



合

內閣文庫			
書號	漢	11742	
冊數		19	7
冊數	圖	3	5

梅亭先生四六標準卷之十三

科舉

補中附

謝及第在後

謝得解

丁卯

仰破屋而抱遺經嘖會心之無幾裹龕繒而隨舉
子嘻免俗之未能解后吾味之偶同摸索此君之
小異欲棄雞肋復美羊腔人驚喝盧得雉之危我
抱志目中眉之愧嘗謂選舉所以籠豪傑安知亦
足銷豪傑之心場屋謂之典賢能或者疑爲老賢
能之術士任重而道遠辰去速而來遲鄧高密願
效尺寸之心笑人寂寂褚彥回少過三十之念使

已賢賢蓋欲乘感會之風雲豈堪送瀟灑之日月
如某至愚不肖甚賤且貧每懷萬物皆塵土之思
頗念吾道非曠野之物年當五歲日記萬言實希
蹤楊文公之辭章復妄意晏元獻之科目莫能送
上安得熱中付甲子於泥塗逐庚癸之飢渴君門
不可以徑入法當從試於有司夜光屢失之暗投
或是晚成之大器雖杜陵許身稷契之意誰肯信
之然草廬自比管樂之心恐不免爾吟高軒過羅
胷謾詫於星芒說古戰場過眼還迷於日色五隨
秋試例困冬燈翳翎觀百鳥之翔回首覺萬牛之

重無能辨璞只合更刀脫漢賦辭楚騷雖依依而
未忍觀魯史知周典幸歷歷之可明技癢爲之途
窮甚矣求田問舍已破除湖海之豪應舉覓官又
勒回山林之駕或謂餘勇猶足先登及工歌鹿鳴
之三乃夢踐飛翼之八芳杜厚顏薜荔蒙耻願一
洗之葦菹盈室荃蕙爲茅由來久矣要之借汝腹
中過耳又何山人跨下慙乎鵬怒而飛鷲匿則擊
是亦細事無足多言唯是吾皇頒詔舉賢之時
實以今日多事得人爲急裴晉公之解韋釋布正
淮西盜起之時韓魏公之發策決科乃天聖日升

之始有益於國無競維人感人物之眇然嘆江濤
之如此四郊多壘士之耻也萬里長城國有人乎
宜拔實才入充歲貢不應庸下亦在選中伏遇某
官持刑明允已清碧草之扉畫諾從容復入紅蓮
之幕茲獲聯於薦送何謬及於單微云云某敢不
高束三傳精研一經思游夏不能措之辭條舒蕢
所未陳之策謹按直筆猶足誅未死之姦諛稍遂
初心誓不志平生之溫飽

縣補魁中謝縣令

聖經賢傳拍未究於數千遂序黨庠首辱推於第

一其細已甚不足乎揚然累土乃九層之階故積
律自一黍而起況是萬家之縣利用百篇之書由
鄉校以發聲榮仕途之接武至如直筆見謂孤經
前輩罕用此以下惟後學遂束之於高閣豈知數
百世盛衰之監具在萬八千褒貶之言孫弘慙而
謝鄉人丈夫淺矣仲舒褻然爲舉首吾道非耶某
甲志無奇丁年逾邁無端讀書已墮左計登高能
賦更負悔心手縱敏於八義眼易迷於五色造化
無功於筆補瑕疵皆得而毛吹用是息黥倦於取
刑蠹書叢只麟史在焉遂偷白日之閑竊考素王

之旨筆則筆削則削頗知齊晉正謫之情信傳信
疑傳疑仍見公穀婉裁之趣亦創通於大義豈盡
達於微言長恐畫虎之不成必至屠龍之無用自
惟鑄錯孰與訂頑屬聞君子之弦歌將興春誦咸
謂有司之衡鑑莫遯秋毫聊爾逢場豈其定霸妻
非具錦果聞其後播揚糠粃不意在前謂我不堪
於公何有伏遇某官以魯禽父作楚縣公妙割無
雞牛民自得於桁楊之外空弦落狐兔士亦慙於
櫝楚之威有懷桑椹之好音還舉棘闈之故事且
從隗始以善鄭來某敢狃近功遂忘遠業玉川破

屋而已矣當益抱於遺經武城得人焉耳乎請憐
陳於故事西府先生之在吾泮賸有菁莪東閣郎
君之稱其家可無桃李胡不招諸生而立館下從
而養弟子以教國中盡拔十得五之功必有濟以
上酬以一當千之夢寧謂秦無人

謝成都解頭劉省元

應起

制春秋之義傑出妙齡貢鄉曲之英袞爲舉首未
遑贊慶過辱修辭恭惟某人青藜故家碧梧雋質
被孟母三遷之教獨抱遺經當陶舒二八之年創
通大義遂魁里選行冠臚傳某何預升賢亦蒙聖

謝愧游夏一辭之莫措但知頂戴於名經慕回路
二子之與言更冀潛心於大業

謝成都解元五十一人

恭審論秀貢英策名偕計少城百重列隧自應炳
井絡之靈後賢五十一人夙已載華陽之志茲應
元年明先聖之詔式副吾皇紹烈祖之期伏惟
某人屹自岷峨濯以江漢相如七經之授不專靡
麗之辭子雲四賦之工蓋有湛深之思茲並登於
天府聞允愜於月評某未遂納交過勤委贄客星
入斗恐當回八月之槎魁首枕參尚及窺五雲之瑞

回臨安江解頭

克家

遺經究終始拍洞識於數千考官敢瑕疵擢宜居
於第一雖知有無德無怨之語然可追不公不明
之嘲何煩摘文更加摧謝恭惟某人傳家忠孝餘
事文章安夏攘夷聊復道威文之事發凡言例又
能措游夏之詞空萬馬以皆瘖戴六鰲而爲首其
義則竊取矣幸不辱天府之書盡心將親覽焉尚
幸聽雲門之奏某慙無識鑒濫主文衡掣鯨鯢於
碧海之中僅塞直鈎之責對龍蛇於丹墀之下願
無曲學以言

謝解頭景 簡文

屢入澤宮聞夙擅春秋之學褒爲舉首喜可塞月
旦之評有勤厲辭良高陳誼伏惟某官學濟世美
教自母慈景子君臣之大倫久於舒究仲尼筆削
之微意何止創通當再進再卻之餘厲萬選萬中
之技楚雖有玉正恐在三獻之餘秦豈無人其誓
告羣言之首某濫叨勸駕愧闕贈鞭先十二以犒
師已窺肯綮擊三千而徙海尚見扶搖

謝衆解元

貢郡國之英濫修歲貢詢鄉曲之譽喜協月評何

勤厲辭特枉抒謝伏惟某官學窮根柢文識波瀾
插架五千耻爲無用之蠹累某十二迄承若掇之

蛎

張炎
省元

用百篇坦然之書占七人作者之列

高拱
辰省

元

茲提麟筆之孤上應鳳苞之九

句龍道
省元

茲策彫

蟲之工竟登乘鴈之數有司論秀免不公不明之
嘲國家急賢望斯謀斯猷之入某過勤委贄何與
提衡三魁天下之儒在加意耳五靈王者之瑞尚
寓目焉

回陳上舍 伯鳳

相如入室蜀賦自工張叔詣京漢都增重有勤曳

履且辱鳴謙恭惟某人江漢載英岷峨擢秀子昂
始高蹈信有雲仍季方難爲兄夙高月旦比者齊
魯之賦粲然虞夏之庠志日中眉屈居曰俊曰造
之冠擢角拔齒粗免不公不明之嘲茲蒙四六之
貽良重再三之愧某頃從化闥獲讀阿房吹河東
以上天幸窺吐鳳圖天南而擊海更願培鵬

回水丘先輩謝解

衰

考其行藝恐遺天府之賢擇乎中庸偶恊月評之
望所謂得子之是賴少逌有司之不明敢圖謙摛
更加巽謝恭惟某人殖學有裕揆才不貲曲禮三

千得恭儉莊敬之教重言十七非瑣碎排偶之詞
茲歌鳴鹿之三遂賦良馬之四強學待問不難得
祿以得名正心脩身諒必踐言而踐行某摩挲俗
眼邂逅譽髦何勤纒履之臨更垂街袖之贈洗風
塵之袍袴愧少緩於報章對日月之衮衣願更思
於長策

回趙先輩

子直謝解

登于天府正恐負賢能之書採之月評幸不失鄉
曲之譽何勤私謝更費雄文恭惟某人學深百篇
氣蓋諸子不但勤簡編之燈火蓋亦富師友之淵

源浩乎沛然久已喧京師之價論其秀者固應拔
俊造之羣茲歌鹿鳴之三果空驚鳥之百某濫賓
計吏冒主文盟考十七之重言幸逃迷眼勉三千
之獨對更望盡心

回武岡新舉蕭漢龍

詢鄉曲之譽未遂承顏獻賢能之書忻聞舉首有
來委質益仞鳴謙恭惟某官巫水之英斗山其秀
深灝灝噩噩之學究明明穆穆之源呂侯之辟三
千既知與義肅何之功第一宜稱名家幸益窮上
世之遺書庶亟對皇帝之清問某濫叨涉筆何與
損衡聞東海生之名喜先鳴於雞口養北宮黜之
勇願拭目於龍頭

回新舉王道明

采芹論秀夙聞能賦之聲撤棘登名果中賢書之
選未皇走賀猶辱謝牋恭惟某官家學有源鄉評
甚臚擬靈光之作久負逸材奏混成之篇行占遠
器茲步漢南之獨遂空冀北之羣鵬擊三千更觀
變化龍飛九五亟快依乘某不武之資斯文何與
一第溷子未足見志士之榮三釜及親願以爲執
事者勉

回免舉士人謝啓

樂正論秀而升諸得時則駕公等何見之晚也博我以丈鳴謙尊光擊節降嘆恭惟某官舊穿楊葉新躡桂叢鵬怒而飛九萬里風斯在下龍潛以躍三千字日固未斜惟時懋哉遐不謂矣某已稽掃榻偶失迎門子來見我乎良感贈言之繾綣吾亦欲東耳尚容拭目於騰驤

回免解杜省元

論定秀士之賢者久欲納交不見諸侯若小然茲勤委贄文旣工於儷六雅復許之肄三恭惟某官

句似少陵學如元凱牧之能賦宜高擢於唐科子夏直言盍亟登於漢殿公等安在主上喟然從先生者七十人有勤私淑搏扶搖而九萬里會即高騫有如骹骹之文何辱黜揚之巧某聿來和義深願友仁一話一言固已可觀於竒崛三熏三沐尚圖續欵於清揚

回試官袖啓

某伏以獻賢能之書有嚴春貢登文章之錄來主夏盟旣爲國以得人更以文而博我恭惟某官學探宏奧味別澠淄夜凡跋紅寧慮三條之燭盡寒

窗穿碧豈容五色之眼迷提玉尺以裁雲倒珠胎
之貫月搜阿房之賦料亦焦心論石渠之經諒多
拔角春秋十二已歸此日之權衡禮樂三千何惜
當年之衣鉢某茲承撤棘幸遂識荆思飢螽蝨葉
之聲悵難尋於舊夢寫號食螽濕薪之景尚願聽於
新篇

及第

回王省元

曹謝取中

觀春秋之林潛心久矣登文章之錄爲首褒然足
愜公言何勤私謝恭惟某官深於蓄德餘以績文
束五傳而抱遺經獨明大義外四夷而內中夏洞
究微言果以海內寡二之才出當天下第一之選
義則竊取矣可逭有司之不明來不亦樂乎更幸
斯文之未喪至如榮進之素定何待抗聲而自陳
某偶綴蟲官預窺麟筆求珠而徑寸先得自賀其
遭跂織而七襄不成未知所報

回何釋褐 大圭

中的璇魁解韋壁省十九年無全牛之刃頓見異材九萬里運化鵬之程實開遠業恭惟某官學有源委行無瑕疵曲禮三千富春誦夏弦之學園橋億萬高月書季攷之功果收傑出之科亟被非常之渥榮進素定無負明天子之殊知要路在前自有鄉先生之近比某濫叨倚席例沐投瓊壽知武故厚之敢爲諛語堅於愈同業也敬誦祝規

回郭正奏

應

王正奏

已之

策名外省趣對中宸三外風塵率聚五星於十月

六丁雷電迄搏六翮于九霄得賢之稱通國以懌恭惟某人箕裘家學主壁鄉評讀百篇科斗之文夙研奧義及重闡慈烏之哺遂擢巍科某人夙堅雅操獨抱遺經瀘水七禽轉蓬不嫌於地遠沅江九肋擢桂遂破於天荒諒加強學待問之功式寃正主庇民之蘊某誤蒙渙號濫主坤文穎人稱之曰門生既聞耳矣仲舒褻然爲舉首尚拭目焉占謝惟深敷宣罔旣

回嘉定張正奏

庚仲

奏賦蜀都登名漢殿西望太白固疑有沉冥之珍

東越王津乃今得曄曄之秀公言甚愜私謝何塵
恭惟其人岷峨之英江漢以濯學皆齊魯箕裘殆
張叔之家文麗卿雲鼓吹有平子之作嘉魚固出
於丙穴顧兔迄變於郊年鼓三級以先登及雙親
之未老龍墀之對三千字更幸勉之捷爲之磬十
六枚自此升矣某幾迷五色幸放一頭吟號食蟲濕
薪之詩何幸快風塵之洗轉走馬看花之句願亟
乘天地之寬

回辛正奏

守謙

張正奏

東寅

摘藻奏名集英趣對毛穎封於郊地開蟾蜍入月

之祥雲夢吞於子虛展駟馬題橋之志恭惟某人
玉津毓秀磬水蜚聲

辛云

周太史之雲仍宜箴王

闕魏佐治之風烈盍引帝裾

張云

遙遙張叔之家

學固同於齊魯巖巖孟陽之裔銘遠綴於岷嶓遂
掃三峽千人之軍上輔五星十月之聚九萬里風
斯下已開鵬海之程三千字日未斜無負龍墀之
問某竭來石郭獲讀阿房說古戰場幸免眼迷於
日色吟高軒過尚幾手決於天章

回類元唐正奏

應龍

學者發凡言例多違舊章大夫精心致思衷爲舉

首幸公言之惟允何私謝之敢當恭惟某人大江
炳靈通泉噴薄能賦如勒夙擅詞章學易於都更
深經術究遺經於獨抱會太義於創通文成數萬
拍數千首先鳴於雞口臣書第一無第二今徑躡
於龍頭惟功名留久遠之看即溫飽非生平之志
察牛堪之意既不違俗而取名知顧郎之恩更期
蓄力而秉志某初微風鑒濫佐星堂青袍白紵之
糊名已多迷於方叔紫磨黃金之定價願無負於
長公

回郭正奏

仝

闕郭公之疑昔嘗恐春秋之罪我道齊威之事今
始論秀造而告王愧余五色之眼迷遲公十年之
身到恭惟某人岷峨世載江漢淵回塾林宗之巾
夫子步亦夫子老汾陽之考中書乃不中書信大
器之晚成嫌脩門之徑入秋風退鷁坐觀巴火之
九鑕春浪化龍始透禹門之三級願培鵬背徑跨
鰲頭某濫佐星堂安知風鑒東之高閣知無用公
穀左氏之文造在大庭尚聳聽晁董公孫之策

回曹正奏

策名上第趣對中宸司徒論秀而升諸幾迷五色

公等何見之晚也亟放一頭幸愜公言何勤私謝
恭惟某人振鐸昭穆子建波瀾列仙甚癯聞素甘
於藜藿良工獨苦善致養於棘薪茲遂一鳴以驚
人式副三遷之教子曹交假館所謂求之有餘師
仲舒造庭佇見褒然爲舉首某竭來五壘得讀阿
房青衫當綵衣至羨封人之有母丹墀攄素縕更
觀謹論之告君

回曹正奏

二年滿戍鷁回首以東歸再命作州臺朶頤而西
碩有勤賀語祇發愧情恭惟某人春藻吐葩秋竿

秉節一第涵子聊償戀闕之丹心三金及親足慰
在堂之白髮猥承妙製見遺陳人某藏去爲榮已
知所賀踟躕五馬良慙出谷以迂喬縹緲孤鴻但
願送江而入海

回王正奏

正寅

一第直涵子耳安用謝爲幾日來見我乎更勤言
贈爲之三復佩此一謙恭惟某人世載其英學優
則仕紫電將軍之庫尚有典刑紅帶宣義之家豈
其苗裔 奏河東之賦 空冀北之羣某偶佐文
衡獲觀筆陣於我無怨亦無德但吟坡老之詩有

司以公不以情愧乏昌黎之序

回張正奏

申之

策名外省趣對中宸知我者春秋罪我者春秋幸
已酬俯拾之芥先進於禮樂後進於禮樂安知非
居上之薪恭惟某人家傳一編曾藏三篋遺經獨
抱精於措游夏之詞大義創通較若辨威文之事
迄膺衆選進以言揚某偶綴文闡獲觀筆陣辨棟
樑於七年之後幸免遺材器根柢於萬乘之前更
觀拔萃

回特奏名李學正

鳴鳳

射策登名拜恩諾仕公等何見晚也而迷其邦論
定然後官之其有所試伏惟某人力材瓌特蓄學
齋深太白有文章之光宜早登於唐殿仲元豈華
藻之力顧久滯於蜀都有來桑榆之收不孤芹藻
之采富貴必從勤苦得少酬鐵硯之勞功名亦在
老大時行對蒲輪之召某未皇走慶猥沐貽箋春
草隨袍等是天公之雨露秋竿有節相期歲晚之
冰霜

回王特奏

相梧

顯膺恩紀榮遙儒科東隅而收桑榆雖負心期之

壯北山之有桎梏足爲眉壽之光恭惟某人波瀾
老成魁壘耆艾如尊乃勇合爲叱馭之忠臣薦褒
有材宜即運籌於聖主何踞鞍之矍鑠始奮袖以
低昂亮無恨青衿之枯行即膺紅帶之寵某未皇
賛慶猥沐貽牋拔薤而規龐參願聞忠告裹蒲而
迎枚乘尚見詔除

回特奏侯新恩

曾榮

偕計該恩登名筮仕半世就舉選良忻叔起之未
衰朝廷少舊臣更喜君房之肯出伏惟某人抱材
膚碩蓄李弘深風翮大鵬本有垂雲之翼天閑老
驥不爭暮日之塗器固大於晚成召亟膺於朝奏
魏有隱士實由年德之高漢迎太公亦籍老成之
力某未皇謁賀猥沐貽牋愧無珥崖翁屈留賢者
近識峨眉老尚問政焉

梅亭先生四六標準卷之十四

生辰

代胡侍郎謝朝士賀生日

生我劬勞撫六弧而增感俾爾耆艾捧連璧以知
慚恭惟某官厚德嘔枯高詞發藻五十之年過二
應憐坡老之衰三萬之日無多欲擬茶山之老華
其斑白飾以青黃人情欲壽欲安知所蒙矣君子
善頌善禱何以報之

代謝朝士已下

五十之年過二孰記衰顏什伍之星有三猥勤善

頌頤方思罔極之德何敢當不類之歌鼓弄明珠
藏但深於十襲噓呵凍筆報有愧於七襄

謝黃侍郎伯固生日詩

絳縣老人之生甲擁翠節以知慙黃絹幼婦之受
辛感碧幢之委重愧踰垣之莫避且返璧之未能
恭惟某官帷幄近臣詩書元帥怜生我勞瘁之旦
有愴蒿莪歌俾爾耆艾之詩使堅松栢勞以春天
之尊酒副之秋月之兩章殆念苞栩憇棠之陰曷
稱飛芻刻楮之役某平頭六十関慮萬千思玉局
老之養生安得還鄉而騎鵠從金華仙而學道或

蒙叱石以爲羊

謝魏侍郎了翁生日詩

久生不學蹇蒲柳之先零初度無能困樵蘇之後
變過辱兩章之秋月見期千載之春風留歸壓於
魚舟難捲還於鯨錦恭惟某官拍肩諸老畜眼一
人天不殛民將謀及詩書之帥人能棟道恐宜在
條理之科閱六十服戎之夫窘千里餽糧之役我
辰安在敢祈牛斗之能神夫子言之或免螻蛄之
俱腐某屬有國故且無親存方茲疚懷於劬勞只
得痛謝於頌禱先生與之言則對參乎奚避席之

疑小子何莫學夫詩武也請卒章之受

謝諸處監司賀生日

我年六一真成薄頽景於西山春餘半分未許託
老人於南極茲屆劬勞之旦敢當褒借之詞恭惟
提刑六轡澄清十行炳煥云運使斧繡光輝珠璣咳
唾寶者告以善揆亡苗亡害之初愛之欲其生有
爾熾爾昌之詠所愧泥塗之絳甲要非光焰之白
庚某有味其言不知所賀君子謂之善頌相期食
蛤以踞龜使臣不敢與聞但願放牛而歸馬

謝都大賀生日詩

匪我伊蔚正緬思罔極之天以羅施松辱許共後
凋之歲然頭白走雪山之戍覺鬢青負寶蓋之峯
幸聯公子之婚姻見假長庚之光焰恭惟某官糝
糠團鳳縵策翔麟一雄將十萬之雌識神駿於驪
黃之外六經佐三尺之法辨澠滯於兔褐之中眷
此陳人寵其初度正欲歸耕於
詎思入對於
延英某有味其言不知所報絳縣老人之生甲花
六十以既周黃絹幼婦之受辛椿八千其安用

謝都大賀生日詞

皇揆余度已勤溢美之言子與人歌更作新涼之

三四一
賀輒駢四六仰謝再三恭惟某官學廣文多筆精
墨妙歌鍾二肆和諧魏絳之聲駭牝三千教習開
元之舞寬望秋先零之念賦陽春寡和之章某重
拜珍投宛成珠貫贈以綠綺愧莫報於雙南寫之
烏絲惟謹藏於十襲

謝呂提刑壽詩

泥涂絳老正自疑甲子之年霄漢繡衣猶記揆庚
寅之度鼎來好語賁飾孤生恭惟某官高誼薄雲
長毫裁霧舊游楚地未寒車馬笠之盟今戴蘇天
尚念斗牛箕之宿雙節併風而幪雨兩章對月以
偕星某遠守石龜深慚玉燕報德罔極劬勞但感
於蓼莪有功見知勞來請歌於杖杜

謝提刑

蕭艾賤生桑蓬初度但切劬勞之感敢當頌禱之
勤恭惟某官盛德嘏枯高文發藻旣旌厚意又歲
多儀區區私情拳拳戰佩

謝呂運使賀生日

霄漢繡衣遷轉木牛之運瓊瑤錦段寵光芻狗之
陳揆初度以何榮受微言而增愧恭惟某官脩名
揭日高誼薄雲駕車馬笠之盟不挾貴不挾長問

斗牛箕之宿無以名無以懷七言撮白玉之舟一字重黃金之價某身方受察心已懷歸使臣必諮於周惠而好我人情莫不欲壽更以贈君

謝生日投詩

代何月湖

彼其之子鵜積愧於在梁我生之辰牛豈神於奮角茲勤善頌徒發愧情恭惟某官藻掞天庭句穿月脇怜絳人之甲子混在泥塗記孟陬之庚寅春焉遲暮特華其老相贈以言某取數既多餘年無幾欲報罔極之德已廢蓼莪敢當不類之歌請辭假樂

代謝生日投詞

皇覽揆余初度漫皐江離子欲養親不存但悲風木茲勤妙語徒發愧情恭惟某官脫時世粧續古樂府溫柔重厚有二雅之正言婉麗清新無六朝之俳體惠而好我何以報公某愧乏辰猷空踰亥首聽陽春之寡和爲調彌高享肆夏之升歌請拜其細

普謝見任官賀生日詩詞

伏以小人不知紀年恍近平頭之六十君子爲善頌禱仰勤厚意之再三受言藏之有感多矣恭惟

三十七
某官英詞漱潤盛德噓枯愛之欲其生忘泥塗之
爲辱賢者告以善任牛斗之不神所慙雌甲之辰
難擬長庚之夢某未能返璧又乏報瓊三嘆而音
有遺良服朱弦之疏越千歲而眉無害還祈黃髮
之壽胥

謝學職十四人投詩賀生日

伏以召南之詩十四固足繫騶虞之風魯侯之歲
萬千何以當泮宮之頌良見維桑與梓之敬然增
匪莪伊蔚之思伏惟某入學上岷峨之英江漢以
濯他年事業半雲閣之功臣此日詞章倍建安之

才子怜香山艷陽之過九信眉山近古之有三勁
氣芳詞高文大冊序所爲作者之意陳誼尤高相
接以粲然之文過情是耻某繭然蒲柳感此桑蓬
人情莫不欲壽欲安生則烏可已也君子謂之善
頌善禱忠焉能勿誨乎

謝潼川提刑謝太博賀生日

伏以問甲辰之雄木旣遄諏度之載驅守癸亥之
捷爲真覺棲遲之萬狀猶蒙佳句見貺陳人恭惟
某官高義薄雲英詞組霧牛頭衮衮詎止隨世界
之花象耳耽耽猶記生池塘之草曲怜苦李承藉

甘棠皇揆余降庚寅紛吾有此我與君皆丙子欲
並生哉其獲守蕭規敢當唐律思其人愛其樹何
如對秋月之兩章誦其詩讀其書安得共春天之
尊酒

謝鄉官寄居士人賀生日詩

伏以匪莪伊蒿增劬勞勞瘁之感維桑與梓辱熾
昌昌大之詞何以報木瓜之三用是光蓬矢之六
恭惟其官嘸枯意厚發藻才雄半百過九年笑白
傳艷陽之已老分寸落千丈怜韓公牛斗之不神
贈汝好辭揆余初度其安知燕喜但笑龍鍾一唱
三嘆而音有遺難和朱弦之疏越萬有千歲而眉
無害還祈黃髮之壽胥

謝潼川知府趙監丞賀生日詩

伏以男子始生有負大人占之之夢我辰安在敢
當先生長者之褒有愧微言莫酬隆眷恭惟其官
爲善最樂大雅不羣發更生寶苑之書浩如淵海
出長吉錦囊之句迅若風檣有怜桃李之一株重
感桑蓬之六矢吹以七言之律重於雙璧之貽其
夙荷甄收竟成椎鈍老人無一子誰知絳甲之泥
塗仙官勅六丁長倚白庚之光焰

謝列郡太守以上賀生日

小劫六十之風雨齒邁二齡大川三百之波濤心
驚萬里揆余初而增感俾爾壽以何居恭惟某官
云云河漢淵海富卿雲舒向之儲月露風煙陋廬

駱王揚之作憐絳縣老人之生甲贈黃絹幼婦
受辛某仕則慕君老當佚我不俟駕固將朝也良
感徽言射以弧受乃負之敢忘幼志

謝通判以下賀生日

六十二歲之樂愧無白鶴之新居萬里幾年之歸
眺念碧雞之老客皇揆余度何及公言伏惟某官

盛德嗟枯英文揆藻念苞栩之使雖叨四牡之還
感蓼莪之詩無復三牲之養爰於布帛贈以襜褕
某六轡既均二節以走夙興夜寐亦希無忝於所
生日邁月征尚祈不諫之亦入

謝王制參等八負賀生日

王制參

翊

丁制機

銘

蒲制機

仲乙

楊制幹

異

陳制幹

曾

宋制幹

拱

王撫幹

三桂

王鈐幹

澥

四方有志愧孤負於桑蓬八公同辰辱褒期於樗
櫟固辭不獲厚意何居恭惟某官合志同方集思

廣益依紅泛綠培懷黃拖紫之程取白嬾青忘看
朱成碧之醜揆余初度贈汝好詞某返璧未能報
瓊焉有觀我生之進退真成維谷之羞俾爾壽而
熾昌曷副如岡之頌

謝丁制置壽詞

轉粟青天之上牋詞來謝於青天射蓬白雪之邊
度曲敢當於白雪有美朝中之措見貽方外之游
恭惟某官遼鶴高標庖牛餘刃春風楊柳之句宜
拍紅牙夜月梧桐之篇何關白髮某既聞耳矣又
寓目焉適有高峯綠雲之行別圖公堂披霧之謝

謝丁制置賀壽詩

塵外花村已辱春風之一曲雪邊蓬矢又勤秋月
之兩章拜君貺以何多揆余初而增感恭惟某官
詩書元帥翰墨宗工歷井捫參憐長庚之伴月斂
箕挹斗笑韓子之生辰既貽一倡之三復畀七言
之二拊躬感槩拜賜駢蕃某政爾避喧又蒙委重
自爲青城客愧擬住之未能贈我翠織成欲捲還
而安敢

回賀生日

戊子

生我勞悴揆初度以增悲俾爾熾昌受徽言而重

愧嘗已戒門而籙壁猶蒙擲地以鏗金恭惟某官
厚德嘔枯英文發藻憐香山花前之歲正可閑行
吟老坡月下之風不妨同坐特捐妙語見寵孤蹤
某自笑朱愚老爲黔佐問昌黎之南斗乘除難挹
於酒漿歌靈均之東皇偃蹇謾陳於竿瑟

回武官賀生日

勞我以生却青雲於垂上愛人以德歌白雪以彌
高感及爾同僚之私增揆余初度之愧恭惟某官
共武之服克壯其猶談笑詞鋒足當八面緒餘筆
陣亦掃千軍有憐桑弧蓬矢之辰見致松茂竹苞
之祝某不能返璧又乏報瓊人情欲壽欲安尚徵
餘比君子善頌善禱但耻過情

代回曾運使

生我劬勞廢蓼莪我而興感俾爾耆艾攬茹蕙以增
慚敢圖高情見畀妙語恭惟某官文得家法句通
古人怜牛斗之不神了無善狀因參辰之相比借
以餘光摘藻粲然厚甚某不知所賀藏去爲
榮八千爲春盡自之五十而慕但激終身
之思

代回安撫趙尚書

師畢

賀生日

蒲柳既凋又屆始生之日蓼莪罔極滋深弗洎之
思特達高情勤渠下問置慚無所懷感有之恭惟
某官曳履公餘鳴謙私惠憐絳人之甲子混在泥
塗記孟陬之庚寅撫其遲暮函牋甚寵臺餽孔殷
某祇佩眷存但深銜戢取公竹馬愧請謝之未能
投我木桃復報章之不稱

代回衆官賀生日

皇揆余以初度內美闕然牛與斗兮不神善名安
在過勤妙語祇發愧情恭惟某官嬉笑文章游戲
翰墨摩娑銅狄欲相許以久長刻畫無鹽殊不知
其老醜此意厚甚而我謂何某返璧未能報瓊無
有此乃相親重道拜而受之何敢當不類歌顏之
厚矣

代回道士賀生日

勞我以生能嬰兒之除滌游方之外笑老子之婆
娑佳句惠然私情媿甚恭惟某官簸弄明月頡頏
飛霞拍石鼎於爐中便成聯句用榴皮於壁上豈
不中書見畀名章有光初度某偶差一念獻笑諸
公飲馬麾蛟望崦嵫而勿迫踞龜食蛤與汗漫以
相期

代回僧賀生日

拖泥帶水若爲還我之未生賞月吟風更愧情人
之相訪恭惟某人句中有眼筆下無痕應憐生朝
認本來之面目雖脫死籍當自揣於頭顱特贈以
言足華其老某似僧有髮在俗得禪庵外松枝覺
歲華之難數庭前栢樹或祖意之少分

回張縣尉

煥

五十學易闕然觀我之生七步成章厚甚揆余之
度顧切劬勞之感敢當頌禱之私恭惟某官簪笏
名家弓刀小隱擬姑熟之十詠肯爲東野之酸師

廬陵之諸賢尚接江西之派值分鄰燭見貺門弧
某德旣多涼官仍獨冷弟子有笑于列者雖未見
治鄉人皆好之何如莫知所報

回同官預賀壽詩

生我勞瘁隔彌月之實訐俾爾熾昌荷祈年之孔
夙感高情之見厚豈善頌之敢當恭惟某官義篤
官聯禮隆僚好怜絳縣老人之辱越在泥塗加黃
綃幼婦之辭寵其遲暮及差科之未動勞朋友之
先施某旣感且慚罔知所報人生不滿百孰非欲
壽而欲安天下達尊三各願彌高而彌邵

回鄉官上壽

庚寅

伏以我生之辰與王瓜而同日物出於甲柰雌木
之非材何勤黃絹幼婦之辭更爲絳縣老人之祝
恭惟某官英文發藻厚德噓枯五十七之歸遲每
怜白傳二千石之強直俯念朱卿假以徽言寵其
初度某不知所賀藏去爲榮吾黨小子之斐然乏
瓊琚之效報是邦大夫之賢者希藥石以相生

回謝同官投詩

五十七之歸遲愧見唐人之句萬有千之無害敢
當魯頌之歌何勤黃絹幼婦之辭更爲蒼顏太守
之祝恭惟某官薄雲高誼翻水成文及爾同寮喜
參辰之相比揆余初度笑牛斗之不神贈以徽言
極其善頌某自憐雌甲難問長庚匪莪伊蒿俱感
劬勞之罔極有杖之杜敢希守衛之勤歸

回士人投生日詩

生我劬勞曾莫報昊天之德俾爾昌熾詎敢當泮
水之詩有勤黃絹之辭但重朱絃之歎伏惟某官
文如翻水思若涌泉憐白傳五十七之齡已遲歸
計比絳人三分一之數大似疑年贈以徽言寵其
初度某不知所賀藏去爲榮愛之欲其生倍有加

三三十二
於布帛施不求其報愧莫辨於瓊琚

回三江文將仕

誦白傳五十七之詩已遲歸計辱魯侯萬有千之
頌俾試壽胥愧非所蒙願竊有復恭惟某官瑰辭
發藻瓊翰噓枯贈汝好辭磨厲桑蓬之意揆余初
度堅凝松栢之心得非愛之欲其生所謂友以久
其道某自怜單獨倍感劬勞維摩想日邊之朝難
陪雄甲謫仙尋夜郎之夢且伴長庚

回學職二十四人投詩

香山五十七歲嘆歸計之已遲凌煙二十四賢忘

歌詩之不類揆余初度懷我好音伏惟某官氣應
歲躔才堪郎省比周家八士之數價喜倍三較魯
頌四篇之文數幾用六冠以黜堂之序寵茲鯉饋
之辰小人不知紀年自甘雌甲君子善爲頌禱誤
擬長庚列磬編鍾春金撼玉某自慚一喙莫辨七
襄孰殺子產告其與之幸可免輿人之誦守得陽
公民又賢也所希篤同業之盟

回同官上壽詩詞

揆余初度終身惟切於慕親及爾同寮君子顧多
於善頌過情可耻佩意亦勤伏惟某官義篤官聯

材雄筆陣憐白傳五十七之感歸計已遲比絳人
三分一之年輿人何筭既加膏沃復借品題其目
顧衰殘難當獎予加桑弧於蓬矢之六空走四方
報綺琴以南金之雙僅憑尺牘

回衆官賀生日詩癸巳

遽伯六十之年重感劬勞於初度曾侯萬千之頌
難當褒拂之微言無容徒履以迎門正恐文書之
銜袖拜珠璣之終惠列鍾磬以成編恭惟其官直
氣抗峨英詞倒峽濯錦江之錦洗空黃綃之絲撫
琴臺之琴高掩朱絃之瑟厚同官爲僚之誼忘歌

詩必類之言使臣弗敢與聞固以王宅憂之故人
情莫不欲壽且懷祝矯舉之羞其莫報七襄但藏
十襲今日之受非也璧恐暗於投人忠告而善道
之石尚期於生我其爲感佩罔旣敷陳

回諸廳屬官賀生日五十人

生我劬勞永負綵衣七旬之養俾爾耆艾敢當錦
瑟五十之絃良感同僚之盡心曷稱高文之大冊
恭惟其官文濯江漢筆抗岷峨四牒二分洞包犧
大衍之數三章九百合公羊外傳之篇有憐揆初
寵貽善頌考華陽之志復見三州之後賢享穆叔

之歌敢忘五善之重拜其捲還不敏藏去爲榮蓋
曰外孫固荷假長庚之光焰桑弧男子已甘付雌
甲於泥塗

回魏制幹賀生日

老瞻南極違入丁出丙之躔詩夢西堂愧換甲生
申之句有勤親誼見畀英詞恭惟其官挺有祖風
卓爲人鑑老者人所敬爲近於親愛之欲其生俾
昌而熾對兩章之秋月藹多態之春雲其倚玉知
慙報瓊何有沈香吟芍藥之調詎敢與聞遠志有
當歸之心尚希愛助

回黃侍郎

伯固

賀生日

白鶴新居有顏景六十一之嘆碧雞老客無廣廈
千萬間之思敢意達尊特形善頌恭惟其官疇庸
參井趣觀房心草蟲阜螽之勞還自天子所木牛
流馬之積困哀我人斯有怜花甲之周曲借藝辛
之妙其未知淑後况敢揆初錦城早還徒仰羨夏
官之典午清溪夜發或思伴秋月之長庚

回魏機宜賀生日

糟糠之堂偶當初度芙蓉之褥猥辱英詞非所宜
蒙願竊有復恭惟其官句穿月脇筆挾天庭借泛

三令三
霞之光轉而白雪攬浣溪之水寫以烏絲所愧瓦
磚之床曷副珠璣之詠但深十襲莫效七襄

婚姻

爲顯孫通魏宅問名啓

了翁

言念二星分野適並舍於魚鳧兩家提孩許問津
於烏鵲仰甘棠之有笏愧苦李之無蹊孰固在於
地同合殆由於天作茲者伏承某官小娘子周旋
內則夙閑十七之少儀而某大學生位長孫某溫
習中庸詎達三千之曲禮况未策贊皇之名第乃
竊附公子之婚姻亦惟陪萬里之游因得合二姓
之好卜妻占八世克協鳳飛之和勸郎勤六經寔
望雞鳴之戒

爲顯孫通魏宅納采啓

言念納采問名嘉禮寧嫌於重請居敬行簡省事
固厭於兩回不敢虛拘敬將厚意必河之魴必河
之鯉亦惟采藻以采蘋言秣其馬言秣其駒更冀
刈婁而刈楚菲儀不腆別楮是陳

請媒書

言念析薪匪斧曷諧二姓之驩釣絲伊緡良借一
言之重况以葭莩之契獲聯榛棗之昏遂孫枝攀
附之榮皆媒葉往來之助

請期書

十月在策交月夙契於丙辰五日爲期吉日又符
於庚午宜其孫子宴爾室家敢修一介之尺書拱
俟八鸞之百兩


代姜寺丞

注

回史丞相府定親

相門出相方託身槐棘之陰丞壁負丞敢妄意松
蘿之附蒙以貴而下賤聘不腆之若人徼福甚榮
省心知愧恭承某官階蘭堪佩足繼史魚之風而
某女澗藻可湘粗閑姜鯉之教屈禮絕百僚之重
今好合二姓之驩君子不弛其親已敬佩魯公之
訓公侯必復其始願益綿魏國之封

梅亭先生四六標準卷之十四



梅亭西標準

十五

內閣文庫			
特四十二	一二七四二	一凡	
漢	漢	漢	漢
冊	冊	冊	冊

合

內閣文庫			
書號	漢	11742	
冊數		19	8
冊號		3	5

梅亭先生四六標準卷之十五

師傳

封爵附

賀丞相除少師

巽避公槐升魁師棘萬世策定盍徑躋萬石之班
三台色齊乃退位三孤之長寸心如此千載無之
恭惟某官厚大而裕和端凝而洪毅周拜乎前
拜乎後邁韋平父子之榮陟格于帝尹格于天
堯舜君民之業自開禧之末一麾九日相嘉定之
治十有七年於我如浮雲心本游於淡泊用汝作
霖雨身爰佩於安危既難挽鼎湖之龍乃力洗咸

池之日周勃之誅呂迎代尚觀望於軍情霍光之
擁昭立宣幾動搖於庭議未有獨運於掌上不煩
執事之顏行爲天下得人與生民立極導憑几之
命而晏然仍几輔垂簾之政而遄已徹簾三邊絕
赤白之囊萬國布黃朱之乘風雷屏息日月重光
宜神聖建道德之師見輔弼爲社稷之寶比播維
垣之命允孚巖石之瞻乃執撝謙力回成渙弗敢
基命定命正倚弼諧若曰父師少師何拘等級姑
冠班於洪化即顓面以經邦坤載物而承天蓋得
下裳之吉鼎以木而巽火實存上鉉之虛九重尊

李泌以先生四海戴子儀爲尚父黃河如帶山如
礪豈惟難拒於公珪青櫺有洞石有窻恐合紹開
於王社某夙勤坏冶自抵簡書泥塗久隔於朝紳
夢寐尚隨於賀臆輒憑魚繭之素恭布燕雀之私
亮天地而弼一人諒益基無窮之聞理陰陽而遂
萬物尚祈澤不獲之夫

代董侍郎賀丞相除少師

巽避公槐升魁孤棘奮庸而宅百揆輔茂陵十八
載之隆平寅亮而弼一人開寶慶億萬年之晏粲
明良交際動植均驩恭惟某官德鉅材全器闕用

博累卅躬行於忠孝四朝身佩於安危河決平原
力挽百川而注海風搖夏屋獨高一柱之擎天盡
返齊疆全歸趙壁金甌閑暇從容作商野之霖玉
几導揚談笑取虞淵之日與生民而立極爲天下
以得人九夷八蠻服整頓乾坤之手兩宮二聖知
扶持社稷之心肆疇巖石之瞻亟出維垣之命甫
揚成渙遽執摎謙重違再命三命之共甫轉父師
少師之拜元圭衮冕上猶恨無官以酬公夏篆通
旃公豈以辭榮而邀上惟楓陛比隆於皇祖則茅
封仰紹於先王西平有子我有臣垂光簡冊周公
拜前魯拜後濟美鼎彝某自分泥塗夙蒙甄冶臺
釐千里旣自投丹筆之書首尾八年未易復白圭
之玷茲復坦明之制但增踴躍之私黃麻之似六
經自此尚觀於蕃錫洪鈞之轉一氣更新俯振於
餘生

賀史丞相除太傅

成都運司作

師臣巽命帝傳升班七十從心公亦何心於極品
三千同德獨高崇德之紹勲叶朱衣介幘之祥增
黃耳玉鉉之重竊以傳者傳之德義不惟其官惟
其人臣哉臣作股肱罕有是父有是子若西涼淳

王陵之寵及東都旌卓茂之年雖加衡紱以盤華纓
俱匪箕裘之鼎鼐於皇 孝廟舊學越王當淳熙
丙午之壽上皇以正月戊子而進亞父今專槐之
正位有喬木之世臣父子一家兩兩齊三台之色
君臣千載重重聚四紀之間賁然綠綈之新復此
青氈之舊恭惟某官清和而任直大以方禹以功
臯以謨適全絕德絳之果霍之勇難擬脩能無敵
知儒者之真可以見賢人之德一柱障黃河之決
兩手洗白日之光三登二十七年萬機幾千百變
丙除狗鼠旋安鴻鴈之居外殄大羊顯築鯨鯢之

觀風震雨凌而棟梁自吉火炎水潤而鼎寶各調
蓋享天心非要人爵陶侃之指紋貫徹猶三遜以
滋高丁固之松夢留連廿十年之不調上念慈闈
之訓日思元老之功無官酬公維師尚父猶堅謀
抑力反渙揚姑隆絕席之班式舉載輿之典虹明
帶玉龜顧印金備衮冕之上儀增衣冠之盛事改
容而禮論道以經平淮用八千兵更酬謝傳蒼生
之志辭齊封三萬戶會尋留侯黃石之盟某久累
播鈞遐瞻巖石聳聳聽上卷之一命阻陪潭府之三
才斐然成章是以有慶乘雪邊之節傳無因拜壽

杖之尊窺天上之階符願長輔化樞之運

賀史丞相除太傅

顯拜師臣榮躋帝傳聖人惟能饗帝復歸美於重
闈太宰以禮佐王併加恩於一命實清廟之盛典
非元老之私榮昔周家既立三事之官在成王尤
遴仲父之選始命姬旦以其師保萬民繼用畢高
以其弼亮四世自茲以往稱此惟艱若西京之遷
王陵與東都之寵鄧禹雖稱異數實飾虛文惟我
孝廟之盛時夙敬越王之舊學奉卮爲壽驩既洽
於兩宮絕席隆師秩爰登於一品疇昔鯉趨於學

禮只今虎拜以揚休千載君臣聚見四十年之內
一家父子併成二萬石之榮與國咸休生民自有
恭惟某官鼎彝家學柱石世臣惟說總百官力贊
事神之勿黷暨湯有一德首明立愛之惟親相儀
南至之郊歲敬東朝之冊克禋克祀敷皇極而錫
厥庶民得祿得名受介福而于其王母二難具美
三遜滋高既力避於維垣亦何辭於命衮日月如
璧映玉佩之魚垂天地爲鑪鑄金章而龜頤一相
主乎內幾年淹九棘之班三公惟其人今日正專
槐之面是固舊物青氈之赤舄尤覺明公黃閣之

黑頭行開茅土之封式對山河之誓某夙勤甄錄
從耳聽郵音雖笄尾在虺蜮之區然馳心賀燕雀之
厦宣麻綴文德之聽身隔重湖撰著考武岡之占
公宜百祿

賀丞相除少傳

雄麻渙命孤棘升班相堯之功已書二十八載之
半弘周之化始介三公九卿之間取之甚廉簡在
則厚恭惟某官直方而大智勇且仁海晏河清藉
整頓乾坤之手天明地察鑒經綸社稷之心奏琴
瑟改絃之功贊匕鬯主器之決進律固加於有德

酬公真恨於無官矧如拔去兇邪收洪範福威之
柄且復芟夷煩亂整素王筆削之功是皆非常之
元宜受不次之賞猶且固辭於專面姑令明陟於
貳公惟時亞保之官蓋古司空之選若稽漢制專
司萬乘之宴私其在周官實任兩儀之寅亮聊不
昭於蕃錫豈盡合於元勲昔魏王再相於淳熙首
升此職故高宗獨稱於德壽謂無幾人馴正師垣
宏開壽域尚式周公之猷訓惟其有之是以似之
以觀文王之景光心乎愛矣遐不謂矣某忻逢盛
典倍激懽悰歌芘士之詩敢忘燕雀之賀夏作得

賢之頌或憐蟋蟀之吟秋

代任參政

希夷

賀丞相除少傳

冊命元勲序升孤傳三少特揖雖均爲貳公之官
四夷咸賓見時乃萬世之績君臣叶慶朝野交驩
恭惟某官明允而篤誠洪深而肅括調政化不調
之琴瑟續古今難續之鼎彝中書十五秋得賢人
可久之德闢國數百里復寧王有指之疆迄今大
寶之還詎止小球之受蓋帝王盛德之必頌獨頌
獻琛而春秋常事之不書特書得玉然皆出魯公
之力庸並垂周室之休敢圖古風復見今日宜亟

正專槐之面乃姑循次棘之階功臣封爵山河聿
觀繼世少傳寅亮天地詎足酬庸某全託一陶獲
歸三徑龜魚竊新亭之蔭亦有肺腸燕雀賀大夏
之成恨無羽翼

賀史丞相父太師魏王追封越王

代任樞密希夷

加冊元勲配祠清廟考十八侯定位之次惟蕭盡
侑於祭廷應五百年異姓之封於越肇開於封土
遂吾相顯親之願彰我 皇念舊之恩宗社同休
華夷胥懌恭惟先正大丞相文惠師王始終三紀
師保萬民湯於伊尹蓋學而臣之克同一德舜舉

三十五
皋陶不仁者遠矣允協重華宜侑食以匹休曾易
名之未稱思股肱於甘露想形貌於凌煙一卷之
書必立師矧實先朝之舊學七世之廟可觀德誰
踰烈祖之老臣徹彼土疆儼爾籩豆惟冒丕單稱
德峻加茅胙之分茲予大享先王永配椒馨之薦
丕昭異數夔掩前聞伏遇少保樞使大丞相國公
克享天心善繼人志故國非謂喬木蓋倚世臣成
績紀于太常以昭先烈用宏茲賁曰篤不忘某世
沐殊恩身逢盛事屬嬰美疢莫陪東閣之賓疇允
大邦切頌西平之子

宰相

賀鄭參政

清之

除右相兼樞使進光祿大

夫

成都運司作

登庸舊學揆序元台能自得師謹厥終而唯始爰
立作相置諸右以輔台兼總鈞樞屹隆柱石恭惟
某官兩儀間氣四海真儒淡乎如列仙之癯傑然
乃萬夫之特壘鹽太學四賦接古詩之流芹藻泮
宮三峽避詞源之水領袖貫九經之庫範模徧雙
宇之宮虎觀螭坳司存雨露麟臺鰲禁鼓舞風雷
杞人憂天馭方危於六馬虞淵取日功卓冠於五

龍學焉而後臣之政不足與間也况苞苴賄賂獨不入沂公之門且鼎鼐樓臺抑未聞冠相之第衆浩然其歸重公持此以安歸天下無如召公久當相成王之左生民未有夫子今乃得伊尹之時然萬世永賴乃可謂功使匹夫不獲焉能無耻予惟克邁乃訓千載一時天之降任是人百年幾見萬國魚頭正有關於已任十年鳳池亦何足爲公榮見伊呂而失蕭曹則知管晏之卑矣濟英衛而遜王魏此豈房杜之細耶願荷棟桴力光竹帛某一寒戍雪十暑飲冰昔周旋康成之間夙親氈坐且班次巨君之下實認履聲今聞宣黃麻之六經適尚盤青泥之九折緇衣三章知不遺於寸善洪鈞一氣亦何間於八荒子獻相國書乎往愬底虞於逢怒君遣使臣禮也終更願聽其亟還

賀丞相明堂慶壽并冊皇后禮成平淮寇
奏捷

邦慶頻仍王勲赫奕事天明事母孝新周南正始之基有文德有武功策召公平夷之績一相主內四夷具瞻恭惟某官氣塞乾坤心貫日月大鈞播物風霆不顯其流形直柄當權水火共成於正味

無妄式遄於勿藥有孚信利於涉川理身理國厥
既兩全治內治外粲然兼舉肅雍顯相而於穆清
廟消選休成而爰熙紫壇太妙嗣徽音正九重之
寶冊王母受介福奉萬歲之王卮豈謂孽臣之姦
驕敢負湛恩之汪濊楚氛甚惡動兵邦域之中漢
相有真折衝尊俎之上薄言討伐亟遂殄殲南方
之強歟北方之強歟風移俗易東夷之人也西夷
之人也氣奪膽寒風聲鶴唳不但平淮雪夜鵝鳴
更觀擒蔡信君子不戰戰必勝知人臣無將將則
誅非能人百而已千疇見兼三而施四輔成帝略
悉出廟謨近使觀其知煩使觀其能曾不陳於聲
色無事用之禮有事用之戰悉顯奏於膚公非無
敵用儒者之真孰自任以天下之重黃河如帶山
如礪疇高蕭相之功西平有子我有臣請繼柳侯
之雅某以違光範迹守夜郎揆分雖一蟻之微聞
喜極六鰲之抃燕雀賀夏豈惟免風雨之憂鴻鴈
賓秋更乞遂江湖之樂

上史丞相

從辟出蜀

西去而辭大臣誤辱再三之命東征而勞歸士竟
無分寸之功顧忘百謫之盈猶冒一慙之忍斐裁

狂簡忸布鬱陶伏念某意廣才疎身勤事左飢來
驅我遂違吾斯未能信之防年不後人已落無聞
不足畏之境徒守童烏之氣習未忘子墨之生涯
滿七除二之跳踉誠覺語言之無味駢四儷六之
吟哢底堪豪傑之跪呈間或小慙小好之逢乞難
大言大利之望相國禮之過矣昔嘗伏光範之門
大夫羅而致之乃使入河陽之幕路經灩澦鬚已
雙蓬身入褒斜命危一葉旣乏先登塞旗之績何
逃相收連坐之刑然而聖主不加誅復令因任此
非元戎所自辟殆出密庸會旣建宣威之牙始獲

捧從事之檄西曹地忍幸不汝疵東閣天寬理難
自絕惟受性酷好學問迂哉韓子之謀矧報國獨
惟文章悲矣柳侯之志顧且甘敗鼓渤澥之比至
欲效朽株芝菌之祥有如萬不及於古人其他百
無用於今世天之未喪斯文也儻或容小道之觀
人之爲言胡得焉盍勉作大鈞之問恭惟某官道
濟四海勲塞兩儀續古今難續之鼎彝調政化不
調之琴瑟屹承天之一柱回障海之百川業業兢
兢贊一日萬機而無曠湯湯蕩蕩作十有三載而
乃司適茲殘羯之餘尚爲困獸之鬪非用儒無敵

於天下何不戰可屈於人兵齊歸侵疆寧須憑軾
之力魏適樂土曾無傳檄之勞我適克至今日休
汝其敬識百辟享爲天地立心生民立極賓春布
萬國之和以陰陽爲炭造化爲工脩月揭重輪之
照茲峻三孤之秩益章萬世之功以保保身在明
明德耻一夫之不獲當無求備於一夫輔萬物之
自然要必曲成於萬物巨川作舟楫則剡木皆有
用之器震風知旂幟則廣夏無可弃之材邦其永
孚于休公有無窮之聞尚念某倍勤埏埴獨困泥
塗書義在彼中阿曾出於春風披拂之內菲葑無

以下體望收之秋霜刻轢之餘

代黃知縣書上史丞相

錦製彌年天不哀其陟屺琴祥踰月人交勸其入
京盍從小宰之銓勿累大鈞之播惟是沈憂之後
難於故步之尋故提孤蹤更干宰物伏念某骨凡
難換器竄亡竒廣殿賜袍已作半枯之葉短檠照
字終無太喜之花幸脫選於七階甘服勞於百里
凄其風木越在塊苦棘人樂樂亦旣畢三年之制
余髮種種難更宰百乘之家儻繩以半九十之行
寧能免落千丈之懼然痛定而思方痛其可再乎

謂弓人而耻爲弓則無是也窮於五技望在一陶此蓋伏遇某官又我受民承天載物暨湯有一德旣簡在上帝之心惟說總百官必監于先王之憲然並用湖海之士未嘗拘日月之功旣於萬物而曲成豈忍一夫之求備乞漿得酒詎敢希鵲鷺之行點鐵成金庶不辱龍虎之榜某敢不刮摩所學澡雪此心桃李悉在公門詎敢詠沙堤之避葑菲無以下體尚庶幾藥籠之收

梅亭先生四六標準卷之十五

梅亭先生四六標準卷之十六

參政

賀喬樞密

行簡

除參政兼知院

成都運司作

晉用真儒升參大政運籌決勝久注意於安危當軸處中仍兼資於文武用人如此通國驩然恭惟某官廣淵而篤誠高明而博厚好學本孔顏之學用心乃禹稷之心非仁義不陳於前雨露風深於獻納有謀猷則順于外風霆不顯其流形翊賛斗樞燮和天緯折衝尊俎鯨鯢服京觀之刑申畫郊圻鱗介慕衣裳之會然南北兩朝不能一統由東

西二府分作兩塗今內治外治交急之時乃政柄
兵柄合謀之日宜崇夙夜宥密之任并策旦夕丞
弼之功蘇民力之中乾回夷情之內燮建久安之
勢而成長治之業杜羣枉之塗而開衆正之門歲
大旱而作霖啓沃良資於傳說天未陰而徹土綢
繆允賴於周公邦其永孚于休公有無窮之聞某
雲邊輓粟雪裏聞麻回思太學之十年嘗侍司成
之丈席今三賢方施政於天下必無不獲之夫縱
四牡非有功之使臣願鑒懷歸之悃

代賀鄭簽書

昭先

除參政兼太子賓客

顯用正人進參大政試之宥密已折衝樽俎之間
倚以弼諧必銷患廟堂之上賢得路四海傾心
恭惟某官清任以和直方而大陽休山立粹爲廊
廟之珍地負海涵凜有社稷之器來從百里甫閱
七年徧儀清切之司弥積均弘之望果由樞筦遂
贊機衡作天子之股肱兼儲皇之羽翼惟公懋德
相我受民式觀鼎鼐之調益永旂常之載某屬拘
郡組莫旅賓某千萬間之歡顏既深賀厦三十幅
之共轂尤慶得輿

賀俞樞密

應符

兼參政

鼎升兵本晉豫政機立武有常將見五原之款塞
用儒无敵更觀三后之協心膺一時稠疊之榮契
千載明良之會恭惟某官材宜王佐智可帝師自
其不辭小官之時已負將降大任之器夙夜宥密
甫參帷幄之籌乾坤清夷益結冕旒之眷既兼資
於文武盍並注於安危爰命宗工式兼亞相上帝
將復高祖德坐令趙璧之還皇天既付中國民豈
但齊疆之復惟股肱之寄在忠力則道德之威成
安彊邦其永孚于休公有無窮之聞某夙蒙揄拂
竟自沈冥直柄當權恐不吝曲成之陶冶近畿入

幕固未爲遠去於門墻

賀陳簽書

貴誼

除參政兼同知

成都運司作

升參大政復翊洪樞仲子之辭三公夫固輕千鍾
之祿曲逆之出六計終當遂萬物之宜一賢得輿
多士舉笏恭惟某官直方而大智勇且仁早收麟
角之科夙負黿頭之望讀孔璋之檄嚴嚴經國之
文卧元龍之樓耿耿濟時之略四國茂蕃宣之績
六條高澄按之功登山有得於徐行乘舟惟恐其
偏重禁中頗牧 鼓舞號令之風雷疆上唐虞緝
熙光明之日月迄由翰苑進陟機庭尊俎折衝京

觀正鯨鯢之戮郊圻申畫介胄無蟣蝨之生立武
事以有常顯真儒之無敵今南北分庭和戰未一
則東西二府謀慮宜同爰籍前疑後丞之功入據
經文緯武之智邇人安遠人至憂民正急於憂邊
大臣法小臣廉正己不難於正物相尊等耳時來
爲之無謂於我如浮雲當念迨天之未雨不遐有
佐無競維人某學旣拙踈法當惟悴十暑自安於
絺葛一寒誰與之絺袍昔周旋元方之間亦欲學
屠龍之技今疲敝益州之役良難見流馬之功忻
聞黃麻之六經合入繡衣之九罍燕雀賀夏椿

必念其差池蟋蟀鳴秋瑾戶願徐於穹室

賀宣參政

縉

申命真儒顓參大政公輔間于兩社德因服而益
彰天子必有四鄰官惟人而後備制書誕布歡頌
交馳恭惟某官忠結主知道先民覺泰山喬岳無
運動之迹人蒙潤而不知祥風和氣以長養爲心
物有生而自遂與其參夙夜宥密之寄不若策旦
夕承弼之功臣哉孰重於鄰哉賢者固識其大者
今海內之事勢若火未然公主上之信臣知風之
自夷情外狡民力中乾即戎七年而無休息之期

拓地千里而無堅凝之術使能定未保其能應則
所憂將重於所欣實賴同心同德之臣亟合羣策
羣力之助收草茅之公議而用之邦國推槐棘之
和氣而達諸閭閻非常之功待非常之人無窮之
基有無窮之聞某崎嶇巢幕冒昧掃門山甫舉之
莫助之故妄陳於千慮原憲貧也非病也詎敢冀
於一陶

樞密

代賀禮部曾尚書

從龍

除簽書兼太子賓客

登延駿望翊贊鴻樞增寶鼎九九之安國由人重
齊泰階兩兩之色魁與台連廊廟得賢華夷胥慶
恭惟某官造道自得經德不回一舉首登固有榮
進之素定孤忠自立宜卑英俊之並游眷旣厚於
兩宮名益高於九牧果登宥府仍冠儲寮時來則
爲之佇正久虛之宰席年不可及也諒多仰羨於
端門民無不獲之夫公有無窮之聞某逖聞成命
倍動懽顏孤鶩落霞正竊垂天之庇六鰲抃地莫

彈賀厦之棕

賀薛樞使

極

成都運司作

顓席紫樞均茵黃閣仲虺居薛宜登左揆之虛臯
陶謨虞還倚右平之重有常立武無競維人恭惟
某官學可帝師材堪王佐智周萬物炳著龜先見
之明節貫四時凜松栢後凋之操周旋三省兩省
之掾練達一日二日之機合文武以兼資佩安危
而注意熙帝載宅百揆民具爾瞻掌邦政統六師
軍則誰與式端兵本專領使權匈奴欵塞五原固
出干羽之舞子房決勝千里正須帷幄之籌帝曰

欽哉相尊等耳山有木而工則度姑遜滕侯之先
封河如帶而國永存實自薛公之上計佇膺帝眷
徑位宰衡某夙累一陶尚驅六轡輓武功原上之
栗覺心瘵而形疲聞文德殿下之麻嘆形留而神往

賀薛僉書

極

顯膺上策進貳洪樞道德之威成安強有常立武
股肱之寄在忠力無競維人渙號再揚師虞允穆
恭惟某官風猷膚敏宇量浚明才刃立解於千牛
豈躊躇於肯綮意匠洗空於萬馬寧慘淡於斯須
輔造化而不言正朝廷於既治星辰聽履久勤朝

夕之論思雨露賜袍遂參夙夜之宥密漢用三傑
運籌允藉於子房舜有四鄰舞羽實資於伯益通
觀偉績追配前聞某濫厠冗員獲瞻盛事帝王之
興建輔弼固知時亮於天工甲兵之問至廟堂重
願勿窮於國力

賀程同知卓

登庸儒宗陪輔兵本綢繆牖戶及國家間暇之時
典領樞機基夙夜宥密之命軍民心愜夷虜膽寒
恭惟某官峻稟扶輿清儲沆瀣何蕃初入於太學
共知仁義之必流下惠不卑於小官豈以供遺而

或怨揚歷勞人之州縣從容範我之馳驅迨作牧
於閩山寢簡知於魏闕紬書史觀昭回雲漢之章
批敕瑣闥鼓舞風雷之令迄由東省進貳西樞惟
春秋九世之讎固將酬於千古然乾坤一擲之舉
不如出於萬全願思無競之維人益務有常而立
武運帷幄而決勝千里正賴協心亮天地而弼予
一人即觀顙面某隴西冷裔江右庸儒頃作塵氓
正出藍田老槐之下茲爲幕客詎忘豐水有芭之
仁所未知鼎鼐鼎之新果猶念鑪錘之舊燕雀之賀
大夏豈憂凌雨而震風烏鵲之遶何枝尚託稀星

於明月

賀俞俞書

應符

使北道而簡僚曹玷網羅之舊翊西樞而基命茲
逢鼎鼐之新往年身未可以許人今日士固伸於
知己輒修燕雀賀夏之敬併吐蟋蟀吟秋之懷恭
惟某官背負天風曾吞雲夢自其克勤小物於州
縣已具可以大受之規模二螭坳處之記言一麾
乃出千騎上頭之賦政再命茲共回回紫橐之間
諤諤青蒲之上露門書講緝熙日月之光明瑣闥
夕趨鼓舞風雷之號令廷臣無出右者天子居然

器之迄自東臺峻躋西府九天渙號簡二三執政
之股肱兩地升賢繫億兆生靈之肝腦有常立武
無競惟人春秋九世之讎固將必報匈奴百年之
運未有不亡今犬羊交噬之已深計蚌鷁相持之
不久下策莫危於浪戰上兵實貴於伐謀在帝王
之萬舉萬全固求耆定然疆場之一彼一此正欠
堅凝幸而及間暇之時亟宜定修攘之計取亂侮
亡兼弱也時則易然同寅協恭和衷哉政將焉往
洪鈞既轉於一氣黃麻即似於六經伏念某拓落
一官嶽嶠萬狀才固自知其無似命亦可歎其不

猶瞻白日於舉頭遭海風而引去上青天而仰脇
僊峽水之倒流甫欲釣錦江之魚乃忽騎將軍之
馬二年劒外寸步矛頭徒令蟣蝨介冑之生安得
貂蟬堯璽之出茲歸身於司敗妄干祿於有司適
值大君子之登庸不勝小丈夫之距躍士曰時哉
相君實皆舉笏以相驩誰其識之有歐陽辱捲簾
之有素願煩啄抱稍養翅翎樂莫樂兮相知更傍
誰家之門戶遲之遲而又久正須大匠之鑪錘

梅亭先生四六標準卷之十六

梅亭四六標

內閣文庫			
漢書	特四十二	一二七四三	一九
卷	二	三	四

合

內閣文庫			
書號	漢	11742	
冊數	19	9	
圖號	3	5	

梅亭先生四六標準卷之十七

中書

賀太府余大卿

鑄

除中書舍人仍兼右司

除戶部侍郎兼知臨安

成都運司作

帝重詞臣公遷閣老裁縫雲霧便應拜李士之真
鼓舞雷風更盡展舍人之樣紫微炳煥黃道開明
恭惟某官忠肅而惠和博習而脩潔清姿秀骨下
獨鶴於人間厚德長材載六鰲於海上心醉六經
之醲郁目營四海之溺飢文人多不護文細行易
虧於大德宰士固習爲宰遠圖或奪於近功惟公
超然過人遠矣彌綸兩省標表九卿久兼內史之

三六十五
贊書茲正中書之三字惟天子之義範曰制以聖
人之情見乎辭扶山東之癯戀漢恩而忍死回河
朔之悍存唐祚於幾亡一札可服於隗囂尺書足
招於贊普不但取九制一揮之敏亦非專四駢六
儷之工俾萬姓咸曰大哉則一字不容易也衣冠
盛事夙尊八葉之科翰墨大勲詎止五花之判旣
敷華而緯國行迪哲以爽邦文章於道未爲尊風
斯在下矣富貴乃吾所自有時來則爲之某頃侍
同朝且依鄰壁韓非老子又嘗共傳公叔大夫詎
望同升范叔一寒哀之命也不哀之命也杜陵十
魚蝦之侶

賀黃秘監

序除中書舍人

代董制置

中宸渙號內史升賢三神在海上之山久勤攝領
一佛出人間之世遂見真除綸綍有光紳綏胥慶
恭惟某官材猷膚碩李術醇深探周情孔思之微
淵源千載發宋艷班香之祕膾炙四方親結龍泉
之知聿新鳳閣之樣辭達而已矣要必見聖人之
情才難不其然蓋欲極天下之選得君爲重緯國

三五
以文好對紫微草尺書而招贊普却登黃閣提一
筆以福蒼生某聳聽除音阻陪賀履千門柳色誰
怜芻狗之陳人万里草堂遙想槐龍之新影

賀直院莊少卿夏除中書舍人

優詔上卿正班內史北門視草謂當進李士之班
西掖拜真聊復示舍人之樣斯文增氣有識傾心
恭惟某官蓄孝醇明挾材鉅麗沈浸醲郁蓋下逮
於莊騷雅健雄深無足多之崔蔡尽兼兩制已四
三年號令鼓舞風雷亦云多矣獻納司存雨露莫
若專之濃薰班馬之香高振綺園之翼有偉用儒

之效會當秉國之鈞某假守魚鳧阻陪燕雀碧梧
幙府幸稍安雪外之城紅藥主人儻或念天涯之
客

史掖

賀聶左史

子述

中宸渙號左侍升賢夾立螭頭均爲清切進攜龍
角愈近凝嚴彰清朝選用之公示君子登庸之漸
恭惟某官材全而業鉅李廣而聞多秀出班行固
已芒寒而色正凜然氣節不爲義疚而利回五年
省闥之弥綸万里戶庭之清晏賴舍人之解事爲
天子而記言績用孔殷序遷惟允楚左史之能讀
八索蓋儲倚相之材唐中禁之用第一流亦爲議
政之地佳傳相期於千載脩名剩跨於數公其遠

落魚鳬阻陪燕雀甚愧丈人厚頃嘗聞所聞而來
屢爲丞相言是有得不得之命灩澦旣令其膽破
岷峨亦使之眼高望五雲多處之星早登魁輔倩
万里橋邊之水聊送客心

賀聶左史

代董制置

南衙渙號東史升賢雖君舉必書均號司存之切
而王置諸左益知位置之親正人登崇善類鼓舞
恭惟某官負材有用蓄孝不貲健步豐扛連六鼇
於海上清標秀質下獨鶴於雲間五年密贊於宰
司庶績自凝於道揆螭頭坳處久稱解事之舍人
龍尾道中遂進讀書之倚相柱下之光有耀甌中
之姓可占某最辱挈提尤深距躍歸心羽翼已久
懷石澗之泉餘論齒牙更幸及玉関之老

六部

尚書

賀章尚書

申命秩宗正班宰伯春官六十立之長以維專曲
禮三千待其人而後卒有隆圖任茲遂真除恭惟
某官重德鎮浮清規厲俗中流砥柱百壬夙避其
鋒野水孤舟六丁莫措其手偉雲山之舒卷閔天
下之重輕迨茲改絃復此持橐堅車大艤安徐而
後進光風霽月逾久而益明粵從貳卿實典三禮
振自古寅清之職還斯民子諒之心不惟和上下

而治神人蓋將經國家而定社稷茲引星辰而上
益高日月之依武德間有讜言忠無不報正觀初
踐台斗理有固然某阻作鳬趨但深螭抃小草有
遠志懷哉並世之醫和大夏無弃材盍以與聞於
匠石

賀任尚書

希夷

晉長冬官復兼夕闡國有六典孰如事典之優閑
命出一人實預舍人之駁正況躋中庶尤簡上知
恭惟某官曾湛秋霜筆翻春潦獻納日月仁義陳
於王前鼓舞風雷言語妙於天下久典三禮既諧

兆民疇若予工併任塗歸之責乃在五岳就兼翼
贊之華忠既結於兩宮名益高於九牧投珠委地
必有清平尚書之言批勅回天更觀儒者給事之
效既劑高馮之藥石即羹傳說之鹽梅某聳聞除
音喜至滿面君子得輿民所載也豈但收稽古之
功袞職有闕我儀圖之知必稱納言之任若方朔
之餓欲死與杜陵之凍且僵不知命而且鳴且號
亦無耻矣其潔已之與進與退惟所命之

賀陳尚書

率

除吏部尚書仍兼內翰

成都運司作

峻長六卿增崇八座惟王有成績紀于日月之常

命汝作納言引此星辰之履仍專齎禁增重雞翹
恭惟某官學濟道真器函天粹絕識洗空於萬馬
全材立解於千牛積江漢經營之勞有河山帶礪
之烈允文允武立德立功還頗牧於禁中悍卒回
心於讀詔講唐虞於羶上頑民聽命於舞干茲膺
典選之升始是奮庸之漸文昌垂象寔爲上將上
相之躔武帳前龜行有爲保爲師之命暫煩長文
制九品之任行見曲逆遂萬物之宜某未解漕冰
正馳驛路聞尚書之踐台斗或垂念於孤槎聽散
人之拜江湖早歸身於三徑

侍郎

賀鍾侍郎

震

除侍左侍郎兼中書及侍講

大君渙號小宰升賢三銓審官尤重左曹之衡尺
一佛出世仍兼右掖之絲綸碧落彌高紫微增煥
恭惟某官日營四海曾著千年關百聖於寸心不
夷不惠而願孔子之李掃千軍於獨筆非韓非孟
而成歐陽之文雲雷十載之經綸江漢六年之方
泳怒鵬旣擊凡馬皆空蛻骨地仙直上蓬萊瀛洲
之島縹纓天策徧儀承明金馬之庭堯醲舜醺最
宜爲誥班香宋艷安敢比材非道不陳於前在庭

無出其右日獻月納亦有嘉謀年除歲遷士無異
論四輔既備命史佚以記言五禮有庸咨伯夷而
降典露門重席星戶鳴珂緝熙有賴於仔肩左右
宜咨於汝翼掌六典之貳更追裴馬之蹤遂万物
之宜即接夔龍之武某夙蒙推挽竟自顛隤今墮
孤雲落照之邊誰復高山流水之賞江梅尚難於
寄驛海棕詎易以移栽然蓬婆雪邊十暑碎杜陵
之萼在玉堂天上一寒望范叔之袍

賀江陵趙制置

方除工部侍郎

優詔元戎升卿起部司空用以寵舊荆之牧未曰
殊恩貴人不待入長安之城豈爲異數中權增壯
上眷彌深恭惟某官氣直而溫材弘以毅稟衡山
扶輿之積人知鍾駿嶽之神師葵軒正大之傳天
使壽熊湘之季聞善若決疾惡如風粵從使指之
膚出領制垣之重茲貪膽落洗空當道之豺狼夷
虜心寒驚遁繞枝之烏鵲寬九重顧旣四三年江
左見導無憂固將大用北門非準不可未免小留
惟無敵知儒者之真況有功見賢人之久徒得右

重使若予工豹尾雞翹獻納上司於雨露熊旂竿
節曄曄外震於雷霆營壘旗幟初無所更朝野人
士皆爲之度洞庭彭蠡可但爲分北之區廣漢江
沱蓋亦繫二南之化况占雲祲當護風寒竊窺往
年根本宜固之言及讀近日事業無窮之奏万國
玉帛豈甘安王業之偏百年丘墟亦貴度時賢之
力願謹郊圻之申畫姑思牖戶之綢繆中興當用
實材更訪英豪於物外上策莫如自治合商得失
於褚中與民守之吾庸多矣朝廷已深知治行豈
但儀簪橐之班牙肅不足爲公榮要當勉旃常之

績某雖無學術知有忠賢頃捧辟書輒干賓謁不
緣介紹蒙稱人品之高尋因憂恫又爲地主之累
今者尋磨驢之步復茲修賀燕之恭登樓而憶仲
宣豈但感凋零之迹下堂而執醢蔑或許傾結約
之心

賀趙制置彦呐除兵部侍郎

顯冊宗藩升卿武部司馬掌九伐之法外益重於
中權元戎先十乘之行遠式逆於近列傳聞四海
忻懌一詞恭惟某官迪德碩膚負材瓌特猷宗英
之禮樂卓爾不羣謀元帥於詩書飄然無敵文武

作萬邦之憲精神折千里之衝三百墨方竊笑無
功之祿利十八年矣備嘗在外之艱難自殄鯨鯢
之妖滋奪犬羊之氣茲膺天寵迄拜夏卿獎三軍
以定中原聿觀偉績間兩社而輔公室佇接前芳
某治任方歸聞報失喜知有功之則悅見無德之
不酬錦城雖樂不如早還益增西望繡裳無所於
汝信處更佇東歸

賀朱倉

在除度支

任兩浙運幹作

勞使臣之還而歌四牡知入重於郎垣旅天子之
命而作嘉禾又暫留於輔邸最爾幕下之士託於

畿內之侯敬德已深修辭敢後恭惟某官政由
出心以家傳昔者周公固望伯禽之拜後趨亦夫
子誰知孔鯉之異聞雖剛大之氣浩然而中庸之
德至矣揭節以出送以禮樂而有光當官而行編
之詩書而無愧茲拜握蘭之召又爲騎竹而留斂
惠而施一州寧容黔突輯瑞而班羣后即聽紫泥
某偶爾依蓮正茲索米囊粟二百之俸實隸治封
遣介咫尺之書敢修庸敬

代回宮使待制史侍郎

弼堅

貳訓夏之刑已慙弗績攝司冬之典尤愧誤恩曾

巽謝之未遑遽謙光之先辱恭惟某官久勞于外
式遄其歸大纛高牙茂展幹方之略珍臺間館暫
從均佚之謀輟湘水之曉行趣宣室之夜對有對
餘芘亦及陳人某視蔭幾何強顏已甚司納言之
喉舌轉覺濫竽借餘論於齒牙早期納履

樞屬

代胡尚書回趙編修

二日栗烈寒但感於真冰五雲郁紛文乃工於翻
水物將其意愧在於肝恭惟某官有偉宗英入陪
廟筭駕輕就熟問津槐棘之榮噓枯吹生假寵桑
蓬之賤粲然駢儷幸此衰遲郭令二十四考之書
此言何爲至我魯侯萬有千歲之頌所有更以贈
君

臺諫

賀洪郎中

咨薌

除察院

成都運司作

親擢郎潛進司臺察十年去國安泉石之膏肓一
札起家任朝廷之耳目公無欣戚邦有榮懷恭惟
某官行守宮庭道探壺奧養以剛大獨扛百斛之
龍文出其緒餘連中八科之麟角惟其守專而退
勇是以任重而進難社下之肉既均尋拜護軍之
曲逆治中之足未展顧令乘障於陰平儀粉省以
歸班封皂囊而論事回天有力方將批徑尺之鱗
偃月生疑已不容立仗之馬曾謂考功一出息之

頃遂見拾遺九鎖火之明星既圻於中台席遂前
於半夜甫登表著徑拜裏行解豸觸邪難置豺狼
而不問鷹隼始擊尤閔龍象之共觀聳聞破頭尸
足落膽刊九山滌九川陂九澤通地氣以上騰闢
四門明四目達四聰發天光而下濟此真御史矣
豈憂匈奴哉鑄金鼎以圖姦不難調鼎察玉衡而
齊政然後保衡其一寒漕水六暑戍雪將返問問
而曝日喜聞臺閣之生風鵬鷃之在秋天儻或實
於西擊烏鵲之繞夜月願姑聽其南飛

賀王寺簿遂除察院

成都運司作

峻擢容臺進司糾院明天子厲精之日爭覩親除
真御史遴選其人迄符衆望風雲感會山嶽動搖
恭惟某官心幹九秋文焰万丈摘髭名第不應州
縣之徒勞策足要津共擬公侯之必復堅車大轡
每難於進光風霽月既久則明上欲求忠臣之尊
念無易太常之肅嚴霜烈日姑令鑄金鼎以察姦
縫霧裁雲行即登玉堂而草制某久違楓陛聞進
蓋臣行行且止而避驄莫陪旅賀皇皇者華之維
駱願以汰歸

賀董司諫

居詎

進思補闕仍侍迓英責重寄隆益可告嘉猷于后
謀從言聽轉當下膏澤於民朝野喧然宗社幸甚
恭惟某官所養剛大而道中庸人方此重而彼輕
公獨以退而爲進廷臣無出右者天子居然器之
拔自州麾徧儀朝著亟拜拾遺之命仍陪勸誦之
聯緝日月之光良多啓沃犯雷霆之怒大有激揚
不賣直以取名惟格王而正事簡在中宸遂升左
垣考司諫七品官之階雖云序進然大人一正君
之事正屬司存今日前無必至之憂而天下有未
形之患戎心外狡民力中乾天文變恠而難謀人
才卑少而不競民保於信而信屢爽位守以仁而
仁不流吏惰且貪兵虛仍脆無非事者請先大者
之圖彼何人斯尤願辨之之早自古建久安之勢
成長治之業莫若杜羣枉之路開衆正之門國人
曰賢左右皆曰賢無使滯淹之久君心以正遠近
一以正切防浸潤之行閭閻外不容二心宮中
府中當爲一軀舍豺問狸則民不服如鷹逐雀則
君自尊察嫠婦之私憂回倉公於驚走庶淮南知
憚於汲黯而昌黎無惑於陽城名節皎然芬芳多
矣富貴乃吾所有何足計哉忠良得路之難切

念此某當獻嘉頌願進苦辭蓋有感平日之知不敢作細人之愛諸公不喜生語柔則茹之善人能受尽言遐不謂矣尚欲作石守道紀德之頌幸勿還李師中落韻之詩

代回傳大諫

出成

自天分閫易地殿藩南內思賢已使侯西廂之對東甌報政又當綰北固之符恭惟某官王之蓋臣邦之司直觀其動搖於山嶽安問狐狸使之感會乎風雲尉如虎鳳汲黯願居於禁闥望之願出於平原一言寧急於封侯萬物盍令其吐氣茲驅大纛又卧長江邊秋一鴈聲幸騎烽之灌燧人生五馬貴羨燕寢之凝香某自愧秋零阻陪夏賀仁義與王言者寧千里而莫追邂逅適我願兮或一見而後去

梅亭先生四六標準卷之十七

梅亭先生四六標準卷之十八

寺監

賀黃安撫除大理少卿

知榮州作

晉卿叢棘升帥前茅乘八月之槎旣瞻相於斗柄
回二星之部仍典領於參旗四履歡然重臨幸甚
恭惟某官負材明允蓄德碩膚淵法澄深得龍津
炳靈之秀扶輿鬱積繼龜山正學之傳久留金馬
之坊妙斡木牛之運中兼閫制外憺戎昭遠略折
衝南人不復反矣從臣虛位東山以公歸兮然河
內競借於寇恂宜關中復留於蕭相後才全掌牙

總玉鈐公去八公來信有關於輕重時行時止俱不
失其光明共羨班景倩登仙之除咸有樂正子爲
卿之喜佇盡護於諸將遂進長於六官某淒其一
寒去此十暑未問五馬二毛之無用最覺孤鴻獨
影之可怜矧熬波之素封今掃地而赤立水旱重
蓼蟲之苦風景增蓴鱠之思所幸潁川黃霸之復
來或察夜郎李白之可念老牛舐犢誰敢論瓜葛
之連孤鳳求凰或亦備蘋蘩之薦其爲頌悞罔旣
鋪茶

賀岳總領
珂除大卿

四牡奏最九苞升班王人不微夙序諸侯之上臣
卿雖少有光八使之間邊面驩然帝心簡在恭惟
某官天材敏邵地望穹華蒲腹精神解千牛之肯
綮撐腸文字空萬馬之躊躇豈惟建武功臣之家
亦習正元供奉之曲久將餉拍仍領价藩盍歸乎
來遂登龍尾見知則悅聊進豹祛卿不同乎暫掌
九功之貳侯誰在矣亟膺一札之招某共飲玻璃
未覲珪玠視諸故府龍豬竊幸於同宮于彼新田
燕雀敢稽於賀夏

代回王大卿
補之

入覲楓宸升卿棘寺民之收旣久凝盡戟之清雪
王曰遄歸復畀青氊之舊物恭惟某官器質庸敏
機量浚明京兆有王之歌至今未泯江東無卿之
嘆所去見思輟自銀符入躋金掌敬爾攸獄監于
祥刑民自以不寃行課清明之效王言惟作命即
登獻納之班某過沐幸臨更勤委重冷秋菰寒水
玉覺執熱之頓清金錯刀英瓊瑤愧報嘉之不腆

代回李寺正

直柄

拜命楓宸陞華棘正好生如舜方惟刑之恤哉選
衆舉臯則不仁者遠矣恭惟某官持心近厚折獄
惟良自再轉而爲丞益揚淑問宜片言之寤主茂
進崇階某有幸爲寮未皇稱慶猥辱鳴謙之賜聊
申叙復之私

代回劉寺正

刑期無刑丞非余召正率不正帝曰汝諧先庚具
孚同寅良幸某謬忝秋官之貳極深夏賀之私姑
奉手牋別遲面慶

代回李寺丞

直柄

拜命明庭司刑贊府一麾出守所至如破竹然再
轉爲丞此行若登仙矣恭惟某官機神明浚識度

端凝治已治人洞知周孔之情思讀書讀律又欲
堯舜其君民徧儀棘寺之華幾致草廛之鞠郡符
旣合邊瑣多驚甫清遠障之風塵旋奉殊庭之香
火帝念師旅飢饉之後折民惟刑人思賢明慈惠
之師命汝作士肆敷芝檢參貳李官昔張蘊古之
直聲由茲論賞雖狄梁公之相業自此升階欲識
遠圖請觀近比某與聞犴獄似是馬曹具嚴天威
望盡心於閱實頗哀老子或袖手以蒙成少遲九
遷當不一賀

代回陳寺丞

振

方欲取違先勤言別出處亦吾輩之先事是非至
他日而後明風雨蕭蕭願雞鳴之不爽雪霜留買
終麥秀以何疑敢因報章并申善禱

代回呂寺丞

祖平

奏最竹符陞華棘寺辟以止辟九重之念在茲丞
不負丞三尺之平必矣恭惟某官象賢濟美燕譽
騰芳伯仲填麓曲突之忠甚切公侯閥閱直鈞之
鈞猶遲茲從漢化之更宜有呂刑之命某辱同寮
采喜倍等倫自此蒙成不負嘉師之託逃於司敗
亦惟餘潤之依

代回大理沈寺丞繹

久參棘屬進貳李官丞不負丞益懋平反之蹟辟
以止辟助成欽卹之仁某有幸爲寮未遑趨慶

代回沈評事

榮持邑最歸領廷評惟丹筆之祥刑實青氈之舊
物頭銜如故步武已高恭惟某官服龍襲芳馨蜚騰
聲實卓脫囊中之穎詳明柱後之文棘寺參華竹
書惟允屬拘邦典暫試民庸麥熟兩岐雖道途之
交詠挑哉千樹宜車馬之重來某有幸爲寮未遑
贊慶遣長鬚而致雙鯉良感先施跂織女而終七

襄更慙匪報

代回大理樓評事澄

舉賢有格當簡乃僚折獄惟良徒得君重公車之
牘晚矣私室之謝何哉恭惟某官地望已高天資
仍茂讀書不讀律懼無術以致君治已後治人寧
以身而試法決科雋甚詳讞瞭然豈無他人恐未
如於一鶚惠而好我何不吝於雙魚某濫貳秋卿
又見春序小孤汔濟亦奚事於聽冰良馬空羣望
自期於追電

代回程監丞準

五雉分工誤恩攝長雙魚尺素取數過情恭惟其
官四海老成累朝耆舊人生待足何時足得住爲
佳官職有來還自來不聞亦式應笑戀軒之疲馬
未能返肆於屠羊某自揣頭顱難司喉舌匪朝伊
夕即騰納祿之章爲官擇人空忍見賢之渴

代回程監丞

準

出命明庭祝釐間館雋永乎山林之味樂且無央
參寥乎香火之緣老當益壯恭惟某官棲遲盛福
笑傲明時詔珍臺又拜散人之號養神丹鼎應
與造化者游所恐蒲迎不容摘隱某歸已晚矣行
或使之汗漫相期本許以急流之勇退侏儒獨飽
敢久於暮夜而倒行

代回軍器王監簿

渥

對越宸綸勾稽武庫爲太守選所表既有交章除
戎器戒不虞實爲稱職公議如此私謝何爲恭惟
某官故家典刑中州曾出婉贊幕中之畫勇分海
上之符焉能使予不遇哉姑從外補有欲爲不留
行者迄得內除時雖旣戢於干戈法合咸精於器
械小煩會計會即騫騰某自嘆望秋未遑賀夏豈
無青精飯此心惟切於謀歸贈我綠綺琴無說可

從而厚報

回朱司令

在

渙奉宸綸晉司帝籍用過庭所學之禮習祈年孔
夙之詩有渥新除式光舊德恭惟某官清門偉望
名世故家先正接伊洛之宗源流甚正後學出河
汾之派沾丐居多卒老于行克昌厥後故從綠水
紅蓮之幕入庀紺轅黛耜之司此非不稼而取禾
政欲敷苗而肯播少培飛步即輅華塗某偶此綴
班何勤委贄自憐往日識野鶴於未仙猶喜殘年
見名駒之有種

代回詹大社

久中

陞華司社贊治容臺惟是詩書禮樂之儒始明邊
豆簠簋之事用人如此通國欣然恭惟某官奮自
清門徑收名第下帷分教不辭獨冷之蘊當路交
章爭取橫前之寶果從蜀道入與漢祠拜如絲如
綸如緯之言實自今始考以松以栢以栗之義應
有古心某有幸識賢過蒙委贄數句爲客會已見
於榮遷一日不齋猶願安於承教

代回趙太社

汝謹

庀司太社贊治奉常舍文字旁午之勞共夙夜惟

寅之命恭惟某官九苞威鳳千里名駒抱朱虛之
忠請鉏呂產笑紅休之陋更媚王音毅然料虎之
頭樂只跋狼之尾忠精既白論諫如丹徑咨禮樂
之英入司籙豆之事雖雖肅肅何嫌三百日之齋
親親賢賢行有十六相之舉某未遑旅賀先辱臨
存贈綠綺琴愧不辦南金之報植青藜杖滿期校
東壁之書

學官

代回李國錄誠之

知賢不早聊剡需章委贄相先足鳴謙德不知所
報藏去爲榮恭惟某官殖學精深摛文鉅麗早飛
英於學省即中雋於儒科固知几閣之文書難屈
朝廷之翰墨爲數旬客已光文學掌故之聯無幾
何時果見國子先生之入比者公車之牘豈其私
室之恩過辱臨存更勤巽謝某無能報國惟有薦
賢馮豐隆翹飛廉雖寄聲之已晚登閭風歷閭闔
猶刮目以相期

代回曾國正

晉司樂正益重儒官盈几閣之文書久勤作主申
庠序之孝弟茲遂得師恭惟某官賦敵凌雲文成
翻水排空直上合盛之白玉之堂取勢斜飛亦宜
在青藜之館茲以文學之掌故入爲國子之先生
佇德成而教尊必言揚而事舉某過勤投璧愧乏
報瓊化民成俗由學乎儀圖莫助傳道授業解惑
也切幸自強

宮教

賀聶宮教

子述

疇庸軍計分教宮藩王事我獨賢勞恬然終歲仁
人詎不謀利展也自今除目一傳滿口交慶恭惟
某官蓄學有裕挾材不貲人見其五兵之精神孰
窺其一劍之肝膽長沙射鴨袖不足以回旋柳嶺
割雞氣益高而磅礴甫通班筍又宰盤根取美最
以來朝紛交章之至闕諸公之登臺省盍息吾黥
此士之落江湖真令人癭爲州別駕去國期年皇
帝曰嘻誰會稟人之出丞相言是莫如國士之追

方當楮幣新舊之交承頗覺中外人情之訐阻公
能調益民得懋遷茂不績於帝庭進嘉謀於王府
會計當而已昔專出納之司誦說云乎哉今乃範
模之職於皇列邸肇建明師高帝子孫固有殊人
之龍種梁王賓客豈徒授簡於兔園必明禮義廉
耻之原使知君臣父子之實庶淮南知憚汲黯而
東海亦敬王尊此外功名時來則爲之耳向來李
問公烏得無情哉某辱知頗深圖報失喜行行驄
馬孰不知尺五之去天戢戢魚頭詎敢乞斗升而
活我



梅亭四山標準

十九卷

內閣文庫			
函	架	特四十二 二七四二號	漢書

合

共

內閣文庫			
番號	漢	11742	
冊數		19 (10)	
函號	函	3	5

梅亭先生四六標準卷之十九

六院

代回史文思

彌忠

率其屬以儆功慙於尸位簡乃僚而剡奏幸甚得
賢公義宜然私謝何也恭惟某官早收名第晚步
選階鵷鵠在原因不私詔王之爵祿鴻鴈于野寧
當廢治世之羽儀茲聯事之偶同難見善而不舉
惟是四六之惠則貽方寸之慙某非曰納交聊復
借重子若無言幾失子幸暮取之拔尤君家所有
更贈君無歲寒而易葉

新官城書藏

代回黃文思燾

共工率屬獲陪鄉曲之英應格薦賢實致邦家之
勛是爲公舉何以謝爲恭惟某官早決科名久淹
選調學深純而有本氣穩重而不浮久矣卜鄰欠
李邕之識面偶然結綬勤貢禹之彈冠何愛一鶚
之章少效匹雛之刀名節皎日富貴浮雲願無忘
激昂之言庶不孤期待之意某不善爲斷兆足以
行偶成一簣之山亦持自賀切玩連編之月却愧
所蒙

代回王文思自適

聯事爲僚見賢當舉同年有子相識已深輒刻
於公車豈收恩於私室恭惟某官世濟其美父教
之忠不謂二十年之間未脫六七階之選聊爲破
白何必謝青某老矣斷輪味於推轂奏記誓報非
所望於高明處事律身願不孤於題品

代回趙文思師稟

率屬共工已愧薦賢之不武陳篇奏記更勤博我
之以文恭惟某官天泚甚清人門具美轅駒奏步
自是千里之奇方鳩僎功未脫七階之選察其實
歷當以名聞某不勝匹雛濫長五雉同官爲僚之

義固已盡心爲善最樂之功更期勉力

代回彭文思

耕

五雉爲工正甚幸爲僚雙魚有尺書先勤委贄恭惟某官崇蘭流馥喬木故家在梓匠輪輿亦足以試有準繩規矩何患無成所恐出入如相避然莫助左右爲先容也某濫茲攝長行矣告休聞弦賞音已認相求之意留渴待飲所望見察以情

代回龔告院

堪

疇庸外轄服采中朝乃積乃倉乃糧久勤回謁如絲如綸如紵盍賴主張恭惟某官學本家傳美由

世濟承邑翼翼結於風月之分江漢浮浮裕此丘山之積進掌四司之告出專一札之文諒不俟駕而行必有勿藥之喜某淒其翫麟久此蹢躅已騰二耳去之章足以行矣猶及再相別而去顧不幸哉

代回万俟檢院

侶

渙奉明綸晉司理旣導人使諫聖上實千載之逢命汝納言堂下無萬里之隔恭惟某官世濟其美德浮于言練詳臺閣之儀服襲廟堂之學積勞于外益閱其中果騰列剡之章入掌四方之牘告呈嘉謀于后應無不得其言下膏澤於民亦有無窮之

聞某未遑燕賀先辱魚牋驅飛廉而寄聲恍已迷
於昨夢排閭闔而披腹猶有望於朝陽

代回新監文思院門史從政

弼忠

分職率屬疇若予工同官爲寮徒得君重貽書寵
甚陳義曄然恭惟某官氣節雄深詞華炳蔚丹穴
五色皆鳴孤竹之聲青雲共登已正三槐之面居
然歛板獨此抱關漢相不以兄故私未妨緩步史
魚直哉邦有道願接芳塵某爲長於斯懷歸久矣
或論道或審曲等是王官非邀譽非納交願成晚

架閣

代回吳架閣

柔勝

起自珍祠入司故府人登龍斷孰知靜退之風公
不蠅營宜有登崇之命恭惟某官器資莊裕德履
淑均讀數萬言信一第之直溷子閱三十載猶屢
薦而不入官茲回香火之功名來主文書之凡閣
假途數月發軔九衢某有幸協恭先勤遣記匪我
言耄實慚堂下之斷輪及爾同寮知免袖間之縮
手

代回薛架閣

君用

渙奉新綸晉司故籍文書盈於几愛莫助之附詠
裝其懷今知免矣恭惟某官河東嶽鸞驚異北麒麟
自中雋於文闈即舒翹於侯泮鳴皋未集豺虎已
多車轡駟馬蕭蕭君誰與守印累累綬若若吾不
徒行宜哉薦揚有此除寵佇憲章之明習即臺閣
之飛騰其甚愧濫巾猥勤街袖居州在宋真足爲
王所之賢夫子却齊願更觀儒者之效

代回曾架閣準

奉一扎之新除司兩部之故籍簿書獄訟之事似
屈長材文學禮義之官豈非妙選未繇旅賀猥辱

損牋恭惟某官琴瑟廉溫琮璜秀潤摩空作賦早
呼殿陛之臚重席談經久繫堂堦之馬身纔趨於
幕府名益震于京師朝方虛掌故之真人皆有欲
炙之色下交章而薦襴上弄印以授堯群無留良
衆乃退聽今雖刑清而役簡政須網舉而目張几
閣文書何厭數旬之客朝廷翰墨會歸三館之英
某一自識賢數勤委贄引重鼎不程力長恐見笑
於大方旣識路又疾驅敢願益堅於壯履

代回黃架閣伯劑

渙奉新綸晉司故府俎丘軍旅之事允藉通材文

學禮義之官曾為妙選恭惟某官蟠書拄腹取第
摘髭祭龜一同有珞珞球球之氣隨輶萬里無
無刺刺之情流聲實於朝廷主文書於几閣更培
風力會決雲衢某何與推賢過勤委翰投我木李
莫輸論報之情期君蟠桃姑寫願忠之意

梅亭先生四六標準卷之十九

梅亭先生四六標準卷之二十

制帥

賀桂侍郎

如淵

再任制帥

知榮州作

進直奎文借留并絡惟益部刺史之寄在漢已嚴
而瀛洲學士之官至唐尤重備茲異數允在真儒
恭惟某官器博以周材洪而毅文武式萬邦之憲
精神折千里之衝江漢經營早追蹤於羊杜日月
獻納旋接武於夔龍帝念岷峨地連關陝四松依
對中權足壯於前茅尺箠策勲數節可窺於破竹
爰進真學士之職式重大元帥之威河內共借於

寇君檐帷暫駐關中既留於蕭相營壘益堅光增
東壁之圖書權重北門之管鑰式遘來繡歸耀旂
常某乘障雪邊庇身宇下愧涸魚之喁噉隨賀燕
以差池牽牛而奪之牛誰能回幕中之辯御馬而
窮其馬度決非門下之心儻或愛尺寸之膚更幸
貸斗升之水我有二天之飲酒誰敢望於私恩爾
來三月之無鹽更乞參於公議其爲頌書焉既數稔
賀黃安撫大卿除工部侍郎仍兼安撫制

置副使

渙冊元戎升卿起部修車馬備器械夙重小司空

之權閎禮樂崇詩書將正大行臺之任命申重巽
驩溢全坤恭惟某官智勇且仁直方而大肝膽鍾
一雙之劍精神峻百丈之峯叔度萬頃之陂世莫
得而澄撓次公重臨之政人轉服其寬明坐令火
井之沈熒真覺雪山之增重敬刑而成三德既平
夏辟之三千事典以治萬民爰長冬官之六十籍
五雉五工之正挽一龜一琴之留當益州疲敝之
秋湏朔方精明之令星辰聽履豈但高法從之班
日月爲常佇蒲載元功之籍某承流支郡席此和
門誰其采白露之葭願使轉青天之粟不能者止

未容叱馭而驅之克壯其猶尚倚約軼之率只

賀聶侍郎

子述

除制置

代董侍郎

躋班禹閣宅牧蜀都輟言語侍從之臣盡護諸將
藉文武威風之帥式遏四夷渙號風行坤垠雷動
恭惟某官氣噓海岱胸湛冰霜善刀遊肯綮之間
全牛立解意匠淡經營之表九馬坐空惟其日千
里而有餘是以歲九遷而無嫌鸞臺鳳閣積彌縫
輔贊之功螭陛雞翹弘獻納論思之益上矜遠服
中遣近臣弄印無以易堯爰峻西清之職披圖指
以示禹俾圖北伐之功惟真學士象十二月之班
而大府帥總六十州之重獬豸匪茹湏方叙之趾
猷皇帝曰嘻命崇文而奉詔不但洗岷峨之愴又
將蕩秦隴之妖玉壘旣安金甌必啓某五年承乏
百伎已窮賴公爲父老而來許我託子孫之契田
間索粟看即騰新尹之誇門外種瓜便可遂故侯
之隱

賀聶侍郎交割

代董侍郎

洎選剛辰恢張制閫千二百里之邊面威令風行
六十餘郡之人心驩呼雷動恭惟某官秀姿玉峙
洞識冰明鞭霆駕風旣出漢廷臣之右捫參歷井

肯爲蜀父老而來行宣陽於皇靈即蕩搖於戎索
佛狸之死郊有數何待來年晉公之雄甲成功應
在今日氣色一新於壁壘勲勞滿載於旂常某猥
聞建牙遂可納履催飛將而追驕虜正虞或累於
躍歸鞍而飛賀書猶冀亟諧於邂逅

賀聶制置

子述

庭揚成渙閫制全坤壁府奎圖莫重東頭之學士
參旂井鉞況專西道之行營夷虜膽寒士民心慙
恭惟某官天資弘毅風采浚明精神五兵六丁莫
擬其銳肝膽一劍百壬爭避其鋒策勲自馴雉而

來取官有驅羊之易今之從政容有位隆而道污
公所過人正惟功大而心小茲煩雍橐來牧蜀都
許以金城之便宜盡護玉關之疆場三分籌策小
試渭濱耕戰之謀百二山河行復關中帝王之業
功名留於久遠富貴乃其緒餘某夙累公知何辭
吏役然受敢不敬蚤夜之祝愧乏寸長況讀忍著
主衣裳之詩義難再適况妻病不離於牀簣簣而男
寒久澁於詩書固知公爾以志私然亦愛之而莫
助某揄枋尺鷃但願通逍遙之遊渤澥雙鳬亦不
計多少之數

賀丁制置交割

紫殿陞班建碧幢而制閫綠綈趣駕滌紅籀以開
藩四履重臨萬井改觀恭惟某官材弘以毅德直
而方所學一本於孔周有言皆合於稷契一堂偃
月勢炙手以絕倫四海倚冰公掉頭而不仕四國
于蕃之已久九卿當相以何疑碩自桂林復尋印
竹清獻之琴再鼓當阜民財乖崖之劒重磨足新
軍律中權有資於後勁外攘全賴於內修暫分治
於四封即盡護於諸將先聲誕播和氣交騰雪嶺
之白界天公來則重騎火之紅照夜王曰遄歸某
乘傳無堪代庖非據崇詩書閱禮樂祈逢元帥之
鼎來封府庫籍吏民敬待將軍而解去

通董制置

居頤

十乘啓行旣孤剡牘三年過隙又玷招羅曾微曉
暢之才可荅頻煩之顧疾驅行李往役前茅伏念
某學餒而材蕪氣凋而力腐少年妄意頗懷竹帛
之功名半世拙謀未了布韋之事業強爲祿仕直
坐飢驅諸公貴人間欲出其門下古來此物自當
弃之道旁獨銜國士之知積愧文人之厚因同品
而薦嚴助自古有之未下車而辟慈明此恩異其

窮人命薄中道憂歸勞心博博鑽火頓驚於三鰲
逕官衮衮刺天難附於羣飛止或尼之會且歸矣
駭置郵之有命仍尊選以見招惟兩喜多溢美之
言故再鼓回愈淡之聽奏函朝徹俞旨夕頒苟文
若之不進不休今寧愧古閔仲叔之且喜且懼寵
實若驚茲蓋伏遇某官以社稷臣爲詩書帥留泰
階台符之步撫坤垠井絡之民去來關雪山之重
輕出入係蜀道之難易公鎮踰歲月共期裴相之
來歸小隊出郊垌復喜嚴公之再駐羣彥固多於
集幙匹夫猶耻於納溝壟放長江使認重來之路
燕尋故壘復窺新捲之簾豈但顯不遺故舊之仁
亦足占難進巧拙之量某敢不循其頂踵銘在肺
肝謹無負有志斯世之將仍每守圖利大夫之戒
忽騎將軍馬難希處士之壯懷真釣錦江魚敢學
拾遺之懶性

通制帥安大資

丙

代董制帥作

筆索贅貲濫竊郡符之寵韡々執禮行依制聞之
尊瞻中權勁後之威修小侯事大之敬輒裁柔櫜
仰溷高牙恭惟某官直大以方清和而任凜然忠
貫於日月巍乎義薄於雲天左袒以呼作熊羆不

二之士左顧而跼收麒麟第一之功皇咨耆定之
勲冊命保釐之寄盡護諸將外撫四夷料天驕之
必亡諒風寒之宜護蕭何全關中以鎮撫西顧何
憂周公有天下之勲勞東歸孔邇佇由節斧徑秉
鈞樞立非常之功待非常之人剩光竹帛建無窮
之基有無窮之聞蒲載旂常某承學無竒立朝何
補二螭載筆初無紀述之長五雉貳卿非有論思
之益誤蒙一札假守三刀不辭捫歷之艱但切震
凌之懼欲具宣於上意正有託於下風望太白橫
岷峨惟切高山之仰止詣大府受約束更希陰雨
而膏之

代回成都黃待制

時若

輟賢禁甬作鎮少城周家地官方賴小司徒之貳
益州天府遽勤大元帥之行戾止高牙屹然方面
恭惟某官靖恭而肅括膚敏而䟽通生寶劒之故
墟地靈人傑接金華之宗派玉潔日光自策名躔
徧儀要路猷承明勞侍從父陪上雍之祠望太白
橫峨嵋爰馳諭蜀之檄擁元戎之小隊布方國之
細書火井沉熒雪山增重考西鄰之近比歸秉左
鈞况東極之深知可操右契某老不得謝命作納

言慕幾兩幾駟之榮會且歸矣望一琴一龜之出行或使之

代回成都吳制置

獬

裁一箋而起敬未宣摧謝之私疊累幅以鳴謙仍拜駢章之寵施輟報重虛往實來佩故舊之高情發衰遲之深愧恭惟某官知推人傑學覺天民屹偉績於控荆蔚奇勲於諭蜀凜然趙清獻之氣節行以張忠定之規模撫五十四州之軍民瘡痍帖泰壯一百八盤之門戶氣色晶明雪山之重旣多沙堤之築非遠某不堪視蔭復此綴班無以公歸

或一見而後去豈惟我賀亦衆目之具瞻

代回李制帥

大東

疇庸帥閫升鎮制垣犀甲熊旂名在江淮之草木麟符魚錦光通河洛之圖書甚慙師言可爲國賀恭惟某官材由世濟學與古稽自其不卑於小官人知將降之大任故國非喬木之謂夙盤仙李之根今人莫棠棣之如皆近宮槐之影雅聞偉望尤抱長材游分半虎之符妙落全牛之刃風寒數處人物渺然固封守以畫郊圻徒得君重訖外庸而作永輔無以公歸某濫守洪都密依廣廈落霞秋水

漸欲尋吳會之舟暮日春天安得對江東之酒

代董侍郎回京湖趙制置

方

分閫罔功濫叨奎召循墻俟命敢辱賀緘願蒙一
介之專遠畀雙鱗之重卷還有覲冒受何居恭惟
某官以社稷臣爲詩書帥細糧廣廈應接武於夔
龍緩帶輕裘卽近蹤於羊杜一賢制勝萬里折衝
天子遣趙將軍真得破羌之策路人問霍去病行
收絕漠之勲功名剩跨於數公同書竹帛步武徑
躋於兩社歸勒鼎勲某守蜀非才擒胡不力以此
衆戰無可奏之膚公不自意全亦粗殲於羣醜尚

欲決焚舟之戰乃不容俟駕而行已貢天牋願
愆於田里尚依雲莊得佚老於林泉

回趙副帥

方叻

守偏城而惕日無以瘡人使一道以觀風何爲至
我方茲躋地志在回天敢圖副元帥之尊先畀小
行人之問恭惟某官篤誠而明允剛直而忱恂無
鳳笙龍管之豪奢有麟趾兔舄之信厚文王之昭
周人之祚固多千里之駒河間之略江夏之功罕
露一斑之豹獨公慷慨同國戚休星紀一周未皇
皇而莫枕風寒數處屹在在之長城寸心如丹百

鍊愈白四郊多壘未容尋鷗鷺之閑三才重乃且
並揔貔貅之旅峴山旣捷泗水來歸不十日至長
安會有官軍見威儀之喜用九泥封函谷無以賊
虜遺君父之憂惟國爾忘家主爾忘身則男子當
戰女子當運黃河以南行皆晉土自陝而東是在
周公其愛莫助之遐不謂矣木牛流馬敢辟轉粟
以上天挑蟲并蜂但願徹桑於耒雨

經略

代回廣西李經略

說

代何月湖

小司寇之持平躡陞五雉大府帥之委重遠寄雙
魚懷感有之真懷無所恭惟某官名高斗北惠蒲
天南槃槃都會之雄庶邦君之奔走英英文武之
特一號令而精明公無遐心民可吐氣某斲輪旣
老整獲已哺宜人獨桂林遙想玉簪之碧忍渴望
梅嶺願調金鉉之黃

代回廣西李經略

說

荷囊輟直桂筦分符靴刀列郡之迎古稱大府孺

三十
其官通材治劇厚德鎮浮財貨本末源流早振地
官之職侍從論思獻納晚深天采之知遽厭承明
之廬歸拜散人之號時方多事公未可閑謀帥須
賢起家甚寵若衛公之鎮撫九十六郡與襲志之
都督二十八年能安越人莫非李姓宜其苗裔復
此蕃宣顧恐青羅碧玉之江山難駐黃閣紫樞之
步武某龍鍾已久燕賀無由夔府竹枝之歌既成
昨夢漢節梅花之句願寄故人


代回廣西李經略

說

价藩報政祕殿升班八桂不曰炎荒固號登僊之
勝四松取之熱撰殆非寄祿之常帝綍渙孚帥符
鼎重恭惟某官材全業鉅器博聲宏厭直承明之
廬作牧始安之徼玉簪羅帶江山分一半之天金
節油幢庭戶行千里之地果臻帝璽進屯宸奎河
洛圖書之淵榮光上燭嶺海輦轂之治和氣旁行
會見出綸又迎歸衮某無由旅賀猥辱搗謙誦大
古而歌散人吾事濟矣去上天而辭宰相公自計
之



梅亭先生四六標準卷之二十



樓亭四六標準

卷一

合刊

內閣文庫			
漢書	特四十二	一七四二	一九
函			
單			

內閣文庫			
番號	漢	11742	
冊數		19 (11)	
函號	函	3	5

梅亭先生四六標準卷之二十一

安撫

帥守附

賀衛參政除江西帥

徑

九重圖任起東府之元勳十乘申咨撫南昌之故
郡蔚懃棠之未翦紛騎竹以爭迎四履驩然重臨
幸甚恭惟某官智仁且勇直大而方崑山片玉之
挺生天寧無意虎丘一輪之未滿公亦何心然夷
狄之問寇公與兒童之誦君實是關國體難久家
居與我處畎畝之中只成歸潔使人得湖山之外
盍尉去思宜煩熊旂犀節之嚴更借鶴嶺鳶峯之

重軍民雷動共欣吾父之重來道路風傳仍喜我
公之未老凡自卯至酉之交說蓋先庚後甲之素
孚善人七年流秋殺春生之惠長天一色洗星移
物換之悲昔黃霸之於潁川及馬摠之於鄆鎮雖
云再涖詎足並言蓋申命宅南之咨乃歸公于東
之漸魁台齊色益足光牛斗之墟霖雨思賢會即
騎尾箕而上某一違材館四候觀臺造舟爲梁鬢
已蓬於灩澦荷戈與袂骨幾稊於褒斜難爭汗馬
之功徑返屠羊之肆忽聞閣禮樂之有帥喜至捲
詩書而欲狂偶見苦於小兒未得詣於大府下榻
致新賸之敬

賀任樞密除福建帥

希夷

元老得閑价藩出牧道古今而譽盛德既將相之
兼資至將相而歸故鄉在古今而有幾適觀全德
足立懦夫恭惟某官輔世真儒爽邦良弼春風沂
水夙卑游夏之淵源界雪岷山更陋卿雲之河漢
早克勤於小物晚服在於大僚非仁義莫陳於前
有謀猷乃順於外雖風霆不顯流形之迹然天地
能知體國之心 兵數年拓地萬里疇若予采方

當顯面以正槐民具爾瞻何遽剖符而分竹拂衣
勇甚懷綬忻然問之往來皆云昔疾而今愈決於
去就足窺衆醉而獨醒爲之兆兆足行莫而發發
必中全閩鄉部祕殿政塗尋某丘童子之釣遊聽
去時兒女之笳鼓所貴於天下士者動靜不失其
光明豈不誠大丈夫哉進退一歸於禮義我不負所
學是在我公林下有人少伴越地禽魚之樂橘中
未老尚見商山鴻鵠之飛某夙累公知敬爲國賀
江空而歲年晚載歌百年幾見之詩水煩而鱗介
勞更致列城一陶之請

代曹安撫賀衛參帥

臣

疇咨舊弼出牧价藩泰階六符下照星沙之地元
戎十乘大開天柱之雲前茅甫臨全楚底豫恭惟
某官洪深而肅括明允而篤誠魁下三台付榮進
於素定曾中五色補造化而不言由兩地以養恬
爲二天而出守辰猷定命聯漢殿以通班甲令著
忠盡衡山而賜履王麟訢合竹馬驩迎令湘安流
使嶽修貢政平訟理而無愁嘆聊寬南顧之宵衣
國小地狹不足回旋即後東歸之晝繡某濫揚前
批幸及戍瓜以望君如歲之心願言叱馭然用汝

作霖之命猶恐追鋒

賀廣西管漕

湛

除靜江帥

代衛參帥作

寓班東觀宅牧南郊一道熟於馳驅不勤易地五
筦資其節制何止觀風恭惟某官器諳浚明風猷
凝邵自望郎而襍被進退可觀由膚使而褰帷光
華益遠尋領將輸之寄益高澄按之功帝謀帥之
惟難公撫封而少駐英英桂林之伯願懋膚功渺
渺洞庭之波尚資餘潤某濫承嘉惠竊倚德鄰湘
水安流正藉戈舡之重夜郎爲徵敢忘銅柱之威

賀夔路徐安撫除瀘帥

瑄

西瀼奏功東川徙鎮占一星之入蜀謂合遄歸不
五月而渡瀘却疑采入賢勞何憚聖眷惟深恭惟
某官胸湛明冰膽韜古劍意匠淡經營之表凡馬
坐空才刃游肯綮之間全牛立解入朝屬爾乞郡
翩然漢水爲池民無愁嘆巫山猶錦使有光華雲
出無心且聊爾陽臺之下春行有脚又移之棘道
之間若時江陽實雄益部地望隆重視古元侯民
俗恬熙爲今道院然天大地大自足着鵬鷖之游
何月更歲更獨不出魚鳧之國殆欲紓憂於西顧
即觀錫命以東歸某越在師行無由旅賀輅下甚

西華三十一
安於局促狹中敢累於提檠不進不休聞又綴鸚
書之末載飢載渴但願從魚服之歸庶因青簾白
舫之回一見紅旆碧油而去

賀徐漕除東路安撫瑄

升班延閣就鎮价藩耀東壁之圖書光干列宿控
西陵之門戶專在三巴無改舍易轍之勞有弭節
建牙之寵用賢如此通國驩然恭惟某官得天委
和與月爭皎一時歐范共推無黨之雄文千載于
張終愧有功之陰德甫更再轉亟取一麾化行江
漢之未幾名震京師而難掩周爰咨度遠有光華

白帝城高符節久煩於兼領烏孫國亂藩籬有貴
於預防就煩使指之膺專總帥連之重肆加內祕
益壯中權不十日而至長安漸試魏延之策命一
將以向宛洛將圖葛亮之功諒飽巖排峽束之詩
合勒地闢天開之頌某絕無操挾獨辱知憐頃徒
據地以承顏聞亦爲天而啓齒實不知師德之薦
遂有缺君房之書諒姑充賦於公車豈欲收恩於
私室待李生者何道豈當求益於速成知徐公之
有常定不昨取而今捨

通湖南安撫曾參政

從龍

任武岡倅作

望魁台之下久隔師門趨翼軫之旁今依帥閫肅
馳函於籤府嗣歛版於轅門恭惟某官氣擊扶搖
曾藏磅礴學粹然而出正文卓爾以不羣榮進負
素定之科溫飽非平生之志蓋中興狀頭之盛三
十有三自大節終身而觀幾年無幾獨凜凜梅溪
之氣槩與英英無垢之風標民鮮舉之公其人也
不然既登兩地之峻何至弗能一日之安春容東
海之濱殫盡南陔之孝三年過隙謂當宣文德之
麻十乘啓行顧使分武安之竹洞庭九州之大詎
止价藩衡山千里而遙是爲岳牧暫借傳品之兩

略行湘水之春無回旋不足之疑見塊北無垠之
大對半夜之問亟遄宣室之歸反九章之騷即報
脩門之入惟公懋德相我受民其甘以迂愚老於
廢棄誨諸生於館下以冗見治試別駕之治中無
材可展然都梁之斗壘固全楚之井疆自昔非螃
蟹之鄉詎容置倅比年更虺蜮之警浪轉爲丞茲
載忻而載奔幸受容而受察門生不知恩非人也
竊自怜柳子之窮相國求余文知我哉何敢學韓
公之傲

通興元楊安撫

九鼎

任武岡倅

隨帥幙於西滇濫綴賓僚之末望將壇於南鄭遙
依節制之尊姓名難摸於暗中牋記盍馳於麾下
伏念某嶽崎半世拓落一官口耳止數寸之間淺
哉學問頭顱入四十之後荒矣功名亦欲守山澤
之臞又恐俱草木之腐昨獻公車之牘謾投光範
中自欲卷懷適會文翁留再剖之符復令王陽叱
九折之馭沐浴而戒行李極知見笑於大方蹉跎
而效小忠亦欲少酬於知己然乏蚍蜉蟻子之援
而落魚鳬蠹叢之邦繞樹淒然託根何所恭惟某

官肝膽一劒精神五兵攬轡登車湘水詠揚憑之
德輕裘緩帶峴山留叔子之名旣思鱸以歸吳忽
乘輶而諭蜀天旋夔峽良費馳驅地重秦關徑煩
彈壓况是四郊之多畜聖尤須千里以折衝遠其慮
以圖非常之功積其力以俟可乘之隙公固有志
於世世寧無望於公惟無敵知儒者之真則可大
皆賢人之業尚念某藐無操挾全蹈踈庸仰天漢
之云高相國方追於國士思月湖之所與中郎或
識其典刑

通湖南曹安撫

彥約

截江而屹廬山仰高有日披雲而覩衡嶽拜下可
期藐然縣掾之抗塵眈此帥連之隸役事有稽於
故實書足達其姓名敢以畸涼陳之耦儷恭惟某
官風猷明浚天韻崇竑自其不卑小官於州縣之
時已知將降大任爲社稷之哭鬻囊者恢復之役事
有至難茲歟倉猝之謀談何容易維時漢廣孰是
皇華能與城以俱存尊乃勇耳使自焚之弗戢燕
可伐歟中冒鵝鵠魚麗之行旁絕虬蟬蟻子之援
所忠者國遑恤乎他屹然孤墉遂作百川之障只
此一事已堪千載之垂來自重湖徧持三節人不

疑其爲驟天亦慊於未疇鋒蝟斧螳敢肆萌芽之
怒帶牛佩犢忍違葱韭之安奏刀割然苟拊黜矣
太守不有肯與許以爭功皇帝曰嘻盍召曹而入
相復念鯨鯢之已戮得無鵠鴈之未安非高牙大
纛之小留恐右粥左食之或闕仍能罷之總帥峻
龍馬之負圖無以我公歸兮恐須衮綉樂爲天下
道也請被弦歌某拙不時宜窮自天賦粗識丹鉛
之點勘安知朱墨之勾稽負米屢空爲親勉出繞
枝自許非賢疇依然長沙不足回旋先生升矣縱
短簿能令喜怒伊誰念之使得侍一日之間亦足

尉平生之願湖南於人不輕接何恃而來冀北之
野無留良實非所望

通安撫衛大參經

書生漫仕抗塵縣掾之卑卜史消辰隸役帥連之
下藐塵埃之簿領跂霄漢之階符斐然修辭甚矣
犯分恭惟某官造道自得經德不回退然得聖人
之清進則任天下之重外凌雲之未剪內偃月之
方深去而違之十載孤舟之橫水時乎可矣一朝
巨棟之擎天不負獨對衮衣之詩盡洗兩造吾門
之誚入參國論出庀祠宮卒以道而屈伸初何心

於止速在外則植旗旄羅弓矢公豈此榮其功之
銘鼎彝被弦歌士誠有望不謂聽麻於文德轉而
分竹於武安長沙千里之平古稱清絕洞庭九州
之大新困繹騷茲勤二三執政之行殆非尋常謀
帥之比自天有命固已興宣室之思惟帝念功寧
久作南邦之式暫撫湘纍之蘭芷即歸商鼎之鹽
梅民無不獲之夫公有無窮之聞某起家素賤受
質朱愚學不前人空守嗜書之癖飢來驅我遂生
竊祿之饒不虞小吏之凌兢正託大鈞之塊土造
後造而廁下列嘗累一陶褻章服而揖上官惟當

三沐

通浙西袁安撫韶

十年幕府負公事未了之癡千里王畿隸華使周
爰之度聊步邯鄲之故欲瞻京兆之真輒修偶儷
之詞薄叙畸孤之迹伏念某幸惟洛誦家本唐餘
因應而情農遂去民而就吏昨貪近祿浪賦遠
游歷并捫參再造魚鳧之國逾沔入渭兩經烏鼠
之邦偶爾得歸置之勿論茲操破釜來問大鈞辱
令芻狗之陳更贊木牛之運幸頭見日良忻近咫
尺之天滿腹飲河政不過斗升之水然非有方問

之芘將若爲三匝之依伏遇某官器博而周材弘
且毅無曲李以阿世言言博士之風不錮人以收
功挺挺司徒之列徧儀旣仕具載休聲惟長安諸
夏之原視商邑四方之極宜得翁歸之公索仍兼
廣漢之聰明弄印無以易堯持教使之告舜京師
浩穰已迎刃肯繁之間侍從論思即聽履凝嚴之
上尚念其不堪位置何足控搏效韓愈謹奉大尹
之書非爲文也慕劉向獨序馮翊之傳尚有志焉

代回臨安趙帥師石

拜命中宸參華外府彈壓輦轂既知天邑之尊平

準京師又借月卿之重少騰歌於張趙即接武於夔龍某方聽除書欲陳慶語不虞貶損猥賜鳴謙會見九遷之榮當不賀而足

代回夔路王安撫

宗孟

垂共工而服命躡視大常伯之班夔有國以建侯遠致故將軍之禮燁然尺牘展也千金恭惟某官殖李端深提身凝遠建武功臣之後文獻具存正元朝士之間德音孔碩由觀風而分閭不易地以開藩睭是陳人接扮掄於西泝憐其舊日拾橡栗於東屯雖糠粃不足於敷揚然草木實同於臭味

春風披拂樹馨香仍飛剪穀之文見寵斲輪之老某強顏曳履有味挂冠共飲玻璃江固已蒙九里之潤俱是蓬萊守願早乘兩腋之風

代回湖南曹安撫

彥約

陞華延閣作牧价藩長沙千里之平孰主張是元戎十乘之啓實寵綏之恭惟某官抱負寬疏踐駁詳熟崇詩書閱禮樂天稟有餘羅弓矢植旂旄人疑爲晚以扶輿磅礴之地有奪攘矯虔之風哀兇鞠頑未正鯨鯢之戮烜威赫德是資虎豹之韜願疇未乃取闢之功行有使果召參之寵某緬懷先

契實托通家拙政在前乃不足乎揚之糠粃同年
有後亦助旁而譟其鼓旗

代回夔州王帥

宗孟

肅將使節就易帥垣號令晶明初不勤於易地圖
書清邃果何遠於去天恭惟某官昭代通材名門
勝士從容官牒鴈所至而有聲剖決吏文牛雖全
而自解茲乘漢傳出護蜀門八陣縱橫久督木牛
之運三巴䟽鑿更分銅虎之符念糠粃之在前餘
草木之同味竹枝嘔啞敢望播揚楸樹馨香滿期
封植用仁侯之新政慰太守之舊民愛莫助之遐
不謂矣某無由旅賀猥沐謙撝拍爪偶然終憶飛
鴻之泥上頭顱如此更慙神虎之門中

代回襄陽劉安撫

光祖

陞華殿左轍鎮山南千里見王雖未究獻納論思
之益十連爲帥亦可策還定安集之功邊面晏然
上心簡在恭惟某官三代遺直一世偉人儒特立
而獨行蓋以有益於國士任重而道遠不止獨善
其身抗正論於經帷吐苦言於諫紙芳馨香矣流
落久之屬時改弦令公趣駕方抱同朝之喜忽聞
分鑰之殊休兵屯田政須元凱之規畫輕裘緩帶

會繼叔子之功名無有遐心益觀遠業某曾同臭味頗共浮沉唱白銅鞮空羨接籬之倒吟青玉案不供繡段之酬

代回史安撫

彌堅

光膺芝檢進陟松班一札細書渙絲綸之溫潤十連大國添旗幟之晶明恭惟某官世濟壯猷家傳遠業輦轂之下彈壓夙著能聲侍從之間論思益高雋軌遽厭承明之夜直出爲湘水之曉行展長沙千里之平袴襦自得鎖洞庭九州之險舟楫無虞葺然獠蠻囂于鼠穴勝之不武雖多殺以奚爲綏之斯來宜習從而罔治帝嘉成績詔錫隆名東璧圖書姑暫煩於寓直南邦藩翰會趣用以遄歸某自媿望秋未遑賀夏徒以在前之糠粃荷不鄙夷其如莫報以瓊瑤止深感戢

代回徐安撫

邦憲

陞華法從作尹神臯疇若予工有渥貳卿之命徒得君重底寧千里之畿漠號旣揚師虞允穆恭惟某官靖共而正直肅括而弘深中外久於踐揚上下孚其名實太宗正之盤礴公豈曰淹少常伯之超騰人不謂早當日畿之謀帥勤天陞之掄材特

陞獻納之班俾任浩穰之寄欲粟賤追李峴少慰
閭閻錄囚歸問不疑更光史冊某自聞先庚之令
亟展同寅之恭材俊滿前欲譽盛德而不敢珠玉
在側始媿先施之未能

代回潼川劉閣學

甲

出綸北闕賜履東川臣作股肱宜職五言之納王
之喉舌游勤四國之蕃西顧既寬南圖益大恭惟
某官清標拔俗厚德鎮浮二十四郡之無人已見
真卿之節一千餘家之失火何勤長孺之行然使
玉帳之輕孰借銅官之重元戎小隊聊復班石谷
之春方國細書恐趣侍雲臺之下某久燕居息復
鳩僇功憑飛廉以寄聲若爲厚報望崦嵫而勿迫
猶佇遄歸

代回揚州崔安撫

與之

建勳偃藩方欲馳於慶牘濫巾分閫何遽辱於朋
緘一謙之光三復以愧恭惟某官氣涵天粹材應
時需德性得南方之強文字喧西都之價仁勇充
然於六館獨何蕃歟言行考之而一人如清河者
羣飛方銳勇退尤高甫躋郎舍之華即領帥垣之
寄堰橫古埭尚如召伯之棠地對長江曾擊祖生

之揖惟良刺史尚友古人使功名配於前聞則富
貴乃其餘事某何功湘楚又守勾吳捲兩西山良
有愧閭公之望觀梅東閣恨莫窺何遜之詩

代董侍郎回夔路丁安撫

黼

疇庸靈石改牧夔藩畫舫青簾昔固識灩澦之馬
碧油紅旆今重認常山之蛇建牙云初滿日交慶
恭惟某官風華俊茂天韻崇欽正色立朝有嘉猷
則告于后抗章請外取膏澤而下諸民廣信之政
既成承明之召宜亟適茲魚復重在麟符出幕十
年去思未遠賜書一扎易鎮收宜盧矢彤弓新元
戎之號令白鹽赤甲壯全蜀之藩垣不俟突黔即
膺詔紫某守邊弗績受代得歸已問檣烏頓有身
輕之喜尚陪厦燕獲伸面賀之誠

代回畢安撫

再遇

疇庸邊閫進秩內徽宣化承流將視儀於三事定
功保大仍作鎮於十連成渙載揚在師允吉恭惟
某官果毅而有守沉鷺而善謀心潛濟北之一編
材駕山西之諸將屬當敵警屢挫虜鋒鶴唳風生
走符堅於淝水鵝鳴雪夜擒元濟於蔡城公將策
大漠之功上已棄單于之過戢千戈橐弓矢既放

三
挑林之牛安邊境立功名真跨揚州之鶴鼎來恩
綽晉錫師麾英節麟符勉徇借留之請神旗豹尾
佇聞入衛之榮某拘以綴班闕於馳慶十部從事
慚無瓊玖之酬千里折衝願體冕旒之眷

二十一卷終

梅亭先生四六標準卷之二十二

總領

賀牛都大除總領

大年

知榮州作

結知宸宸改領餉臺千里餽糧有飢孰堪將拍六
計以廉爲本疇可易公成命風馳驩聲雷動恭惟
某官弘深而肅括忠肅而篤誠爲淮海維揚之俊
人得伊洛入河之宗派仁爲己任此心即禹稷之
心謹厥身修所學皆孔周之學安行塗轍動中和
鑾名旣震于京師才合居於給諫行行且止避御
史已播流聞皇皇者華遣使臣乃煩咨度名駿之

登既羨槐龍之對可占留肅相於關中且專餉事
任武侯於渭上式敏戎公然劔閣雖曰崢嶸而崔
嵬而益州實資疲敝之危急舐糠何止於及米放
手寧恤於傷葵人知罪歲之徒然天遣福星之臨
止序諸侯之上暫借重於王人折千里之衝即遄
歸於政地某比緣井改益資困窮雖飲冰食蘗以
自將然求牧與芻之未獲置郵傳命喜聞君子之
得輿升斗踈恩庶免波臣之涸轍其爲忻擇罔旣
敷宣

賀黃運使除總領申

內躋郎省外總餉臺西賓出幕之十年遂專主席
東漕下車之三月盡總賦輿人歆錫命之蕃上恨
用公之晚恭惟某官器資凝遠業履端溫言行夙
擇乎中庸名實久孚於上下頃歲紅巾之變折衝
白刃之間數進忠規刈葵惟恐其放手縱無恩澤
徙薪豈下於焦頭共推江夏之無雙再試潁川之
第一維駒維騏維駱暫紆苞栩之飛如熊如羆如
貔孰飽樵蘇之饗帝咨衆望僉曰公宜王人下視
於諸侯有嚴天節郎官上應於列宿肯歷土山政
令先庚而已孚軍民旁午以相賀田里愁恨嘆息

久已周知財貨本末源流尤皆宿講皮不存則毛
將安傳唇既亡則齒得無寒欲兵食兼足之沛然
在制閫同心而已爾既無間越秦之肥瘠何難圖
韓范之功名某百無一能億或屢中頃進總領甚
稱之語蓋在咨諏周爰之初茲聆除目之頒豈勝
頓足之喜惟榮之歲租無五千斛而使所月解近
七萬緡昨賴管前抱賣之贏用補大科帶補之欠
近困井仙之後難施箕歛之苛在小郡官兵既多
空腸而大司符移尚理虛額巧但施於有麪窮莫
甚於無錐與物爲春望公如歲今夕飲者恩明日

按者法正累故人觀察急於賦剝史私於民願哀
老子

賀楊總領九鼎

升賢九列總賦兩川無踰老臣久望甲寅之報敬
有成命足寬庚癸之憂除目一傳滿口交慶恭惟
某官資弘且毅器博而周解十二牛而有餘才固
高於一卅繫千駟馬而弗視氣亦蓋於諸公天使
之爲入蜀之星人以此卜擒胡之月知彼知己漢
中方務於養民擒賊擒王許下幾爲之避地徒緣
食乏遂致師還皇欲我公身任此事爰峻上卿之

拜俾專計相之權金掌月升光無不燭玉關夜閉
守或有餘聊寬西顧之憂即聽東歸之命某聳聞
出綽竊喜得與敢問遲之遲長恐遭羣吠之恠可
以速則速幸即遑四牡之驅

通四川王總領

鈞

代董制帥

企郎宿之周天夙瞻景耀望使星於蜀野行挹餘
光同是天涯莫非王事欲掄方寸之烟可無咫尺
之書恭惟某官器度崇宏典刑炳蔚江左風流之
後代不乏人襄陽耆舊之家世濟其美恬於再轉
翩若一麾日近長安謂即登於金馬天通蜀道又

出護於木牛惟關中餽餉之功實海內安危之本
樵蘇後爨今多宿飽之師弩矢前驅古有晝行之
羨行詠勞還之四牡佇觀趣侍於六飛某起家單
平蒙恩優渥立朝已濫况塵六典之卿試郡猶慙
輒冒十連之帥躊躇四顧冒昧一來惟方國奉十
行之書妄希宣布諒王人序諸侯之上亦願將明

代回趙總領

不憊

餉師天塹晉秩月卿峙乃糗糧坐給列屯之衆厲
以爵祿宜登九州之命恭惟某官育德忱恂揆材
膚敏方公私之積可哀痛孰與阜通顧財貨之出

有源流當加斟酌蒼年而變千里無飢載疇流馬
之功宜進執羔之寵某阻陪賀旅先辱撫謙鄉不
同乎已升華於元冕公歸無所會加畀於繡裳

代董帥回楊總鄉交割

榮駕駟車端開犀印卿士惟月班通河海之間軍
聲如雷驩溢關山之外恭惟某官材弘且毅器博
而周運斤成風解全牛於四顧策轡奔電洗凡馬
而一空皇咨分閫之勲命亞執珪之位合東西而
瞻使節共稱總賦之有人分南北而立王庭何患
擒胡之無日亟觀合爵佇即歸班某有幸爲寮又

將邀福百里九十正倚同舟共濟之功一日三秋
願叱負弩前驅之效

代回趙總領不

祥刑訓夏深愧曠官事典司冬猥令率屬冒恩有
覲竊茫知歸恭惟某官給餽上流簡知中宸樵蘇
宿飽知調度之賢勞袞繡晝行佇詔書之趣覲有
華餘潤且及陳人某度其夕陽宜於野服猶曳鄭
崇之履小立斯湏行巾元亮之車又奚惆悵

代回四川陳總鄉咸

陞卿九農給餉四蜀事權增重光弩矢之前驅氣

色益明飽樵蘇之後爨恭惟某官學宗洙泗秀稟
岷峨介然忠勤屹立江流之砥見於調度傍流地
上之錢致詳慮於講解之餘定經制於裁節之內
栗塞其度已成未乃取闢之功印弄於庭宜有無
以易堯之命庸進執羔之寵以彰流馬之勞正觀
游刃之若新何慮強弩之已末某倖功愒日得謝
爲期取御史於九卿之中行觀更迭序主人於諸
侯之上願立斯湏

代回湖廣趙總領彥楄

壽庸外府進位上卿禮樂光華旣茂明於調度化

財平準茲益重於事權除目一盼輿言胥穆恭惟
其官持心信厚臨事浚明恭懿篤誠繼高陽之六
子切磋磨琢蹈衛國之武公揚歷彌深聲華甚茂
茲肅將於使拍俾總視於軍儲曾不淹時已聞奏
最爰進四大夫之祿仍幹半天下之贏是亦平遷
行有峻擢某未繇旅賀例辱巽牋卿不同乎已陞
華於元冕公歸無所會加寵於繡裳

代回湖北錢總領文子

自違貝闕寢遠珠庭迹雖遠於行藏心實馳於賢
德恭惟某官材全而業鉅學廣而聞多鞭霆駕風

已上蓬萊之島捫參歷井遽登蜀道之天飛芻漏
給於列屯叱馭不辭於九折成功者去盍歸乎來
惟是洞庭彭蠡之間實接夜郎牂牁之徼少湏澄
按庶免繹騷當飢饉師旅之餘民亦勞止在詔諏
詢度之事公優爲之顧恐詔溫不容席煖某腰黃
無補頭白思歸竊笑文章良感雙魚之遺光華禮
樂願遄四牡之驅遷召新榮眷委庸敬不敢煩瀆
併幸照知

代回淮西趙總卿不憚

陞卿九島給餽列屯人自日邊恩榮畫錦之遣錢

流地上師有宿飽之期下車云初載路相慶恭惟
某官直溫而肅括明敏而疏通早練達於民庸洞
講明於邦計懋轉輸之績飛不盡翰持經濟之材
翔而後集屬邊防之小定惟糧道之孔艱爰與前
席之思久不見賈復念弄印而授無以易堯庸疏
執羔之榮俾專流馬之運序王人於諸侯之上姑
驅馳數月之間求宰相於宗室之中會凌厲九人
之後某託交惟舊話別方新闖伺眠龜正欲致燕
雀之賀勤渠專騎乃先辱鯉魚之書徒華巾笥之
藏莫遂簪裾之報

梅亭先生四六標準卷之二十二

文庫

圖書

內閣
文庫



梅亭四六標準

卷之六

內閣文庫			
漢	特四十二	二七四二	一九
冊數			
部數			

合

內閣文庫			
部數	漢	11742	
冊數		19	(12)
部數		3	5

梅亭先生四六標準卷之二十三

都大

賀新除川秦茶馬魏戶部

泌

顯陟臺郎總提廐政文昌六部地官見謂之劇曹
武騎萬營天府復專於隆委祿因德詔材與事宜
恭惟某官心平而氣和人今而學古公侯子孫之
必復固有世臣名義鬼神之神難欺實由家學琮璫
不雕而自貴鸞和隨動而有聲屹立夔人之藩籬
何翅晉陽之保障儉以足用節而愛人迄轉上聞
首膺表選擇蘭依烏之位內陪從於太微摘名市

駿之司外分節於少府職任昔分而今合事權滋
重以不輕一洗空萬古之凡會如雲錦六經濟三
尺之法歸近天顏輕破睡正濃之詩小試思無邪
之李某苦慙驚骨復飲墓頤王良後造父先亦有
馳驅之志汲黯贛寬饒猛恐非採掇之材

代通制帥通四川趙茶馬

彥紹

分巴跡之旌旗濫膺守土占益州之分野知有使
星欣竊庇之自今愧修辭之已晚恭惟某官風猷
凝遠天韻宏深博極羣書太乙之藜相照文焰萬
丈長庚之夢不虛藉未陳周召之詩書亦宜獻間

平之禮樂恬爲丞之再轉甘出守之一麾刻銅虎
之符游揚美最護木牛之餉益茂膺公謂宜運海
以搏鵬又使摘山而市駿周原之茶鹽鹽包以紉
奩魯垞之馬駟駟爛如雲錦豈容黔突行有紫泥
某頑頓之資踈鹵於事將拍以出濫持天子之節
旄無功而還不得月氏之要領敢意冒升於荷橐
且令假守於銅梁有如凌兢何以全度東西之瞻
使節儻未賦於旋歸前後之間清塵尚有餘於同
味

代回張茶馬

子震

純用茶馬事

奏最蕃宣易司摧牧卧雲而逼象緯榮分東壁之光摘山而市駿蹄益固西秦之圉恭惟某官味甘苦永心秉塞淵出乘兩腋之清風已親法駕勒回中道之奔電歸扞渴羌茲揚春山之旗久擁東方之騎非環非玦上有雙鸞載馳載驅駕彼四牡取月團三百片之羨包以細奩供天子十二閑之須爛如雲錦佇頒鳳夸趣扈龍旂某有味溪芽無心天秣烹玉澆過秦之論徒抱渴塵籥雲作徠漢之歌更觀逸足

代錢塘趙縣丞通史都大

彥的

佐赤縣於京畿曾微善狀望繡衣於霄漢輒贊空函誠知使者之輶軒寧顧丞哉之廳壁恃仁人之在上實善類之焉依敢瀝寸丹敬裁尺素伏念某地寒無挾天賦甚慳濫綴族盟既愧宗英之卓爾僅憑門蔭又輒舉首之衰然粗謹守於廉勤亦徒勞於州縣每發辛勤三十年之嘆若爲扶搖九萬里之程頃贊武夷之六條及識文昌之八座青冥強箭妄希一發以五紆綠水寒波竟少九門之雨翼茲贊日畿之邑輒爲露剡之謀冒於一來茫然四顧盡枿去牙角豈無對立之松槐託根借恩光

誰念無言之桃李茲聞皇華之使實司造化之爐
遂忘躍冶之嫌輒控問鈞之請恭惟某官清涵沆
瀝峻稟扶輿若伊陟若咸賢合繼相門之相有封
胡有羯末乃安常調之常五馬不受於二毛八駿
又馳於四牡良弓良冶廣開橐籥之權鑄金鑄人
總出陰陽之炭圜法令行而禁止方兄昔歉而今
豐點鐵成金實在一陶之巧匠鎔銅合潁即成百
尺之浮屠

代回史都大

定之

光奉宸綸真持使蕩方千里而賦政久歛惠於一

州園九府以通財遂褰華於數路恭惟某官人曰
有偉風調不亢番君得江湖之心不但番宣之績
史公引漳鄴之利更高城築之功暫司坯冶之權
洞識貨財之本恩隆正任使以大名地上流錢會
當裕子母之積階前生玉行將繼叔父之風某密
託隣光遠依夏庇六轡如組未遑瞻原隰之華萬
物爲銅願益楸陶鎔之業

代回鞏都大

嶸

杓攜龍角星駕賢勞氣轉鴻鈞天休滋至恭惟某
官司存園法贍足方今坯冶一陶財不期而豐美

陰陽爲炭道已長於泰交換于五辰歛是百福某
空糜囊俸猶綴橐班誤出山林聚鐵已難於鑄錯
頌成振相磨鈇聊具於報章

代回輦都大

恭惟某官總攝三官阜通九府錢流地上知鞭筭
之奏功人自日邊佇輶封之趣覲

代回輦都大

持橐無功蒙誤恩之起廢飛箋爲惠勤妙語之嘯
枯有味其言不知所謝恭惟某官器資凝遠材譖
深長時方多艱政有藉貨財之本公雖少屈亦足

之權行觀地上之錢流即聽日邊之璽召
某投閑暮境躡貳秋卿燁然尺牘之臨甚矣蒼顏
之愧藏之十襲感厚意以無忘雖則七袞覺報章
之弗稱

提舶

代回市舶聶提舉

周臣

肅駕星輶總司海舶舳艫千里有無得以懋遷胡
越一家內外服其平準是爲庸使允屬通材恭惟
某官卅濟象賢早騰燕譽青藜舊物蓋旋北斗之
樞畫戟凝香晚試南交之宅不嚴而化所去見思
惟是嶺陬久資璇稅扶胥黃木習廉介之具孚銀
甕白環紛貢珍之並入貪泉酌水已知吳隱之心
祥飈送飄佇應孔戣之召某卜鄰有幸賀厦已稽
六秬五羊難續遊仙之夢尺書雙鯉空慙寄驛之情

代回趙市舶

惟鳳

奏課分符乘輅司舶候風入貢固常聚蠻越之珍
酌水獻箴要當試夷齊之飲聞君廉甚職此宜哉
恭惟某官蔚若宗英濟之世美再試弦歌之政所
去見思一陶襦袴之功不嚴而治惟時嶺外交貨
海中然商賈筭至舟車漢非得已若犀珠賄及僕
隸唐已病之今大夫不務富其家則行旅必願出
於市得人如此通國稱之某雖縻於茲行引而去
露螢不暖安得照十二乘之車檣燕語留聊復答
咫尺書之便

卷之二十三

梅亭先生四六標準卷之二十四

漕使

賀新潼川黃運使

申

知榮州作

疏恩北闕將漕東州次公之最既殊宜登丞弼叔
度之撓不濁暫借澄清和氣褰帷仁聲載路恭惟
某官負材瓌碩迪德忱恂怡然不辭小官之時恢
乎可以大受之量盤根利器無四顧之全牛大輅
鳴鳶洗萬古之凡馬茲收三近古之郡實昔再轉
丞之邦田里無愁嘆之聲所居民富原隰有光華
之遣果若人言惟益部之使星俱高而潼漕之門

地尤峻建臺移治蓋田諫議之言持節策名有趙
清獻之烈惟公濟美與古匹休使臣得咨訪之周
上意知總領之稱某偶乘一障獲託萬間蹊田方
窘於奪牛斗水誰哀於涸鮒即日褰裳而求去聞
公攬轡而少留有刺史之榮無刺史之難是在使
者飲故人者恩按故人者法惟所命之贊慶攸初
乞怜是愧

賀黃運使交割

申

知榮州作

攬轡撫封褰帷問俗漕下冰解俟原隰之載馳財
阜風薰與輶軒而偕至民無罪歲帝有德星恭惟
某官簡要而恢通優游而昭晰萬頃不濁何能撓
叔度之清四國于宣所去思次公之政暫別峨眉
之月來觀涪右之風豈徒榮練鵲之袍察二千石
蓋將倚木牛之運出五丈原列城暫倚於澄清衆
職恐煩於總領某冒乘斗壘幸隸井封君子憂道
不憂貧餅之罄矣國人望公如望歲雨以潤之

賀呂提刑除運使

詳刑奏最轉漕升華統部不移令已孚於先甲事
權益進命不待於重申六轡借留百城胥抃恭惟
某官負材鴻碩蓄德駿厓家學淵源擅箕裘之弓

治世臣閥閱屹鼎鼎之樓臺盡徑歸清切之班顧
游屈皇華之寄二節二節俾詳察於風謠特書屢
書已茂登於歲績茲峻登於延閣俾專制於計臺
地上錢流欲暫煩於鞭筭日邊人至即遄上於橐
班某幸甚受容復茲竊蔭三熏三沐僅能寓致於
雙魚載馳載驅行賦勞還之四牡

賀夔路徐運使

瑄

叱馭及疆褰帷問俗察二千石知遠有於光華登
百八盤亦備嘗於險阻神明所相忠厚爲周恭惟
某官德配春華氣涵秋杳平生仁義所學皆本於

孔周單辭明清致君亦欲其堯舜出騰縣最入重
郎潛謂拾級以升高忽抗章而引外汶川鄭水今
爲湖北之偏州漢廣江沱久矣召南之美化雙旌
矣止五袴暖然諒思檢校於杜詩遂賦馳驅之周
雅瞿唐五六月自昔畏團團之天巫山十二峯何
况濟朝朝之雨遂勞六轡峻陟萬山蛇退猿愁人
何堪而至此狔啼駐嘯公所過以晏然聞蜀道分
八使之權以夔漕爲諸司之冠家有鹽井固足操
用度之贏民無錢爐似亦困征輸之役一賢旣入
百姓何憂遠而使之觀其忠可窺上意使者專焉

得其道寧有遐心功名留久遠之看富貴乃緒餘之事如某者无用於世所敬惟賢頃聞武城之弦睢盱慕蘭近載益州之舫邂逅識荆便蒙許載之後車且復指迷於前路稱曰知已知已未也更容受察於六條待以國士國士報之寧敢貢諛於尺牘

賀李運使鼎

起家將漕揭節濟湘舊令尹之雙鳬甫去十五年之近部刺史之四牡今察二千石而來民距躍以爭迎公馳驅其何憚恭惟某官篤誠而明允簡要

而清通言行擇君子之中庸德業得賢人之久大十年出幕孰居行營司馬之前萬里封侯乃在諸妾校尉之後勇襍望郎之被出塞膚使之帷爰從綠波青苴之間尽覽赤甲白鹽之勝金掌甫升於卿月玉鈴又屬之將星与其食武昌之魚又看種柳不若蠟永嘉之殺少待成瓜有懷清絕之大招復賦皇華之小雅暮捲西山之雨曉行湘水之春洞庭無波聊護木牛之運特犒爲徼皆知竹馬之迎有功見知不遠伊邇某強顏佐郡偃指終更非有海沂之功可歌別駕豈謂瀟湘之地又逢故人

偶聞報之不先慚奏記之已晚儻怜秋水長天之
共且善助之庶安清風明月之分會且歸矣

通張運使嗣古

飲水西江未及瞻舍人之樣披雲南嶽行當參都
漕之臺欲提聾丞上累膚使寸舟炯若尺素布之
恭惟某官心契九秋眼高四海周情孔思探鳳髓
以調膠宋艷班香拔鯨牙於刺手早司存於雨露
既感會於風雲厭承明之廬人共期於三入歸靈
光之殿天實相其獨存聊歌小雅之皇華來領大
招之清絕上原下隰拓長沙千里之平重江復湖

護洞庭九州之大齒髮未凋於計相腹心當屬於
留侯豈舍王哉今召君矣伏念某蟬聯成紀鳬徙
臨川家故一寒無虬蟬蟻子之援官仍獨冷有驪
駒狗曲之嘲歸尋黃獨之苗甘老青精之飯猥蒙
文石之陞俾讀武岡之銘自非使者之汝容轉恐
丞哉之余負鄉人見孺子之入諒亦惻於仁心長
史無宰相之才詎敢干於薦口

通湖南黃運使桂

乘輶將漕攬轡濟湘光粲璧奎卿月謂升於金掌
祥開翼軫魁星顧聚於玉衡四海歉然重湖幸甚

恭惟某官果達而藝直大以方文武兩科蚤占羣英之冠冕忠信一念允爲百世之楷模恬要路之在前甘急流之勇退東觀聿跡於蓬頂南風遽愴於棘心旣釋素冠盍持紫橐顧賦皇華之雅來尋清絕之騷開天柱紫蓋之雲民巖洞見澄洞庭青草之水地險弥堅杜陵何憚於曉行賈傳即觀於夜對某一寒寡與三暑投閑頃者誨館下之生不能教胄今茲補黔中之佐定是負丞所幸綴曲江之題或可逃直指之斧貴賤位矣雖有一龍一猪之分左右采之固在四牡四駱之下

通潼川程運使遇孫

度劔閣之險戍月凄然望玉臺之遙使星明甚久欲布仰高之悃茲併修賀上之恭恭惟某官心平而行高人今而學古影纓諾仕大夫爭羅而致之澤笏造朝廷臣無出其右者捨萬里九霄之騰踏甘五年一節之回翔不辭載馳載驅之勞茲見可久可大之業碩果何嫌於不食包瓜自得於含章皇皇者華昔固重周原之寄湜湜其止今况屯渭上之師願策木牛流馬之功却振金爵觚稜之步某學未能信年不後人直爲文翁留再剖之符遂使

石洪弃一孟之飯舟經灩澦鬢已竟其雙蓬路入
褒斜命已危於破竹徒竟長安之咫尺竟慚淝水
之八千河內願借留恂豈但任轉輸之委漢中無
所事信倘或辱薦引之知

代通成都梁運使

綸

代董制帥

隨八月之槎遂離漢闕望一星之分已次蜀都瞻
之在前瞠若乎後敢伺下車之始輒修上記之恭
恭惟某官器宇弘深風猷凝茂學有家法肯甘州
縣之徒勞政作吏師自合公侯之必復勇襍潜郎
之被高褰膚使之帷古來天府之腴莫如益部今
使雪山之重是在我公諒由四牡之華即有九年
之積不勞黔突亟下紫泥某久汙班行獲聯事契
豈謂半符之剖又依六轡之馳江路市橋想已遂
碧雞之訪天梯石棧得无憐黃鶴之飛

上兩浙丘運使

壽雋

索米待公車之命僅志抱關轉粟給中都之官猥
容入幕實有得賢主人之賀未知事大君子之方
斐然修辭滂若下汗伏念某寸勇尺懦一拙百罹
學不知方徒爾疲精神於蹇淺仕未能信尚何計
班資之崇庠然半生脫進士之場已三仕作諸侯

之客碧雞坊裏側身猶望於早還白鹿坡前戰骨
自甘於速朽偶獲返屠羊之役乃游羅舐犢之悲
五削猶溫一簣正湏於補考百念旣冷連年不果
於到銓親故開陳勉強抵此公卿推輓伺候久之
敢期得闕於日畿乃可託身於冰漕使者持斧實
總陝東陝西之權賓之初筵宜得洛北洛南之彥
詎應庸譴可備諮諏伏遇某官李本家傳材周世
濟四顧千牛之立解一鳴萬馬以皆瘖人懷召虎
之來宣日望伯禽之拜後導夙夜宥密之命亦旣
許時聯朝夕論思之班自應平步碩以翼翼四方
之極託之皇皇六轡之華礫其梟狼了不容於掩
耳壯哉雀鼠必從是以革心六條觀風萬物吐氣
孝者善繼人志是以似之欽哉時亮天功自此升
矣尚念其一無操挾全蹈闊踈鵲繞月以何依幸
二天之獨有魚泳川而相得或尺地之可通尚從
吏師稍勉政李大事則從其長倘堪藏拙於小官
先達者爲之前諒亦垂情於後輩

上湖南曾運使槃

主俗吏之簿書竈方夜祭瞻華使之禮樂槎自天
來半生忍渴於見賢一旦奉身而受察喜而不寐

文以足言恭惟某官得春委和与秋爭潔接江西
之正派克肖茶山抱河南之遺書久窺禹穴根柢
學問緒餘功名平生惡巧宦之圖握蘭屬耳所至
成循吏之傳騎竹驩然游蔽芾於甘棠始逶迤於
苞相謂予環而趣侍又濡轡以載馳去江入湖彼
善此蓋有之矣轉倉將漕唯与阿相去幾何人疑
王事之獨賢公未帝城之願入洞庭九州之大近
困轉輸衡山千里而遙正須廉訪揮王志慮摩俗
痛愁續荆潭唱和之詩不妨幽眇對宣室鬼神之
問會即超遷某承學諸生就官一列寒窻事業私
知對白以抽黃矮屋官曹今使出朱而入墨

君子之易事樂只小官而不辭向來一瓣香之詩
南豐固在下有千歲苓之句東坡謂何

通權運司牛都大

大年

承流弗績亦思歸味於蓴鱸轉漕非才敢取弃餘
之竹馬負決難於超乘倭已見於循墻盍以寸疇
布之尺牘恭惟某官洙泗正季淮海俊人言行一
擇乎中庸名實兩孚於上下清標雅操立獨鶴於
人間遠韻遐心送孤鴻於天末頃厭獬豸鵬鷁之
命來爲蜚叢魚鳧之遊天子十二閑爛如雲錦月

團三百片美若金莖廉不近名儉皆中礼脂膏自
潤昔考人謂斯何圖史疑塵去之日如始至王覲爲
可帝念在茲正湏清猷之一琴往減汾陽之半樂
某游從二紀奔走百罹方其弄月於眉山敢望占
星於益部已騰免牘冀奉俞音萬一不已於馳驅
再三尚求於教誨汝張汝弓汝鼓當飽顏行我任
我輦我車悉希指示

代回夔路王漕

顧問

疇庸司庾易節將輸激江西之波旣蘇涸轍之鮒
踏巴東之磧更觀常山之蛇使乎賢勞王所簡在

恭惟某官德浮於位材裕其官熟路輕車固有長
驅之地急流巨艦獨高難進之風一麾江海之行
千里湖山之得旣田里之無愁恨宜原隰之有光
華或謂歛散之權未展澄清之志木牛轉漕何妨
籌策之紆金馬著書行見詔除之渥某緬惟新治
恍憶舊游福星所臨遙想疲民之樂業豐年可慶
幸爲老守而寄聲

代回夔路王運判

宗孟

旣歷麾符榮將節傳彤襜繡斧新礼樂之光華赤
甲白鹽壯江山之彈壓旣均六轡坐幹千艘恭惟

其官抱負甚奇踐揚茲久屢登一鶚之表綽著能聲四分五馬之符居多善政有華將拍不遠觀風認常山之蛇默識木牛之運跨灩澦之象佇觀盡鷁之來某漫浪之期差池其羽走長安之日又陪上雍之祠占蜀道之星還作高唐之想

代回潼川張運判

師夔

代董制置

傾蓋相驩夙承雅契驅車見顧敬佩高情更勤四六之貽弥認再三之眷恭惟某官材猷膚敏器誦端凝使節皇皇夙抱靡依之感吉事總總行膺不次之除某甚感珍投莫知瓊報藏之十襲足爲篋笥之光雖則七襄不稱襜褕之贈

代回楊國博

丹筆祥刑幸依光於翼軫繡衣轉漕忽改次於斗牛甚慙徇鐸之初有缺褰帷之慶高情厚甚下問燁然恭惟某官獨抱古心力行正道太孳晨入士皆樂於有師湘水曉行民蓋幾於无訟自天出綽易地乘輶莫非王民何此界彼疆之隔徒得君重助春生秋殺之仁尤恐紫泥不容黔突某罔功闕歲撫事懷人有所不通方將考德而問業何去之速遂使離羣而索居所幸鄰壁之輝尚借滎河之

潤交泰亨而君子長惟此爲然有德進則朝廷尊
遐不謂矣

代董制置回利路楊運判九鼎

升班延閣易漕价藩煥乎有文章上直堯言之祕
送之以礼樂再華周道之驅就擁雙旌榮開疊組
恭惟某官揆材膚敏稟德浚明湘水兒童能說輶
軒之風采峴山父老尚懷裘帶之功名暫從神圉
之遊實簡明庭之眷駕言龍節將指夔藩富媪孕
靈坐溢牢盆之利姦胥落膽盡空訟詬之冤帝念
葭萌地鄰嶠冢木牛轉粟路即達於褒斜銅虎剖
符師可臨於秦隴有嚴三命欲集兩長東璧圖書
自它有耀北門管鑰無競惟人某辱託爲寮尤深
贊慶聞之道路恐又啓十乘之行修其簡書尚當
爲九遷之賀

代回湖南鄭漕肇之

曉行湘水遠知礼樂之華老入明光近抱簡書之
畏因遺我雙魚之繾綣知駕彼四牡之春容恭惟
某官與李長材英声茂實勒足奔電洗凡馬而一
空運斤成風解全牛於四顧入朝甫爾出牧翩然
撫字勞心香未安於燕寢澄清有志恩已賜於鵲

袍拓長沙千里之平旣均六轡護洞庭九州之險
坐幹萬艘行奏計於甘泉即立班於文石某蒲柳
之質糠粃在前芻狗已陳不意復蒙於文繡槐龍
對舞所期及識於衣冠

代回淮南徐運判

煇

榮驅漢節給饋淮壩禮樂遠而光華著聞于古師
旅加之飢饉聚見于今欲息隱雷之聲正藉福星
之照恭惟某官李爲可用才靡不宜素所蘊藏皆
及物之志久於歛退無希世之心旣交章於北臺
迄來歸於東海夜前席而入對晝衣繡以亟行奪
螻蟻烏鳶之遺黎使肉骨之再活捕蝥蟊蝻賊之
餘孽無翅股之復搖苟可救民諒深體國盤根之
別利器歲計有餘乘槎而歷天津風斯在下某過
勤巽謝仰認謙撝寒日荒荒詎宜貪帝所之夢春
郊處處猶將觀使者之功

代回福建趙運判

善宣

起家越上將漕閩中送禮樂而有光華古莫重乎
膚使一道德而同風俗今又在於廉車公無遐心
民可吐氣恭惟某官持操甚厚揚歷深至至今京
兆之歌曰前有趙宜入承明之直無以易堯不應

七聚落之間復勤單輅傳之出惟西北風塵之已
息而東南雨露之猶慳問俗及豚羔山谷之詩云
爾羨君超鸞鶴坡仙所詠非耶少觀荔子之丹即
拜芝函之紫某未由旅賀例辱損箋分民病之憂
願謹衣篝之護後天下而樂佇榮袞繡之歸

代回江東莊運使

夏

奏功司庾將漕陪京一道服於教條不勤易地六
轡熟於原隰益足觀風中宸眷隆上流勢重恭惟
某官材全業鉅學廣聞多高義之薄雲天早奮何
蕃之勇道山之鄰日月晚讎劉向之書輟從著作
之庭出任皇華之寄聚萬民於荒政驅四牡以賢
勞如此人才盍來歸於金馬柰何天塹方仰給於
木牛風景不殊星言夙駕師旅因之飢饉正藉箠
鞭氣色益以晶明佇頒召璽某冒焉浪出未以汰
歸訪斗牛邊已後君平之問以春秋對佇觀莊助
之來

代回江西李運使

珩

起家乘傳將漕餽軍淞河以東之民去思未遠大
江而西之地來莫已歌有志澄清何憂盤錯恭惟
某官名隨日起材應時需近使之煩使之殆無施

而不可善人也信人也似未足以相名方人物之
眇然而江濤之如此天子有詔固將大任於陸君
皇帝曰嘻猶有未平之劉闢樵蘇後爨弩矢前驅
繭絲乎保障乎公必本根之急濡需者卷婁者彼
何鼎鑊之逃紅旗破賊黃紙除書直相先後盡棟
飛雲珠簾捲雨寧久回旋某側聞下車方規上記
受一廛於仁政亟欲謀歸勞四牡之使臣別遲贊喜

代回成都林漕

文仲

將輸沔北易節劔南斜谷列屯方仰木牛之運少
城一道已先牡馬之迎下車云初載路相慶恭惟

某官好是正直擇乎中庸迎風寒露之玉壺潔其
清矣暖日生煙之錦瑟和亦溫然自奏郡庸出司
漕計乘槎直上天已界於漢中叱馭疾驅星忽臨
於益部聞數萬人通千里之役須十餘鍾致一石
之糧弩矢前驅樵蘇後爨諒賢勞之无憚在聖眷
則甚深某借潤德鄰升華工正錦城雖樂期公乃
在於早還金門少留即日會觀於暮召

代回湖南曹漕

彥約

按荆湖右轉漕湘中六轡如絲雖賢勞於原隰三
軍挾纊亦流潤於京師恭惟某官儒學醇明吏材

膚敏自策扞城之績亟膺持斧之榮告舍人趣治
裝適當寇警見大夫無可使誰給軍儲徑煩行李
之來以成破竹之捷民亦勞止因之師旅以柰何
我儀圖之殲厥渠魁而已矣小觀耆定即見勞還
某縻職雉官馳神燕厦歲月如代空驚揚糝之在
前造化爲工行見積薪之居上

代回湖北王漕

允初

起曹惕日甚慙清切之司信使觀風有渥皇華之
遣先勤下問良佩高情恭惟某官望實飛騰典刑
炳蔚一俞一咍當入陪廣厦之輶載馳載驅還復
動陽春之脚有華清樾施及凋蒲某曳履胡顏從
簪甚力老驥真老寧復恋立仗之芻孤山不孤行
當迓在原之轡

代回淮西傅漕

誠

虎符奏最龍節疇庸礼樂遠而光華遐心何有師
旅因之飢饉敏手是資恭惟某官機量醇明材猷
敏劭駒在彼谷已空北馬之羣魚躍于淵盍展南
鵬之翼甫班天上復守雲中帖四境之繹騷集萬
民之離散茲由畫戟就易繡衣雖合符得節若平
進之常然疊組重珪非他道之比少煩咨度會即

勤歸某願友多聞獨欠一識整六師而截淮浦正藉
來宣使百工而求傳岩猶堪共役

代回趙漕

彥倓

殿藩江介轉漕湘流表得賢侯州乃无於一事衡
爲巨鎮食何有於九年宜煩單車以餉千里恭惟
某官傑韜國器表立宗英出而專城奎書勉厲之
有效入焉繕器工匠技巧之咸精侈兮南箕歸止
西陌自起家而予郡已知國之得人田里旣無於
嘆愁原隰遂華於禮樂四郊如靖一節以趨某引
分投簪蒙恩分組景翳翳以將入所欣瞻衡宇而
載奔芳菲菲其弥章更願折瓊枝而繼佩

代回江西胡漕

觀

奪情許國將拍餽軍移孝則忠蓋古所謂大臣者
知遠之近故今用之鄉人焉恭惟某官挺有祖風
蔚爲世德中外踐敷之久聖明簡注之深素韞三
年方枕曾參之塊綠林一日忽干通德之鄉觀察
使急於賦焉見大夫无可使者惟閔子嘗要經而
服事至伯禽亦卒哭而御戎帝曰汝諧公爲民起
樵蘇後爨政觀韓信之奇弩矢前驅豈耀長鄉之
貴某相識雖晚所聞已多山林鷗鷺之姦何遽至

是京觀鯨鯢之績願早圖之

代回黃漕

學

典獄參聯久虞瘵曠共下兩關長忽冒攝承浪自揣
於頭顱難上司於喉舌露章控免天聽莫回諒四
牡之光實分隣壁致五鳩之正謂代庖人方伺端
以亟圖候謝忽鳴謙之先原定或復之敢稽

代回湖南徐運判

輝

四牡之勞使臣久稽王觀五雉之工正謬竊君
恩曾哭謝之未遑已謙光之先恭惟某官王之
膚使古之謀人雖駕單車身嘗於數器故繫四

印勞不嘆於獨賢淮海无波京師知潤遂使雲司之
白与分水佩之蒼某聽履可慙投簪甚切集于苞栩
遙瞻星言夙駕之光收之桑榆已畏日暮倒行之戒

代回廣西楊漕

方

起家予節將漕宅南高明有融及物之心未了選
擇而使重遠之意可知恭惟某官明善成身為仁
由已三仕无喜色三已无愠色養之浩然兩喜多
美辭兩怒多惡辭聽其自爾及茲更化復此立朝
遽為襁被之行遄有褰帷之寵莫非王土寧辭五
嶺之災無有遐心行歌四牡之勞某罔功曳履有

請投簪我營小山之居將委身而就老公作太元之草願載酒以相從

代董侍郎回辛運使

克承

帖荆報政沂峽觀風原隰之事孔殷正煩咨度疆場之虞未靖尤藉轉輸賢者之來民所攸賴恭惟某官天資凝遠風韵浚明巍巍我千佛之姓名早宜臺閣屈折三神之步武晚落江湖茲煩漢節之華來假夔藩之重跨灕潁之象不辭王事之艱難俯常山之蛇要識老臣之開濟飛騰自此翹企俟之某別德恍然爲僚幸甚尚憐往日聽夜雨於巴山安能扁舟披朝雲於巫峽

代回淮南林運使

陞班中祕將漕邊陲禮樂之重而元龜之何有師旅因之飢饉敏手爲宜天下之風駕恭惟某官器資膚敏德履弘深日之於日幾益舒翹於歲最屬淮人之離散求此之勿忘漢德之寬仁帶牛佩犢徒得君重無使民憂峻奎壁圖書之聯兼錢穀刑獄之任餽千金之日費正賴通材護數廛之風寒更賴奇節某未遑望復其甚慶得輿遺我雙魚愧莫酬於縉紳冀我四牡願加旆於馳驅

代回潮長范漕子長

肅將使指兼擁州麾一道觀風足展澄清之志專
城宣化又彰鎮撫之材重湖无憂四海相慶恭惟
某官人門具美天分素高久矣踐揚名實孚於上
下恬然歛退言行擇乎中庸公道方申薦章旁午
宜絲綸之一札畀符節以並驅夏口武昌三國之
山川如舊江沱漢廣諸侯之風化一新不俟席溫
即膺環召某摧頽暮齒塵綴朝紳只今數日以謀
歸外無榮望期公五月之報政別致賀忱



樓

字

四

六

標

準

平

庫 文 閣 內

特四十二類

一二七四二號

一九

圖

架

漢

書

合

十

內 閣 文 庫

書 號 漢 11742

冊 數 19 (13)

品 號 圖 3 5

梅亭先生四六標準卷之二十五

憲使

賀李知府除潼川提刑

錫

丹檢起家繡衣問俗故國非喬木之謂世選爾勞
奕葉茂猗蘭之光汝陳時臬星言雙節風聳列城
恭惟某官器博而通材弘以毅卓犖坐空於萬馬
笑談立解於千牛謂之壽杭謂之春秋素高家學
有若伊陟有若臣弼宜襲世官與其勞四國之蕃
宣不若奉六條而廉察公私之積可痛有賴阜通
輕重諸罰有權尤資閱實昔者鯉趨而獨立今茲

虎拜以揚休載馳載驅共說西平之有子善繼善
述更觀東府之象賢某濫守憇棠獲依陰樾作鹹
作辛作苦幾不容一日之安惟內惟貨惟來詎敢
逭二天之按其爲歸倚罔旣編摩

賀潼川李提刑除夔路提刑

錫

自天出綽易地褰帷家人有嚴君焉舊膺此選皇
華遣使且也今卅其官雖曰因避親之嫌亦見善
繼人之志夔藩幸甚梓部駭然恭惟某官器重以
周材弘且毅與人忠而執事敬見善明而用心剛
四國于蕃茂甘棠之蔽芾六轡如組訝苞栩之倭

遲曾未暖席之間倏有改轍之命惟四蜀之門戶
倚三峽爲咽喉昔先正保衡於此展澄清之志今
命汝大正庶乎體欽恤之心遙知叱馭而驅之會
有解印而去者忠信缺矣蓄積缺矣暫勞雙節之
馳錢穀幾何斷獄幾何佇對九宸之問某方依雲
覆忽報星移雖難留脚之陽春然尚冀驩顏於
廣廈送我而入楚澤固猶恨遠水之遶思君而下
渝州會問訊清溪之發其爲忻懌罔旣編摩

賀新潼川王提刑

禧

奏最觀風詳刑易地天旋夔峽垂光來近於蔚藍

星入益都載驟復歌於苞栩仁聲籍甚封部驩然
恭惟某官從容以和洵美且直自爲名進士之日
蔚有古君子之風旣疇庸磊落之州合入從通明
之殿顧煩雙節往控三巴蜂腰鶴膝之飢吐復盈
膚華雀角鼠牙之滯訟洞燭肺肝古井無波陽春
有脚還濡牡轡來顧鶴林禮樂言遠而有光况接
鄉閭之近刑罰不中則無措更兼倉吏之平雖則
劬勞又復馳驅於原隰周爰咨度便當獻納於軒
墀某乘障非材奉身受察五善重拜忻聞君子之
得輿百拙一勤儻許小人之全璧其爲頌詠未易

編摩

通劉提刑

堂

丹墀賜對繡斧詳刑君遣使臣固光華於在遠獄
爲司命必明謹而不留一賢觀風萬物吐氣恭惟
某官器函方重識抱浚明曾中風月之無邊一塵
不染筆下源泉之不擇萬斛而羸頃厭承明出將
英盪以九畿施邦政天不違顏障百川回狂瀾海
爲縮足頤退湏於檠戟復出駕於輶軒司長沙千
里之平惟良折獄澄洞庭九州之大何擇非人從
知察小大之情必不容上下其手周爰咨度即開

衡嶽之雲慨然澄清何愧滄浪之水所恐思賢於
宣室還當問路於脩門某起家一寒去國三暑強
顏倚席昔慚洛下之生箝尾對牆今補黔中之佐
雖云貳郤正隸六條廉不掩聾敢嘆永哉之余負
戇今成癖亦惟使者之汝容

通成都周提刑居信

門參歷井再爲油幘之趨挹斗揚箕揔隸綉衣之
察欲徹畸孤之名氏例須耦儷之簡書斐然抽毫
滂若下汗伏念某學未聞道年不後人亦知富貴
之浮雲不如貧賤豈無名教之樂地何必事功直

以飢驅爲此祿仕西望太白谿峽水之倒流東訪
蓬萊值海風而引去不謂詩書之元帥尚憐鄉里
之小兒表之鶚書隨以馬幣遂冒瞿唐五六月之
險來訪巫山十二峯之高揆材地以闕然託使天
而近只恭惟某官人今而心古行峻而氣平少年
公瑾之綸巾豈甘寂寂他日伯仁之金印徑可纍
纍居然盤旋州縣之間無乃培養廊廟之業勇訪
半輪之月徑登九折之塗載酒凌雲頓釋里閭之
愁嘆埋輪當路欲周原隰之咨諏何敬非刑惟明
克允歛此大惠亦旣洽魚鳧之民訖其外庸即歸

接夔龍之武尚念某不遠萬里來奉六條安於小官而不辭亦惟君子之易事昔在嚴公幙聞俱爲蜀使之知難甘原憲貧或竊效貢公之喜

通潼川丁提刑 必稱

登蜀猶天撫鹿蹤而自嘆仰韓如斗瞻熒次以非遙敢裁小子之斐然敬告大夫之賢者伏念某才疎而力腐少賤而長窮託疲芥於山林未能辟穀繫飢愚於簪笏却媿伐檀居然四十之頭顱孰是尺寸之竹帛頃自湘濱之憔悴誤爲錦里之逢迎半路逆遭竟勤回於俗駕三年飄忽難重入於禮

羅不謂再剖符之文翁未廢三折肱之韓子撰書詞而具幣又委重焉局岫幌而掩關旣無及矣惟是居攸之禕允之任却愧乏儀之群博之材治法征謀逼人己甚臺評幙辯忤物亦多未論雞犬之求仙誰許龜魚之託蔭恭惟某官器資凝遠材具寬宏盡棟朱簾屈平蠻之籌策清江碧嶂蔚治郡之功名謂宜進之清朝庶可行其素學居然龍節戾止蠶叢禮樂言遠而有光斯言信矣刑罰不中則無措自古謹之有如使者之賢足寄欽哉之恤綉衣持斧寧以滯銅官之山簪筆荷囊行入侍玉

皇之案尚念某貌無所挾誰適與容燕谷自寒敢望春風之披拂吳舡未辦尚依夏屋之幘幪

通湖南楊提刑楫

晨入太學之下曾識明師曉行湘水之春今依虜使禮有嚴於事大書敢廢於恭先恭惟某官守道真儒庇民正學自其驅馳於外不辭小官固知磅礴於中而可大受由子男之百里游賓客於諸侯廩給百司簿正九苞人皆疑其婉晚公何有於鄙夷園橋億萬人甫知矜式起家二千石忽有薦揚上憐皖伯之邦久缺桐君之政徒得君重無俾民

憂一札細書朝聞命而夕引道三年成聚今有袴而昔無襦孰期清絕之鄉又缺皇華之使爰將隆指出揔祥刑德星臨翼軫之間楚氛已靖仙槎來雲漢之表衡嶽頓開遙知登車之慨然必有解印而去者周爰咨度胡不均弘某副墨謏聞勾朱末雋譬諸川澤之下獨何蕃歟不知鄙酖之前有賈生否適是褰帷之始欣然祭竈之榮簿領中有是人耶非敢望也夫子嘗爲委吏矣能勿誨乎

代回叢路李憲至

奏最涪江按刑巫峽于蕃而歷四國所去見思察

剗而奉六條其有所試恭惟某官分輝井絡擅秀
岷峨名父子之天資璵璠之器難弟兄之家學金
玉其相環轍久之褰帷晚矣惟良折獄何擇非人
送以禮樂而有光既深簡在編之詩書而無媿願
益周爰某跂遠莫前賀成已後三巴疏鑿雖莫瞻
繡斧之持六轡馳驅猶願謹衣篝之護

代回浙東譙提刑令憲

畫戟奏功繡衣疏寵專城作牧既優撫字之材一
道觀風更展澄清之志有嚴星駕增重日畿恭惟
某官蓄德淵深裊身肅括郎潛甚久不矯世以爲
中卿列彌高忽抗章而請外寄隆名於壁府歛大
惠於金華民欲借君於一年公已報政於五月進
之旬服寄以獄平遠有光華况近長安之日周爰
咨度已接蓬萊之雲某甚慶得與未遑削牘儻無
雀角可使園扉之空似是馬曹亦竊廣厦之庇

代回陳提刑

守藩弗績扁舟欲問於吳江改組有嚴輿轎俾踰
於閩嶺方露章而請免倏雲翰之寵貽愧非所蒙
願竊有復恭惟某官抱材膚碩蓄學崇欽右峨左
平獻納盡司於清切上原下隰咨諏久屈於皇華

既潜消佩劍之風又密移珥筆之俗日月之貴名
方起乾坤之新渥必蕃諒九吾味之同皆借君波
之及某采入其阻北足以行共飲玻璃之江已有
倚兼之幸或入鳴珂之里尚希拔薤之規

代回提刑樂郎中

繡衣平糴久勤周道之馳驅丹筆祥刑更奉漢條
之寬大民非改聚官不易方雖四海之望未厭饗然
重湖之幸何厚恭惟某官器資凝遠德履直方摩蜀
道之青天豺虎莫投其距歌郢中之白雪犬羊難
肆其腥名大震於京師材合居於給諫惟是山海

之征推難損一雞欲其財貨之懋遷是資四牡遂
煩英節來按薰湘皇皇原隰之華民無遺便暴暴
丘山之積居有積倉公若違之他邦民必爭於境
上惟良折獄何擇非人既無得而易堯信莫如於
借寇衡雲改觀頓令山嶽之自搖湘水澄波便覺
江河之易避第虞詔紫不俟突黔某辱託比肩每
蒙合志勞來還定安集欲慰疲甿同寅協恭和衷
正資益友所慙尺牘有缺朋箋魚相忘於江湖諒
不責腹中之素鳳又繼之日夜尚同歌肘後之騷

代回江東提刑譙寶文令憲

寶盧寓直玉節按刑江淮草木之威名亶孚有衆
河洛圖書之經緯爰寵此行恭惟某官奧閤刺天
脩名拔地曾吞雲夢何小者之足言舟近蓬萊又
悠然而引去萬牛莫挽四牡載馳禮樂有光公不
負澄清之志哀矜勿喜吏何敢輕重其心有功見
知不遠伊邇某民唐索寞歸夢飛騰望南浦之朝
雲未能捲雨懷江東之暮日正阻論文

代回福建詹提刑

徽之

疏恩中禁持憲外臺褰帷風動於列城洗印日新
於衆聽湖山自得原隰有光恭惟某官早抱通材

徧儀華貫游刃有餘矣經肯綮之未嘗善刀而
之得躊躇之滿志屬時更化加意審刑徑疇淑問
之賢徃任皇華之寄維閩七聚不勝鱗介之勞奉
漢六條寧止狐狸之問必有澄清之志乃無愁恨
之民其審克之行且召矣某未遑燕賀先辱魚書
君乘使者車固可想雲煙之風采詔詣行在所或
少慰塵土之心期

代回湖南胡提刑

淵

還節荆襄按刑湘楚父老迎嘆見百年之故家叔
姪交承後一門之盛事賢勞何憚聖眷方深恭惟

某官擇乎中庸好是正直一經教子諂機寧觸於
屏風萬里隨翁直氣早鏘於門限忠無不報孝可
以移何周道之驅馳忘漢闥之補拾天高蜀道甫
休捫歷之嗟地徧長沙又作回旋之舞蓋今褰帷
之所自昔稅駕其間嶺北長蛇無復元城之迎侍
遼東孤鶴足榮華表之來歸某視螺川爲近隣恍
蕞門之遠別殘燈翳復吐寧有可借之光可入期
不來徒抱相違之恨滿期召壘猶可盡簪

代回江西李提刑

珏

予環將漕持斧按刑一道三司公殆踐揚之循兼

旬並命上應簡注之深前賀方馳後緘狎至恭惟
某官鎮浮雅量撥劇長材左馮翊右扶風居多善
政朝天津夕西極未究遠猷當戎狄講解之餘有
溪洞猖披之醜見大夫無可使者明天子選而用
之知效一官笑他人之刼刼身兼數器覺餘地之
恢恢民爲上所不爲本原安在我徃寇亦能徃保
障奚先願繼周使臣之光華豈徒漢刺史之風采
某見賢忍渴得報忘飢不解世俗書謾瓊瑤之效
報實爲天下賀願金玉之盡珍

代回湖南胡憲

澥

老形已具父自分於投簪成命莫回猶罔功而曳
履燁然下問厚甚高情恭惟某官政爲吏師行有
家法皇華原隰之上父職咨諏清切雨露之邊合
班獻納顧令衰白亦復佩蒼得非隣壁之光密借
滎河之潤某負二宜去已三上章行或使之即返
暑羊之肆願有復也遙瞻回鴈之峯

代回成都林憲

繁已

畫戟時庸繡衣疏寵田里之無愁恨歷試茂哉原
隰之有光華載驅榮甚恭惟某官人門具美天分
仍高我搢時流窘邊幅者多矣公抱國器願綵籍
以須之父於典州方此將指川合東西而瞻使豈
不足歟王置左右而輔台恐未免耳既均牡轡益
煥龍光某年以衰侵心爲形役已屢章而告老兆
足以行望三節之鼎來每懷靡及

代回江東葉憲

簣

翫麟雲司將謀退而飲山綠便蕃天寵使無功而
佩水蒼徒嘖人言誰侑予美恭惟某官好是正直
多所平反江以東之瘡痍各安饘粥斗維北之喉
舌難挹酒漿猶贈以言欲華其老然持總衆職而
相望恐難備百工之所爲某鳩僇非長狐疑已決

薦尚書不煩以政終非孔殽之宜白丞相去歸其鄉當希踈廣之老

代回江西李憲

五

制五刑以即天已慙占筆居四民而時地猥使代庖諒皆皇華之光密有蔽芾之蔭恭惟某官徧持三節游歷諸司方赤子之弄兵金堅憂熾賴繡衣之持斧風動草披仁遠及於一壘官躡升於八座某水焉得北日已薄西總余轡於扶桑安知飭化集王事於苞栩願見勞還

代回廣西郭提刑

貳

隨而薦栢酒遠莫致之得書而已麥秋報之何以恭惟某官馳心拱北將指宅南漢節梅花已弄青黃之實周原苞栩既成蒼翠之陰諒惟平秩之功如在始和之吉某雲司玩歲水部踰閑三月不違仁勞飛鴻之遠到五嶺皆炎熱願秣馬以遄歸

代回利路鮮于提刑

申之

虎符遲次龍節載驅禮樂遠而光華遐心何有師旅因之飢饉敏手是資恭惟某官籍甚人門燁然地望吏民相告方懷季子之章郡縣未澄宜攬孟博之轡劔閣今爲平地鮮于世號福星公有埋輪

之心民何懸金之慮功德如是祥祉如是其善持之刑獄幾何錢穀幾何行且召矣某老而浪出冗未汰歸五雉爲工徒積汗顏之媿四牡勞使願收直指之功

代回江西陳提刑

天宜

自天申命易地詳刑南海之陬旣濡無復跼蹐之困西江之水方涸更爲活鮒之謀恭惟某官奧學名家通材資世恢乎餘刃孰嬰紫電之鋒飛不盡翰斜取青雲之勢頃分半竹惠滿三楓尋專刺舉之六條迄用澄清於五管惟是畫冠之化未孚珥

珥筆之民欲銷赤子之弄兵必假繡衣之持斧周爰咨度行將勞星駕之還遠有光華何況接日畿之近某濫茲聯事幸甚依仁所望使者之車疾驅沃轡庶假忠焉之誨叶濟疲甿

代回廣東潘提刑

涓

分符奏最持節祥刑田里之無嘆愁選諸所表原隰之周咨度遠乃有光恭惟某官器宇浚明風猷膚碩頃儀六館實倡諸儒玉石一區時方負隴西之媿沿澠異味何至空冀北之群迄著顯庸蔚爲循吏一麾出守方幸同寅六轡載馳復聞後甲片

言可折必能體欽恤之心五嶺皆炎正足展澄清
之志星言夙駕天不違顏某十國爲連再鼓愈淡
落霞孤鶩不能奪萼菜之思尺素雙魚願無廢梅
花之寄

代回江東葉憲簣

斜日投閑冒誤恩而入侍朶雲借潤儼好語以相
先有味其言不知所報恭惟某官恢然抱負久矣
踐敷榮分刺史之符勇樸郎官之被甫陞華於卿
月又趣駕於使星數弄明珠自是驚人之質追隨
瑣闥會歸密地之班某起家一寒去國十暑頭顱
如此難遮西崦之光陰膂力旣愆又踏東華之塵
土會且歸矣焉用文之

代回曹提刑叔遠

顯奉郡庸肅將使指凝香畫戟政成數月之間直
拍繡衣象應一星之入用賢如此載路驩然恭惟
某官天韻崇竑風猷峻潔三年博士誰韓愈之見
治六館諸生留陽城而不果徘徊南浦檢校東屯
却念枳城實產伊川之易因尋涪水欲昌山谷之
詩孔席未溫曹裝又趣刑罰不中則無措自昔欽
哉禮樂言遠而有光是在使者佇從四牡歸侍六

飛某方襞賀緘已蒙謝牘我留綿谷正方深通漢
之防君把繡衣未可動思吳之興

代回新葭路李提刑

至

疑畫戟之香久分漢竹持繡衣之斧式憇甘棠燕
賀厦之未能鴈寄書而何速恭惟某官氣鐘井絡
秀出岷峨真難兄之弟難弟之兄信名父之子名
子之父人生五馬貴四出守而無嫌權門九牛毛
屢掉頭而不顧乃今直指猶是斜飛持衡秉鈞此
言何爲至我明刑種德所有更以贈君某日旣薄
山雲猶出岫惠文柱後殆非佚老之謀神武門中
行進乞身之請

代回方提刑

信孺

已下代衛參作

觀風嶺外公遠有於光華易地江湄我但慙於玩
惕鼎來下問益仞高情恭惟某官學與古稽美全
世濟江濤如此誰知戮力於神州人物眇然士頗
傾心於執事久於直指無乃斜飛然小大之獄旣
得其情則澄清之志亦足以展風雲之會朝夕以
須某分閫何功投林是幸叔夜不便於書疏遂緩
報章莊周無索其形骸尚祈終惠

代回方提刑

信孺

報政九疑觀風五嶺萬物吐氣正須結輩之賢六
轡周咨何慮越人之瘠恭惟某官風猷強濟業履
浚明學禮之有異聞蚤駿萬夫之望誦詩而能專
對卒鳩二國之民九重念功再命作牧與其田里
之無嘆息賀其見鳳之鳴何如原隰之有光華惠
尔跼焉之外星言雙節山鎮百城刑獄幾何錢穀
幾何不嫌纍印功德如是祥祉如是佇即予環某
方欲修辭遽勤委重雙魚尺素何言衛公綠竹之
詩兩驂四黃請繼方叔葱珩之詠

回叢路李提刑

錫

二年和義之郡粗護憇棠再命通德之邦獲依仙
李不謂我入而公出真成室邇而人遐辱寄朶雲
如對落月恭惟某官負材鯁亮蓄德鴻深雪檜霜
松凜凜祖風之似公槐柳棘英英家學之傳四奏
郡庸兩將使指巖巖漢沔帳下之甲多奔往往巴
渝舟中之指可掬去孔伋君誰與守見王導吾復
何憂共歌四牡之有功行趣八鸞之入覲某獲通
侯請且託交盟勿勞乎勿誨乎尚希忠告同姓也
同業也宜不遐遺

梅亭先生四六標準卷二十五

梅亭先生四六標準卷之二十六

倉使

通王提舉

與權

抗章引外揭節司平正士去朝四海之疑未釋望
郎問俗三湘之幸則多况以部刺史之天來臨舊
令尹之地民信之矣帝念在茲恭惟某官天韻崇
絃風猷膺碩學問廣大日光玉潔而蛟翔志氣清
明燭照數計而龜卜早提邑最入踐朝行徧儀清
選而人訝其遲立登要路而公不之領古之君子
寧可祿歎而氣豐今之謀人渠恤身進而德退拂

衣勇其攬轡慨然載歌小雅之皇華復領大招之
清絕我聞在昔三異具見於一同民到于今五善
固忻於重拜所虞駟召靡俟鴈回某去國三年起
家貳郡瞻霄漢之佳士昔蒙或輓以或推逢瀟湘
之故人今乃受容而受察偶甫至丞哉之璧末由
望使者之車文儒申申既喜迎柳公之不遠武岡
矯矯亦幾見王導而無憂

通湖南樂提舉章

人一天而我二未遑樂霧之披戒七日而齊三將
展衡雲之拜持不腆之上輅曠莫達乎中涓削磻

斐然負芒悚甚恭惟某官器資顯允德履碩庸
鄉之呼吸智謀雲仍固在正子之充實善信風烈
猶存魏科摘髭要路策足落筆坐奔於萬馬善刀
立解於千牛縣庸蔚乎浮湘郡最卓於守郢不但
別盤根之利器要已知勁草於疾風盍歸清切之
班朝夕獻納勉副皇華之遣原隰馳驅甫湘水之
曉行遄蔡城之夜縛郵酹有酒洞庭無波六轡既
均復成清絕之地一節以走恐登碧落之天某不
肖至愚無聞甚陋二科鹿鹿遂謀三釜以養親千
里魚魚誰以四方而供簿然專令朱出而墨入決

不敢黃放而白催郁先達者爲之前此六或遂居
下位不獲於上茲道難行受察去初願忠敢隱移
慈竹而裁率土定未忘故里之情賦梅花而獻繡
衣敢妄冀聞人之目

通新江西提舉兼知撫州徐監丞

環

榮驅龍節兼綰魚符內府轉丞方表循良之最外
臺選使更疇牧御之庸一道驩然六條秩若恭惟
某官器資庸敏業履淑均無終義理之文夙高朱
賈有功平反之德遠邁于張峻名胄之遙知餘
風之挺挺君山出牧屹隆維屏之藩汝水竊鄰

沐餘波之潤帝念西江之涸民多南畝之離肆咨
六轡之良井任双旌之重安其田里而無恨有蔽
芾之甘棠送以礼樂而有光寧逶遲於苞栩諒耻
納溝之失所必已檻轡而慨然式遄其歸不諫亦
入其淹回蜀道企想滕仁畏此簡書之流馬木牛
之智芥然疲役知奔蜂藿蠋之難何由回北斗之
槎尚冀下南州之榻其爲頌俟罔旣鋪菜

代回胡提幸

案

新合守符載馳使節田里之無愁恨已茂民庸原
隰之有光華宜膺君選恭惟某官器資凝遠德履

端深迎寒露置玉壺撓而不濁懷連城佩寶璐即
之也溫有華左輔詳試右翊斂嚴瀨釣竿之手將
賦歸來適武夷粟粒之牙猶煩料理龍光甚渥牡
轡如濡君乘使者車民知免矣詔詣行在所予日
望之方欲通咫尺之書乃先勤四六之惠某老未
得謝命作納言不善斲而汗顏稍麾即去望持斧
之直指更勉其驅

代回淮東齊倉劄

訢合守符肅將使指田里之無愁恨厥績茂焉礼
樂之有光一此行寵矣恭惟某官人門具美風調

不羣溫恭維德之基於文無害平易近民之政所
去見思眷是榆邊鬱然棠蔭茲自天而出綽不易
地而褰帷淮水湯湯式展澄清之志周原膺膺行
觀勞來之功某縻迹於朝莫面以賀五雉之爲工
正久已懷歸四牡之勞使臣別遲贊喜

代回湖南楊倉九鼎

顯陞簿正改賁使華國方貪賢使服班行之上民
尤望賜故資原隍之驅書繡分光宵衣寬碩恭惟
某官性資寬栗材具碩庸觀其不辭州縣之勞固
知必爲廊廟之器兩著扞城之績去則見思一罹

枕塊之悲毅然執礼既畢祥琴之御爰膺戎器之
除適是重湖年饑而用不足加之諸洞地大而孽
易牙欲其澄清知所斂散非輟寬閎通敏之士誰
課還定安集之功四牡載馳万物吐氣突不黔席
不煖了無偷安避事之情居有倉行有糧會見節
用愛人之孝某賀我選厥逢人說斯暮見吳山有
老大徒傷悲之感曉行湘水願功名留久遠之看
在旦夕佇擊水之三千曾旅進之末由何謙撝之

代回浙東孟提舉

植

南將星駕分察日畿遠而光華况去天之尺五近
先辱恭惟某官器資凝重德宇浚明方公少年嘗
栖棘於獨秀之下維時老子偶泛蓮於鬱孤之傍
屢獲過從不勝傾倒淒其三紀存者幾人細思一
夢之回何翅千帆之過天子有詔選公卿於西漢
之循太守謂誰疑姓名必東家之故顧取斜飛之
勢又爲直指之行登蓬萊宮問百万蒼生之辛苦
探會稽穴添一部史記之雄深舉頭即在於長安
濯足曾登於雲漢某鷄豚共杜虎鼠同宮方欲寫
贊喜之情乃先沐過情之謝承明之廬勞侍從之
事無以公歸邦家之光非閭里之榮豈惟我賀

代回江西王提舉

顧問

簪筆何功蒙誤恩之起廢函牋爲惠感妙語之嘸
枯有味其言不知所賀恭惟某官王之膺使古之
謀人慷慨登車覺范滂之不遠勤渠下榻延徐穉
以來前故當駕彼四牡之勤不廢遺我雙魚之寵
某老將及耄生也有涯雖則荷囊還本來之面目
其如蓬鬢當自揣於頭顱曷月還歸定相從於杖
屨因風占謝愧莫報於瓊琚

代回湖南葉提舉

宗魯

起自家林肅將庾節民以財爲本當加培植之功

君乘使者車必有阜通之政得人如此通國驩然
恭惟某官風調不群天材甚茂郎潛旣久忽爲襮
被之謀邊隙方開亟進徙薪之計身謀雖左物望
益高茲膺禮樂之光華復仕貨財之平準政恐公
車之暮召不容湘水之曉行某嘗具一箋未敢多
賀駕彼四牡諒有功而見知雖則七襄愧成章之
匪報

代回孟提舉

植

生日

庭帝門孤方切慕義之感函牋亭餽仰勤桑梓之
情卻之不恭用是下拜恭惟某官高誼絕俗厚意

噓枯記孟陬之庚寅撫其遲暮憐絳人之甲子混
在泥塗華以緹緘加之飲饌某丁年託契亥字過
期鵝鴨之惱比鄰甚華登俎雞豚之同保社敢不
舉觴

代回章提舉

良肱

郡符訢合吏節光華昔湘南之一州歛此大惠今
江西之列郡汔可小康演而申之自此升矣恭惟
某官器資凝遠學行淵深領著讎中豈固薄蓬萊
之島抗章請外必欲開祝融之雲人言衡山千里
而遙孰知周公暮年而變茲從畫戟易舁繡衣載

馳載驅民已安於四境受容受察吏知服於六條
將由膚使之功又趣面君之詔燕人爲函粵人爲
罇奏技闕然伯氏吹璫仲氏吹篪均茵幸甚某自
聞除日尤切歡顏託諸侯以寓公自今以始受一
塵於仁政曷月于歸

代回文思趙提舉

希倉

疇庸百里進轄五工禮儀知皇帝之尊所關甚重
臺閣須子弟之習未占已孚恭惟某官禮樂宗英
典刑家法兩試一同之地並騰三異之聲所去見
思願留借寇後來居上無以易堯夏氏上匠虞氏

上陶小煩鳩儔周公拜前魯公拜後會即象賢某
天幸同曹早勤委贊名父子之塵塊俯仰爲僚老
詩書之斷輪始終知免

代回孟提舉

植

憲曹贊治自揆罔功起部虛貪遽叨攝長冒國恩
而有覩託鄰比以知歸恭惟某官密邇王畿久將
使蕩有功則說行當勞四牡之來位事惟能必進
苞六飛之御何旁觀之巧匠猶不廢於拙工特枉
雙魚見華五雉某瀆三不告負四宜休某水某丘
乃童子所釣遊也彼鋸彼斧惟梓人之進退焉

代回浙東王倉

遇

右翊合符左畿易節田里之無愁恨畫地共談原
隰之有光華去天一握恭惟某官學爲儒倡政号
吏師出守晉陵適楚氛之甚惡獨明召教救周民
於予遺茲由畫戟之香進席綉衣之寵公方念越
人之瘠加戚于心上將思王某之文最宜爲誥某
比方謁入復辱書來四牡之勞使臣行且召矣五
雉之爲工正猶幸見之

代回廣東孟提舉

植

避直郎闡服勤使節番陽之召來朝何錫予之嶺

嶠于行言遠而光華也恭惟某官受才庸敏賦政
中和不俟駕固將朝陳前甚敬將入門奔而殿敢
後則非駘駘馬之嘽嘽安飛鳶之跼跼梅花雪片
洗空五嶺之炎茶焙鹽帆贍足九年之食使乎不
辱王所謂何其有幸卜鄰謂當聯事北山瞋膽已
移猿鶴之文東野回頭猶有駉蛩之願

代回湖北趙提舉

師石

虎符訢合牡轡光華卧護重湖材素雄於辨治身
兼數印權益重於按臨恭惟某官德秉忱恂識全
庸敏一路大計惟錢穀幾何刑獄幾何連年多虞

蓋蓄積缺矣忠信缺矣繡斧茲煩於直指綵衣尤
與於平反載馳載驅想星言之夙駕是撫是袞將
天道之好還某闕然僇功偶此攝長送之以礼樂
愧賀幅之已稽是以有衮衣願德音之是懋

代回淮東陳倉

孔碩

抗辭請外將拍臨途明啓刑書末覺丞哉之負式
遏寇虐正觀使者之功恭惟某官表嚴而裏寬人
今而學古孔懷同氣蟬孰歎於有綏折獄片言雀
難欺於無角適淮民之飢饉勤周道之倭遲側聞
褰帷良多負樵粟塞其庾斯成末乃取闢之勲印

弄於朝行有無以易堯之命某濫司飭化莫贊光
華遺我雙魚豈止加餐之字駕彼四駱請歌靡盬
之詩

代回江西章提舉良肱

五雉工正之聯承人之乏四牡使臣之重博我以
文得非所蒙願切有復恭惟某官內外揚歷表裏
融明開南嶽之雲厥功已茂激西江之水所惠滋
多蘇民氣於崇朝斧盜吮芳未晚皇華原隰之上
願益咨諏清切雨露之途會觀獻納某強顏曳履
空意投簪觀風而問高年想憐其出畫地而數佳
政亦足以歸

代回浙西林提舉拱辰

簪筆何功蒙誤恩之起廢函牋爲惠感妙語之嘘
枯或承之羞不知所賀恭惟某官高誼絕俗厚德
鎮浮宜頡頏於飛霞猶簸弄於明月駕彼四牡名
大震于京師遺我雙魚光自生於庭戶某拜命之
辱有味其言咫尺不違顏雖少華於末路八十猶
行腳諒見笑於大方

代回淮東劉提舉庚

斜日投閑冒誤恩而入侍朶雲借潤僊好語以相

三六
先自惟闕然何以得此恭惟某官早飛雋望寢踐
夷塗忽持漢節之光華出問淮人之飢饉民爲國
之本不應壹付之烏鳶君乘使者車乃可再安於
鴻鴈行且召矣願少需之某生也有涯身其餘幾
意行迷路又涉赤墀之塗具尺回舡終尋黃石之
約

代回淮東趙提舉

希道

旬侯底績庾節遄驅十二政之聚民可觀近效六
百石之察郡益究遠圖迺面得賢上心倚重恭惟
某官稟資信厚毓德直溫頃結綬於王畿即分符

於輔郡適時艱食極力救荒能活數十万人之飢
何必二十四考之政有華出綽亟命褰帷財貨本
末源流諒皆素習勞來還定安集自有成規六轡
旣均二節以走某欽聞視簞未果襍牋遺我雙魚
良感從遠方之惠駕彼四牡何幸勞使臣之來

代回湖北曹提舉

彥約

短衣疋馬又塵紫橐之班長跪雙魚如見繡衣之
面雖無以報敢誦所聞恭惟某官學本遺經用周
當世一種陶潛之秫再依王儉之蓮扞索虜於淮
濱屹長城於漢水恢然游刃經肯綮之未嘗快哉

此風搏扶搖而在下屬重湖之瘡痍煩一節之咨
諏因而訪桃源之桃不妨假館恐未熟摘洲之橘
已見趣裝某久於離群茲焉還綴老夫耄矣更數
旬金馬之門我公歸兮或一笑銅駝之陌

代回趙提舉

汝讜

代衛參

分閩罔功願歸吳下改轅有命俾牧閩中業已控
辭期於得請欲謝吹噓之迭已成臯緩之慚恭惟
某官屈漢宗英持周使蕩江湖表裏勤四牡之載
驅山嶽動重搖覺千牛之立解飢者欲令其得食慨
然已見於登車諒必由洪都新府而來猶可陪異
州故人之飲行止非人能也得無恋恋之情解后
適我願芳宜有諄諄之誨第恐一節之走能回六
轡之馳某正爾思尊又蒙分竹采入其阻足觀海
上之禽魚不已于行只負山中之猿鶴

回王提舉

遇

代月湖

右翊合符左畿易節田里之無愁嘆畫地共談原
隍之有光華去天一握恭惟某官學爲儒倡政作
吏師出守晉陵適楚氛之甚惡獨明召教救周民
於予遺茲由畫戟之香進席繡衣之寵公方念越
人之瘠加戚于心上將思王某之文最宜爲誥某

比方謁入復辱書來四牡之勞使臣行且召矣五
雉之爲工正猶幸見之

回尤提舉

裴

去國奉祠久抱伐檀之媿起家進職忽叨分竹之
榮曾異謝之末皇何謙撝之甚寵恭惟某官見聞
殫洽議論崇欲尚書之履有声典刑是似部使之
斧直指風采凜然皇華寧久於咨諏清切即觀於
猷納某同爲吳客共落楚鄉德必有鄰僭輔車而
增重服之無數藏簡牘以爲榮

宗正

代回西外趙知宗

不應

小宰立班愧星辰之曳履大宗維翰貽月露之連
編雖過乎情良感此意恭惟某官枕洵有守信厚
不浮天揖同姓之聯肅然糾合尽日宣三德之
敬莫不浚明雖玄爲善之居家尤樂推賢而報國
有華新渥猥及陳人某司臬亡庸共工甚忝虎拜
稽首願觀蕃錫之榮龍作納言已懼曠官之辱

代回西外趙知宗

不應

疏詔東平展親西外王曰叔父立愛始于家邦汝

作秩宗受祉施于孫子棣華韡々瓜瓞綿綿恭惟
某官大雅不群爲善最樂箴規磨琢蹈衛武之流
風忠義輪囷粲劉向之封事庸專糾合之任助成
睦族之仁周之宗盟誰若滕侯之長唐之宰相豈
遺德裕之賢某側聽渙揚未遑旅賀召伯分治諒
信如麟趾之詩長卿倦游愧莫續兕觥之賦

海亭先生四六標準卷之二十六

梅亭四六標準

冊	文	開	冊
一	二	特	漢
七	七	四	
四	四	十	
二	二	二	
元	元	元	

合

內	開	文	庫
冊	號	漢	11742
冊	數	19	14
冊	數	3	5

梅亭先生四六標準卷之二十七

太守

賀趙尚書知平江府

改述

通班矯閣作牧吳門厭承明之勞出領黃堂之寄
游姑蘇之勝請吟畫戟之詩和氣先庚而已孚驩
聲旁午以交慶恭惟某官飄然無敵卓爾不群重
祿勸親亦既曳星辰之履大宗維翰乃欲把江海
之麾尺一之留甚堅再三之請彌刀君陳順我台
于內寧煩更尹於東郊召公繫諸侯之風何害暫
分於西陝登以瀛洲之秩試之馮翊之邦月滿一

輪虎丘幸甚河潤九里鳳闕賴之無以我公歸矣
恐須衮繡有安社稷臣者宜在廟堂某全抱迂踈
獨蒙賞識燕巢于幕正有望於捲簾鴻漸于般矣
若爲而遵渚然感恩正在於知己則受德豈待於
成身使相國賜之相國禮之則韓愈亦人耳此執
事事也執事責也於蘇洵何有哉

賀李參政知遂寧府

璧

升班書殿宅牧价藩入爲帝王師難戀洞霄之香
火出補父兄處重尋川路之風煙民說血涯公歸
有漸恭惟某官材全而業鉅學廣而聞多伯夷侍

天下之清一星終矣伊尹得聖人之任四海信之
若爲聽文德之麻尚使分武信之竹周公主陝曷
嘗瑕公孫之碩膚山甫徂齊殆欲續祖考之明哲
然有撫四夷之急能無先一州之疑向參耐官或
謂恐任宣威之寄寇公暫撫不如歸園答虜之勲
所謂真儒無敵之功豈容匹夫不被其澤某聞報
失喜捲書欲狂眉山之見端明不但願出陳黃之
派洛社之起司馬庶幾卒成遼夏之盟

賀寶慶李知府到任

大謙

錫命菟符開藩龍邸鄴侯出守衍苦李之盤根召

伯來宣新甘棠之美蔭驩騰千里喜溢四隣恭惟
某官筆橐世臣箕裘家學稟衡嶽之淑氣真磅礴
而扶輿沆瀣溪之 光風聊逍遙兮容與旣贊星
輶之畫又司天塹之糧所去見思厥臨孔惠自合
歸軒墀之供奉願猶試田里之循良惟此三湘壯
哉二邵考姚合之句夸五雲才子之除參韓翃之
詩詫萬里滄波之勝矧今新府密邇故鄉汎掃松
楸宿春糧而可至綿聯桑梓晝衣綉以何殊暫擁
戟香亟遄圭覲某漫爲佐貳正託附庸向忻一識
於荊州今幸再依於劉表偶欲叱峽之馭難隣

之父分尚或濯滄浪之纓叙宗盟而後去

賀虞漢州公著

戊月湖

渙奉恩綸復紆郡組紫樞黃閣蓋舊物之青氍紅
旒碧油又凝香於畫戟豈爲歛惠會即疇庸恭惟
某官父教之忠仕優則學識其小者指爲東閣之
郎君見而知之始信西州之奇士勞心兩郡袖手
四年茲奉板輿之親仍分竹符之使維今廣漢實
古雒城登橋而訪君平探河漢之遠派臨池而憶
諸葛懷宇宙之大名無疑牛鼎之烹雞政使蟻封
而試馬佇策勲於召杜歸接武於韋平某舊及同

僚新聞報政老驥真老空歌挽士不能寸之詩冥
鴻未冥猶見治平爲第一之召

賀太平字文守

紹彭

恭審輟賢中臺作牧上郡引嫌得請辭兄弟並相
之榮歛惠承流新父母斯民之政雙旌戾止五袴
煖然恭惟某官氣稟岷峨家傳莘渭抗旃出使勇
登老上之庭持節來歸亟荷甘泉之橐惟時重鎮
孰若當塗爰分半竹之符小憇甘棠之蔭朱轡皂
蓋暫凝畫戟之香黃閣紫樞自是青氈之舊某取
違未久遣賀猶稽方國一札之成寧須符合刺中

三公之入即佇袞歸

代羅司法

有開

上撫州林守

出

一官待戍頗安塵土之卑千里懷賢未快雲天之
覩忘越國過都之遠失擔簦躡蹻之勞宋之滕而
踵門若爲藉手何與韓之同業庸可潔身不然凝
清兵衛之香視此卑陬法曹之掾無謂而謁匪狂
則諛恭惟某官德宇浚明性資凝遠深造自得獨
扛百斛之龍文幼學壯行連舉八科之麟角諸老
未能言者天子居然器之影組西崑不受人間之
風日總書東壁漸摩天上之星辰六鰲忽戴於瀛

洲五馬遄驅於汝水穿天出月續康樂之詩章貫
日凌霜儲平原之氣節無多借寇會即詔黃功名
刺跨於數公史冊相期於千載某地寒無挾天稟
甚慳童而習之偶成蠅於誤筆齒已長矣僅得雉
於鳴盧欲留久遠之看恐未遺餘之補渠其繞樹
何所託根柱笏而看西山幸遲瓜代挂席而上南
斗徑造棠陰初非商賄賄之有無計班貲之崇庠
止欲觀道德於前後聽議論於左右特恐驢鳴之
止一難希馬價之倍三見刺史即周孔之初無他
望與童子慕回路也請在下風

通撫州林知府

澤之

隨鷁鷺之行昔陪朝綴投雞豚之社茲隸氓編未
修負弩之恭敢緩馳牋之敬恭惟某官心旣凝粹
德宇恢通杞梓廊廟之材宜其隆棟璵璠瑚璉之
器而乃潤山粵課民庸入司簿正居然難進而易
退可見特立而獨行厭承明之廬抗嚴助之素志
照臨川之筆尋靈運之舊遊維此偏城雖云凋郡
登瀛平地了無三島之風波擬峴高臺盡領五峯
之煙雨均洪十萬戶之福企望二千石之良丞聽
璽褒式遄圭覲某強名半刺實受一墨拔薤而擊

五
強宗諒無待任崇之諷索棗而夸新尹但切吟杜
甫之詩

通武岡呂知府

祖烈

典午非材偶躡踐更之次涓辰祇成式嚴事長之
恭半生傾耳以懷賢一旦奉身而佐治斐裁四六
聊具萬分恭惟某官才應時需美兼世濟丹青霖
雨家傳三相之畫圖朱紫風流人敬千鍾之名字
道統聿新於南渡文盟實主於東萊今人莫崇棣
之如蓋優家學故國非喬木之謂正倚世臣乃再
轉而爲丞始一麾而出守由也果賜也達然裕如

黔之嶺巫之嶠斯民幸甚然稽近比詎許久留式
觀一節之趨入侍九鼎之闢某學未能信祿以代
耕入誨諸生非敢絕吟而停手出延五鬼真成觸
諱於轉喉甘心曝簷日之溫豈意趣屏星之代今
何如昔寧敢爲李膺之大言我不爲公抑豈異呂
虔之嘉贈所幸處治中之任而展其足固有負天
下之望者爲之前風清月明祇望平分於別乘露
繁天豁或容款奉於清談

上知贛州胡尚書

集

聽尚書之履無以公歸分刺史之符徒得君重地

便過家之計天知體國之忠宜奉十行遂倡九牧
恭惟某官篤誠而明允肅括而弘深雲岫無心自
然萬物之吐氣秋竿有節豈以四時而改柯萬人
仰星辰之班六合無風塵之警誰因五單于爭立
之釁遂主十萬衆橫行之謀非上智必英豪談何
容易厭承明勞侍從兆足以行尚煩西清學士之
真俾爲南國諸侯之長牙旗鐵馬虎頭素重於百
城寶帶金魚龍尾仍通於八座納獨峯於臂次攬
八境於毫端富貴歸鄉人知從太守之樂其樂謀
猷告后誰其先天下之憂而憂無疾其驅不諫亦

入某一違約繆五見於締從軍無分寸之功失勢
有千丈之落落路經灩澦鬚已雙蓬身出褒斜命危
一葉謫甘滿百黜不待三北宮之挫一毫縱無膚
撓東野之失連產轉覺心寒惟是頃者之誤傳或
聞舉之以自代士固伸於知己吾不足以累公巨
源之表嵇康良非素望昌黎之薦侯喜亦足自竒
幸而出大賢之門亦合進小夫之牘實以熏心於
憂患未由奏記於門墻道逢千騎之上頭喜甚六
鰲之抃足輒裁賀語併控謝忱名在惡子之中敢
廢南豐瓣香之敬門無行媒之迹亦甘師道三徑

之荒

通武岡虞知軍

衡

仁侯出牧和氣先驅黔之嶺巫之碯地稱樂土軫
之旁鶉之尾天假德星謹藉雙魚候迎千騎恭惟
某官人門具美風調不羣利器盤根縣最茂朝歌
之長清談繁露蒙聲稱祕監之孫從容再轉之丞
恬退一麾之守惟武岡之矯矯晉數茂洪若文儒
之申申唐推公綽考之近比尤不久留吳公治平
之勲甫簪筆而持橐呂侯詳刑之命又攬轡以登
車我公來合於左符此事即探於右契湘水如舞

暫迎五袴之來嶽雲既開又趣雙旌之入某頃因
退鷁及識匿犀何幸宣州主人之來將有黔中上
佐之託惟是箱尾以涉筆偶然越俎而代庖茲僭
修副貳之恭非強附交承之好除道路而迎太守
願亟驅畫隼之旗封府庫以待將軍庶早反屠羊
之肆

謝綿州虞知府

普

將指非材連需章而析免陳情未達勤巽命之重
申力不足以回天錢何從而流地洊蒙問勞祇重
悚慚恭惟某官才應時需美全世濟連擁雙旌之

駕喜騰五袴之歌紫闥黃扉自合傳登庸之鉢朱
薨碧瓦且暫分磊落之州有怜芻狗之陳非具木
牛之智蕭然疲役畏此簡書猶加從史之詞乃相
親重之道某冒申僂僂冀免驅馳澤國龍節土國
人竟莫回於先甲大家牛車小家擔尚有望於同
寅

代回開州張守

晉

榮分漢竹少憇召棠絕異北騎麒麟真成歷塊出
巴東屬胸臆審已開藩恭惟某官文學浚明器資
膚敏談笑千牛之解游刃有餘超騰一鶚之飛插

翎甚勁言從涪水易守固陵編元子之珠璣多傳
詩賦奏韋侯之金石又妙辭章卧而治之行且召
矣某罔功犴獄躡長雉工無論思朝夕之才漫誇
文石有追迎雲月之友邈在盛山

代回龔州沈守

韓

出綸西掖宅牧南交惟帝念功不泄邇而忘遠建
侯植屏率崇德而象賢恭惟某官風調不羣人門
俱美製百里之錦游刃有餘題別駕之輿建轡甚
速朝陽之鳴已近夜郎之徼方虛君無遐心民有
吐氣某無由旅賀猥辱謙施五馬不受二毛此可

慶耳雙魚中有尺素何以報之

代回江州莫殿撰中書

子純

叢棘藏瘝改司平之常伯五花委重勤解事之舍
人敢被謝牋并掄賀臆恭惟某官多士冠冕九牧
羽儀要路在前獨有韓稚圭之識榮進素定了無
張師德之譏忠結人主之知文鼓天下之動乃從
右掖而綰左符鞭鳳咎鸞宜有燕閑之樂帶牛佩
犢反勤禽制之威茲升祕殿之華就易大邦之翰
九江虎渡交騰來暮之謠十年鳳池恐有見晚之
召某老當謝事頑復即工君薄淮南耶計登庸之
不遠吾在汶上矣恐邂逅之無期

代回方韶州

信

五雉分工何補雞翹之末雙魚尺素又勤驛使之
來藏去爲榮不知所賀恭惟某官器資庸敏政術
融明以專對之學專城裕乎不裕用平戎之策平
盜難豈其難輟從三章之溪使鎮九韶之石顯允
方叔佇獲醜以言歸執競武王豈忘遠而泄邇某
罔功雲部攝長水曹勞侍從厭承明會且歸矣選
賢良安渤海跂予望之

代回譙沅州

得遇

榮分竹使出牧杏城安邊境立功名維其時矣崇
詩書閱禮樂盍少試焉恭惟某官濟美勲門蜚英
學省班超投筆當加萬里之封韓信登壇可決千
里之勝得州如斗游刃成風沅沘公子之思聊逍
遙方容與楚茅王祭之入應糾合而彌縫豈舍王
哉今召君矣某雖嘗請別猶闕賀成選用賢良欲
安之願察舉龔之意備足文武可使也更疇借寇
之功

代回張澧州

忠恕

夏后之辟三千罔功亞旅冬官其屬六十謬玷上

卿五馬高情雙魚下問恭惟某官受材膚敏涖事
靖共挺挺魏謩寧無祖烈昂昂嵇紹宜有父風聊
分漢竹之符出結澧蘭之佩某罔功曳履有味投
簪荒元亮之菊籬竟成何事想浮丘之松塢空送
此心

代回尤衡州

斐

榮分漢竹言憇召棠崇德象賢共謂錫山之有後
牧人御衆從知衡嶽之無虞恭惟某官業履粹明
聲華茂麗喬木非謂故國文獻固存茁蘭稱其家
兒典刑是似茲紆魚佩作牧熊湘平庶民愁恨之

心去其螟螣還中州清淑之氣懷彼鷗臬佇增秩
以賜金復鳴履而曳玉某無由旅賀猥沐謙撫用
賢良固欲安之既深簡在臬京師并蒙福也更乞
勉旃

代回富和州

嘉謀

起之家林分以符竹用忠良慈惠之帥慰愁恨嘆
息之民邊圉底寧前旒寬頤恭惟某官名門濟美
雋軌舒翹方事之殷能運糧而排泗相時而動復
得計於觀濠何小智之自私疑大勇之若怯忠無
不報事久益明茲從珍臺遂殿藩服惟是烏江之
壘鎮實係垣墉非資青社之餘規難安田里民之
瘼矣君必勉之某雖忻除目之頒猶缺建牙之賀
綠琴委贈莫辦貂襜之酬盡戟凝香願謹燕寢之
衛

代回趙饒州

師芳

取材右戚予節左符南土跼焉風俗昔諳於瀧吏
東方擁騎江湖今樂於番君恭惟某官麟趾清標
鴻寶與學文章賀白決科俊造之羣政事龍興黃接
武循良之傳梅花萬里麥穗兩岐盡歸乎來爲王
卿士然宅乃牧亦福京師訪九賢之風流安庶民

於田里亟其璽賜當以袞歸某猶缺賀成乃勤委
重雙魚中有尺素已尊君子之謙五馬不受二毛
更覺王孫之貴

代回林撫州

呂

右虎留符左龜拂印以柳易播君何改刺之嫌自
宋之勝我得受璽之幸恭惟某官材全業鉅學廣
聞多七歲而賦方圓靜若得意連年而取科第易
於摘髭教胄西宗抗旃北漠旋被南衙之薦入讎
東觀之書輟從第一之祕丞進陪十五之郎位願
試馮翊勇下蓬萊今轉爲汝水之行殆亦是吾州
之慶真薤一本未能獻郡人之規歌麥兩岐已略
聞太守之政所願召參之使少寬借寇之民某方
欲賀成先勤委重唱父老曰陽公賢也行亦謀歸
有子弟而子產誨之別遲善頌

代回方連州

補

疏恩北闕宅牧南交唐陽山之都雖云窮處漢桂
陽之守蓋有聞人恭惟某官抱負雄深踐揚詳熟
爲丞再轉人歌別駕之功出守一麾上念專城之
重有華銀嶺遠畀銅符無疾其驅恐有天子之詔
起視汝穴更觀刺史之謠某遙想履封無由旅賀

望千騎上頭之去應有光華因雙魚中素之來就
申寫送

代回錢漳州 壽

榮剖漢符既臨漳浦人生五馬賸收及物之功山
有九龍豈少專城之樂恭惟某官飛騰聲實明習
憲章近使之遠使之皆駕韶鈞之韻汝器也何器
也宜爲廊廟之珍惟其游著於民庸是以復煩於
郡寄雙旌畫戟無辭遵海而南一札綠綈會即自
天而下某持荷惟舊視蔭無多馮熊兩轡愧莫陪
於賀厦烹魚尺素聊復具於報章

代回唐光化 濤

考工弗績人慙五雉之司宅牧惟良遠致雙魚之
問洗此執執儼如即溫恭惟某官宜在中朝願乘
邊障九夷通道既歸馬于華山之陽千里專城姑
擊牛享雲中之士今召君矣豈舍王哉某曳履胡
顏投簪甚力人生五馬貴願森衛之有加天高數
鴻鳴愧報章之不腆

代回趙袁州 彥倓

起自家林分之符竹庶民安其里是在二千石之
良刺史得其人茲爲十萬戶之福恭惟某官蜚英

屬籍擢秀宗標頃聞弦歌之聲已高物表不謂肯
綮之技久縮袖間茲由祝釐始復出牧袁雖小郡
古號名邦江山勝遊謝靈運之風流猶在閭里無
事韓昌黎之政術可師卧而治之行且召矣某違
離滋久企仰良深聞去騎之逐雙旌喜而不寐因
烹魚之有尺素文以足言

代回處州趙守

伯麟

分竹南衙憇棠東輔庶民安其里是在二千石之
良刺史得其人何止十萬戶之福恭惟某官凝資
信厚蓄德惠和大雅不羣信其來之有自小邦懷
德宜所去之見思茲屈高陽子之才出為縉雲
之牧民庸益懋王覲不遥某側聞建牙未由削櫝
雙魚中有尺素先承君子之謙五馬不受二毛祇
覺王孫之貴

代回葉廣德

延年

分命竹符承流桐汭安庶民於田里是在刺史之
良潤千里之京師尤借近畿之重恭惟某官識宏
且敏材裕而通鏘百里之絃歌紛諸臺之剡薦明
庭擢雋方通振鷺之班神圉祝釐遽抗冥鴻之志
起家而得二千石去天而在咫尺間勉策民庸佇

遄王覲某未馳賀幅猥辱謝緘豈自知雲中哉固
行藏之難料吾必在汶上矣恐邂逅之無期

回趙全州賀權軍必愿

比蒙省劄暫攝郡章退惟涉筆之文丞誑久挈瓶
之假守祇慚越畔無敢告鄰然在五日常兆之間
亦竊千里滎河之潤輒憑咫尺僭布萬分

代回信州李守昌

振職司均抗章請外治粟方資於內史傳聲俄典
於信州居南之滯有之江東之幸多矣恭惟某官
茂騰聲實蔚有典刑仙李盤根三百年之閥閱秋

蘭流馥四十載之才名方陞九苞之司忽念五馬
之貴詔書催發難漱石以枕流德政甫臨已反風
而滅火爲繭絲爲保障豈無素定之規有社稷有
民人足展平生之學某未諧旅賀猥沐損箋耄矣
綴班將何逃於司敗歸歟假道猶有謁於館人

代回林嘉興良

輟丞外府作牧內畿羞崑崙薄蓬萊孰窺雅意右
扶風左馮翊欲展通材卧而治之行且召矣恭惟
某官持操甚正揚歷彌深武城之愛播於弦歌海
沂之康流於頌詠藹然譽處服在班行甫更再轉

之餘遽請一麾之去言從攜李少憇甘棠舉頭即在於長安濯足會登於雲漢某未遑燕賀先辱魚書儻未挂洪景之冠猶願見黃霸之璽

代回晁南康

百談

訪靈谷之煙雲旣擁千騎懷廬山之風月忽寄雙魚忻然發函喜至折屐恭惟某官清門秀望名世真材即之溫然不減天球之器韻識其小者漫知月斧之精神方群飛之刺天寧一麾而出守兵衛森畫戟豈特昌韋應物之詩山水含清暉政欲考謝康樂之句徒得君重行以公歸某密託桑陰旣

凋蒲質腰黃何補愧山靈之移文頭白早歸煩謫仙之寄語

代回真州閻宗簿

一德

持橐無功忝青氈之舊物飛牋爲惠辱黃綃之好辭有味其言不知所謝恭惟某官踐駁茲久望實具孚旣朝蹟之居多亦民庸之荐著以恢然十二牛之刃宜快哉九万里之風属淮甸兵甲之餘民亦勞止惟閻公榮戟之雅帝曰俞哉不待席溫行膺璽召某久安芟製又玷荷囊斜日銜山所謂聊復尔耳浮雲出岫未妨歸去來方徒佩先施莫諧

十五
厚報

代回魏湖州 大中

陞華簿正得請州麾既建高牙屹隆方面曾未遑
於馳慶猥先辱於飛牋恭惟某官早煥英躔寢儀
膺仕神臯治劇久風月之平分匠監參聯去雲霄
而一握惟古馮翊乃今吳興帝掄輔郡之材僉曰
明公之可承流方尔歸齋翕然潤九里而及京師
君有餘矣先一州而後天下人謂斯何某自笑龍
鍾阻陪燕賀天時向熱望少留水晶之宮氣候稍
涼却歸侍玉皇之案

代回和州李守 大東

上車強顏又綴甘泉之法從開緘見面重逢采石
之謫仙妙語爛然高情厚甚恭惟某官名門勝士
昭代通材自其不卑於小官固已可卜其遠器婉
婉幕謀之贊煌煌簿正之光胡然把麾爲此斂惠
意淮民之離散已數萬人寬漢詔之嘆愁惟二千
石徒得君重無俾民憂鄉黨宗族稱盛焉何朱輪
之陸續父子兄弟相繼也會紫橐之聯翩某幸託
南鄰已投西崦聊復尔耳便當挂神武之冠行或
使之猶見賜潁川之璽

代回太平王左史 居安

諫大夫之去國公議謂何良刺史之爲邦疲民幸甚愧貢書之已後辱垂問之相先恭惟某官粹學淵回英姿山立識其小者巍巍拾芥之科誰其似之挺挺伏蒲之節交懽將相拔去兇邪此非淺之爲丈夫所謂上不負天子捫中無愧補外亦榮載酒龍山尋孟嘉之風味泛舟牛渚問公瑾之功名雖未均弘亦不落寞某年運而往日具之離猶冒恩除聊復持甘泉之橐小須興盡行當挂神武之冠

代回鄒汀州 非熊

黃帽青鞋又踏東華之塵土朱轡畫戟未忘北社之比鄰有來緘滕良慰離索恭惟某官溫然國器厚甚交情自頃杜門寂寞雀羅之設猥蒙枉駕從容雞黍之期求今人中有此客否自榮駟於五馬已屢寄於雙魚平生所聞陳汀州流風未遠丞相皆奉龔渤海即日當迁孰知厚祿之故人政尔頗哀於老子某持荷仍舊視蔭轉斜骭髀伊優揔不若挂冠而去嬰跼勃率或猶及召壘之來此心所期須面以旣

代回錢漳州 壽

晚景投閑叨承賜召秋官正屬竊玷貳卿靖循僥
忝之由寧匪游揚之助未遑控謝先辱飛牋千騎
上頭悵莫陪於祖送雙魚尺素窘不盡於報酬

代回筠州王守樞

停鵲起敬長懷東閣之郎君烹鯉得書知在西江
之道院飛文璀璨荷意勤渠恭惟某官早著英猷
寢跡膺仕淵然韋元成之孝問濟以伯禽父之謙
恭簿正塞華人己疑於婉晚民庸得請君何有於
鄙夷風行水波少爲高安之父老雪耻日獻月納
行見王家之子弟超人郎選方虛公來則重某不
量衰白猶踏軟紅山翁愛山行乞身而去矣相門
有相望進德以須之

代回前建昌羅知軍勲

已下並代衛參帥

及瓜受代分竹過家適聞千騎之還未遑賀下游
辱雙魚之遺有媿積中恭惟某官從容以和柔嘉
維則日奉平反之笑五馬甚榮人無愁嘆之聲衆
狙亦喜去之日如始至昔者人謂斯何引綬還鄉
端足見買臣之貴昔襦今袴恐已歌叔度之來某
正尔蒙成又承解替知賢當幸慮无益於高明所
去見思會亟登於華要

代回新南劔朱守

疇庸監郡疏寵專城別駕之功澤既瀦於彭蠡三
刀之夢劔終合於延平銅魚初分竹馬交慶恭惟
某官世科爲奕政李練詳屬尔立朝名實旣孚於
上下翩然引外動靜不失其光明久題湓浦之輿
遂擁演山之戟佇由明試亟用遄歸某辱託同寅
良深賛喜引會稽之綬足紹光榮聽臨淮之歌更
觀強直

代回興國趙知軍

引嫌抗疏改命作州共此大江尤倚上流之重均
之維屏是資公族之英恭惟某官濯秀銀潢舒翹
玉幹持平棘寺獄刀誤於有司歛惠竹符民甫誇
於新尹倦游廬阜乘興印山初非求喬木之迂姑
欲廣甘棠之憩恐未煖席又有溫綸某倡牧亡庸
爲寮有幸千里湖山之自得此豈刀能庶民田里
之相安尚希愛助

代回建昌趙知軍

時適

已下代衛參

抗章請外得郡來南兩科禮樂之英宜居表著千
里循良之寄寔賴藩維恭惟某官大雅軼群清標
映世七略百家之浩浩旣策雋躔十事九律之嚴

嚴更游餘刃方觀再轉遽取一麾金盤玉杯考顏
碑之遺蹟銅陵石澗尋謝屐之舊游特恐未煖席
之間又有不俟駕之召某濫茲聯事行且蒙成我
思古人雖有媿之庭之令民曰太守尚相圖田里
之安

代回鄂州趙監丞

彥綰

借材武監作鎮价藩皇華以遣使臣有嚴並命他
人不如同姓足壯上流恭惟某官早爾不群淵乎
似道翔而後集刺天不羨於羣飛用之則行奔電
何難於十里甫從再轉亟領一麾種柳西門人固
望陶公之政憇崇南國公盍明召伯之風會於文
昭武穆之英復此漢廣江沱之化富貴乃其自有
治行當以上聞某襆被歸田分符易地東連吳會
馬牛非不及之風西望武昌烏鵲有可依之月

代回南安趙知軍

伯鳳

解佩治中分符嶺下疇庸外服知更試之已詳就
任除書見用賢之不次伏惟某官天資廉靖政術
寬明惟其有之美不忘於世濟潔其清矣畏猶在
於人知游分男國之封綽有子民之惠與其半吉
陽之刺何如專橫浦之城粟暴而循惟良共理報

政無遲於五月飛車即下於九天某政爾藏瘵濫
茲聯事胡越同舟而濟尚無可異之心魯邾擊柝
之聞幸假相扶之力

代回沈興化 紉

諸公奉詔共騰薦士之章老子綴班亦切挂名之
寵徒得君重實獲我心恭惟某官實德蜚英名門
濟美閩有山川之勝在昔已然莆爲文物之邦惟
良共此頗聞賢明慈惠之政寂無愁恨嘆息之民
輒以名聞是爲衆選未見升迁之報又何異謝之
爲某陳力不能奉身而退亦有專城之命似可卜

鄰已無叱馭之心何因假館

代回何巴州 友諒

符分銅虎將尋栗里之歸興在驪駒獨奉巴州之
寄勤渠遠問感哉深情恭惟某官井絡聞家坤維
秀望南賓出守是爲四十而專城北闕上書且有
九重之知己謂式遒於王覲乃復懋於民庸他日
有殊恩計不遠矣十年爲同姓與有榮焉某納履
星辰把麾江海歸鴻遵渚難隨鳥翼之過浮鷁朝
天猶覲鴈行之附

代回建寧李守 說

已下代衛參政

贈琴芳桂林知將行於湘水發朝芳元圃復出守
於价藩愧迎賀之未遑感勞謙之見及恭惟某官
典刑炳蔚器采端深靈光殿之獨存是閔衆目承
明廬之三入又把一麾五年憇南國之棠再命典
西清之橐謂歸班於文石還分閫於武夷無疾其
驅即有詔追之寵不聞亦式况深猷告之知某承
惠長沙懷歸茂苑雙魚中素莫殫報施之情千騎
上頭尚佇臨存之惠

代回臨江丁知軍

必稱

得覲楓宸分華竹使朱轡皂蓋豈但人生五馬之
榮碧嶂清江盡在都城百雉之內恭惟某官耆明
山立廉潤春溫才名四十年久於許國刺史二千
石甫此起家伊誰云從何見之晚吳城葛井袁水
蕭灘無嫌如斗之州正藉成風之刃不容席煖行
有輪迎某聯事方新懷歸已切叔度何暮定閔襦
袴之有無令尹重來試問人民之非是

代回建昌趙守

訪洪崖之井漸欲東還問歐冶之地又令南徙上
章自列中詔未俞欲馳話別之牋已辱駢章之寵
恭惟某官身兼數器氣蓋諸公暫爲清香盡戟之

吟益增碧澗紅泉之勝二千石之有效宜莫如君
一再鼓而已衰何以教我某又隨旄纛特畏簡書
聞越地肥聞亦有禽魚之樂吳江水冷何當逐鷗
鷺之吟

代回姚開州

自舜

題慈恩之姓久遂託交傳盛山之詩始知出守遠
勤委翰更費屬辭某官續三世科爲諸儒唱頡頏
飛霞之佩宜在漢庭簪弄明月之珠久留蜀道會
膺表選亟有裏除某游守銅魚甚思尊鱸同年千
里恍如琴上之星何日一罇共聽簾間之雨

代回林饒州

繫已

顯膺帝綍榮領价藩番君得江湖之心定酬民望
雷令候牛斗之氣乃借鄰光恭惟某官籍甚才名
蔚爲壽俊道赤水而容与揚歷已深上青天之崢
嶸咨諏有賴居然蜚屈始此雄飛惟是餘干控于
粵服遠考劉長卿之舊政近師范文正之餘規御
屏記名天子有詔某留連洪府密迹大邦飛登棟
之雲旣勤郇汗酌青灣之水尚賴晉波

代回徐濠州

翦

已下代何月湖作

拔尤蓮幕分寄竹符當從軍四五年之餘有起家

二千石之寵可知才美超出等夷恭惟某官蒲腹
甲兵摘髀科第小試東南之尉勇隨西北之師贊
畫碧幢息氛紫塞側聞鴻鴈之離散淮甸皆然重
罹犬羊之腥羶濠梁爲甚帝咨誰守僉曰公宜非
常之任待非常之材斯言益信不次之除有不次
之報指日可期某偶綴公朝例蒙私謝窺威顏咫尺
天之意寧有遐心誦良吏拊循時之詩即觀奏
最

代回興化張知府

声道

畫戟清香有闕恭先之問明珠繡段例承委貺之
勤情文燦然衰遲媿甚恭惟某官器資凝遠材具
端方久朝績之踐敷思民庸之展布選侯千里出
守一麾閩爲保障之雄莆乃衣冠之會徒得君重
无俾民憂某偶綴近班過勤私謝乞爲寒水玉方
无計以滌煩贈我金錯刀諒不深於責報

代回王歸州

茹

塵埃伺候甚思何氏之山林翰墨淋漓似見王家
之子弟玩之終日洒如清風恭惟某官材地寬餘
人門秀整瑰意琦行真淮海之俊人玉友金昆皆
正元之朝士未空羣於巽北姑歛惠於巴東方千

里而封諸侯豈不足以爲政先一州而後天下特有感於斯文某自笑衰蒲更爲小草迷途未遠已令童僕之迎俗駕當回何待逋客之謝

代回金黃州與

百舍思賢夢過黃泥之坂一書委貺坐來赤壁之風讀之洒然何以得此恭惟某官影纓撫仕脫穎奇材屢風月之平分盍雲霄之獨步屬當冠至能與城存遂就畀於麾符俾益堅於保障綸巾羽扇訪故壘於西邊登戟清香歌大江之東去何以累君子猶有十萬之羸進而彊本朝行膺尺一之詔

某旣乘下澤又戀屬車邊秋一鴈聲漸起江湖之興人生五馬貴願精茵鼎之調

代回太平州王左史居安

迎五馬問專城已嘗上記烹雙魚有尺素始報下車厚賜駢蕃旅酬窘澁恭惟某官眼高四海氣蓋諸公惟僚其位而行不得其言則去今之君子遑恤位隆而道污賢哉大夫可使頑廉而懦立故於去國一二年之近遄有起家二千石之榮報政匪朝歸班有日某久踈顏采未隔心期君薄淮陽耶願早還於禁闥吾在汶上矣會猶見於璽書

代回饒州滕知府

安

入膺顯命出殿雄藩餘千乃畚之故都有華作牧
遠方聞滕之仁政必願受塵眡龜之賀未遑烹鯉
之書何腆恭惟某官提身肅括操行淑均獨扛百
斛之龍文恢然抱負連中兩科之麟角雋甚聲華
歷試民庸率登政最再持平於廷讞旋入直於郎
闈斐兮織文翩若襍被水清石見雲散月明故從
二千石以起家且使十萬戶之蒙福考古文翁之
宅題詩柳惲之樓拜顏魯公於堂已見心期之磊
落繼范文正之轍會看步武之騫騰某方此違離
悵然馳僊傾蓋如故何幸兵衛之凝香游刃若新
亦使鼓旗之旁譟

代回林處州

孔昭

起自家林出守輔郡以賢明慈惠之帥寬愁恨嘆
息之民上意甚隆下情惟允恭惟某官蜚英雋軌
策步華塗表裏瑩乎純明中外久於揚歷屬當赤
白囊之警出分赭黃織之憂未明李廣之功遽得
樂羊之謗忠無不報事久益明徑畀竹符徃臨括
郡抱濟北老人之石何必知勇之功名訪江南處
士之星會有太平之官府某猥塵班綴過辱緘滕

弩矢前驅雖少稽於賀厦鼓旗旁譟猶有待於賜環

代回劉袁州履忠

光膺漢詔出牧江城穀旦于差瓜期而往所謂十萬戶之福其惟二千石之良恭惟某官望實高華典刑秀整自頓割雞之政交騰薦鶚之章服在班行藹然譽處恬爲丞於再轉甘出守之一麾布新澤勸耕桑請驗韓昌黎之表得賢君游庠序自有李泰伯之文洗空珥筆之聲即聽璽書之召某偶塵橐綴例尋緹緘當太守入境之初雖稽燕雀之賀夏頌聖主得賢之美猶期蟋蟀之吟秋

代回慶元程知府準

榮駟節傳易殿价藩凝燕寢之清香護龍潛之舊邸寬條一布和氣四騰恭惟某官器宇端凝才猷敏劭盤根利器游刃有餘野水橫舟乘流則逝一襟潛郎之被屨褰華使之帷宣室不見賈生萬議以公卿之任潁川必得黃霸始慰其父老之心瀚海澄波京師蒙潤近長安之日豈舍王哉望蓬萊之雲今召君矣某比万蒙教復辱損箋陪進旅退旅之餘雖已遲於賀夏拜特書屢書之况亦自足

以生春

代回姜道州

楷

起從珍館出綰銅符板輿迎養之榮竹馬歡呼之
切教條一布喜氣四馳恭惟某官夙抱通材蚤儀
華貫西風便面厭隨京洛之塵東海邊頭歸望蓬
萊之氣雖某水某丘万便於幽討然吾山吾溪正
賴於主盟考陽城之勞心知所從矣得元結而吐
氣竊有待焉安知良刺史之歸不應吾太公之望
某未遑旅賀先辱謙施欲徃從之湘水深莫效綺
琴之報歸去來兮山酒熟亦吟盡戟之香

代回光化唐知軍

燁

蘭芷可佩頗懷瀟湘之故人草木知名似是江淮
之刺史徒得君重實獲我心恭惟某官文史蟠胸
精神滿腹觀牛刀之游刃已大足之生鑿自爲入
幕之賓彌露處囊之穎果從交辟徑把一麾邊城
蹂躪之餘野馬也塵埃也郡守經理之始爾絲乎
保障乎無有遐心政觀遠業某恭承嘉惠甚覺故
情沉乎不繫舟漸爲興盡之計賞此無瑕璧但歌
靡盬之詩

代回傅贛州

伯召

奉詔舉賢詘公充賦貽書陳誼期我過情言及而
言謝非所謝恭惟某官器資宏毅識量浚明四顧
而解金牛號霹靂手一洗而空凡馬真腰褭蹄卧
汲黯於淮陽固許召還於禁闥試望之於馮翊不
如即置之本朝日君有命於庭星郎多虛其戶凡
在班列許以名聞雖不勝匹雛固爲無力人矣然
有如一鶚敢不表而出之露請頗勤天高未動不
度德不量力雖見笑於大方非要譽非納交亦粗
賢於流俗不虞手畢却重背芒回首丘山何害四
十圍之溜雨濯足雲漢會看九萬里之搏風某獲
落無容嬾蹢未去迷邦故令晚方微吟黃太史之
詩可人期不來亦太息陳後山之句

代回嘉定林守

繫已

對月半輪好在漢嘉之太守披雲五朵乃是瀟湘
之故人問者闊焉得此足矣恭惟某官玲瓏俊識
卓犖通材和荆潭之詩氣已吞於餘子隨巴蜀之
檄名益震於諸公兵衛森畫戟之香談笑入青油
之幕聊將八詠還受一錢載酒訪揚雄之居登樓
歌李白之句亦職有利益歸乎來某久欲挂冠又
還持橐庚星之配殘月寧容到曉之不收丙穴之

有嘉魚所願得賢之與共

二十七卷終

梅亭先生四六標準卷之二十八

太守

代回新建寧府李大諫

大異

代月湖

蒼玉青旂趣元侯之北觀清香畫戟轉仁氣以南
驅誕對端辰裒時蕃祉恭惟某官蜚英騰茂聽厲
即溫肆夏升歌擬宣麻於文德陽春有脚還擷茗
於武夷芳歲維新叢休滋至某龍鐘甚矣燕賀缺
然列炬盍簪願遂同朝之喜習鄉上齒便爲告老
之謀

代回程峽州

峻

象刑贊治自媿罔功雉正共工禦令攝長愧未申
於巽謝遽先辱於謙搗恭惟某官燕譽甚休駟除
不遠閑香山之白傳歲月已深起東海之蕭生風
雲胥會有如衰朽諒借吹噓某自揣頭顱不堪指
目聊復爾耳少陪鳴履之班行或使之即控挂冠
之請

代回程慶元

準

制五刑即天論贊曹無補居四民時地利攝長可
慙既拜誤恩亦懷厚芘恭惟某官賢勞于外聖眷
已深怜草木之味同假之聲氣惜桑榆之景晚借
以寵光挽回神武之冠躡視文昌之座其餘年無
幾取數已多司喉舌之納言濫巾甚愧借齒牙之
餘論納履爲期

代回孫衢州

子直

憲曹贊治徒玩歲以罔功起部虛負遽誤恩而率
屬有渥粉榆之芘密榮蒲柳之凋恭惟某官作牧
近畿肇基王業有功則說行頒一札之書位事惟
能會振六官之譽曲怜衰朽巧借吹噓某久欲投
簪寧堪鳴履司納言之喉舌恐乏告猷借餘論於
齒牙早期歸老

代回張澧州忠愍

分符竹使出牧蘭江諒榮戟之初臨已袴襦之交
詠恭惟某官人門具美仕學皆優粵從幕水之依
羣空異野尋駕屏星之寵歌蒲海沂茲歛惠於一
州行報政於五月某語離方爾賀上闕然遭吾道
兮洞庭相從已晚遺余襟兮澧浦藏去爲榮

代回潘真州友文

象刑贊貳自媿罔功雉正攝丞猥令率屬非餘波
之遠竊何誤渥之驟加恭惟某官朝蹟方華民庸
甚茂駕輕就熟不忘推轂之言嘸枯吹生巧借託
根之地故令尸素亦復佩蒼某餘年無多休日已
晚惟是識鄭崇之履莫報君恩止當挂弘景之冠
歸歌聖德

代回安慶楊國博楫

元帥辟賢名儒出牧傳道解惑太學固教化之原
謹身帥先郡守亦吏民之本恭惟某官器資端亮
學術粹夷論不詭於聖人皆師友乎孔孟達可行
於天下真妾婦於儀秦自服班行益隆譽處人有
矜式甚慰橋門億萬計之心民無嘆愁却須刺史
二千石之力用召父杜母之政慰桐君皖伯之邦一

郡得才萬物吐氣其未由削櫝先辱飛緘君豈薄
淮陽耶當還禁闥吾必在汶上矣猶見璽書

代回周建昌

燧

入覲天陛出牧江城地小而民實殷無謂附庸之
陋政平則訟自理蔚為保障之雄恭惟其官濟美
象賢蜚英燕譽須為別乘既邦國之不空今則專
城諒湖山之自得眷盱江之小壘接閩嶠之要衝
欲寬愁恨嘆息之民是在賢良慈惠之帥銅陵石
磴尋謝朓之風流金盤玉杯識顏碑之氣骨是不
落莫何有鄙夷其方此違離悒然馳僚插三萬軸
嘗願託於主盟奉咫尺書敢再溫於前請

代回趙肇慶

鬢垂霜白甚便烏角之巾腰佩水蒼仍玷紫荷之
橐何勤妙墨更示微言恭惟其官大雅不群在宗
載考駒翩翩方長駕早空冀北之群為跼跼兮卑
飛猶落嶠南之遠佇策龔黃之績歸圖勉峴之功
其有七不堪負四宜去會且歸矣願為聖人之氓
愛莫助之請續循吏之傳

代回王楚州

益祥

入紆漢組出牧淮壩銅虎分符資循良之共理石

龜設險喜牧御之得人恭惟某官材具寬詳器資敏勁循循善誘立美教於鱣堂謬謬以昌振直聲於烏府屈伸以道出處何心茲屈搏風九萬里之程姑承起家二千石之寵山陽古郡江北要衝師旅飢饉之餘民亦勞止勞來還定之政公優爲之某別日猶新消辰未審雙魚中素猥勤先施之光千騎上頭莫贊前驅之慶

代回趙江陰

彥适

入對文石出牧澄江天近帝畿已覺王孫之貴地名道院諒無刺史之難恭惟某官卓然宗標展也

國器大功二十之一舉才子以爲宜同姓五十有三友邦君而亦衆眷湘河之奧壤在中浦之名邦舳艫相銜如枕席之上湖山自得歸庭戶之中使細民而息有在太宗之維翰某儀圖賀厦寢迫歸田八座前銜恍已成於芻狗尺書厚意聊附報於歸鴻

代回趙南雄

善僕

懷組新興改轍舊部昔爲半刺猶未究於全材茲旣專城諒不孤於共理恭惟某官飛英屬籍擢秀儒科楚令尹之清已之無愠漢良吏之盛去則見思久於飛鳧晚而展驥剔藪欲擒於劉關啜羹不

媿於樂羊茲從三楓就領半竹吏民旁午共忻別
駕之重留號令先庚不待賢侯之再命紅旗破賊
盡戟凝香某側聞下車未由上記種柳而歌刺史
願早成陰折梅而憶故人無忘寄驛

代回黃岳州

漢

入對楓宸出分竹使京洛雲山外方佇來儀乾坤
日夜浮又煩坐鎮恭惟某官恢然抱負多所踐駁
攜龍枕參蚤冠南宮之進士馮熊接軫歷試東方
之諸侯豈袁盎直諫乃不居中抑望之雅意固求
補外屈伸以道出處何心今奉建武之細書坐曉
岳陽之大觀先天下而憂後天下而樂不在茲乎
有刺史之榮無刺史之難亦足試矣某負二宜去
有兆足行我欲破何山之葦且甘藿食公當增黃
霸之秩而入荀班

代回張潮州

鎬

出綸西掖作牧東陽魚佩虎符香自凝於燕寢鳳
城龍首患何有於鱣溪恭惟某官喬木聞家茁蘭
秀質高山流水早收出宰之榮明月清風尋取平
分之寵民懷五袴君夢三刀眷是潮陽雄於廣郡
善必聞惡必見雖嶺海如畿甸之間守此土治此

民乃貢賦供宗廟之壤惟能誕布韓昌黎之政自
可細和鄭餘慶之詩某從雙魚中聞千騎上文軫
之薄桂海無有遐心姓名之在御屏願恢遠業

代回章象州

時言

夏辭三千貳卿弗績冬官六十攝長奚功過辱高
情遠垂下問恭惟某官材猷庸敏政術融明竹使
虎符曾謂人生之貴桂林象郡諒增地望之雄猶
枉雙魚見華五雉某去天雖近來日無多竹馬交
迎公當厚南土之惠專鱸既熟我欲御西風而行

代回施温州

城

西曹叢棘之卿躡升五雉南國甘棠之伯遠寄雙
魚頌而不規榮亦爲媿恭惟某官身兼數器惠歛
一州雅志在乎本朝行召君矣好善優於天下豈
欺我哉故令陳人復被新渥某亦聿旣耄豈不懷
歸天子以孔幾爲尚書三留甚媿丞相舉龔遂於
太守一見即行

代回王寧國

補之

制五刑以即天參縣無補居四民而時地率屬可
慚簡拔非宜游揚有自恭惟某官久分符竹行及
成瓜國人曰賢當拾遺於禁闥天子有詔佇奏計

於甘泉猶狂魚書見華雉正某日之夕矣人謂斯何納言喉舌之司濫竽何益餘論齒牙之借納履爲期

代回建寧傳侍郎

伯成

象刑贊治自媿罔功雉正分工猥令率屬誤恩有自餘芘焉依恭惟某官王之盡臣國之元氣元戎小隊又頒千里之春方國細書行趣九重之覲曲隣衰朽密借品題故躡長於中臺使少華於末路某身其餘幾欲者不多慮行道之猶非倚門翫隣憺休日之已晚搔首踟躕

代回新平江趙待制

希憚

弭節江城建牙輔郡鸞鳴滕閣久雅望之遙臨燕寢蘇州暫凝香之森衛恭惟偃藩明德胙土大勲衮衣繡裳宜拜左周公之命彫戈皂蓋又分右馮翊之符卧而治之行且召矣某罔功犴獄攝長雉工昔受一墨事其大夫賢者今爲三輔無以我公歸兮

代回陳撫州

苗孫

牧夫庶獄之司躡陞五雉邦君諸侯之寵遠寄雙魚受之赧然感亦厚甚恭惟某官器資敏劭治術

寬明師出於陳鄭之間孰共殽殽人樂其龍黃之
教謂有璽書似聞棠陰之成已迫葵丘之代民雖
借寇使盍召參諒敬老之近親不撫壯而弃穢某
偶然曳履行矣投簪君數父執於慈恩誰其存者
我得塵氓於仁政顧不幸哉

代回常德趙守

師乘

輟材宗邱作牧价藩全楚故邦義陵雄郡既有賢
明慈惠之帥當無愁恨歎息之民恭惟某官玉泚
流芳金門賜第雲霄一握盍陪護於屬車風月平
分久徊翔於別乘茲分符竹趣及成瓜三閭大夫
何至斯濯纓想樂武陵太守好事者進棹尤宜洞
庭無波宣室有詔某未遑上記候問下車安遺雙
魚聊作不遠之復人生五馬願觀自養之頤

代回湖北范漕

子長

兼鄂州

四牡之勞使臣久稽王覲五雉之爲工正謬忝國
恩手畢鼎來芹芒益重恭惟某官岷峨雋特江漢
經營方言利者析秋毫民力竭矣得明公而守夏
口使指裕如式遄其歸不遠伊邇某負二宜去有
七不堪詠南朝之數諸何恍非其舊歌西賊之聞
一范願疾其驅

代回新吉州汪守

祥刑訓夏莫輸贊貳之功事與司冬忽被攝承之
命誤恩有覲餘此焉依恭惟某官游著民庸還分
藩閩起家二千石佇看黃紙之除書連檣一萬艘
豈戀紅粧之執樂行且召矣願少須之某久覺龍
鍾難司鳩僦已屢貢挂冠之請兆足以行雖遠勤
削櫝之褒榮式爲愧

代回胡峽州

紀白雲之司已慚弗績分蒼玉之佩更愧罔功良
馬五之烹魚雙只恭惟某官賦姿凝遠布政䟽明

居然一麾之臨邛在三峽之遠詰曲羊腸之路王
尊願爲忠臣崔嵬虎牙之山吳漢隱若敵國願望
此府無媿昔人某司臬無庸共工尤忝讀西陵至
喜之記恍若夢游感北山勒移之文凄其歸晚

代回柳州趙守

師懿

老夫耄矣躡分五雉之工公子何如遠致雙魚之
素感藏甚厚報答莫宜恭惟某官千里名駒九苞
威鳳榮分符竹行吟種柳之詩少俟戍瓜即布甘
棠之化有華下問遠及陳人某翫麟雲司超騰水
部曳鄭崇之履小立斯須挂弘景之冠止慙遲暮

代回孟嚴州導

分竹近畿及瓜代戍舉頭見日治行易於上聞運
斤成風德澤亟其下究恭惟某官抱負甚偉揚歷
采詳恪持三尺法之平以長王國忽請二千石之
祿而課民庸維今嚴陵視古馮翊范文正之風流
未泯趙清獻之矩範具存舉而措之斯亦奇矣某
縻於聽履闕若盍簪去騎之逐雙旌賀成已後烹
魚而有尺素先施甚慚

代回李崇慶壘

優詔起家分符予郡蜀更多故有愁恨歎息之民

公勉一行真賢明慈惠之帥雙旌戾止五袴驩然
恭惟某官德履直方器資凝遠夕長蛇朝猛虎去
而違之乘赤豹從文狸潔其清矣未走三節聊把
一麾導玻瓈萬頃之江委諸汶井駐我眉半輪之
月照此唐安田里得以底寧公鄉選諸所表某游
從已舊俯仰成陳歛大惠于一州徒得君重賜細
書於方國無以公歸

代回臨江洪守伋

敬爾攸獄慚貳職之亡庸咨汝共工遽叨恩而率
屬高情下問外覲內敷恭惟某官業履粹明政聲

充實傳家萬卷洞先秦古史之書出守一麾續兩
漢循吏之傳排閭閻風而直上歷吉日兮將行猶貽
雙魚之緘見華五雉之正某強顏曳履有味投簪
輪人爲輪愧罔功於鳩僇相門有相願崇德以象賢

代回晁南康

百談

參華陳臬玩歲亡庸率屬共工自天有命遠勤五
馬特枉雙魚恭惟某官當世淳儒爲時循吏得州
如斗少低刺史之天遵渚有星佇應郎官之宿交
章已入趣覲不遐某自覺龍鍾寧堪鳩僇司納言
之喉舌深愧濫巾借餘論於齒牙早期納履

代回興國楊知軍迪

抗章引外得請專城六館諸生方有範模之地長
江千里可無保障之人伏惟某官能賦摩空明經
飾吏頃者一同之政藹然三異之稱鴻羽來儀鶴
行增重四方之供簿正兆豈足行九里之潤京師
賢然後用闔閭故壘彭蠡上游累年無露積之藏
數處有風寒之護上爲民計中遣公來能安田里
之嘆愁必記御屏之姓字某濫茲作牧政爾爲僚
屬州得陽公之賢亦去幸矣便道因滕閣而至爲
我賦之

代回安慶陳知府

貴謙

望郎引外不孤銅虎之分倦客得遷只動專鱸之
想未遑泚記遽辱鳴謙恭惟某官奧學淵回清標
山峙氣沮金石豈徒黃絹之好辭世掌絲綸宜得
青氈之舊物亦既累年於東觀非惟百日於南宮
乃懷棠棣之碑徑賦桐鄉之政朱光嘗爲皖守非
此地耶汲黯不薄淮陽今召君矣某久荒三徑又
長十連望吳會於雲間恨無飛羽借潁川之河潤
但切馳心

代回羅建昌

勳

陳情便養疏寵改麾顯升二千石之真龍光有渥
榮遂九十親之侍燕喜尤多恭惟某官左學英游
西樞貴介抱持醇固言行擇乎中庸揚歷詳深名
實孚於上下輟從李寺出館竹符建牙密邇於故
鄉蓄眼雄誇於新尹報政紅泉之澗徙番白石之
汀側聞盱江舊隸撫境不離梓里游奉板輿豈惟
有刺史之榮蓋亦全天下之樂第虞選表却合處
中某幸甚爲寮愛焉莫助問專城之五馬方欲修
書得尺素於雙魚惟深抱愧

代回安慶林知府

仲虎

簪筆何功蒙誤恩之起廢廢甚寵辱妙語之噓枯
藏去爲榮不知所謝恭惟某官心期到古膽略過
人從右學以策名三綰左符而出守竊窺近奏具
見遠圖應憐老驥之服輿根塵猶在故因飛鴻之
送目書問先之某髮白奚爲腰黃弗稱見此古壘
洗當韞櫝以儲藏報之英瓊瑤愧探囊之羞澁

代回常台州

建

斜日投閑冒誤恩而入侍朶雲借潤儷好語以相
先有味其言莫知所謝恭惟某官早飛雋軌浸踐
夷塗忽持江海之一麾出領湖山之千里丹丘
堵畫戟凝香行有詔追即歸禁近某髮直種種心
已休休咫尺不違顏雖少光於末路八十猶行脚
祇見笑於大方

代回陳撫州

蕃孫

別畫戟之凝香倏焉兩月讀烏絲之妙語燦若五
雲未能先施良負不敏恭惟某官粹資玉立厚德
春溫來臨父母之邦居多異第之政民胥然矣皆
願受一廛而爲氓我儀圖之又私喜同年之有後
比因造朝之役過勤下榻之情曾謝幅之未遑已
慶緘之先及某去天雖近來日無多騎馬聽雞聊

續邶鄆之夢踞龜食蛤終尋汗漫之期儻未疾驅
猶容嗣見

代回孫衢州詢

鄉里有賢者久矣傾心出入相避然失於交臂鼎
來手畢益重冀月芒恭惟某官抱負不凡踐揚茲久
甫安朝蹟豈少民庸屬錢楮之重輕生閭閻之愁
嘆衢故太末也今實輔藩君薄淮陽耶即歸禁閤
日扁舟之東上時千騎之西來所至賈胡以俟明
府或恐銅駝陌上會相見故徑下嚴陵之灘豈料
金鯉池邊不見君遂直過定山之路荷長驥之書
問搔短髮以懷慚某不安田廬又趨殿陛以年亦
當廢矣難借吹噓曷月予還歸哉恐勤將送

代回魏知府欽緒

別去仞墻倏焉兩月有來尺素爛若五雲旣媿先
施又慙厚報恭惟某官棲遲盛福邂逅初心厭簪
筆於承明久挂冠於神武顧恐踞鞍之矍鑠猶堪
奮神以低昂盍歸乎來何見之晚某不安西崦又
踏東華惟有當歸已決焉於去計入爲遠志徒仰
止於高風

代回建寧傅侍郎伯成

諫大夫之去國誰解引裾賢刺史之還鄉真成衣
錦既幸邂逅適我願矣猶恨出入如相避然恭惟
某官性稟直方氣全剛大難進易退溫溫維德之
基遇事直前蹇蹇匪躬之故方此告嘉猷于后蓋
將下膏澤於民無三諫之不從遽一麾而出守拾
遺補過寧忘汲黯之忠納誨輔台行聽商宗之命
某不安西崦又踏東華戴惠文之冠身其餘幾挂
神武之服秋以爲期

代回常德呂守

昭遠

歌滄浪之水猶記獨清望赤城之雲忽分五朵恭
承嘉惠益仞故情恭惟某早策名躋臺躋膺仕珞
璉清廟之器寧久在山杞梓明堂之材誰將作室
游仙夢斷公定憶秦人之挑吊古愁多我亦念靈
均之蕙有華妙語肯寄舊交某蹇步踳跚斜陽寂
歷續東華之夢又聽朝雞讀北山之移只慚夜鶴
挂冠有日望履無階

代黃潛

聲

回趙致劑

善下

宗邱賢勞旬侯均佚赫奕廉車之重焜煌郡紱之
光既合虎符足凝燕寢恭惟某官直溫而寬栗明
允而篤誠早入對乎三雍近於大雅晚更條於七

略博以羣書兼左右之戚賢乎上下之名實糾合
周盟而肅若欲分陝服而主之適咨牧於金華爰
取材於玉葉高牙大燾屹隆屏翰之維今袴昔襦
諒借京師之潤某驅馳其職飛輓何功轉數十萬
給中都實日虞於司敗良二千石有治理是天幸
以蒙成

代回趙南安

師傳

合符挂海之北易鎮梅關之南以忠肅恭懿之材
慰愁恨嘆息之俗銅魚既合竹馬交驩恭惟某官
夙派天潢早梯月窟製尹何之錦愈出愈奇題冲
舉之輿再進再勇遽厭飛鳶之影懶移祭鱣之文
謂即入於直廬猶于藩於橫浦陽和有脚姑行大
庾之春咫尺違顏即近長安之日某謬塵班綴例
辱緘滕逢驛使一枝之來喜承見寄跂織女七襄
之報愧不成章

代回洪筠州

梅

解龜庸蜀分虎勾吳惟筠爲州號西江之道院與
鄱接境得北道之主人民起來暮之歌公有衣晝
之寵恭惟某官流芳名閥騰茂通材鳴筆父之琴
全牛自解入河陽之幕凡馬皆空方夢翼以朝天

遽捫參而歷井惟良作牧所去見思乃若高安之
城亦出錦江之水舉頭見日知漸近之使然有脚
行春計無遠之弗屆某重游碧落轉覺黃昏十部
從事之來敢無酬於記室三公刺史之入願益大
於相門

代回章象州

時言

榮紆郡組誕布詔條象郡自秦旣入中州之籍虎
符分漢是資循吏之功雙旌鼎來五袴咸喜恭惟
某官人門具美風調不群惟服襲於典刑故飛騰
於聲實屢製尹何之錦技敏奏刀載題仲舉之與
歌騰別乘宜森畫戟出擁朱轡跼跼飛鳶公蔑鄙
夷之意嗷嗷鳴鴈民有安集之期某例辱巽牋備
知謙德龔遂良二千石必能致渤海之安申公年
七十餘聊復議明堂而去

代回興國葉知軍

代衛參政

榮分漢竹言憇召棠二千石之起家上恩甚寵十
萬戶之受福民望已深恭惟某官文獻名家典刑
勝士盤旋州縣旣不嘆於徒勞容與班行亦自安
於平進淒其在疚甫此御祥適擇牧於山城爰借
材於家食川名曰富人實多貧荒政十二聚萬民

正煩料理長江千里護數處庶免流離某濫守帥
藩幸同寮案察鄰國之政寧敢自私安刺史之民
更期忠告

代回吉州薛守

璆

杜陵老大久便白木之鐔漢殿論思又綴紫荷之
橐此皆左右先爲容也所恨出入如相避然恭惟
某官名閥甚華歷仕皆膺自分郢城之月即行閩
嶺之春聲實交流班聯孔邇又森畫戟出訪青原
連檣一萬艘不廢撫摩之政起家二千石會看華
要之除某見謂衰遲過勤比數雙魚中有尺素良
感故情五馬不受二毛相期早貴

代回建昌黃知軍

迎五馬問專城甚慚不敏身雙魚有尺素乃辱相
先雖感高情能無下汗恭惟某官器資凝厚材具
寬餘鼓琴一再行誰識高山之志作詩三百首可
默咸池之音畫戟朱轡新戶庭之號令紅泉碧澗
添溪谷之精明不俟合符會膺召尔某崦嵫月薄
江海天遊老入明光踏舊班固已戒來迎之僮僕
歸來輦路聞好語又將選所表之公卿儻即疾驅
猶容晤語

代回傳贛州

伯召

趣齊國之裝方圖迎候展山谷之啓乃辱先施雖
多溢辭亦感厚意恭惟某官精明玉立芳潤春溫
翩翩者雖一洗而空凡馬恢恢其刃四顧而解全
牛游持江海之麾始駕山澤之節夜郎爲徵彭蠡
無波乃今易鎮之除其殆過家之計虎頭城下雖
爭爲竹馬之迎豹尾班中恐催看槐龍之舞某不
堪視蔭又復綴班無以公歸少辦朝廷之事豈惟
我賀是蓋邦家之光

代回胡嶼州

坦

蒼顏華髮不堪東華之塵埃盡戟清香好在西陵
之門戶飛牋璀璨佩意勤渠恭惟某官德性靖其
器資肅括蒼皮溜雨此非撲檟之材高浪駕天抑
豈泐泓之水由轄而院既三四稔以身去國已七
八年居然一麾猶在千里自公言之誠屈爲民計
則甚良商旅願出於塗何憂郡計公卿選諸所表
會有郵音某久矣地寒加之日薄勞永明侍從之
事豈不懷歸及潁川太守之來願安承教

代回臨江洪守

伋

五馬專城未遑先問雙魚尺素良佩高情白顧闕

然何以得此恭惟某官器資閎敏材具寬餘孟子
有言故國非謂喬木魏謩敢諫此笏乃今甘棠有
如把麾何足游刃顧今近咫尺天之選皆自良二
千石而來勉分黃屋之憂會取青氈之舊某景賢
翳而將入技斷斷以無他乘興而來聊復續東華
之夢乞身以去行將上北闕之書

代回薛漳州

揚祖

百舍思賢寢闕承顏之便尺書委况具知存念之
勤退惟衰遲良深感戢恭惟某官持心靜重臨事
敏明中外揚歷之詳聲實飛騰之盛猥辭簿正出
領州麾諒因報政之來即見歸班之寵某桑榆短
景樗櫟散材簪筆甘泉姑對揚於休命挂冠神武
會邂逅於初心

代回趙徽州

希遠

千騎上頭未遑贊慶雙魚尺素猥辱謙勤靜言思
之爲禮過矣恭惟某官神明帝胄禮樂宗英早詳
七略之書宜應三雍之對翱翔半刺淹屈全材惟
古郡之新安乃先正之舊治流風善政崇德象賢
召杜龔黃勉策名於今日毛原周召會配德於古
人某雖綴近班已謀歸計暗中摸索頗有似曾相

識之疑送上吹噓不勝無能爲役之嘆所願召爾
之下或在挂冠之前

代回筠州施守

檄

起家得郡便道開藩隻旌兩轡頓覺偏城之重一
襦五袴想回寒谷之溫恭惟某官器采端華典刑
炳蔚爲博士爲太尉茂譽處於前聞有喬木有世
臣盍躋登於要路洊分漢竹出憇召棠惟筠爲州
夙號江西之道院貫蜀之水曹爲錦里之主人一
郡得賢萬物吐氣某濫茲分閫幸甚爲僚修豫章
庭戶之間正茲懷愧雪高安父老之耻當遂蒙成

代回王楚州

柝

入紆漢組出牧淮壖銅虎分符資循良之共理石
龜設險喜守禦之得人恭惟某官才具寬詳器資
敏劭循循善誘立美教於鱣堂諤諤以昌振直聲
於烏府屈伸以道出處何心茲屈搏風九萬里之
程姑承起家二千石之寵山陽古郡江北要衝師
旅飢饉之餘民亦勞止勞來還定之政公優爲之
某別日猶新消辰未審雙魚中素猥勤先施之光
千騎上頭敢廢前驅之慶

代回高郵汪守

統

掌故民部已覺厚顏首善賢閔更叨附尾三省僥
逾之自一由披拂之功恭惟某官厚德嘔枯深仁
蘇涸拔茅連茹引黨類以同升自葉流根先京師
而蒙潤曲振孤寒之跡亦聯獨冷之官某倚席非
材濫巾有覲子厚齒牙之不少獨欠爲師少陵爾
汝之肯忘無多酌我

代回桂陽張知軍國

鄰東家之棗尚欠即溫憇南國之棠猥蒙假蔭實
未知千騎之上遂有稽一介之書鳴謙先之自訟
悚甚恭惟某官美高世濟才應時須以持橐三出

之家守取履一編之學盤根錯節不辭州縣之勞
茂實英聲共擬公侯之復既奏絃歌之最俯甘管
籥之司倦直上於星辰洊平分於風月茲膺竹使
來旣桂封竊稽漢史之傳不但衛蠡之政茨充之
代此郡俗始農桑許荆之繼是邦民知教化惟公
善政與古匹休豈久凝畫戟之香亟歸取青氍之
舊某不堪位置何足控搏既難封不龜之侯聊爾
監無蟹之郡已作紅泉石磴之夢更數月則可歸
然在紫蓋天柱之旁希五雲之見庇

代回富順楊知監伯雨

花嶼讀書敢作三刀之夢角巾還里顧開兩焰之
祥孰分隣壁之光寔倚大邦之屏恭惟某官器資
凝遠業履端方李斟酌乎六經真越諸子家清白
者累世仍畏四知頃從幕府之游茂著賦輿之最
既樵蘇之宿飽合斧綉以晝行游刃成風技飽經
於肯綮得州如斗袖何足以回旋然既車輕而馭
良何嫌舟大而水淺誰如仲卿者會有裏言君薄
淮陽耶即膺中召某十年出幕一障乘邊自怜無
味以可憎况聞不修而已壞楚餘波之及晉儻沐
垂情滕小國之間齊庶幾逃責

代回眉州趙守

希濬

武穆文昭又憇棠而出守召父杜母愧楊粃之在
前比己修執訊之誠茲又辱巽牘之寵恭惟某官
飄然無敵卓爾不羣子政文章何止十二篇之頌
辟疆議論顧爲二千石之淹甫稅駕於龍泓又偃
藩於臺嶺先聲戾止和氣藹然江酌玻瓈暫領一
盃之水袍分宮錦即銜七寶之盃某契託交龜情
深賀燕袴歌今五已欣逢廉叔之來樓近古三安得
有黎侯之愛

代回劉知府

光

十年出幕已迷蜀道之津兩焰生巾又在鄭公之
里天幸事大夫之賢者日可就有道而正焉恭惟
某官夙擅三長兼該七略尉中壘卿宗正雖鬱壯
圖前江陵後弘農已多美最顧戀三堂之竹洞懶
尋千樹之桃裁行當解五斗之醪即日奉三雍之
對某一寒寡與獨冷多畸盤盤再辱於青泥愧愧
三榮之皂蓋方圖設榻而延孺子仍合避堂以舍
蓋公愛勿勞乎忠勿誨乎正願拜任崇之外姓所
同也名所獨也詎庸避安石之墩擁篲不遙操觚
罔既

代回雅州費守

澄

千騎迂臨已諧望履雙魚寵賁尤佩鳴謙徒欽博
我之文亦耻過情之譽恭惟某官清涵江漢秀擢
岷峨萬字千鍾暫試文章之守十行一札行登獻
納之班觀剪裁鯨錦之工知潤色龍縑之學所恨
黃金之虛擲真成白璧之暗投某分竹罔功飛芻
何力見君子云胡不喜既窺善著之機教使臣必
咨於周願受忠焉之誨

代回簡州楊知府

汝爲

載酒子雲之宅方欲款門着鞭季休之州已聞開

府挾故闕修於耦牘念舊辱畀之朋牋一謙之光
三復以愧恭惟某官器資凝遠業履清通大音農
瑟而義琴正學周情而孔思其言明其行粹鄉譽
夙高所居富所去思民庸甚茂早深丹袞之眷已
奉綠綈之招君不行兮夷猶羗難得而覩縷茲從
便郡如用起家朝廷深知弱翁佇膺峻擢兒童爭
迎郭伋安得久留某洊領銅符獲依珂里車幾兩
馬幾駟未敢希揚侯之歸薤一本水一盂所願受
任棠之教

代回嘉定高知府

泰叔

去歲茲辰共對孤羆之傲兀當暮之日獲迎五馬
之逶迤辱榮戟之遙臨感珠璣之委貺惟深十襲
敢廢七襄恭惟某官業履粹夷風猷高潔李問襲
石室之富鑒裁婉金鏡之清安行鳴大輅之鑾詭
遇謝小人之乘鵠陸有漸鵬路自高得百姓之心
以廉爲本道千乘之國所去見思自奏最於三峴
盍躋班於兩禁若爲熊軾又涖龍藩太白對影成
三人更弄平羗之明月東坡不願侯萬戶只尋古
佛於凌雲嘉州不負於此身漢殿即嗟於見晚某
獲依鄰壁正竊餘光田里愁嘆之聲每拊心而知

愧原隰光華之雅方拜手以固辭尚祈吾味之同
不吝君波之及

代回新崇慶黎知府袖啓

伯登

恭承游驅熊軾改牧龍藩奏二十七最之優宜歸
漢殿連六千石重之寄更守唐安民曰幸哉公爲
淹矣維昔交雙鱗之賀乃今瞻千騎之光恭惟某
官李問淵停器資山立早結冕旒之眷入爲臺閣
之珍倦直承明復歸蜀道東藩兩郡所去見思西
掖九迂最宜爲誥顧動觀梅之興又煩分竹之行
不俟突黔即膺泥紫某同升有幸懷德滋深燕雀
期

賀大夏之成幸諧面慶龜魚切美鄰之蔭尚慰心

梅亭先生四六標準卷二十八




九

梅香亭四六標準

卷之三

合十

內閣文庫			
漢書	特四十二類	一七四二號	一九四
函架			

內閣文庫			
書號	漢	11742	
冊數		19 (15)	
圖號		3	5

梅亭先生四六標準卷之二十九

倅

通潭州馬通判

赴寧鄉簿

榮膺宸綽顯貳价藩千里展長沙之平古稱清絕
別駕居刺史之半今得仁賢先驅有嚴和氣已溢
恭惟某官材猷凝遠識度閑夷勲業終歸於伏波
雲仍固在方略何如於討虜風烈隱然久載休聲
宜躋華貫尚屏星之借重使湘水之安流清風明
月之平分折瓊枝而繼佩高蓋華軒之一丈齊王
軼而並馳邦國不空公侯必復某失身副墨食志

勾朱綴簿上而趨閣前繞枝已久采水中而塞木
末託蔭方新尚徼風雨之悵懔庶免塵埃之箠楚

通潭州張通判履信

書生漫仕抗塵祭竈之卑卜史消期隸役題輿之
下昉去民而就吏持不肖以事賢共承攝龜尤願
前馬恭惟某官器資凝遠德宇洪深紅蓮幕下之
婉謀青草湖邊之美製所立皆偉其他可知天道
好還共擬公侯之必復王事靡盬肯辭州縣之徒
勞駕言屏星戾止湘水平分風月已歌邦國之不
空暫建鼓旗更覺湖山之自得會趣長沙之召徑

登文石之班某副墨陋儒勾朱冗職無蚍蜉之援
柰何與上大夫言非鸞鳳所棲此豈爲我等輩設
惟倚悵懔於夏屋庶寬箠楚於塵埃

通潭州吳通判鏗

歌海沂之別駕無路事賢詠臨邑之卑棲消辰效
役敢以尺書之敬徹於再拜之先恭惟某官地望
穹華人門峻特冠切雲帶長鉞夙超四姓之侯佩
明月懷連城要是萬人之敵舒翹綠水展足赤城
盍歸乎來何去之速峻溫洛榮河之直分清風明
月之平邦國不空足表監州之績公侯必復益光

著令之忠卧而治之行且召矣某崎嶇白戰漫浪
朱勾不卑小官寧免塵埃之筆楚當詣大府尚希
風雨之幘幪

代回衡州謝通判

曳革履之聲足容縮縮擁緹屏之駕手畢渠渠敢
因謝絨并致賀臆恭惟某官人今而學古齒宿而
意新徘徊金馬之門何相見晚璫粲銀魚之佩曾
不逾時泛綠水之芙蓉裁赤縣之桃李茲展驥足
乃在熊湘王祥垂年別駕之功始立東之雖老宰
相之器固存某見謂龍鍾猶共鳩僇追壬戌赤壁
之夢恍已九齡同甲子絳縣之人幸成二老

代回婺州高倅

禾

鳳凰下千仞頗疑遙增擊而去之鯉魚中尺書乃
有長相憶而遺我形骸更遠臭味已同恭惟某官
賦料凌雲文成翻水排空直上合盛之白玉之堂
取勢斜飛亦宜在青藜之館居然雞肋屈此牛刀
宜未折彭澤之腰已先盡剡溪之興空願一塵於
仁政竟違十乘於他邦何許飛鳬乃今展驥聞及
瓜之不遠知行李之鼎來某已薄暮齡宜收朝蹟
聞有長塵尾固願再款於名談何當大刀頭却恐

寢踈於良覲

代回肇慶方倅 信孺

託先世之遊從淒其一夢見通家之姓字粲若尺書似聞逸氣之無前尤喜故人之有後恭惟某官挺身膚敏發聞芳馨頃冒甚危之機肯使不測之虜迄從權變復合和親奈何衆口之難調責以一言之相應忠無不報事久益明果復舊疆端紆新組治中展驥足才即應於時須池上有鳳毛美更觀於世濟某偶然浪出頗以倒行綠槐十二街此非佚我老之計白髮三千丈行當致爲臣而歸

代回撫州魏倅 峴

伏勤專介見畀屬辭試乞巧於天女孫則爲宜耳願求福於木居士不亦左乎得非所蒙願竊有復恭惟某官世濟其美材稱乎官一同甚敏於割雞半刺即觀於展驥有渥題輿之寵何待推轂之功不即人而人即之行且召矣其求士甚士求我盖亦有焉某旣受一廛當迎別駕比何武之薦龍臺則恐過情期魏墓之繼鄭公所當拭目

代回處州董通判 居誼

一官藏拙焉知賢材而舉之三載陟明不如鄉人

之善者冒焉刻去何以謝爲恭惟某官敏手決科
縈身從政君門不可以徑寧緩其驅公事之了雖
癡姑行所學事常出乎名上材益展於治中足應
時須敢孤歲舉需章比入巽牘鼎來顧恐將去齊
之情莫酬復望蜀之意某余髮如此歸志浩然儀
圖之莫助之浪將短綆匪報也爲好也聊實空函

代回筆通判

端已

識中散於未仙知音者寡思元賓而不見訪別其
孤報謁良勞贈言尤寵恭惟某官槐根之止蘭茁
其芽題別駕之輿少紆轍迹聽文昌之履會振家
聲疑只在於山中遂徑造其竹下亦既見止萬金
之產不虛何以贈之兼乘之珠相比某愧無瓊報
徒辱珍投書門前之一死一生客則陋矣坐足下
而三熏三沐愛莫助之

代回臨江鄭通判

元鼎

奉詔舉賢幸不負公車之檮開緘見面乃猶題別
駕之輿揣力則綿摘文何綺恭惟某官才猷膚敏
器度浚明君子學道愛人已之無愠廉吏謹身率
下去則見思意一鶚之可言忘匹雛之無力此亦
公舉殆非私謝之求所愧外除無復裏言之助猥

勤泥軼更枉緹函某歸老杜門味言推轂治中展
驥足豈徒風月之平分池上有鳳毛即看雲霄之
獨步

代施倅稿回邵州王倅祖壺

果緹命駕引綬露章湖南二郡之豪雄今稱第一
江右諸王之奇俊碩屈平分下車之初載路相慶
恭惟某官典刑炳蔚才諳浚明梗枿大夏之材久
於聳壑瑚璉清廟之器何乃潤山滿期留中還又
補外厥爲資水尚存漁父之滄浪匪直海沂可養
公台之度量飛騰由此翹企竢之某再轉無庸同
寅有幸託交承於隔政不但爲瀟湘之故人話契
闊於期年渾未隔京華之舊夢問兩鴻鵠諒歸詔
之鼎來遺雙鯉魚覺報章之不腆

代回紹興史倅

策驥足於治中方開軌轍棲燕巢於幕下正託幘
幘曾望履之未皇乃鳴謙之先辱藏固深於十襲
報敢廢於七襄恭惟某官天分素高人門具美焜
煌相業接王家三樹之槐爛熳世科掩竇氏五枝
之桂宜自庭階之秀徑躋臺閣之崇要津碩厭於
立登佳境不辭於漸入鳴琴單父已昭利器之功

別駕海沂更養佩刀之望有來易地益近去天萬
壑千巖暫煩應接清風明月真足平分長史有宰
相之材寧無識者群從繼叔父之烈行即見之某
一拙百罹十趨九蹶未了癡兒之事復蒙華使之
咨一水相望悵有同於蓬弱五雲借潤幸不棄於
管茅

代回道州宋倅蒙

司臬罔功躡升雉正發函得教似是馬曹歸斯受
之告者過也恭惟某官抱負甚偉揚歷益深酌別
駕一杯之清試春陵二三之策佇觀驥展會即雄
飛某久覺龍鐘又共鳩僦甲兵之問不至乃所願
聞山林之味更長奚其不去

代回黃通判

榮

題別駕之坐君子宜之戀屬車之塵老夫耄矣鼎
來郵問益認鄉光恭惟某官早策名躔寢儀華路
文章爾雅猶存元祐之故家風采老成不減正元
之朝士小淹驥展佇即雄飛某密託粉榆旣凋蒲
柳榮鈞天之一餉續夢無多及崦日之半規告歸
已決小須驛召猶或郊迎

代回李通判

銓

嘆峨峯之客子舊嘗綴於金臺懷石林之主人今
獲依於玉樹所願拜一盃之水乃先飛五朶之雲
恭惟某官世載其英學優則仕繩其祖武合薰班
馬之香裕乃父功宜踵韋平之武况是一門叔父
之貴新領三軍元帥之權雪夜鵝鳴亦識西平之
有子風聲鶴唳倚湏幼度之平戎詎容全材更淹
半刺式觀挺挺之風烈克稱袞袞之公侯時來爲
之風斯下矣某竭來通義正幸依仁所恨五色之
迷有負六王之畢同姓同業也底勞叙元礼之通
家三熏三沐之尚擬迎蓋公而避舍

代回綿州程通判

植

化閨禮闈不隔云堂之霧廉泉遯水久睽緹屏之
星倂來以書僕感且悚恭惟某官器資冲遠業德
碩膚嶭然岷峨之高皜乎江漢之濯發研游刃已
知立解於千牛按轡徐驅亦覺坐空於萬馬不謂
九垓之汗漫尚從半刺之翱翔然富樂之山固有
富樂之實佐磊落之府正湏磊落之人豈有不龜
之封侯而忘無蟹之監郡某罔功龍邱游試墓津
無以我公歸兮試問蕭朱之好事其大夫賢者尚
修程李之驩

代回吳通判

昌裔

對月半輪荷不厭平分之破觀風一道乃遽叨進
寸之除感曳履以見臨且鳴謙而加賁共惟某官
清標山立奧學淵停濮陽朱弦之桐洗盡人間之
箏笛豫章白羽之扇留爲世上之舟航詎容蚤頤
久淹驥足頗哀老子夙託年家噓枯吹生絡繹寄
聲於圓嶠駕輕就熟馳驅俾踵於方舟某已控需
章巧還節傳集于苞栩集于苞杞但切懷歸投以
木瓜投以木桃祗慚匪報

代回叙州通判楊承議

德輔

揚舲監郡懷寶睦鄰秋月兩章真有風人之託春
雲多態不爲時世之粧載味落英踐實之言足窺
結根孤生之節水色異諸水安能爲清紺之塵君
家更贈君無忘厚培植之力

梅亭先生四六標準卷之二十九

梅亭先生四六標準卷之三十

諸司屬官

代回丁制機

銘

某恭審進通閨籍出運幄籌閱道放出蜀之龜侯
誰在矣令威跨歸遼之鶴而子和之恭惟某官李
裕家傳才優時用一經受業固無羨黃金之籛萬
里隨翁欲重吟青玉之案宜輕蒲壁樂近蘭陔暫
主畫於中權即舒翹於表選乃今王謝之子弟率
多信布之功名佇奏膚公亟觀趾美某八年于外
一節以趨欲贈丁儀愧乏子建之好句得見嵇紹

益知中散之有人

代回楊制幹異

桂林勞從事之賢講聞高誼久矣草堂就參謀之
辟邂逅適我願兮况聞在楊侯之鄉已嘗識李邕
之面偶忘摸索重感記怜共惟某官嫖節紉蘭妙
齡拾芥章指之義數萬志在春秋縱橫之對三千
丈之禮樂畫諾肥越人之瘠笑談易蜀道之難北
山有楊想君子樂與賢者西方曰棘嗟遠道胡爲
來哉行矣章交亟其王覲某昔遲去曾今倦游梁
忻聞瀟湘之故人來作臨邛之重客潭府淳古亦
嘗倚席於麓山錦里逢迎更覺驚心於石鏡

代回耿制屬

重客及隍缺於遠肅高文銜袖厚甚先施恭惟某
官山立清標淵回懿孝暫試三語之標迄無一夫
之寃茲被制捆之知俯按荒城之陋某幸諧再覲
仍拜屬辭徒深巾衍之藏莫效襜褕之報

代回陳制幹噲

青天轉粟之難漸欲歸雞豚之社綠水紅蓮之麗
鼎來見鴻鴈之賓與汝爲鄰於余同業何幸萬里
似人之喜然非九垓若士之期伏惟某官孝行醇

明詞章炳蔚頃嘗識老人大父之處已知異吾黨
小子之狂八韻之驚試官果妙年而中鵠三仕而
爲令尹宜即以飛鳧顧從嶺表之炎來依劒外
之冷孔明用蜀府中實委之費禕嚴武鎮川幕下
固謀之杜甫所謂有爲之亦若安知來者之不如
某戍雪無庸漕冰欲解十乘久違於文子至於它
邦尺書如見於孟公爲之驚坐

代回史機宜

識嵇父於未仙知敬人中之鶴見徐卿之有子真
成地上之麟辱貽秋月之兩章尤服春雲之多態
恭惟某人材爲國瑞李有家傳手敏八義亦欲吹
噓而送上眼迷五色竟難摸索於暗中不妨利吾
器以俟時行即漑其根而食實斯文如女有正色
安用自怜我相夫子非癯仙即騰善價某方謀下
榻聞偶稅郊茲勤連璧之臨咸有聯珠之贈寸田
耕不盡益信任忠敏之詩二季對相望誑有歐陽
子之識

代回成機宜

晉

疏寵承家拜恩諾仕男兒慷慨不難自致於一科
母氏劬勞且合亟營於三釜固爲親屈難與俗言

伏惟某人茂實英聲瑰意琦行象賢崇德豈惟聞
禮以聞詩續問成宗是在難兄而難弟姑紆綠綬
用當綵衣佇觀名第之擢疑即步要津而策足某
未皇贊慶猥辱貽箋識野鶴於未仙但深感愧期
名駒之越國會見騫騰

代回劉撫幹

孟虎

先庚有命焉知賢才而舉之高甲爲郎何見公等
之晚也冒然剡入無以謝爲恭惟某官孝超人羣
詞窺天巧一第直溷子政有貴於晚成屢薦不入
官亦何慊於同隊假以歲月矯焉雲霄某得於所
聞言之不怍燭之武老矣無能爲矣一力告休仲
山甫舉之愛莫助之萬祈自重

代回胡帥機

綱

諸公獻納共騰薦士之章老子婆娑亦竊挂名之
寵徒得君重何以謝爲恭惟某官父教之忠世濟
其美故國非謂喬木意風烈之猶存此笏乃今甘
棠況天章之固在黃閣門闌之喜青油談笑之長
推轂有言滿坐稱善聊附蒼蠅之尾何補黃鵠之
毛然未嘗得承顏而接辭則非所謂納交而要譽
履聲來止巽謝何哉某無與提衡亦勤銜袖暗投

珠於道路何以相酬朝發軔乎梁津幸其自愛

代回楊撫屬

紹雲

老形已具濫塵喉舌之司賀櫝鼎來遠借齒牙之
論恭惟某官文獻博雅機量䟽明爲入幕之賓諒
多裨贊舉筦庫之士會即騫騰某歸興雲飛官情
冰冷推賢揚善亦有味其言哉度力量時懼無補
於賢者

代回蒲撫機

仲乙

聯名接武憶共尋皇子之陂異事同僚喜來入烏
公之幕情親有素辭費何居伏惟某官遠抱淵深
清標冲粹二十而作文賦早拾科名八百之除吏
負偶非親故然大車檻檻每難銳進而餘刃恢恢
正覺硯新杜老參謀正不出浣花之里晉公贊畫
固可參古栢之碑况今連鑣向闕之人莫非講劍
摘文之客北多良馬暫入禮羅南有嘉魚即登賢
罽某託交年拜起敬月評風動帳中亦欲更親於
談笑氷解漕下自茲恐隔於行藏

代回李總屬

鑄

懷中散之野鶴夙荷心知見少傳之傳鸞今能趾
美未遑贊慶猥辱陳箋恭惟某官李有家傳才爲

國許金閨天上鳳尋瑤草之期玉樹風前善繼石
林之志佇膺世選不俟民庸某家寓峨峯族出成
紀重來訪鴈湖之鴈已隔煙霄何幸見龍津之龍
早騰雲漢其爲頌詠曷旣敷陳

代回朱總屬喻講書

久於睽離辱此臨賁頓解塵埃之渴更勤月露之
文退而復白圭之三何翅得黃金之百駕彼四牡
量材未敢以載驅遺我雙魚拜賜惟知於長跪

代回鄧總幹

剛

共州隔邑偶萬里之盍簪異事同寮借一音而推

轂所慚假蓋何用陳牋恭惟某官才器鴻厓詞章
犀銳倦乘箕而騎尾甘歷井以捫參北風旣亟只
且獨何爲乎愁苦南鄭多道亡者碩不行兮夷猶
天實生之人爲瞠若去國暮年見似者喜矣嗟尔
遠道胡爲乎來哉引鼎不程乞鄰非直偉卿以一
身從我安敢蔽賢伯道之五鼓不來忽聆執誅某
久於戍雪行矣解冰當百里半九十之時敢辭賤
役有一石三十鍾之窘更賴仁言

代回陳檢察

鑄

仰仲子之世家積百聞於一見得孟公之手牘將

異事而同寮所愧先施之未能乃蒙下問而不耻
恭惟某官李有家法材應時須登賢能之書合竟
丹墀之對作神僊之尉未忘文石之忠尋小試於
幕謀謂徑通於閨籍居然斂板復此曳裾百斛千
鍾來察聖賢之實一石五斗肯聽婦兒之言無嫌
從事之獨勞行應司徒之計治某燕巢既舊蝗粟
知慙明珠暗投固已覺我之形穢寒氷烟立尚或
使人之眼明

通湖南韓運管

望桐韓之閥閱夙仰泰山恃苦李之姓名敢通北
海眇然縣掾之賤望之使筦之尊以言自鳴於分
甚僭恭惟某官材猷孔碩文獻甚都東萊其師驥
固宜於汗血南澗之嫡鳳何有於凡毛君遣使之
皇皇筵得賓而秩秩坐紆三組卧護重湖使曾吞
雲夢而恢然則背負天風也必矣某卑棲矮屋仰
席崇臺安得自高政有資於引重能令公怒寧無
望於包荒

代回胡運管

極

回首祝融之峯前久無鴻鴈濯足清江之窓下忽
送鯉魚既感故情又慙褒語恭惟某官士林翹楚

官海汨齊騰身方脫於選堦歛手又償於邑債賴
割鷄之敏甚卒馴雉以靡然觀其不辭州縣之勞
終焉必爲臺閣之器聊依綠水即致青雲某不安
田廬又塵班列老矣無能爲也行即告歸忠焉能
勿誨乎毋忘嗣訊

代回胡運管

極

西清舉賢爭剡需頭之薦南郭濫吹與題籍尾之
名計效則無何謝之有恭惟某官抱致遠之度無
欲速之心才名四十年始償邑債扶搖九萬里猶
作幕賓歸張迭嗟崔李交說射雉而用一矢縣力
可慙烹魚而得尺書雄文何腆某亡能爲役有味
其言末路再得朋喜而不寐吾負二宜去人謂斯
何

代回添差吳運筦

鑰

戚侯四姓旣聯中秘之華部使六條顧倚上賓之
重方欲展大僚之敬乃先勤小牘之恭一謙尊光
三復愧感恭惟某官器函天粹材軼人群太妙徽
音雖不聞而亦式少君高節豈以貴而自驕榮通
東壁之圖書暗接西廂之筆橐碩肯參聯於冰潛
不辭主諾於日畿世選爾勞聊復養脩門之望徒

得君重詎真煩細務之親無王事鞅掌之勤有皇
華咨諏之任銅龍甲觀生民又望於姜嫄路馬乘
車褒賞誰如於申伯某淒其紛白復此依紅蛙以
墟拘豈是緣青冥之脚魚於川泳尚或同白水之
心

代回許運幹儀

枉駕臨存屬辭賁重今作禁門鍵敢當百年幾見
之稱君如雙井茶會赴衆口一嘗之願恭惟某官
氣墟海岱文耀虹霓羅致幕中信一第之直涵子
寶橫道側乃屢薦而不入官今歸張之迭嗟又崔

李之交說敢愛其力而隱於言惟是日夕之牛羊
會且歸矣瞻彼月明之烏鵲愛莫助之某有味推
賢無能爲役然前驅弩矢固余力之不任儻旁譟
鼓旗或此心之可效

代回奚運幹祝

題鴈塔之名夙有同升之幸依驪駕之漕茲叨聯
事之榮愧削牘之未遑感飛牋之先辱恭惟某官
歸然地望雋甚天資手決卅科不用懷綳之簪笏
力行家李固求竹帛之功名便當正奚仲之車何
用主李悝之糴漕中四百萬石暫倚經營廣內

一百三家即煩校理某偶攀末甲復託同寅自揣
頭顱猶是五侯之賓客視如手足亦惟四海之弟
兄

代衛內機回新任趙運幹師秀

內幕主書濫竊機謀之祿外臺贊畫鼎來禮樂之
英盍修同寅之恭適坐旁午之冗高情厚甚下問
燁然恭惟某官傑立宗標焯爲儒倡麟振振而一
角鳳翹翹以九苞太乙吹灯豈特傳五行之孝長
庚吐焰固宜光萬丈之文吾道非耶公等安在旣
低飛於枳棘又屢泛於芙蓉輟天塹之元僚佐星

輶之計吏棟簾雲雨似聞曾駐於檐帷庭戶湖山
復見重來之賓佐聊副皇華之咨度即登清切之
司存某濩落東書參差一第不符不獵豈能談笑
於青油爲箕爲裘聊戲爛斑之綵服爾然薄陋安
所依歸異事同寮儻怜草木之吾味百聞一見當
爲珠玉之脩容

代回曾運幹集

射雉而用一矢縣力可慙烹魚而得尺書雄文甚
寵初無足謝何過乎恭恭惟某官殖孝精深摛辭
鉅麗一讀阿房之賦信凡馬之皆空再歌泮水之

詩知祝嘏之速肖聊贊星輶之畫盍歸天網之收
某老矣綴班闕然報國徒得君重輒刻牘於公車
何以文爲更歸恩於私室不辦七襄之報姑容十
襲之藏

代回新成都趙帳幹 益

計幕借材鼎來主畫郵筒聞報方欲貢書猥勤下
問之先殊感高情之厚恭惟某官世濟其美父教
之忠材刃有餘解全牛而不頓智囊無底洗凡馬
而可空是宜即復於青氍不謂尚淹於墨綬惟茲
潛輶正重賓筵惠然肯來協贊皇皇之轡出其所

李行豐暴暴之財不俟章交會應召用某冒焉行
險甫此依仁及同君子之寮亶爲幸會所媿小夫
之牘不盡傾期

代回唐提幹 元齡

夏辟三千參聯無補冬官六十攝長可慚何勤執
訊之來更辱徽言之寵恭惟某官摘巍名第策足
英游暮拔其尤以幕中之羅致歲計其入知地上
之錢流行交公車之章當爲清廟之器某不能者
止乃分之宜方鳩僦功忘以年之當廢我龜旣厭
知曷月之還歸

代回陳提幹

伯震

明詔選賢爭抗需頭之薦老夫涉筆但深遜尾之
慙幸而得君可以報國恭惟某官摘髭名第策足
俊游人嘆老而嗟卑急於速化士任重而道遠貴
在晚成欲功名留久遠之看信溫飽非平生之志
日諸公之暗摸露尺櫝以明揚今猶待詔於公車
底用謝恩於私室某隨人作許爲役無能感北山
之移文逝將命駕觀東閣之奇士更幸改轅

代回夔路馬提幹

已榮

二年滿戍鷁回首以東歸再命觸藩暮朶頤而西

顧本欲潛深而伏隩願使出幽而迂喬欲罷未能
不知所賀恭惟提幹岷峨濯秀江漢養源淬剗犀
之鋒馳騁不難於萬里賦射熊之館吹噓亦在於
九天若爲二紀之塵埃良負兩科之冠劒方江濤
之如此覺人物之眇然勲業終伏波之歸圖畫勉
凌煙之繼某濫竽榜下曳尾泥中推轂有味其言
心乎愛矣引鼎不程其力人謂斯何

代回新班李茶幹

鏗

白髮強顏游叨乘障黃塵眯目未暇見賢敢圖宗
家之英辱貽記室之牘恭惟某官人門第一才氣

無雙蔚然丹山之羽毛展也青雲之步武麒麟地上已通籍於煙霄龍鶴山中難窺班於霧雨切聞六經三史之孝欲追一翁二季之蹤行膺綸綍之招何待弦歌之試某夙同鯁譜近倚龍門所恨室邇而人遐末由展覲敢謂禮踰而情過更費屬辭感鏤惟深鋪榮曷旣

代回提幹監鎮楊修職埴

問一得三夙服名駒之譽駢四儷六茲窺汗馬之功得非所蒙顧竊有復恭惟某官岷峨毓秀江漢濯英挺有祖風固合間於兩社裕乃父烈寧當久

於諸侯茲耿耿以發矧已纍纍其綴組芝蘭庭下子弟正欲自佳槐棘班中公侯必復其始某辱崇世契見碩邦交老欲荷鋤歸問南山而種豆古來和鼎相期東閣之觀梅

代回許知縣

鴻祖

虞判院提幹

珪

袖賀

屣履迎門獲解塵埃之渴文書銜袖辱貽月露之篇所慙先施之未能又覺成章之匪報惟感千金之贈當深十襲之藏

代回夔路常平馬提幹己榮

偏城守土曾微牧御之庸一道觀風猥被將輸之

命亟控循墻之避但期接浙而行敢意鳴謙抵深
自訟恭惟某官銅柱氣旣絳帳文章早收楊葉之
功尋擢桂林之第全材孔碩迅步何稽羅而致幕
中足占穎脫爭令出門下行即章交佇軒翥以若
然知乘除之必爾某濫叨小節甚愧同升兩科文
武之英幸獲陪於年拜三川人物之論亦竊服於
旦評所愧匹雛無力之人莫旅萬牛回首之送區
區之悃續續以言

代回詹書監

淵

庶獄哀矜參聯弗績八材飭化率屬罔功過辱高

情更勤下問恭惟某官有志於世用力斯文儼素
韜之倚廬耿丹心之戀闕范希文之守服必通時
相之書富彥國之從權宜有天子之詔不然暮召
當在朝祥某乂玷憲曹又共事典會且歸矣所願
爲聖人之氓愛莫助之猶幸惜天下之寶

代回詹書監

淵

八年一別瞠若可驚千里尺書跼然有喜只慙善
頌未免過情恭惟某官乂手成章摘巍取第民曹
補掾已小試十二牛之刀詞學問津又將垂五十
牂之餌不虞銜恤猶鬱交章少須彈琴之成聲會

見積新之居上某強顏于此視蔭幾何尋有味推
轂之言老夫耄矣持受羹反錦之意執事亮之

代回饒殿幹時亨

貳職祥刑罔功犴獄誤恩率屬遂長雉工視蔭幾
何取數多矣恭惟某官素材孔碩清德不腓醉面
春風之和良多行樂官情秋光之薄還動出機有
赫寶儲行觀幹裕某宜燕居息而鳩僭功某水某
丘所釣遊會且歸矣在阡在陌可來往亦有意欵

代回饒殿幹時亨

頭顱如此甚慚朝夕之論思足音跼然真成親戚

之聲欵輒因陳謝併賀新除恭惟某官家食甚都
官情未憖里門養望久倦游紫樞之庭冊府辦嚴
將司存白玉之牒不妨遊戲會有薦揚某宜在挂
冠又此持橐聊復爾耳姑出應於俗緣歸去來兮
猶可尋於情話



卷五

梅亭四六標

梅

三十一

五

內閣文庫			
漢	特四十二	一一七四二	一九
書			
冊			

合

內閣文庫			
番號	漢	11742	
冊數		19 (16)	
品號	圖	3	5

梅亭先生四六標準卷之二十一

教官

通武岡陳教授

震

造託湘流疑已就碧油之幙延緣巫水乃聞還絳
帳之紗愧執訊之已稽盍通名而告至恭惟某官
學探千載文擅一家聲摩殿前皆三誦阿房之賦
禮羅幙下顧載歌泮水之詩茲聞交章行即陞觀
紫皇好學正爾恢天網之收黃閣招賢會亟勸露
門之講州縣徒勞人耳將相寧有種乎某垂老無
聞甚愚不肖向者誨諸生於館下要是牛溲茲焉

試別駕之治中亦非驥足不曰丞哉之余負亦惟
善者之吾師儻諧半面之期亦勝交臂之失監州
無懈恐非直杯水之官廣文有羶幸或作數旬之客

回武岡連教授嶸

補黔中之上佐問字茫然聞稷下之諸生迎師幸
甚未皇執訊先辱鳴謙恭惟某官正學純明懿文
炳蔚一門三秀聯翩千佛之題六館十年卓犖諸
儒之唱頌棲鸞於矮屋又繫馬於堂階君子所樂
三在得英材而教育天下達道五正須師席之琢
磨佇令巫水之磻咸識沂風之詠遄班玉筍遂講
金華某典午非材同寅何幸君來重席底虞坐客
之無羶丞未全聾尚聽講經之有筭

回武岡何教授淡

老形既具久欲挂神武之冠族姓未寒幸不冷廣
文之席有來雙鯉如對三鱣恭惟某官挺特令名
飛騰茂實園橋策足振鬣先登方策蟠曾摘髭獨
晚邂逅泮林之集頡頑蓬島之游某急景凋年閑
官窘步閑蕃於六館之空舍其亦有施乎識堅也
十年爲故人將賀其鳴已

回白教授酉中

舉爾所知期不辱賢材之實與我共理亦惟賴庠序之申何勤謙撝更加巽謝恭惟某官器能庸敏學問純明問一得三子職早深於學禮喝五作六甲科共俟於爲郎茲暫憇於冷蘊合亟膺於溫綽某愛莫之助情見乎辭繫馬堦前切勿羨諸公之袞袞銜鱣堂上正湏效夫子之循循

回白教授

法從舉賢真誠知人矣廣文道謝何爲至我哉靖惟暗中摸索之明何待送上吹噓之助恭惟某官器中瑚璉行存宮庭蒙求我而我匪求蒙識其大者學優仕而仕則優學人自即之是宜四牡之章不待雙魚之請某初無寸力過辱尺牋上臣事君以人斯爲可賀貪天之功爲己則不敢知

回白教授

下車聞庠序之教亟欲引賢積閱限銓選之文甫能剡奏是亦公舉何費屬辭恭惟某官行無疵瑕學有源委繫堂下之馬安能鬱鬱以久居釣海上之鰲行即飄飄而高舉聊助鼓旗之譟何勤珠璧之投某愛莫助之顏之厚矣引鼎不程其力聊復露章推轂有味其言更新強學

回白教授

二毛五馬詎知千騎之榮尺素雙魚倏拜三鱣之辱未能先施敢缺報章恭惟某官武安故家文公宿學丁年出使便入對天子之庭甲科爲郎何至落諸侯之客佇由芹水徑上蓬山某濫領斗州又捫井絡杜陵十暑復重尋流汗之炎范叔一寒行可伴無氈之冷其爲欣幸曷旣鋪茶

代回王教授

同

八公同辰推薦賢之轂一第溷子寒坐客之氈輒用名聞何勤私謝恭惟某官學省佳士詞場雋人

何蕃貌不任其心而行焯焯仲舒言有補於世其對洋洋鶚旣集於泮林鳳當巢於阿閣平昌足信况有李翱之言翁歸不私何害山陽之託吾徒得君重耳子亦來見我乎某過辱臨存更勤賁况卮甘泉之八十一乘殊愧所蒙登凌煙者二十四人更期自勉

回漢州劉教授

大川

生日

鴈塔聯名料有感屏中之鶴鯉庭真饋何足惠堂下之鱸或承之羞不忘所賀恭惟某官世家政駿鄉友卿雲舊憶杏園同走馬看花之賞近懷蘭省

共餐蠅爆竹之吟揆余度之余名俾爾耆而爾壽
君子之言信有證既正而葩我生之初尚無爲其
何能穀某恭承嘉惠倍感故情避蓋公之堂願安
承教推鄭莊之穀但懼罔功

梅亭先生四六標準卷之三十一

梅亭先生四六標準卷之三十二

州官

通宋簽判億

赴寧鄉簿作

一官走俗拍囊粟以媚飢千里懷賢望嶺梅而傾
渴將爲半面之張本請先三袂以修辭恭惟某官
天韻浚明風華膚敏不自多其闊閱必身致於功
名鳳覽德輝下之則宜巢閣麟爲聖人出也而乃
在郊自古多才莫若湖南之賓客得公爲重兄空
冀北之士夫無久紅蓮之依恐有青藜之照某偶
逃飲墨遂得勾朱仕有時乎爲貧惟會計當而已

矣學然後知不足願教誨式穀似之

通臨安趙簽判

崇寔

天府元僚亦旣入芙蓉之幕冰臺未屬何幸託桃李之場謂已納交遂忘執贄敢圖街袖之禮適重歛衽之慙恭惟某官卓爾宗英濟之世美平氏之與韋氏僅聞閥閱之傳周公之謂魯公宜襲勲勞之舊俯試一同之治迄騰三異之聲故國蓋有世臣藉未取苴茅之賞他人不如同姓自應聯棠棣之輝顧甘僉舍之勞來借神臯之潤雲飛川泳是爲近咫尺之天海運風搏行即擊三千之水某濫

回費簽判

塵吏底缺效恭先倒着白接離所愧反躬之未稱報之青王案更慙出吻之無奇

易地借材詰朝入幕遷于喬木可見主人之相知陟彼高岡良勞君子之于役恭惟某官典刑勝士文獻故家子弟欲其自佳不顯亦世公侯必復其始無競維人暫茲泛綠以依紅行矣紆青而拖紫某濫乘一障正窘百罹忻聞主畫之良將有蒙成之託集思廣益何幸承賢者之來同寅協恭所望有忠焉之誨

回史僉判

文寄

謝錯道

某辱講歲饋見貺風宜口腹之奉累人難鯉盤之
牢拒綵繡之光翻坐盍鯨錦之卷還未寓投挑報
李之誠且舉受殮返璧之義願無再遣必亮寸忱

回史僉判

文寄

一麾出守遠從戎於安南同官爲寮幸留良於冀
北有勤下問尤佩高情伏惟某官業茂家傳美專
卅濟人人宗眉山之學維其有之字字出史籀之
餘由來久矣茲屈糟丘之隱且兼冰幕之游衆皆
醉而我獨醒是亦爲政人有酒而身無事定不廢
書某一障之乘再鼓甚淡思元賓而不見良忻子
弟之自佳待崔羣以相親尚幸友朋之責善

回權僉判李司法

中子

被命帥連屈參郡畫聞風已久幸分鄰壁之光易
地此來良覺賓筵之重恭惟某官蟠根奕葉騰茂
飛英古錦爲囊非尾棺之奇詭飛霞有佩足金薤
之光芒胡爲繡節之家猶屈墨曹之掾取青媲白
諒必工進取之文沈綠依紅何足留軒騰之步此
州斗絕每事冰寒茲乃得君子之寮必能圖仁人
之利某強顏乘障束手面墻倒屣相迎何幸一賢

之入幕同舟共濟庶無百姓之填溝

回權僉判李司法

申子

比沐袖賤已感再三之意茲承被籀又貽四六之文良感勞謙亦幾迷復恭惟某官臨邛重客成紀故家仲元在夷惠之間席珍審矣太白落荒渝之上袍錦謂何如聞飽曲禮之三千今復採直筆之數萬大廷奉天人之問固利春秋廣殿對日月之明令條禮樂拾芥不難於取紫泛蓮寧久於依紅肯爲某來徒得君重某濫茲主畫正爾蒙成三重熏三沐之初何俟於三語同姓同業也固有望於同寅

回郭僉判

仲洪

偏城假守凜虞末路之難貳郡得賢折託初筵之重未皇注記先辱飛牋恭惟某官學富家傳美優世濟林宗砥礪之節壯若山淵子儀金石之忠貫於日月其在遙遙之胄諒餘挺挺之風四國于蕃寧止三令尹而無喜五年湏暇顧方半刺史而同流惟時三榮強號一郭蠱小有悔无咎尚可爬梳井居其所而遷竟難回幹求牧與芻而不得無麵造餅之滋難何幸別駕之來將賴同舟之助相勉以忠義宜兩家子弟之通知衆望爲神仙詎子載

風流之敢繼第恐飛黃之服皂誰能泛綠以依紅
某昔未借交今欣聯事瓊瑤匪報永以爲好也敬
飭魚緘珠玉將至得無修容乎惟占騎氣

回郭僉判 仲洪

函牘相先已佩再三之意袖牋爲况更勤四六之
文損惠稠重訟慚襞積恭惟某官西岷秀望東郭
故家宰松桂之林良多美最汎芙蓉之幕似鬱壯
圖佇自民庸式遒王觀某幸茲聯事甫此識賢凋
邵蕭然正有望忠焉之誨佳賓戾止或可容拙者
之歸

回趙僉判 高

行吟憔悴忽玷竹符坐嘯從容將依蓮幕方圖往
記遷辱鳴謙恭惟某官學富家傳材優時措成季
之勲有後夙載英聲廣漢之政甚高宜躋膺仕顧
紆僉贊良鬱師言鴻漸于磐聊復爾耳鵬怒而翼
其孰禦之某出幕星終得州斗大於焉嘉客定非
圖利於大夫及爾同寮尚冀頗哀於老子

通潭州子節推官

數淮右之衣冠高門以世謁湖南之賓客上幕其
人眇焉枳棘之棲仰止芙蓉之幕不容禮後請以

書先恭惟某官服膺典刑飛騰聲實奔西北三邊之警爰及東南一尉之危誠死君上誠死封疆言之易耳今爲妻子今爲窮乏去者紛然能障狂瀾可知勁草章交其盛召擢宜優猶出依綠水之光殆斜取青雲之勢天地亦大矣會當錄德而計功人物方眇然願思任重而致遠某因貧蝗粟爲養蠹官今兩府之高士不爲乃甘爲此後五日之孺子可教幸卒教之

回吳節推

代月湖作

蓮綠水之風流於焉嘉客瓜青門之瓠落似是昔

人藻翰惠然故情厚甚恭惟某官浚明其質庸敏於才錐之處囊中久於見穎羅而致幕下信矣拔尤聊秩初筵即騰夷路某罔功于國歸老是邦龐公入城或奉笑談之適揚儀在幕正觀聲實之流

回李節推

欽

十年別德謂已溯紫而凌清一榻延賢今顧依紅而泛綠有勤委執良愧過情恭惟某官學有家傳才宜時措仙李盤根猗蘭奕葉夙高通德之門椒蘭息芙蓉爲裳宜待承明之詔顧勞主畫暫屈賓僚川泳雲飛此豈容於煖席幕開風動佇即拜

於溫綸某冉守竹符獲依梓里同姓也故人也惟是焉依儀圖之愛助之尚祈無隱

通潭州趙察推

汝倅

下邑椽曹之卑謬茲祭竈上府元僚之重正爾秩筵妄欲託桃李之場盍起敬芙蓉之幕恭惟某官身端行治學廣聞多禮樂宗英其賢城也遠矣詩書元帥以禮羅而致之湖南之客多賢姑紉蘭芷天祿之書當校行薄蓬萊某弄筆得官代耕求祿輕舟主簿柰何凌萬頃之茫叢桂王孫或者哀衆芳之穢

回新武岡王判官之經

駕丹桂之梯夙聞香輿依紅蓮之幕茲屈英游先辱朋箋良高僚誼恭惟某官負才庸碩蓄孝齋法早收名第於摘髭盍徑要津而策足願由倉庾欲試弦歌會外臺重黔巫之邦以一賢任溫石之責使者持斧旣已加桑梓之恭賓之初筵必首入蘋蘩之薦某一寒寡與獨冷多疇涉筆負承已慙記壁挈瓶假守更使捫參猶幸勝士之肯來或望餘光而後去百聞不如見面未易立談同寮敢不盡心尚希愛助

回榮州羅推官

聞琳琅之譽愧未盍簪賓玳瑁之筵幸聞命駕鼎
來儼語益仞高情恭惟某官子貢名門公遠仙裔
扶搖三萬里謂立致於要津才名四十年胡尚淹
於選筭暫此依紅而泛綠亟其拽紫以紆朱某濫
守麾符正資幕畫戒行李載書冊幸疾其驅廣忠
益集衆思無孤此意

回羅推官

萬里試郡叨分和義之麾聯事爲寮正藉友仁之
益未皇往記先沐蜚牋恭惟某官世德蟬聯器能
駿發明經而拾地芥早題千佛之名舉瓢而酌天
漿合上三神之岳碩未吟於芍藥尚小泛於芙蓉
煖席未幾溫綸即下某重捫井絡濫領斗州同寅
協恭和衷哉正湏賢者罔利征商自始矣能勿誨
乎詹晤非遥敷陳罔旣

回新本州蘭推官

尊祖

慕蘭相如夙服題橋之志從李虞部暫爲入幕之
賓一介未先雙鱗甚厚伏惟某官美優世濟才應
時湏智囊衮衮以生風才刃恢恢而餘地初試神
仙之隱五采宣威繼爲法令之師片言平獄便合

紆朱而拖紫乃猶泛綠以依紅最爾三榮隣於九
頂事頓異於昔者公胡爲乎來哉廣忠益集衆思
國無陋矣戒行李載書冊予日望之其乘障非材
觸藩無計求牧與芻而不得專俟罪歸襍被束梏
而未行或容晤語

回武岡彭知錄出

共江西之水昔嘗附總屬之題名分黔東之風今
乃際糾曹而聯事未皇注記已沐飛箋恭惟其官
學裕家傳才優世用考三世登科之記安俟金簾
續一門叔父之芳正頃玉樹頤扼銓曹之限不辭

邵掾之卑竊聞文孝之穰穰足贊武岡之矯矯操
持綱紀自來喜見於朱絲明習憲章詎得久淹於
丹筆不容煖席即對溫綸其教冑非材佐州何取
督郵地忍儻未逐重聽之聲丞錄事天通固甘作
折威之司馬

代回新嚴州郭知錄伯長

對比臺之馬耳自昔通家問南山之鳳雛乃今補
掾貽書勤甚喚夢凄然恭惟其官詩禮磨礪典刑
服襲飲水食蘩不忘先訓之勤欽板折腰猶待糾
曹之次三語之機相契五章之剡何難其星且拱

辰日將入酉伏波床下敢當盛意之勤渠子陵臺
邊或恐歸舟之邂逅

代回李知錄

短綆汲深聊備一人之數長牋委重何啻三語之
多受之赧然無可謝者恭惟某官持心近厚克敬
惟刑京兆浩穰小大之獄難察參軍俊逸輕重諸
罰司有權冒騰一鶚之章自笑匹雛之力譬之推轂
信當遵平陸之塗然而盤根豈宜後朽株之木某
願天馬有長驅之足早入帝關

回司理司法

楊蕃

林木

蒙恩佐郡慙非典午之材聯事為僚將有同寅之
契方圖涖記已沐飛箋恭惟某官業履直溫風猷
明浚補三語之掾暫屈通材培萬里之程盍躋要
路佇由鶚表徑遙駕班某倚席罔功題輿非據別
乘分月愧初無倡和之能同舟遇風幸不靳維持
之助過此以往未知所裁

代回江陰趙司法

桑榆婉晚又塵紫橐之聯竹素勤渠良感墨曹之
意慚無好語莫報故人恭惟某官清出璇原粹藏

玉質頃者勾稽之試藹然廉直之聲蒲謂諡頑身
結飛霞之珮不虞黻弄胎寒明月之珠佇積平反
入儀華要勉爲國許已振家聲某壯不如人老當
佚我聊復爾耳更穿振路夢之行姑少遲之徑返屠
羊之肆

代回全州劉司法

西崦餘齡冒誤恩而還綴東鄰厚意飭儷語以分
光情溢乎文愧浮于感恭惟某官簪裳胄望衣被
典刑爛斑綵服之華趨庭有得局促墨曹之試游
刃不難諒積平反之功即登華要之路某粉榆相

託蒲柳旣凋迷觚稜闕角之雲煙誤爲出計懷江
上山間之風月已卜歸期

代回江陰趙司法

崇价

冬官率屬誤拜上恩春藻摘辭猥勤下問恭惟某
官提身廉靖臨政䟽明行矣瓜期又作墨曹之試
豈其茅茹如長爲白璧之投願少湏之自此升矣某
未能免俗豈不懷歸猶戀君軒小曳鄭崇之履行
秣余馬言歸䟽廣之廬

回新任李司法

公澆

題千佛之名夙欽雋望補三語之掾茲屈茨游望

履不先鳴謙何厚恭惟某官挾材肅括蓄學碩膚
五千言之修身盤根有種三萬軸之貫腹奕葉彌
芳蚤擢領於廣廷甘擡頭於矮屋盍騰華貫又領
決曹昔狄梁公之於并門韓昌黎之在荆渚皆居
此職能大其官景行行之執事事也某負丞將滿
聯事亦榮惟內惟貨惟來知片言之可折同姓同
業同道或一見而後行

代回唐司理

惟良折獄何擇非人恤功于民不聞亦式鼎來良
掾式慰疲旼恭惟某官有偉儒宗蔚爲壽俊稟江
陽之秀清德可知觀雪嶺之竒雄材斯展不煩三
語行剡五章某歸夢飛騰
亦已買江西
之舫行即解維或可識劒南之英當圖望履

回羅司理

十年出幕濫叨一障之乘同官爲寮賴有三語之
掾方規請益先辱鳴謙伏惟某官學有家傳材優
世用撥煩剗劇共知從事之賢勞登明選公將在
參軍之俊逸騫騰近只翹企俟之某又入坤垠叨
分斗壘同舟共濟諒無有於遐心縮袖旁觀亦恐
孤於大手厥惟期俟莫旣編摩

通潭州曾司戶

應甫

操觚學步敢論臭味之同舍墁代庖強附交承之契揆材名而貌甚接步武以幸然恭惟某官曾出魯洙秀鍾閩嶺鏗爾舍瑟學傳先聖之不傳向來辦香文到古人之未到事業已其土苴科名真是遺餘居然三語之除淹此八年之久爭先捷徑君不行方夷猶獨抱古心羌難得而覩縷寧有圖書之彥可留版籍之司深霧雨而澤之望雲霄而近只某狙狙有志鹿鹿無奇栖枳棘於叢中甚安斯寢攀芙蓉於木末敢襲其裳重違大府約束之嚴姑俟前驅弩矢之至鳳凰尚遙於千仞鯉魚盡貢於尺書糠粃在前令公怒之未免珠玉將至覺我穢以何疑

代回邵武曾司戶

復

老子婆娑濫紆蒼佩參軍俊逸遠寄素書恭惟某官植德潤身揆材資世用計然之半策已足豪雄試揆之一官會觀霹靂有憐西崦之景猶庀北斗之司某曳履罔功投簪替孔武吾車吾馬漸爲膏秣之謀某水某丘或遂釣遊之願

回段司戶

干木之廬必式尚阻面承子松之歲當更反勤言
贈撫謙寵甚內訟悚然伏惟某官毓秀岷峨炳靈
江漢秀實仁勇之節風烈固存文昌翰墨之聲雲
仍是似草凌雲而入奏芥拾地以決科小試掾曹
未展霹靂之手固爲擢屈忽纏悽愴之心素冠已
畢於三年丹檢會膺於一札制禮弗敢過也俯就
朝祥任官然後爵之亟觀暮召某避堂不敏下榻
已稽將軍乃肯幸臨旣不以服而爲解進士於吾
同業是固將賀其善鳴

回綿州家司戶

熾翁

家將仕

坤翁

鸞停鵠峙舊聞英物之不凡鴈後鴻前今見故人
之有子未皇修贄先辱贈言恭惟某官世載其英
學造乎道取青拾芥誇映秀士之羣泛綠依蓮卓
犖掾曹之表恭惟將仕學有家傳美由世濟俯拾
地芥不難一律之塤篪小試天葩便入三銓之衡
尺佇遡正觀亟踐世官某自嘆孤蓬復分半竹事
其賢者友其仁者幸其在邦域之中愛勿勞乎忠
勿誨乎特有望文辭之表

通潭州段支使

齒下士而望光明漫爲委吏詣大府而受約束將

見元僚或有三年之託振可無一紙以張本恭惟
某官恢然材諳籍甚典刑故笏猶存可落姦雄之
膽新硎既發孰嬰肯綮之芒茲依綠水之華暫贊
碧油之畫湖山自得皆春生秋殺之仁賓主相驩
有川泳雲飛之樂得文武於幕下已空異北之士
夫流聲實於天朝是必湖南之支使某一科不補
三釜是謀使我有二頃田肯爭雞鶩屈公爲數旬
客幸蔭龜魚

武官

代回林御帶

標

十年去國恍然孤鶴之歸千里故人厚甚雙魚之
遺所慙善頌未免過情恭惟某官鈐略通材璇魁
名第朱華庀職早通二閣之班畫戟凝香屢作三
刀之夢碩因微恙力請真祠尊足者存叢何怜於
蹉跎奉身而退龍豈困於騰驤既兩踵之生輝宜
單車之促覲君王神武雖已謝單于而閉玉關男
子功名正當殺賊奴以取金印某無能爲役非所
納交天子欲誅羌酋未覺營平之老丞相必舉龔

遂佇觀渤海之安

謝戴將使

本

解后適願已幸識荆倥傯裝懷未遑訪戴旣感輕身先匹夫之意復有一紙賢十部之榮恭惟某官天分軼羣人門濟美翼扶九萬里決應海運於南溟腹笥五十家暫隱天樞之北落勇早聞於六館陣獨掃於千軍會當定一霸於螯弧何難連八科之麟角袞明日月更看黃榜之新履上星辰始是青氈之舊某舊交羣從今識清標聞元方季方之齊名亦旣見止從延君少君而受禮更幸進之

回成副將

鑑

懷章試郡叨分榮邸之麾訓旅將屯知有和門之副遠勤一介見畀雙鱗開緘絜然佩意厚甚恭惟某官共武之服克壯其猷稟山西六郡之良性資鷙勇應婁北一星之象卅胄蟬聯茲煩寡二之良來貳第三之拍爲王爪士足增劔閣之天高歸衛羽林寧俟玉關之人老某濫乘一障將幸同寮共惟帝臣正爾賴熊羆之士能以衆整尚願聞龍豹之韜占叙惟勤敷陳罔旣

寄居官

代董制帥通許侍郎

奕

劉閣學

光初

石坳和墨躡升猷納之班玉壘分符更冒蕃宣之
寄歸然地重叢爾人微實惟隣寶之依敢發書函
之故恭惟某官清時碩德名世真儒惟其特立而
獨行造道自得故能難進而易退經德不回至今
猶侍臣之冠歷年賜方伯之履在外則植旗旄羅
弓矢公豈此榮其功之銘鼎彝被弦歌士誠有望
佇起几安之焉亟馳介大之主某見謂踈庸誤蒙
簡注願乘一障豈能堪十乘之行縱駕兩藩何敢

作三刀之夢冒焉叱馭願在執鞭嗟遠道胡爲來
哉孰寬脅息居是邦事其賢者載慰心期

代通費參政 士寅

分小隊於少城將安問政倚鉅人之長德行可庇
身請裁吾黨之斐然來事是邦之賢者恭惟某官
賦資肅括蹈行中庸長卿吞雲夢之曾豈以八九
而芥蒂太白金岷峨之眼尚餘千萬之琳琅簡上
帝心爲公室輔固已重清廟九九之鼎謂當應泰
階兩兩之符乃甘松菊之主人暫作園林之勝事
道之將行也命天將降任是人佇一馬二童之來

增六鰲三極之重公有無窮之聞民無不獲之夫
其繭然棗昏重以木訥躡冒清華之選遂塵碧落
之班所期乞一障之乘詎敢作三刀之夢惟是夙
仰翹材之館乃今得依通德之鄉避正堂而舍蓋
公定難屈致置盂水以教任守尚幸告忠

回寄居官

楊南平 牟涪州 蒲運官 侯茂州

再命專城甚慙惕日六條察郡誤玷觀風所幸依
長者之墻用是攬慨然之轡曾修辭之不敏辱委

贊之相先恭惟

楊南平 牟涪州

文武兼資循良可紀

侯守

器博而周才弘以毅

蒲運官

洵美且仁柔嘉維則

回

衆官云筆力挾岷詞源倒峽作爲黼黻卿雲河漢之
亡窮粲然琳琅李杜光艷之固在有怜弄峨眉之
月詎能應益部之星財匪鬼輸安得有錢而使鬼
粟非天雨若爲轉粟以上天匪藉大家之牛車難
沃小雅之牡轡某自知負乘更愧贈刀大夫儼然
造焉旣知感矣是邦事其賢者能勿誨乎

回寄居官賀除漕

依君子之鄉正虞謫滿歌使臣之雅忽冒恩除亟
以籲天期於易地敢意緘滕之賜過形黼黻之詞
恭惟某官厚德嘔枯英詞發藻通經學古用西漢

以爲宗援筆賦詞鑒東坡之太晚崇金蘭之氣類
致水薤之箴規送以禮樂而有光恐孤煩使編之
詩書而無愧曷稱徽言某攬轡安能循墻知懼是
邦大夫之賢者知久敬以善交吾黨小子之斐然
愧成章而匪報

回鄉官未相識

守鄭公之鄉方規問政辱子雲之札有味贈言愧
先施之未能感高情之見厚藏惟深於篋笥報莫
辦於瓊琚

回鮮于將仕珏

五月渡瀘曾奉青油之談笑十年去蜀未瞻丹穴
之羽毛敢圖倂來辱篤世好恭惟某官學優而仕
父教之忠德星出虛危本南隆衣冠之望高論已
河漢信東坡眼目之長竊聞填箎不替弓冶章矣
是以有慶矣正湏子弟之自佳咄兮終不可緩兮
倚見公侯之復始某未皇望履先辱賜謙識野鶴
於末仙固將有後期旣駒之越國所向無前

梅亭先生四六標準卷之三十二

梅亭西標準

內閣文庫			
特	四	十	二
一	一	七	四
一	九		

合

內閣文庫			
漢	11742		
冊數	19	(17)	
函號	3	5	

梅亭先生四六標準卷之三十三

宰

通寧鄉周知縣

塚

絃歌愛人願效縣公之役會計試吏冒干簿正之
供是非尋常之託根請裁四六而張本恭惟某官
人門具美天分素高家聲早著於黜三世德不專
於爵一安劉必勃破操在瑜學配前聞肯俯貪於
蝸蚓律設大法謂徑掣於鯨鯢居然婆娑尚此盤
礴得非堅車大艦利用遠遊寧有巨棟脩梁驟堪
轉致頗聞三異且見一同非百里材姑繞蟻封而

試馬爲萬乘器會江龍鼎以函牛長沙令之讀五
車綴班雖晚洛陽生之對半夜趣召可期某學不
踰人飢來驅我舌乏長裾之飛譽姑從矮屋以立
身先達者爲之前定包荒於後輩大事則從其長
足藏拙於小官冒然而來恃此不恐人果不可無
勢豈矜駕御之能士安得獨自高尚假比隣之庇

通崇仁曾宰

穎秀

曉行湘水我方尋欸乃之歌春靜巴山君來賦薦
于之曲非鈎魴之厚味漫致鯉於長鬚恭惟某官
忠恕家傳倫魁世業恢恢游刃如錐之處囊中在

在影纓皆羅而致幙下適通玉籍屈綰銅章願避
譚公之維私不云贛水之可厲維寶唐之補邑固
麻谷之舊邦錦製此來綉行甚寵改邑不改井易
地則然有土此有財得人焉耳奉潘輿其孔迺馳
魏闕以非遙某兩鬢白紛隻身墨隱昨班文石不
能誨館下之諸生今戍武岡幸不失黔中之上佐
出書尚遲於三日受滕願託於一墨操韓子赤縣
之權晉妾于於薄少荒鄭虔蒼苔之屋尚見茈其
歸來

代回常安曹宰

輔出

不稼取禾我謾持於漢橐及瓜代戍公已趣於曹
裝一介惠然雙鱗厚甚恭惟某官百里爲令三年
有成不求赫赫之名見思所去雖聽鼙鼓之鼓有
挽無推交章翕然增秩近只佇公侯之必復豈州
縣之徒勞某骭髀雲司超騰水部會且歸矣不當
戀仗馬之芻行或使之猶復見飛鳧之舄

回武岡許縣令

大用

強顏貳郡慙非典午之材箱尾爲僚喜有同寅之
幸曾修辭之未暇辱垂問之相先恭惟某官精神
五兵肝膽一劒積月書於右序已播英聲奉天對

於左廬更登峻級方西北二邊之未靖何東南一
尉之足淹行矣章交亟其王觀某無能教胄願使
轉丞雙鯉得尺素書良勤垂念從一騎蹕五百里
即遂承顏

回武岡薛縣令

仲庶

聞三鳳之聲未皇識面聽雙鳧之舄良喜足音尺
書惠然三復感甚恭惟某官材優世用學贍家傳
蚤安枳棘之棲簿爲之兆繼領旂揚之寄民自不
冤亟爲製錦之謀可見鳴弦之志惟此黔巫之鄙
異乎江浙之間下若牛馬上若熊羆從昔少人而

多石大不鯨鯢小不虺蜮乃可宣化而承流公行
勿渥民望攸屬某淒涼半刺僥倖同寮欵乃一聲
定樂薛存義之至統如五鼓幸端鄧伯道之來忻
幸良多敷宣罔旤

回綏寧野令杓

榮離霧隱出宰雷封維今巫水之磻雖云巖邑在
昔夫夷之長固有聞人恭惟某官闕里故家良弓
宿學三仕爲令從知學製之精萬里封侯行見弃
縑之勇茲來蒔竹已及戍瓜下若牛馬上若能罷
飽看奇壯大不鯨鯢小不虺蜮正藉撫摩某典午
非材同寅有幸許丞重聽猶能聞欵乃之一聲
侯肯來諒不俟統如之五鼓

回武岡許令

教胄本朝久歸來於茅屋負丞支郡偶及代於瓜
期夙聞成削之標將托寅恭之契未皇淮記先辱
撝謙伏惟某官氣稟沉雄性資果毅對擒胡之月
盍策勲名戴作孫之星碩勞撫字佇民庸之入奏
承天寵以遄歸某倚席不材題輿非據貳部長縣
固胥齒之相依體國愛民願腹心之無隱

代回丹徒姚知縣

宰山水之縣知在近郊聞弦歌之聲未瞻遠器敢
圖往記施及汎負恭惟某官籍甚人門歸然地望
善刀出匣其孰嬰紫電之鋒結綬登畿顧斜取青
雲之勢多景誰如於北固辦香寧舍於南豐改云
茲操權於赤縣姑欲惠於黔氓繭絲乎保障乎定
知緩急勦魚也陽橋也決有後先雙鳬之舄翩然
五鳳之脯近止某畫墁無補巢幕奚為望金堂石
室之間無因而至感綉段瓊英之贈藏之為榮

代回江陰何宰處博

送紙上之軒昂皆我輩語就暗中而摸索之

家有味其言不知所賀恭惟某官人門具美天分
仍高日食萬錢盡追隨於伯父地方百里何局促
於子男聊繼益昌之功名即見中牟之除寵某日
之夕矣人謂斯何乘興而來漸有回舡之意同姓
為近空餘推轂之情

回成都呂知縣大全

箝尾青油之幕那暇笑談傾心赤縣之官鼎來材
傑聞鳬鳬之近只得書鯉而躍然恭惟某官渭釣
名家蜀珍粹望恢乎遊刃豈難解盤錯之根飛不
盡翰殆欲培扶搖之翼蓋班玉筍顧擁壁浦士元

非百里之材便應別駕成都有萬事之好是在長
官錦製奏功綈緘入覲某全提迂拙冒涉險艱舍
蒿印一室之書無能爲役投成華兩縣之間何處
有詩

代回新昌詹宰

繼

孤鶴重來恍難尋於舊侶雙鳬西望猶未廢於故
情相贈以言足華其老恭惟某官早持雋望見謂
通材學道愛人固自不妨割雞之用治中別駕亦
何足爲展驥之謀種桃李於春風接蓬萊之雲氣
去天尺五孰云多而不揚擊水三千願少安之無
躁某崦嵫日薄嶰谷地寒簪筆甘泉聊爲覆蕉而
尋夢挂冠神武豈須叢桂之移文

代回趙萍鄉

彥達

名駒千里夙聞佳公子之聲烹鯉尺書未忘舊令
尹之好方當執熱如對調冰恭惟某官遠派天潢
早梯月窟卓犖千萬人之敵足亢磐石之宗低回
三十載之間始入金閨之籍楚萍如斗陶柳皆春
不惟吏泗而民咷料亦庭空而旅實尔表得游庠
序又見賢君天使亦好官負恐成故事某自慙揚
糝安有憩棠老鶴乘軒可笑翅翎之短飛鴻踏雪

三十一
空驚拍爪之留

代月湖回吳宰

困

振履光臨屬辭寵賁靖共正直得之眉宇之間雅
健雄深粲然毫楮之上君言雖過我心則降恭惟
其官敏手決科洗心從政盤根而別利器游刃若
然促柱則少和聲鳴絃自若頗聞鑊湯茗椀之句
仍見髯翁稚子之詩已窺一班復尋尺素六察六
院本以待邑最之來三沐三熏決不在時材之下
某過勤委重莫可報嘉逢人而說項斯當無回隱
作書而見子布徒取嘲嗤

回鹽官林知縣

申

懷赤縣之章聞將引綬依綠水之幕行或望塵未
遑名姓之通猥沐緘滕之寵恭惟某官風猷肅敏
業履端溫杞梓之材異材是宜作室瑚璉之器何
器而使在山板輿欲覽於王畿蒲壁故來於京邑
切聞潮浪頗蝕邑封必欲種河陽之花不若撻淇
園之竹行觀驅鰐亟遂飛鳧某贊畫非材底寮有
幸癡公事未了也正懼瘵官新令尹仁矣乎當期
做誨

回李知縣

庭可雀羅辱再三之相遇門無鳳字有四六之見
貽委重良多報嘉不腆恭惟某官器資肅括才具
碩膚祭彤方果於鉏茲即墨遽從而造毀令尹無
愠色亟歌歸去之詞童子有仁心迄動巡行之歎
再試巖邑四達通衢人疑故步之迷君若新硎之
發吏才如此難逃六察六院之除公論則然何假
一話一言之贊某緬懷先德幸接後塵力足爲器足
施非所求於我也問則告疑則辯敢有吝於公哉

代回俞知縣

剡升陟之章真成備數鳴謙撝之德更費屬辭受
之過情謝若爲語恭惟某官槐根之正蘭茁其牙
窮武陵之源吾爲尔宰歌滄浪之水清畏人知意
有雉馴可無鶚薦某過勤四六嘉歎再三雖則七
襄覺成章之匪報儉於百里願賦政之又新

代回弋陽曾知縣

煥

刺手拔鯨欠丁官之下取長鬚致鯉與甲藁以偕
來不謂垂橐而歸將有埒國之富恭惟某官汲古
得綬績文有機夜雨聽阿房之篇英詞偉甚春風
接曲江之席舊夢瞭然謂已古駕於蓬萊乃猶讀
書於松桂古風一覽恍今日之未聞大冊載觀尤

小生之所畏贈我綉段多矣期君蟠桃可乎某何與斯文亦聿旣耄角巾東路諒無煩関尹之迎辦香南豐請歸爲宗派之賀

代回餘姚趙知縣

希祐

聞武城之弦居多遠韻剡公車之牘輒及通材嘗試言之無可謝者恭惟某官月題千里風翻九霄鯉趨過庭早有聞於夫子虎拜稽首將是似於召公觀其製錦之操刀足可衣綉而持斧參諸衆見僭以名聞蓋欲脩良師帥之儲非止託賢父兄之契某重蒙四六熟復再三舉之愛莫助之更期進德老矣無能爲矣何敢獻諛

代回長沙楊宰

宜中

不鄙雀門見迂鳬鳥特枉咫尺書之教仍惠二百篇之詩拜賜便蕃滿心銜戢恭惟某官清材汲古奧識洞今作賦摩空阿房之摺笏已晚聞弦亮笑長沙之短袖難旋禹稷用心固已失薛郇蘇郭之輩孔顏素學猶不廢房杜王魏之流至於佳句之耽更覺良工之苦取數多矣受言藏之此士落江湖宜爲時出諸公登臺省會以名聞某何與斯文亦聿旣耄龍鍾韓子低頭負東野之慙刻畫無鹽

捧心漫西施之學

代回當陽林宰

鑑

老夫耄矣曳履可慚令尹何如飛牋見問恭惟某
官名父之子克世其家學裘之功已深寧能無譜
製錦之技旣敏會即策勲某自笑龍鍾寧堪鳩僇
空憐往日識野鶴於未仙猶幸殘年見名駒之汗血

代回麗水張宰

元渙

西崦投閑冒誤恩之起廢南鄰借潤駢好語以噓
枯返璧未能報瓊何有恭惟某官人門秀整地望
高華鳬未來京花已開於滿縣蝗不入境麥自熟
於兩岐行用最聞即膺世選某髮真種種心已休
休懼方命之見誅聊強顏而入侍不能者止更數
月以乞歸倘疾其驅或一面而後去

代回常寧曹宰

輔世

老夫耄矣誤隨弓旌之招令尹何如更加錦綉之
贈寘慙無所懷感有之恭惟某官抱挾長材踐揚
膺仕衮驥足於百里料亦賢勞缺鹿鳴之三章猶
稽改秩權勢逼迫無患有司不公政化流聞惟善
能舉其類蠖伸於屈鵬怒則飛姑安種秫之期以
俟及瓜之代某儀圖莫助有味薦賢借聽於龍耳求

三四十六
道於盲莫報勤渠之意加膏而光養根而實更伸
頌禱之私。

代回興寧廖宰

柳

飛鴻踏雪談舊事以無人烹鯉得書喜故人之有
子因之喚夢何以報嘉恭惟某官父教之忠世濟
其美早回翔於簿領似屈鸞棲稍剴決於糾曹諒
多鶚薦顧動鳴絃之興欲明製錦之材會觀棠蔭
之成亟騰善最雖在梅花之外必有賞音某夕陽
在山浮雲出岫咫尺之間乃蒙篋笥之不遺千里
所期願以民社而日愛

回家知縣

午仲

妻生日

某不腆糟糠值此瓦礫之旦何勤翰墨燁然黼黻
之詞調固仰於弥高歌亦慙於不類同我婦而饁
南畝但切懷歸跂彼女之織七襄竟成匪報

回新西水勾龍知縣

僮僕來迎知已返柴桑之里舍館未定無敢過干
木之閭敢圖將進趨趨之間竟蒙先垂特達之顧
恭惟某官蜀都秀望漢殿巍科跨躡健特良鬱康
莊之驥步鞭笞鸞鳳久棲官舍之燕巢茲聞西水
之鳴琴行趨東風之叱馭劒門天下壯諒皆收檻

於胷中閬州城南稀更合包羅於筆下藉未召卓
茂於密令會有言苟變於衛侯某茲成雲邊在公
宇下置漢陽之雉方當求聽於鯁言種河陽之花
又恐亟飛於鳬鳥

回新榮德王知縣

子勉

倦甚衰翁已作歸歟之計豈哉令尹甫聞至止之
音有勤屬辭良高陳誼恭惟某官才優世濟學富
家傳頌聖主之得賢遙遙風烈移忠臣而爲孝挺
挺雲仍若爲牛刀之割雞更欲蟻封而試馬三榮
之強名郡縣并有仁焉兩年之括利錙銖泉之竭
矣或恐一雞之損尚俟雙鳬之來幸疾華鑣以別
利器某崿嶇一障坎壈兩春秋水落霞已決尋盟
於鷗路春雷奮地尚觀運化之魚龍

回王知縣

應西

求士爲國輒剡牘於公車博我以文敢收恩於私
室一謙厚甚三復悚然恭惟某官學問淵深器能
疑遠揚雄有河東之賦吹噓宜上於九天溫造空
異北之羣羅致敢違於三月茲表一鶚聊助雙鳬
何勤四六之貽更致再三之謝某推轂有味引鼎
不程諸侯薦人與之諸侯安敢自必於天子國士

遇我報以國士所祈自拔於衆人

回遂寧青石席知縣

伏以十年一別謂已造於筍班萬里重來胡尚淹
於花縣遠勤一介見昇雙鱗恭惟某官政地名家
祖風餘韻故國之非喬木將在闌孫大厦之無弃
材寧遺杞梓碩限七階之選復疇百里之庸會由
晉興徑登魏闕某去此十暑依然一寒不虞再辱
於陶甄俾守三榮之保障紙書賢於十部過勤聯
璧之牋終日雖則七襄終愧雙金之報

回盤石李知縣

一麾假守獲託鄭鄉十部貽書過勤郇翰愧先施
之不敏仰厚意以安窮恭惟某官唐太白之家蜀
仲元之孤麟爲聖人出也亦旣在郊鳳覽德輝下
之是宜巢閣顧屈一同之尹式騰三異之聲君子
學道愛人亮牛刀之立解縣令承流宣化佇見焉
之橫飛某濫號專城適逢竭澤是邦大夫之賢者
何以教之吾黨小子之斐然願有請也

回劔門王知縣

分榮德之麾濫乘一障聞湛恩之閥實冠四封未
遂盍簪猥勤貽翰恭惟某官人門具美天分夙高

此笏乃今甘棠式光龜組故國非謂喬木蓋在象
賢藉魁奇忠信之才守崢嶸崔嵬之險佇交鶚薦
徑作鳬飛某濫剖銅符獲依珂里未見顏色願聞
拔薤之規聊欲弦歌尚迹伐柯之則

回新應靈趙知縣

與佩

瞻五潢之派知敬清流懷百里之章將迎新尹有
勤一介先畀雙鱗恭惟某官大雅不羣小宗繼別
精石渠五經之學豈必秘鴻寶之藏酌玻璃七寶
之盃自合受龍巾之寵乃肯宰山水之縣殆欲聞
絃歌之聲一同驩然三異近只某濫茲試郡幸甚
得朋似聞製錦之刀既有所試更冀發硎之刃早
疾其驅

回三縣知縣

出幕罔功一星周矣分符非據二火燁然賴有同
官之良或可聯事而治伏惟某官揆才庸敏迪德
浚明學古入官小試子男之國疑民以政共知父
母之心佇交一鶚之章即趣雙鳬之覲某濫茲假
守幸甚爲僚共惟帝臣正賴同心之協濟頗哀老
子諒無袖手以旁觀

回資官文知縣

三
無嚴諸侯必反之君方養勇與老人期後何也僕
欲踐言比立青紫囊以馳欲易黃皂衣之擾不虞
返旆便自寒盟同僚敢不盡心特開大駟未信以
爲厲已姑示小懲茲望白圭之磨且聽青氈之復
信近於義言可復也已更寬期會之程過而能改
善莫大焉幸無詫催科之拙

回新宜賓黃知縣

楷

恭審榮分蒲壁入觀蘭咳牛刀割雞更溯倒流之
三峽鳳簫駕鶴來寧未老之雙親喜氣先驅歡聲
夾道恭惟某官器資膚敏業履崇茲讀江夏未見

之書盍登東觀講延平相傳之學宜侍西廂若爲
出邾子之城還又宰棘侯之國烏殆思於反哺燕
亦急於歸梁種蒲縣之花聊復尔耳采行潦之藻
其順矣乎付談笑於青油養聲名於丹闕鴻漸于
陸不素飽也正佇來儀鶴鳴在陰其子和之何辭
好爵其蹕蹕老矣蹉跎依然但深吾愛吾廬之恩
濫叨我任我輦之役所幸依闌外之制且獲聞庭
下之趨悵銅駝陌上之十年獲金馬坊中之再見
莫懷漫刺驚辱僂箋數面成親况嘗綴葭莩之契
論心道舊所願聞藥石之言忻幸惟深敷茶罔旣

回崇仁趙知縣

鄰粉榆之社聞飛禮樂之英宰松桂之材知報詩
書之政萬里偶馳於蜀道一墨實受於滕仁未皇
馳箋猥辱委翰恭惟某官不羣卓尔無敵飄然熏
南豐之香文章有種樂東平之善性行無瑕摘髭
俯拾於魏科策足宜騰於要路留連栖鳳邂逅飛
鳬當師旅飢饉之餘得賢明慈惠之長佇交鸚表
徑上鴛行某弱念易盈老形已具我任我輦誤令
直指以觀風吾愛吾廬但願曲肱而飲水惟是玉
川之破屋仰依蒲邑之茂林易地則然行亦返曾
子之室得人焉耳會當聞言偃之弦

回丹稜范知縣

乙孫

眉州荀監酒

辯之

眉

州李監稅

詰甫

山壘終更已上投閑之請江鄉改牧莫知誤渌之
由方露悃以控辭荷雲牋之委貺恭惟知縣人門
具美天分素高暫紆臺閣之登屈試絃歌之政監
酒典刑茂著學問深醇差池宦路之老成主當糟
丘之醲郁監稅器質疑粹學業端深巍巍名第之
英淹卹征商之權恢恢才刃足立解於千牛整整
華鑣可坐空於萬馬佇公車之交剡即要路之疾

驅其五技已窮再鼓愈淡已乞歸銅陵之磴或許
告還倘共飲玻瓈之江尚希愛助

回青神權縣嚴縣丞

百

聞蜀莊之珍幸於旣見見韋郇之牘得所未聞報
不成章還若爲贅恭惟某官岷峨峙秀江漢濯靈
貢鄉英門率出下風之請以春秋對亟膺上計之
招居然全材屈此贊府有來寄牋於紫紱知旣攝
宰於青衣佇奏一同之庸亟登三異之最躡故跡
破崖岸端使然哉馳閭闔入凌兢自此升矣某濫
更治將遂爲僚昌黎接後輩之名何爲至我藍田

愁羣山之望行又見君

回新神泉史知縣

大川

依芙蓉之幕嘗辱贈言宰松桂之林未皇執訊茲
守鳴珂之里過蒙投璧之光恭惟某官器宇宏深
丰神峻整陽休山立克世金魁之家玉潤冰清近
續符溪之學暫牛刀之小試即鶚表之交飛論坡
穎歐蘇之交旣聞耳矣嗣嚴楊陳李之響尚寓目
焉其未果避堂先蒙枉駕拜閔睢五章之貺真盈
耳以洋洋歌白駒一束之詩無遐心而皎皎

回新都史知縣

季溫

聞武城之歌未窺半面讀阿房之賦敢斬一言粗
欲無患其不公敢冀有文以相接恭惟某官玉壘
名閥金魁故家文勝質質勝文不難百勝學優仕
仕優學信是兩優戰青袍白紵之中鏗綠綺黃鍾
之韻比見天地人之策本本元元可知果達藝之
材恢恢焯焯漫尔吹河東之賦俾之空冀北之羣
某叨領竹符獲依粉社於我本無怨而無德詎敢
收私室之恩贈行不以頌而以規更願直大庭之
對

梅亭先生四六標準卷之三十三

梅亭先生四六標準卷之三十四
丞

通寧鄉陳縣丞

惜

武功之丞簡靖久矣沐芳臨邑之簿卑棲茲焉假
蔭敢以尺書之敬進於再拜之先恭惟某官遠抱
甚都壯猷孔碩清明志氣曾中風月之無邊沈浸
文章筆下源泉之不擇盡徑要津之立顧淹贊邑
之留鳳凰自下而升高聊復爾耳鴈鶩鉗左而摘
右端使然哉雙陸之勢無休九萬之程斯下某崎
嶇副墨漫浪勾朱士安得自高妄欲比鄰之託余

方有公事願聞掃溉之吟

回桐廬朱丞

中肖

短啓代庖已忘西施之唐突長牋倒廩尚憐東野之龍鍾一謙之光三復以愧恭惟某官人門濟美風調軼羣觀東閣之奇詎當相吏歌南陽之直真是自強試窺千萬琳琅之毫芒豈以八九雲夢而芥蒂對藍田千挺之竹肯負丞哉續桐江一絲之風今召君矣某見賢不敏拜賜何居士廉未識挑椎亟當進謁永叔強差韓愈願勿失言

回華陽李丞

挺

題曲江之名夙嘗託契贊武功之理茲幸爲客士有候於中涓乃先勤於下問恭惟某官行無瑕類李有本原充長吉錦囊之文命騷可僕飽鄴侯牙籤之讀繼別爲宗胡爲再命之材淹此一同之貳鴈鶩鉗左而摘右端使然哉鳳凰自下而升高將在此矣某冒嘗險阻全蹈拙踈數同年琴上之星感舊游之如夢共萬里橋邊之月幸末路之得朋

代回武進陳縣丞

貴成

名家勝士自有公言助國舉賢古無私謝枉長牋之委重搔短髮以真慚恭惟某官千里名駒九苞

威鳳大科異等一翁二季之相望茂實英聲七略
羣書之兼總謂即登瀛洲而給札猶欲破崖岸而
爲文余不負丞丞負余誰其知者季而優仕仕優
季似是兼之無謂我豈要子隣始爲人識亦知吾
徒得君重少應時湏所愧明陟之章適引暗投之
惠某三復墨妙十襲珍藏儀圖之莫助之更期進
德匪報也爲好也聊復成章

回樂安趙縣丞

彦彬

老驥般跼猶戀天山之秣名駒奇俊適追電影之
幸許論交過勤執訊恭惟某官近於大雅博以
羣書太白詞章宜有六丁之取更生經術豈無太
乙之知不應賜第之餘復作贊公之試鴈鷺平立
未妨破崖岸以爲文鸞鳳高翔會即決雲霄而布
武某爲寮有舊辱問相先揣弘景之頭顱歸已晚
矣畫嚴丞之手版猶願見之

代回樂安趙縣丞

彦彬

推士轂而及丞味言何有旁使車而從子哦句已
來一謙之光三復以愧恭惟某官諸劉族屬爲漢
宗英馳閭闔入凌兢則爲宜耳去角牙破崖岸端
使然哉剡三載之陟明愧一言之不知然無華乃

安靜之吏則所美豈輦輓之文有望於君不孤此
意某已成歸計更辱贈言布襪青行纏吾已從此
逝矣珠宮紫貝闕子盍歸而求之

代回樂安趙縣丞

彦彬

題藍田之壁君受代以不遙厭承明之廬我治任
兮更迫何勤委翰仍費屬辭恭惟某官以貴王孫
爲名進士巖邑更刀之後非復昔時贊公游刃其
間疑有餘地及瓜近只按茹誰歟敢愉陟明之章
少寓愛助之意某投簪不力曳履胡顏以一身而
備百工藉可已矣總羣書品奏七略子必勉之

回錢塘趙縣丞

彦的

余方有公事鼎來赤縣之官曹我未免鄉人益愧
白頭之幕府有勤執訊敢闕報章恭惟某官卓爾
不羣飄然無敵尋玉清洞中之字已書會計之功
展錢塘江上之圖更動吟哦之興手版暫煩於畫
地觚稜何遠於去天某轍鮒孤蹤磨牛陳迹喜似
人於千里况辱託於枌榆雖異事而同寮尚不遺
於葑菲

回富陽趙縣丞

光祖

倘使者之車笑癡兒之未了題丞某之壁聞公子

之鼎來未果修辭先勤執訊恭惟某官五漢龍種
千里駒材早宣采棒之威坐獲綠林之賞鴈鷺籍
行而平立端使然哉鳳凰自下而升高恐不免耳
某強名入幕正愧面墻赤縣官曹喜依仁之有幸
黃塵衣帽或分蔭之自今

回益陽李縣丞

江西之有宗派昔已論交湘水之逢故人今將聯
事尺紙良勞於遺遠白頭何至於如新恭惟某官
翰墨勝流典刑前輩人言短李釣竿已負於珊瑚
天遣長庚霞佩正垂於金薤謂進參於諸老願退
貳於一邦籍尾無辭需頭有薦示東春秋於五傳
訪離騷之一經士安得自高政以比鄰之請余方
有公事願聞掃溉之吟

代回麗水童知丞

壩

考陟明之績輒剡需章屬比事之辭遽鳴謙德於
禮爲過此意則勤恭惟某官文獻故家詩書宿好
彼不即汝而汝即彼既執螭蛇余不負丞而丞負
余寧問鴈鷺烏何關於屋上黔固詠於邑中時而
颺之聊復爾耳某有二宜去以兆足行幸能其官
亦有無窮之聞仕優則李願又可六之功

代回宣仁張縣丞

曼德

升陟一章何能借重謙勤尺牘又復拜嘉其文固是粲然此禮略之可也恭惟某官清餘家法敏有吏材翠竹深林久已觀於停峙老槐古縣茲良費於吟哦無俟書來亦當剡入未見分毫之補又勤四六之貽某辭璧未能報瓊又乏樓臺近水柰何秋月之闌干桃李成蹊佇見春風之披拂

代回宣城張縣丞

曼德

厭承明之廬我動歸與之興題藍田之壁公傳至止之期四六鼎來再三復熟恭惟某官黻纓華秩

簪筆名家再轉爲丞坐閱十年之久一鼓作氣會搏万里之程願嗇龍文虎脊之精神靜聽蟲臂鼠肝之造化某自知日薄豈可夜行疲馬之恋君軒已將告老騎驢之到京國猶及語離

代回海鹽梁丞

成章

五雉分工近承誤渥雙魚尺素遠認故情恭惟某官拾芥有年哦松何晚翦伐誰能送只令志士之嗟精悍無所聞正自可人之意猶借齒牙之餘論見華喉舌之納言某似是水曲已承天寵告者過也想以爲司馬之官行或使之惟當返屠

回崇仁朱丞况

文昌之座高華偶然序進武功之官簡靖亦以書
來所愧陳人有慚善頌恭惟某官天葩吐藻地芥
決科鸞鳳高翔時來則爲之耳雁鴛平立丞豈端
使然哉似聞臺府之見知又欲改歌而相試解牛
旣效薦鷄何疑某司臬無庸僭功有命老夫耄矣
恐孤喉舌之納言曷月歸哉猶借齒牙之餘論

回彰明黃縣丞旦

老我蹢躅甘一麾之出守故人嗟為踏甫再轉而爲
丞馳情室迕而人遐示問禮踰三情過恭惟某官

金華一派玉井雙流煎瀘川之茶忘酸寒之異味
賦爨道之笋尚冠冕於兩川獨怜曾次書傳之香
方從此中文字之樂鴈鴛箝左而摘右端使然哉
鳳凰自下而升高恐不免耳某凄其一別瞠若百
羅立館下招諸生嘆齏鹽之亡味坐堂上稱太守
驚杞菊之已莎方欲求拔薤之規乃聞對哦松之
壁桃李春風一盃酒尚佇來歸風霆劇談九河翻
願安承教

回江原郭縣丞允升

履履迎門未皇執贄文書銜袖畏沐贈言巾佩湯

謙之光俯深盱豫之悔恭惟燕官見聞殫洽意氣
醇明發而中節謂之和見於眉睫粲然有文以相
接示以肺肝所慙先施之未能更資微言之難受
某欲還鯨錦懼損繭緘雖則七襄終之襜褕之報
藏之十龍永爲篋笥之珍

回新津孫縣丞

庭傑

吟哦公事藍田丞端使然哉觀采風謠益州分故
知之耳有勤迂顧更費屬辭恭惟某官齊子武之
家楚叔敖之胄枕流漱石尚有典刑擲地作金粲
然文采淹回貳令之壁鏗鏘千室之弦有怜并州

之迎已孤竹馬安得祁山之出能辦木牛或錫之
輦願還此笏十鍾一石自昔固病於西南三令五
申須君更教其左右若爲委翰頗似過情某已控
需章勾還節傳承風駕之命弗敢與聞補晚賦之
章願安承教



梅亭先生四六標準卷之三十四



梅亭四六標

庫	文	閣	內
商	架	一 元	特四十二 二七四二 號

合

內	閣	文	庫
番號	漢	11742	
冊數		19	18
圖號	圖	3	5

梅亭先生四六標準卷之三十五
簿

通寧鄉蔡主簿

攷說

交代

望俊躔於淮海知敬儒先問遭道於洞庭偶從誤
後貂不足而狗續鴻高舉而燕來及未治任可無
執訊恭惟某官員材鴻碩蓄學駿厯中郎典刑晚
亦宜於東觀客卿富貴久盍見於西秦吾道非耶
公等安在跨揚州之鶴安得自高麾湘水之蛟能
令公喜方今漢庭之老用矣敢問吳會之意何如
某志大心勞材䟽意拙一科不補欲鉤鰲而未能

五技易窮覺暑龍之無用所賴鸞鳳之先戒棲枳
何如無謂牛羊之下來求芻而止尚托子孫之契
欲窮師友之源向來一辦曾南豐苦難並世安知
四海習鑿齒不勝讀書

代回上高劉簿

呂詩

衆賢雜還共騰薦士之章老子婆娑切與挂名之
寵無可謝者安用文之恭惟某官節抱秋竿詞摛
春藻諸公評論謂當策足於要津何物簿書欲使
擡頭於矮屋人爭送上我亦譟旁引重鼎兮不程
問大鈞而未答某挽士不寸宜休者三遺我雙鯉
魚似虛取勤渠之辱漸階羣振鷲願無忘醇正之
歸

回江夏范主簿

之損

屈就棘棲榮趨瓜戍漢之廣江之求古稱夏口之
雄薄如絲訟如縻今敢秋毫之隱方圖贊喜已沐
飛牋恭惟某官翰墨功名填虎學問一門叔父慨
然孟博之登車十萬甲兵喜爲幼度而折屐頤就
銓曹之調俯從簿正之供難爲弟難爲兄正觀競
秀能令喜能令怒佇即蜚英會蹋翻鸚鵡之洲見
倚賴巨鰲之釣某一寒寡與三暑沒閑頃者綴文

石之班不堪教胄茲佐武岡之治正玠一負丞所
折楚服之同尚切晉波之及修西門種柳之課君
必勉之尋南嶽煨芋之禪我之懷矣

回綏寧譚簿尉

成子

老驥垂頭有愧治中之展名駒策足不孤簿正之
供幸游從諸父之間有稠疊同僚之好恭惟某官
美由世濟仕本學優乃翁知國如知兵手板無倉
黃之失它日聞詩又聞禮心印得清白之傳寧嫌
矮屋之卑會即高門之亢某再叨半刺不美羣飛
士安得自高儻可請比鄰而與祭余方有公事亦
當破崖岸而爲文

回武岡黃主簿

海

深叢見孤熊曾聽阿房之讀遠方遺雙鯉來司臨
邑之曹可謂聞音而跼然抑訝何見之晚也恭惟
某官源委深厚波瀾老成潁川第一之功固起甚
廉之簿江夏無雙之學蓋觀未見之書暫須矮屋
以擡頭即快要津之策足某因功教胄承乏佐州
聾丞尚可送迎儻或免督郵之逐短簿能令喜怒
何幸同君子之僚

回蔣主簿

時懋

三十九
雌伏邵丞自笑廣文之何用鸞棲簿領渠云高士
之不爲聞湏及瓜之期尚請拔薤之教恭惟某官
掞材有裕蓄學不貲黔山之嶺夙負權奇之質湘
水如舞聊攄會計之材佇即飛騰徧儀華廡某卧
雲已幸分月何爲靡有他長友其士之仁者能令
公喜忠焉能勿誨乎

代回廬陵嚴簿

世明

老夫耄矣不堪再鼓之衰主簿何如猶致一牋之
賀恐孤厚意聊具報章恭惟某官派分釣瀨之清
丈似漆園之壯驂騑開道會即秣天山之禾鸞鳳
冲霄姑少棲人間之枳交章載路增秩匪朝贈我
明月珠可見多時之鯁弄乞君飛霞珮會看萬里
之頡頏某高卧北窻却遮西日軟紅可厭敢長戀
屬車之塵堅白爭鳴惟欲據槁梧而瞑謀歸決矣
因謝及之

代回吳主簿盟

昭誣辨謗方欲賀君比事屬辭何爲至我恭惟某
官居官能大遇事直前象有齒以焚身古今如此
鼠無牙而速訟事理固然幸疑似之旣明將功名
之自致暫蹶霜蹄未爲失何必尤人勿諱泥坑乃

良規願觀進德

代回永豐洪簿

檄

尋陶潛之丘壑方此息交托孫寶之比隣惠然執
訊願有復也何以報之恭惟某官地望穹華人門
炳蔚故國非喬木信有典刑用人如積薪寧分先
後暫勾朱之遊戲佇薦墨之飛騰某已乞垂車殆
難推轂俟有可乘之間詎敢蔽賢設或未同而言
則懼辱命

代回崇仁黃簿

元

告移文之猿鶴方此投林訪奉詔之鳳凰居然棲

枳先勤下問良戢高情恭惟某官家學深純天
曹敏誦詩三百已多哉早木之名下筆五行遂
雋蓬萊之殿乃所丹欽之點暫爲朱墨之勾聊復
培鵬行且展驥其抗章納覆望寵剖符賦張衡之
歸田便堪稅駕聞孫寶之祭竈尤幸卜鄰

回范主簿

君子實爲我心未遑走謁主簿能令公喜猥辱飛
牋既勞十部之臨敢發七襄之報恭惟某官器姿
瓌碩學問醇明曾中十萬之甲兵吐爲筆陣硯裏
三千之禮樂俯拾儒科便應策足於要津底用擡

頭於矮屋兩府以孫寶爲可如彼斯何百里非仇
覽所棲自此升矣某偶巢燕幕例拜魚書遺我翠
織成欲卷還而不敢報之青玉案愧營度之無奇
代回上饒趙簿以駭
老夫耄矣陞華五筵之工鄉人好之委重雙魚之
素然惟某官學優而仕業稱其家邑大民殷無憚勾
朱之冗政成事舉會觀薦墨之飛有憐龍鍾之共
鳩僭某偶然曳履甚矣濫巾已再具致休之章十期
於得請行重尋邂逅之願茲不瀆辭

回武岡何簿尉

強顏武郡慚非典午之材籍尾爲僚喜有同寅之
幸曾修辭之未敏辱垂問之相先恭惟某官精神
五兵肝膽一劒積月書於右序已播英聲奏天對
於左廬更登峻級方西北二邊之未靖何東南一
尉之足淹行矣章交亟其王觀某無能教胄願使
轉承烹鯉雙魚得尺素書良勤垂念從一騎蹕五百
里即遂承顏忻幸良深敷宣罔旣

回靈泉李主簿

君子之居是邦未皇進謁它人不如同姓先辱陳
牋旣感臨存亦深訟愧恭惟某官隆山望族隴右

名家飛將軍之功名寧論妄校謫仙人之苗裔顧
落夜郎進士論定而官之公等何見之晚也暫且
出朱而入墨猶堪紆紫以懷黃其有幸識賢特勤
委贄置一盃之水正有望於吾宗夢三刀於梁初
何關於我輩

回長沙蕭主簿

歌鹿鳴而勸駕叨預旁觀聞鵬化之回程已違旅
賀有高陳誼猶念故侯恭惟某官挺秀楚材效珍
嶽貢頃觀奧義洞明呂辟之三千固擬大庭當擢
何於第一龜果登於前列鸞暫屈於卑棲長沙

不足回旋會計而已短簿能令喜怒騰踏在茲惟
是資水之淵源寥乎曲江之姓字閱世三紀闔郡
一人進士業於進士同若爲愛助天下寶爲天下
惜當自激昂某叨守三榮將書一考已進南嶽香
火之請或可言旋儻過東園山水之亭更希勿毀

回新威遠蕭主簿

與樞

鳳凰千仞不辭棲棘之卑鯉魚尺書見報戍瓜之
及良高陳誼復愧過情伏惟某官卓爾不羣飄然
無敵心潛寶苑富金淵玉海之藏句滿錦囊多篆
鼎風檣之作旣儒科之峻擢何簿領之足奄矮屋

擡頭聊復爾耳要津策足由是而之其久於知名
行矣聯事取青媿白愧修報之弗工入墨出朱惟
疾驅之是望

回新盤石曹主簿

開驛騶之道萬馬皆瘖飛鸞鳳之驂一變亦足未
皇候氣先辱修辭恭惟某官履行醇明風猷凝遠
吐天葩而拔俗拾地芥以決科齒清如水豈羨景
宗之笳鼓學至於海方觀子建之波瀾俯從簿正
之供密近里仁之美能令公喜公怒直爲假館之
謀爾有嘉謀嘉猷又恐趣裝之入某欣聞還舍未
遑欸門諸侯不臣寓公無曰一墨之願受進士於
吾同業尚須尊酒以細論

回趙主簿

伏蒙枉顧見畀屬辭備知家學之淵源仍見詞場
之根柢繼沈侯之八詠諒有祖風吟趙嘏之一聯
肯孤宗派但深藏感曷旣報酬

回任主簿

三錫

欲見組纓取瑟尚疑於將命鼎來綠綺彈琴足想
於成聲望履未先鳴謙何厚恭惟某官諸任望族
四蜀名家鄉老使興賢能久應定野主事能令喜

怒晚乃栖鵲屬聞纏風木之悲未敢于小死之教
抹蒙袂葺履之餓乃辱協心推纓冠被髮之仁可
占用世朝祥既御暮召何疑某方欲款門已勤命
駕發棠殆不可復敢更希馮婦之下車治齊問所
以安或可延蓋公而避舍

回榮德馬主簿

奇之

應靈趙主簿

綸

一麾出守慚非牧御之才同官爲僚正藉老成之
助有來下問極仍高情伏惟某官腹溢儒書氣吞
晚輩倚賴臣鰲之釣時來爲之低回祥鳳之棲公
等安在諒奏勾朱之最即逆薦墨之飛某自笑倦
游何堪共理友其士之仁者行即盍簪忠焉能勿
誨乎更希倒廩其爲傾僎罔旣敷宣

回汶川文主簿

聞覲省之歸未遑一詣辱臨存之寵仍畀屬辭得
非所蒙願竊有復恭惟某官學優而仕德世其家
黃不第之厚顏雖淹衆論龍共好古而篤論自有祖
風少屈鸞栖行看鯢化某濫膺郡寄幸托士鄉將
因其嫌乎將諱其姓乎固非所望吾見其人矣吾
聞其語矣愧莫之酬

回長江李主簿

出幕罔功詎堪再辱分符非據恐負三勞所幸在
賢者之邦或可冀忠焉之誨恭惟某官學探聖處
譽藹明時炷史五千言潛心有素鄴侯三萬軸載
腹不遺顧薄蓬萊暫栖枳棘王珣能令公喜不足
爲歎孫寶安得自高聊復爾耳某濫守和義蓋擇
里仁無以我公歸方便解疑塵之榻事其大夫賢
者惠之止水之盂

普回簿尉監當已下

不願封侯已快盍簪之悃既見君子又勤銜袖之
文感煖於布帛之言乏報以襜褕之語徒知十襲
莫效七襄

回趙主簿

頂戴登科記知一日之成名跪讀尺素書喜同年
之有子旣高陳誼又耻過情恭惟某官賦擅凌雲
文成翻水能吟青玉案學素裕於鯉庭甫縱黃金
羈名果聯於鴈塔暫棲枳棘即上蓬萊某辱託通
家過勤委贄憶曲江杏花之會陪野鶴於未仙尋
平羌江水之流幸海鯨之有種

回崇仁趙主簿

聞公子之翩翩受厘良幸還使臣之穽穽反室有

期將遂識賢預深引領恭惟某官負材開每進德
忱恂名千里之駒早騰燕譽九苞之鳳迄對龍
光便當遡紫以凌青顧屈出朱而入墨會膺鶚表
徑筵駕行某將拍雪邊傾心日下一詣習主簿合
應勝於讀書獨吟鄭廣文尚從容於歸賦其爲欣
幸罔旣編摩

梅亭先生四六標準卷之三十五

梅亭先生四六標準卷之三十六

尉

通寧鄉李縣尉

尚

一行作吏祭竈鬼以媚飢同官爲僚禱尉仙而徼
福可無牋記先布姓名恭惟某官機量浚明風猷
膚敏千里之馬騏驥顧伏鹽車九戢之魚鱗魴合
登廟鼎鬱鬱赤墀之志匆匆采棒之行茅舍之聽
雞聲孰非王事花村之無犬吠即是民庸人憐橫
水之孤舟誰識倚天之長劍棄除必爾翹跂俟之
某不自力田輒謀耕祿家貧親老誠有詩於斗升

官小職輕亦欲伸其尺寸然平生之短朱墨須寮
友之助丹青僅念卑棲難倚制鰲之釣猶能拍浪
請陪射鴨之弓

通寧鄉陳縣尉

愷

我爲祭竈之謀惟鄰是卜公有折腰之役及爾同
寮聞五綵之鼎來盍尺牋之預附恭惟某官潛心
蓄李敏手決科文石陞高定抱南昌之憤青冥箭
送暫爲東野之酸孤疋蹙於草中蛟何爲乎水裔
以顰白戰失步未所至賈胡願早酬於一識
不知仙吏竟尚隔公幾塵

回武岡東尉

東膠退士合佐黔中北部英游宜留洛下顧訪湘
壘之悴不辭溧尉之酸恭惟某官材調崇鉉器資
果毅久游雙宇夙閑龍豹之韜李敵萬人足奪貔
貅之氣宜策勲於榆塞顧試步於竹弓繞黃山穿
昆明會當奏揚雄之賦涉赤墀登文石不徒上梅
福之書某自分駑庸甘心雌伏別駕始可展足豈
其然乎同寮敢不尽心乃所望耳

代回湘潭游尉

林

青鞋左計又迷京洛之塵繡段右牋可忍蕭湘之

故誰能執執此不聽冰恭惟某官曾出清門源流
正李單傳伊洛寧忘厥祖之典刑平視莊騷盍勉
乃翁之文字得解牛於肯綮失射鴨之酸寒行矣
交章從而增秩某重尋故步真是陳人懷鈞天一
餉之榮且然聊爾追汗漫九垓之約行或使之

代回崇仁舒尉

若拙

識中散於雞羣夙有通家之好懷少傳之鵠峙未
諧識面之期飛牋惠然佩意厚甚恭惟某官冠裳
闕閱詩禮典刑無忌即劉牢之甥風流是似鄭公
乃魏墓之祖氣象如存綵捧所臨綠林其遁佇公
之着句

回舒縣尉

再書美最陪賀旅以未能十部華牋感鳴謙之先
辱榮於藏去愧在暗投恭惟某官疏通之才膚敏
於李南昌小隱自當登文石之塗東野壯圖誰可
任通家之漕願少安之無譟孰云多而不揚某芻
狗已陳露螢不暖友其士之仁者敢隱於言今者
人謂斯何恐孤此意更容見可續得表微

回通山廖尉士正

蓬矢之生厚其臨存之寵瓜期而往先之謙施之光似顛倒於衣裳亦輪囷於肝膽恭惟某官美由世濟才應時須抱壁中科斗之文人無能識對殿上龍蛇之影日獨未斜顧爲東野之酸小作南昌之隱願俟時乎將刈正安結綠之委蛇旣識路又疾驅忽報飛黃之騰踏勉爲親屈剩了兒癡某已拜散人足休餘日或出或處漸爲雋軌之踈惟孝惟忠敢置祝規之敬

回錢唐張尉

屢薦入官明公淹矣一官禦寇前輩願之愧執訊之不先辱屬辭之見及恭惟某官珪璋之質藻火其文誦三篋之亡書深於汲古授一編之秘略盍以濟時顧尋東野之酸來主西湖之勝弓刀閑暇聊暫爲平地之僊文字芳鮮行即入明經之佛某濫巾畿幕投袂吏塵雙魚書之臨極承厚意九牛毛之冗聊具報章

代回武進黃尉

大中

曳履罔功我二宜去飛牋見問君獨賢勞恭惟某官早決儒科晚遊吏役願登文石豈無梅福之書

猶抱竹弓小著孟郊之句有勤魚素見勞雉工其
自揣頭顱難司喉舌已控挂冠之請聞命即行敢
因授簡之歸占辭奉報

回善化黃尉

習委吏之會計正爾卑棲聞飛仙之遨遊超然高
隱方圖執訊先辱飛牋恭惟某官文獻名流典刑
勝士爲公室輔家夙近於魁三有伯父風學諒求
於已百顧紆塗轍小試弓刀河西之尉淒涼不常
厥邑湖南之地清絕幸疾其驅行即文章亟膺剡
辟某其心祭竈迫命代尉短主簿髯參軍總無關
於喜怒殫落英飲墜露願同廣於離騷

回新威遠王縣尉

癸亥之

題千佛之經夙聞秀望試五采之棒似屈長材有
來委翰之勤良動得明之喜恭惟某官天葩揆藻
地芥拾科頌聖主之得賢定是雲仍之派移忠臣
而爲孝固諧風土之宜若爲翰墨之材肯就弓刀
之役月明靜夜應無犬吠之聲雲入古廳小寓燕
巢之舍東野寧淹於射鴨南昌會見於參鸞某濫
守郡符幸聯王事瓊玖匪報永以爲好也聊飭魚
緘珠玉將至得無修容乎惟占騎氣

回新榮德郭縣尉

光昨

效官錦里昔未識賢乘障斗州今將聯事鳴謙委
况擊節拜嘉伏惟某官摘藻天葩決科地芥待公
車之詔誰明東郭之賢涉文石之塗還作南昌之
隱顧慙陋邑恐負英躔然代公實發軔於通泉至
尚父亦奮身於長史繼其風烈將在雲仍無嫌射
鴨之弓即引穿鵬之箭某出幕十暑試郡一寒同
僚敢不盡心必蒙愛助一官願爲禦寇更幸疾驅

回新應靈趙縣尉

与撫

一門父子謂皆分唐叔之珪五色神仙顧少屈道

家之玉有來委翰知可得朋恭惟某官千里名駒
九苞威鳳宗室隨二千石飽聞議論之高文章長
萬丈光坐想垠崖之豁况已摩空而奏賦不難趾
美以決科何爲渭北清新之材乃屈河西淒涼之
職吟竹弓之射姑昌東野之詩登文石之塗即上
南昌之疏某舊交中壘今見休侯正望弓刀帖鼠
竊狗偷之警却從筆硯窺蛇神牛鬼之奇

回新資陽曹縣尉

趣曹裝而東上莫企風帆試梅隱以西還未瞻星
表方規賀謁已沐贊牋伏惟某官學有家傳文爲

國緯偉然九尺之幹輔以八斗之材進士論定然
後官之久宜脫穎公等安在何見晚也今始奪袍
折腰暫就於河西入幕即空於異北某濫茲假守
幸可借交以公歸兮正望發棠之惠無吾以也更
希拔薤之規

回新遂寧長江張縣尉

瞻海上之槎恨差池於八月取圯下之履望傳授
之一編袖牋臨之展卷愧甚恭惟某官負材孔碩
蓄學不貲英英脩月之文飄飄凌雲之賦朝華本
高於夕秀夙知乃墜於暮成入對大庭良負誦書

之三篋出次遠闕尚賢不調之十年况長江素委
之詩人豈市門可淹於仙吏暫返輕舟於吳會即
歸大老於周家某庸欲款門先蒙命駕以霸陵李
將軍之老儻不見呵則天上張公子之賢敢忘加敬

回王縣尉

昌大

訪南榮之隱冒懷太守之章宣北部之威正藉少
公之捧有來委翰良仞垂情恭惟某官科級高華
器能膚敏試竹弓之射不辭東野之酸寒登文石
之塗行繼南昌之謹直功名之會磨厲以須某出
幕星終得州斗大耳鮮勿撓固當謹庭戶之脩吠

大不驚是則藉弓刀之助

回秦縣尉謝差校正

九韶

善繼人志當爲黃素之校讎肯從吾游小試丹鉛之點勘表微愧甚嘗巧可乎恭惟某官心夷而志崇齒新而意宿試劍馳馬早欲範王良之驅游刃解牛今將進庖丁之道綵捧行施於北部青氍會憶於西崑今開萬卷餘義理在文辭之表端能幾字正始終有條理之科所望遠來之朋共成相觀之善卿自用卿法在良弓之子必學爲箕人患爲人師然它山之石可以攻玉

卷之三十六

梅亭先生四六標準卷之三十七

監官

代回新監鄂州大軍向

士芳

五雉分工謬叨誤渥雙魚尺素良認故情恭惟某官胄出高華才猷秀整所謂故國非喬木蓋有典刑不知公子是監倉誰相料理無忘澤露更與培風某罔功雲司攝長水部血氣旣衰戒在得何敢忘耶田園將蕪胡不歸兆足行矣

回向監倉

老我勾閑濫分丈二之組故人委重遠貽咫尺之

書倚檐報之搖毫率其恭惟某官象賢烏奕燕譽
飛騰大耐官職之餘暫司倉粟小試山林之久遂
及成瓜駕賢業而心馳佇薦書之交上某更勤來
問仍費屬辭腐於力弱於才無能爲役問則告疑
則辨敢愛乎言

回宣城劉監稅

趣譏征之期仕未能信講交承之好禮辱相先既
登受之未安欲捲還而不敢藏惟深於十襲報敢
廢於七襄恭惟某官學本家傳美由世濟凜凜更
生之志節博以羣書英英夢得之詞章雄於一代

顧從三語之掾復甘再轉之丞勇尋葛井之神仙
遂作宣州之賓客左右望而罔市爲政在人貨賄
掌其征屢生財有道迄參幕畫入贊藩條馬也守
閭雖少淹於歲月鳳焉巢閣即徑上於雲霄某聞
詩於庭千祿以閤抱關非耻方浪爲鎖棘之謀得
闕正賒敢躡翼及瓜之代藉使承竹馬之棄亦未
得蕉鹿之真敢圖臺隸之臨許論子孫之契去之
日如始至知來者之蒙成舊之政必告新敢因之
而請益

回郢縣侯監稅

無隴西李博之材濫茲幕有夷門侯嬴之智亦
爾抱關委贄相先報章敢後恭惟某官學卑衆
家近三蘇祔曳枯荷難裏崔嵬之氣筆摘玄章漫
爲拓落之官暫屈閑譏聊從吏隱佇漢庭之用老
從吳市以登仙某未洗袴袍辱迂車轍載披郇翰
有言何至於失人儻憶郛筒無酒或容於酤我

回高監稅李巡檢

區區薦士蓋採公言置置陳牋何勤私謝所願激
昂於事業庶無孤負於品題報不成章言不盡意

回江監酒

名門諸彦夙忻投分之多計幕一時茲有爲寮之
幸欲脩辭而不敏愧執訊之相先恭惟某官材本
家傳美由世濟英辭倚馬秀子弟芝蘭之階甚色
乘龍隱王孫美蓉之褥尚何事麴蘖之託居然營
糟粕之餘郎君可是筦庫人聊復爾耳碧香竊比
主家釀將有望焉苟無平原督郵之嘲會博涼州
刺史之任某自安飲水敢望啜醪交公瑾如醪
將從今始爲復生設醴酒幸勿我忘

回李監酒

景初

元辛之號重光天回西顧剛卯之稱單閼日麗東

迎亨在泰通祥因履考恭惟某官清材疾達懿識
規圓蒼璧絕瑕彌聳旦評之望青旗簇仗行登元
會之班諒對於菟顧兔之交益介食蛤踞龜之壽
其尚稽賀牘過辱頌言尚可歸田正有望土牛之
送不堪立仗詎肯希櫪馬之喧

回新榮州史監酒

季儉

鳳凰千仞昔聞將下而復飛鯉魚尺書今見昔來
之甚惠有勤委贄敢廢報章伏惟某官胄出典刑
家傳忠烈振振公姓不肯附黃閣之家挺挺祖風
殆欲伏青蒲之節謂立登於膺仕顧小隱於步兵

惟是三榮之陋哉詎堪再辱於賢者改邑不改井
竟困井遷有民此有財不勝財竭所謂蠅頭之入
全仰犢鼻之酤郎君可是管庫人聊復爾耳先生
未出禁酒國幸疾驅之其尚耳強顏真成厲尾一
郡之政守與酒因利利之衆人皆醉我獨醒執事
事也

回史監酒

文舒

同官爲寮輒剡公車之牘薦賢報國豈收私室之
恩一謙之撝三復以愧恭惟某官美由世濟材應
時須舉瓢而酌天漿更觀遠業明經而拾地芥佇

決魏科將猶錐之處囊中何止羅而致幕下某每
勤婉畫良覺賢勞推轂有味其言式稽于衆引鼎
不程其力姑見此心

回新榮州家監酒

民獻

某乏蒲萄之博郡既竭吾才累糟粕以築臺徒得
君重顧念步兵隱嗣宗之職何勤天王使家父之
來恭惟某官業精于勤學優則仕族庖之刀有餘
刃爭自致於功名良弓之子必爲箕諒夙精於詩
禮少時嘗讀醉鄉記郎君可是管庫人惟此三榮
之窮仰於一醉之富旨且多且旨當辨聖賢私

勝公公勝私在權子母惟尊不空而客常滿則人
皆醉而我獨醒引勝地於一盃趣朝天於三斗某
發醅何有罰耐是憂爾來三月寔無鹽不堪寡助
破除萬事何過酒切幸疾驅

回周監酒

孝癸

叨恩試郡正懼曠厥聯事爲客幸逢名勝愧陳箋
之不敏辱垂問之相先伏惟某官抱負恢宏典刑
膚碩軀屈糟丘之隱小試清醇諒知酒誥之篇益
加醲郁佇階騰踏即踐高華某老矣倦游冒焉遠
戍對北海而捉私釀免俗未能交公瑾如飲醇醪

同寅是望其爲傾侯罔旣敷陳

回榮州呂監酒

逢年

守榮黎之徵方幸終更分通義之符游叨詳試有
勤下問益仞高情恭惟某官學有家傳材高世濟
故國非喬木之謂蓋有箕裘惠風汜崇蘭之光有
華階序會即登於玉筍式並美於金屏某前者爲
僚茲焉改成猶蒙獎借及於芻狗之陳要是飄流
念在尊鱸之熟

回監叙州茶帛庫張

世永

海上八月之仙槎昔幸逢於博望山下十年之老

石今再遇於穀城淒其一夢之驚愧此尺箋之貺
恭惟某官風標靖重器識端溫近世名卿疇若乃
翁之清介當家與學定存是似之典刑紆餘入幕
之賓協相摘山之畫春風萱草承燕喜之慈顏秋
露蘭芽已蟬聯於官牒佇觀濟美還入旁招某叨
領臺顧獲迎鷁首見名駒之汗血良慰故情懷野
鶴於未仙還悲往事

回趙舡場

必孚

巨川作楫夙知家學之高野水橫舟謾借時材之
重袖長綫而見昇搔短髮以懷慚恭惟某官籍甚

宗英蔚然相種若射有志已穿鵬鷄於西風其釣
維何行掣鯨魚於東海顧屈其裘之學暫司剡剡
之工當斧斤間暇之時聊聽數聲之鶴唳收文字
芳鮮之績即看萬斛之龍驤某巢幕非材濫巾有
覩登天而攀蜀道昔逢峽水之倒流航海而溯斗
門今覺村船之逆上幸百聞之一見及異事而同
寮胡越協心何況不殊於臭味魁台齊色尚期勉
繼於芳馨

回新添差趙監押

惴緩無庸濫分郡寄戎昭且整將倚宗英貽書最

然陳誼厚甚文有勤於四六感益倍於尋常恭惟
某官胄出文昭學深武略振振麟定鳳高趾角之
仁肅肅鬼竄合任腹心之選以斗州之甚褊辱天
族之肯來桴鼓不驚藩維自壯某獲叨聯事將幸
分憂察閭里之姦邪願無犬吠冠宗室之議論庶
款燕談

回龔監獄良臣

懷湘屈之清來隱城池之上聞楚龔之潔實具在邦
域之中方圖班箋已沐涖記恭惟某官器資庸敏
業履端方清淑炳衡獄之靈忠信挺巫嶠之秀學

歐陽子端是百年能幾見之人師昌黎公願有四
舉乃一得之歎謂高登於雲路乃勇退於急流游
奉真祠益彰雅操寧與騏驥將與雞鶩甘從考澗
之槃小不虺蜮大不鯨鯢可見在山之潤紅藥猶
堪於傍砌青蒲會報於裏輪某拙不瘡人猶弗諧
止誨諸生於館下以冗見治試別駕於治中何卑
敢憚正擬編蒲之暇欵求拔薤之規居是邦事其
大夫願依賢者舉進士吾為同業能勿誨乎

回史監廟龜

十年出幕濫分和義之麾千室四絃將竊依仁之

益未皇注記先沐蜚牋恭惟某官行無瑕疵學有
源委儒林發藻天難地芥之收簿枳擇棲行踐天
衢之直某立朝無補乘障非材火兩燄之生巾真
成妖夢水一盃而窺戶更望忠規請謁非遙占謝
惟略

梅亭先生四六標準卷之三十七

梅亭先生四六標準卷之三十八

學職

謝永州鄭學諭

一聽履聲已喜似人之見載披手畢更欽博我之
文得非所蒙願竊有復恭惟某官學探聖瀆秀出
愚溪窮司農之經諒皆殫洽客廣文之舍大似淹
回佇即摘髭亟其奮翼某不能教胄有負轉承僮
簿書獄訟之餘其交以道則道德性命之理當誦
所聞

謝張學諭

元之

吟墻竹之公事自分聾丞聞洋林之好音還成伎
癢亟裁四六就謝萬分恭惟某人氣韻淑均風猷
膚敏尋西塞桃花之鰕豈其河鯉之逢思東吳尊
菜之鱸行矣溟鯤之化無厭俗情之傲贅即觀鄉
賦之拔尤某聊爾治中奚勞賀上膺何如昔已無
可取之楷模籍也抱能尚可相從於閭里

回唐學錄淵

題輿非據箝紙尾以何心銜袖見貽羨筆頭之有
口一謙厚甚三復悚然恭惟某官清挹晚蘭秀分
緋藻蒙開蜀道諒餘挺又之風勤讀楚詞定出選

遙之胄佇帝庭之大對豈鄉校之久淹某教胄無
庸負丞有覩露繁天豁有慙南嶽之鳳鳴澗愧林
慚但覺北山之鶴怨

回吳學正

應龍

洗塵土之袍未皇請益披月露之牘良佩鳴謙藏
以爲榮報於何有恭惟某官風猷凝遠天韻淑均
炳扶輿磅礴之靈富詰屈聾牙之學生九辯九歌
之地豈自隔於脩門挾八克之能將能將差強於
敵國四六且工於駢儷三千足想於縱橫某有幸
依仁過勤委贄故將軍之雌伏難言李廣之無雙

新進士之龍飛惟祝吳公之第一

回卓學諭邁

聞凌雲之作方幸友仁拜明月之投更高陳義不
知所報藏去爲榮恭惟某官秀出閩中僑游黔鄙
橫經重席方依夫子之宮墻問舍求田豈爲王孫
之僮客佇摘髭於名第即策足於要津某教胄無
庸負丞何筭楊脩有智但欽絕妙之受辛韓子非
才頗覺長慙於典午

回寧鄉魏學賓

抗塵縣掾真成拓落之官引領黨庠知有耆明之

彥未瞻文席先沐尺書恭惟某官漢相雲仍鄭公
風烈北多良馬老伏櫪之駿厖南有嘉魚秩賓筵
之燕衍正爾廩人之繼粟何如天子之執漿佇累
蒲輪即空惠帳某盍請鄰而祭竈願越俎以代庖
禮貌衰則去之友其士之仁者會計當而已矣忠
焉能勿誨乎

回魏教諭

得一

旅進接辭未皇款曲謙撓委贄備仞勤渠所慙揚
然之曾有孤厚甚之意恭惟某官故家古汴久客
都梁渾渾無涯窮虞夏商周之奧義挺挺有烈願

臯叢稷契之良臣昨膺冰漕之計偕盍對天堦之
親策暫留鶚泮行奮鵬溟某教胄非材負承知愧
友其士之仁者蓋有望於名邦忠焉能勿誨乎詎
敢當於溢美

回彭學賓

居仁

觀國之賓顧屈習鄉之齒愛人以德何勤博我之
文一謙惠然三復感甚恭惟某官夙充嶽貢見謂
楚材子佩明經詎肯受安昌之薦錢鏐好古祇欲
爲孔子之徒行膺拾芥之科寧久采芹之客某自
慙李落更愧名浮憂則違之賴不失黔中之上佐
士之仁者當或憐澤畔之大夫

回朱齋長

茲蒙謙巽又復賁臨退而歌鹿鳴之三何止重車
渠之白蟾枝鵬路所有更以贈君燕夏鶯喬此言
何爲至我

回趙省元

易學論

茲承纏履寵臨鳴謙垂賁柳子之業甚淺未見可
師李翊之問何恭恐孤求益伏惟某官器函趙璧
學貫義圖家人則有嚴君觀復不遠主器莫若長
子幹蟲蠹奚先惟精研三聖之書且博究九師之傳

浩漸之爲儀可必鶴鳴之好爵何逃某屯蹇餘生
乾坤長物相從講朋友之允不亦悅乎然有非頰
舌之咸所能宣者

回宋直學

學詩

侯貢士

友德

史掌儀

霆

楊贊講

大介

宗西漢之文詞未皇請益祖東坡之翰墨猥辱鳴
謙所願就有道而正焉敢恨何相見之晚也恭惟
某官岷峨山立江漢淵澄晏如揚雄固已度越於
諸子飄然李白詎容流落於六丁無忘澤豹以培
鵬會即騰蛟而起鳳某再鼓愈淡五技已窮嘗聞

蜀都蓋亦兆基於上世思樂泮水尚期克廣於德
心

回衆學職

濯太白之冰壺知卧月花之影磨文饒之璞玉願
聞水薤之規辱委贄之寵先愧識賢之緩後恭惟
某人炳靈世載文獻老成蚤聞高軒過之吟羅曾
有耀詎意古戰場之讀過眼還迷是宜不見於諸
侯猶辱觀過於吾黨九萬里風斯下願培鵬路之
程三十字日未斜即對龍墀之影某茲蒙投壁始
得遺珠有司以公不以情且相同於采藻於我無

德亦無怨願更草於凌雲

進士

回李校正

息肩屬爾未遂見賢振履跼然張勤委贄退而展
玩悚若感慚恭惟某官作賦摩空成文翻水飄然
太白空望眼於岷峨籍甚仲元輩脩名於夷惠若
爲將仕之諾當淹行秘之書暫客諸侯無謂道旁
之苦行賓王國卽爲席上之珍某得姓偶同卜隣
不敏事其賢者友其仁者足慰遠游愛勿勞乎忠
勿誨乎尚希餘論

代回曾祕校

炳

世契

古人有子昂然野鶴之標妙語及門副以家雞之帖恍如喚夢殆不勝情恭惟某人自出清門不爲俗季接茶山先生之派信有委而有源繼郴陽從事之賢諒肯堂而肯播有懷父黨見惠客鄉共阿戎談自覓後生之可畏薦祢衡表孰知餘力之不任姑記九苞鳳之祥徐思千里馬之報

代回陳宣教植

世契

紅蓮綠水談舊事以無人翠竹碧梧喜故人之有子投文爲惠陳義甚高恭惟某官閎閱芳華典刑炳蔚填麓伯仲皆蘄然之秀金玉氣質疑小者之佳早騰吐鳳之詞夙記鳴蟬之賦雖偶遺於世祿曾自奮於儒科觀其紙上之辭此豈池中之物抑宗元之記先友賸有人焉山巨源之念遺孤焉知來者某有懷世契幸及英游思不忘久要之言旣聞耳矣有可相料理之處願盡心焉

代回廖宣義慶成

共阿戎談獨未見其父耳作靈光賦果有異於人乎申之雄箋展也厚意恭惟某官清門有奕素季甚都安在何見晚耶小淹賢業幸哉有子如此足表義方頗聞及瓜已戒行李願念江湖之賜號亦

靄煙霧之勒移想象朝雲已竟鋪張之巧扶持夜
燎更勞駢儷之工某無以報瓊重於辭璧靈椿一
而仙桂五歧予望之胡琴四而鹿鳴三聊相復也
回韋省元

患在為師濫綴虞庠之屬惠而好我獲窺唐律之
工恭惟某人詩解人頤句穿月脇金籥一經之李
信有家傳蒲帆百尺之風勉為國許某有勤投璧
所乏報瓊鄉人之善好之玄遂忘其尚白後生焉
知來者青正望於出藍

代回孫秘校

暄

薄官走何邕躡升五雉故人有孫宰忽寄雙魚恭
惟某官學業甚均交情未憊重憐瓠落壯不如人
矧復蒲凋老當佚我與其佩水蒼而徒爾不如飲
山綠而終焉某自揣頭顱難司喉舌未能免俗復
叨曳履之榮豈不懷歸已動挂冠之興

代回辛宣教

穰

辨謗

惠以朋箋申之儼語辨先正之謗勁氣凜然叙通
家之情高懷厚甚恭惟某人象賢濟美燕譽蜚英
李師中之讀書不難擢第王文正之有子猶未沾
恩是非以久而明公侯必復其始一生一死詎敢

爲翟公之交三沐三熏所望聽韓子之說某緬懷
契闊倍有盡傷吾言之聽者誰歟法當小待子歸
而求有餘也願益自強

代回曾祕校

三益

共千里之月猶愆半面之期寄五朶之雲仍負隔
年之債雖迷於復實感所蒙恭惟某人咳唾成珠
弟兄連璧素所蓄積捲湖海之波瀾作爲文章粲
朝廷之翰墨公等安在吾道非耶某日旣薄西星
猶拱北邯鄲借枕雖重游廣樂之天神武挂冠行
將老菟裘之地如君善頌非我敢知

回蹇祕校

茲蒙盛服見賁長箋吾政何及公言耶深慙溢美
是邦友其士仁者尚賴告忠至如社稷之儲尤賴
里仁之唱并此叙謝兼布願言

回袁進士

此君將無是乎愧識賢之不早公等何見晚也辱
委贄以甚恭景星負先覩之懷明月重暗投之恨
恭惟某人器資凝遠業履端溫文章滿家有曄天
葩之吐俊又觀國何難地芥之收始疑泄柳之閉
門今感任棠之出戶某濫分小壘久避正堂聞高

論傾枝鄒何嫌末至見刺史即周孔則不敢知

回景省元

所求乎友未能方深訟愧不見諸侯何義始辱臨
存有勤委贄之華寧恨盍簪之晚恭惟某人曾蟠
義氣腹溢儒書春登孟子之門固妾婦儀秦之學
差入子貢之室定奴僕屈宋之騷其在雲仍諒有
風烈況已入地官之獻佇亟膺天網之收某假守
非材識賢不早當戶而見龐守旣俎豆予避堂而
舍盍公無金玉爾

回尋進士

救荒

某問隱遯之肥見賢不早挾流離之瘠借助良多
方圖草具以盍簪遽辱英詞之銜袖伏惟某官才
高時輩譽謁月評不見諸侯若小然方踰垣而閉
戶爲食於路待餓者乃被髮以纓冠思飢諒切於
已飢獨樂孰如於衆樂彼或以鄰國而爲壑此獨
耻匹夫之納溝相友助相扶持得人焉耳無衆寡
無小大易地則然某假守蒙成強顏逃責旣見君
子已忻慰趯趯之螽爰及矜人要共念嗷嗷之鴈

回蘇祕校

榮祖

九州四海知有百年幾見之家五兩半通喝亡一

翁二季之里世濟其美吾見其孫恭惟某人規
高曾淵源師友黃樓一河水親承宗派之傳青松
三萬栽更覺孫枝之茂佇用元祐之學入對蓬萊
之宮某爲長於斯得人焉耳袴歌今五詎能及廉
叔之暮來樓近古三儻肯爲黎侯而晚賦

回蘇祕校

丞

孤雲落照敢言歌樂職之聲名山大川疑尚有英
靈之氣在賢者識其大者惟有之是以似之恭惟
某人學有家傳文必已出不作人間煙火之語宜
在天上雲霧之窻遥遥賈誼之有嘉挺挺魏謩之
似證子弟何預人事兒郎自有家風力行所知不
聞亦式某竭來假守獲識真儒松聲聞十里之風
幸同臭味薤本置一盂之水更望箴規

回蘇貢士

辰之

下第

童而挾策莫非誦眉山之書老矣懷章乃獲守通
德之里未皇下榻先辱踵門恭惟某人學有宮庭
詞爲枝葉承老翁青松之植擅幼婦黃絹之才平
時謾說古戰場豈料還迷於五色歸家但草凌雲
賦會將放出於一頭某正愧遺賢顧勤委贄貧家
見珠貝真成負眩晃之羞使君洗樽壘行欲致荒

唐之謝

回孫省元

和之

吟風弄月之歸未皇請益裁霧縫雲之作猥辱擊
蒙喜聞足音仍拜手畢恭惟某人學行之上世載
其英古稱閉戶之先生豈其苗裔近耻呈身之御
史殆有典刑久江湖魏闕之遊識伊洛濂溪之派
知其主信其客必窮游夏之淵源加其膏希其光
詎止卿雲之黼黻某未皇避舍猥辱踵門一瓣薰
南豐之香願觀卒業幅巾援東坡之筆嗣得乞言
於梅亭先生四六標準卷之三十八



梅

亭

六

樓

年

卷

合

年

卷

內閣文庫			
漢	特四十二	二七四二	一九
書	類	錢	冊

內閣文庫			
書號	漢	11742	
冊數		19	19
冊數	圖	3	5

梅亭先生四六標準卷之三十九

賀正

賀嗣秀王

師撰正

斗攜龍角又頌羲仲之春
璽蒲兔園請賦梁王之
壽恭惟某官宗藩明德
政路崇班慶襲璿源默
應璿璣之運寶分玉帶
益調玉燭之和宜從桃
韋之辰丕介椿松之祉
某愧無善頌可賀履端
曳鄒陽之裾方規旅進
授司馬之簡更佩謙光

賀史丞相正

代董制置

鳳紀更端復對戊寅之曆
龍躔回次又新甲乙之

司時維元勲坐膺純嘏恭惟某官勲高王室忠簡
帝心以道德而位三公應千載明良之運理陰陽
而遂萬物成十年生聚之功宜誕受於春祺用永
扶於皇極某一違鈞範五見歲華身在西陲阻效
椒觴之祝神馳東閣輒輸竹簡之誠

賀鄭參政

曾樞密正

代董制置

三陽交泰驗正月之始和五福照臨瞻輔星而有
耀宜介簡穰之慶用彰弼亮之功恭惟某官德協
春溫氣排冬凜參贊陶鈞之化曾云樞機之柄允整百工
沈潜帷幄之謀折衝千里宜對青規之旦亟登黃

閣之榮某一自西來五逢朔易吳蜀萬里未由稱
壽於椒觴蕭曹同心所願垂光於竹帛

賀制置安撫正

辛卯

太歲在辛令豫孚於三甲吉日維戊春先撫於五
辰相維玉帳之籌對越璇璣之運恭惟某官川流
厚化山立陽休仁行而春爲青規而圜萬物剛養
其氣轉洪鈞以壽八荒聊賦顧兔追龍蛇之詩更
均蠶叢及魚鳧之福問訊梅邊之味亟催花底之
朝某辱苾陳人尚棲故壘千林有喜固忻捲賀燕
之簾三徑就荒已願返屠羊之肆

賀黃制置正

送赴壑之鱗喜避蛇於劒閣振治兵之甲行歸馬
於華陽啓寅車之勞還回午門而愷奏恭惟某官
盛心懿識惠氣威風橫腰下之黃升作眉間之色
推腹中之赤立爲城上之祥噓師律而黍生播民
和於麥實紅塵晝靖不妨圍夜觀之棊紫禁春回
會歸押曉班之仗某又看新曆真是陳人騎火照
山紅遙想元功之疊賞雪嶺界天白何時尊酒以
重論

賀諸司正

庚寅

知榮州作

庚寅孟陬六十齡之復見甲子朔旦四五紀之罕
逢其在皇皇之華宜膺_臨簡之福恭惟某官德潛
天粹政播民和圓萬物以青規之仁_臨孔惠轉
八荒於洪鈞之氣其泰大來盤既頌於淑花戶益
蟠於桃實某得州斗絕觸緒冰寒多且盲日且多
不敢貢茹柴之釀熾而昌昌而熾但知祝椿柏之
祺頌侯惟深敷陳罔既

賀曾安撫

從龍正

三統肇子運開豐楙之辰萬物出寅律應棣通之
會維時重德茂擁_堪祺恭惟某官得天委和行地

載厚望公如歲便當晝對於延英與物爲春可但
曉行於湘水南人不復反矣東山以公歸兮某投
老黃塵佐州黔鄙願開壽域使無不達之勾萌尚
念荒莊俾預向陽之花木

賀監司正

日月初躔星紀復回於赤奮地天交泰雲壚益播
於青陽時惟六轡之華茂輯百嘉之慶恭惟某官
德潛剛克道配陽休繡斧淑旂暫勸楚鄉之農事
瑤車玉軼還逢湘水之孟陬仁風轉蕙以汎蘭蓀
類拔茅而連茹某二年黔佐萬斛緇塵破崖岸而
爲文丞詎復敢喧於櫪馬瞻原隰之有華使尚祈
出送於土牛

賀總領運使正

歲在元辛承以長生之兔日維吉戊臨于正旦之
雞載維四牡之有功定促八鸞之入覲恭惟某官
陽休山立大德川流福星臨參井之墟民無遺便
卿月代房心之次帝有恩言三陽茅拔以茹連百
祿竹苞而松茂某尚棲舊蔭又見新年兩鬢霜濃
難望東風之解凍一犁雨足願從南畝以歸耕

賀總領正

陽春肇始是生萬物之輝王人載馳宜序諸侯之上
宜介穰穰之福以稱皇皇之華恭惟某官清徹
冰壺和鍾玉律錦衣諭蜀榮弩矢之前驅繡斧
荆慰樵蘇之後燮履端於始何福不臻某濫守竹
符阻持椒筭木牛坐運送寒寧假於土牛櫪馬交
喧召見即登於金馬

賀王總領正

鈞

陽春生萬物之輝維其時矣王人序諸侯之上何
以予之宜對三陽茂綏百福恭惟某官清標水峙
和氣緹溫給餽江流聊總木牛之運揚鑣天路即

符櫪馬之喧某濫守竹符良蒙越陰太元八十一
首又觀頒朔之新廣成千二百年請致脩身之祝

賀林總領正

祖洽

代何尚書作

歲統開端茂歲始和之吉王人共命肇迎滋至之
休恭惟某官望重持荷功高輓粟三陽謹始時已
進於泰交一札端歸寵益新於渙渥某又看新曆
真是陳人道阻且長缺致椒觴之慶儀圖臬助載
馳竿牘之恭

賀安總領正

癸仲

國典待來歲之宜元正啟祚王人序諸侯之上壽

考維祺況峙魯侯之糗糧均啖安期之瓜棗恭惟
某官氣排冬凜德配春融寒送土牛坐斡木牛之
運飽喧櫪馬行觀銅馬之降梅放柳舒竹苞松茂
總領甚稱上意式副師征朋亡得尚中行共扶泰
道某尚蒙戍雪未解漕冰糴穀湟中所願丘山之
暴暴轉粟天上更宣原隰之皇皇

賀李提刑正綢

重光單闕載新一歲之元五善六條誕布九重之
意與時偕極何福不臻恭惟某官德配春融氣排
冬凜徧儀兵衛之畫戟出當霄漢之繡衣皇皇者
華遣使臣喚起曲肱之夢行行且止避御史通明
直指之威仁風梅放以柳舒和氣竹苞而松茂某
自怜苦李獲掃甘棠我有二天正託故人之苾士
更三日尚希舊雨之恩

賀周提刑正

代黃侍郎

青帝執規驗三陽之引達繡衣持斧新六轡之光
華舒對端辰益裒純嘏恭惟某官氣鍾溫厚德尚
和同苞栩逶遲又逢梅於嶺驛甘棠蔽芾還韞草
於園扉佇有召除亟登要近某罔功分間有幸爲
寮對天地交泰之時當馳善頌體官師相規之義

正賴協恭

賀提刑正

六螭廻轄日又出於嵎夷四牡載馳春徧行於湘
水端陽旣達純嘏其裒恭惟某官稟氣中和與時
消息皇華原隰之上暫借平反清切雨露之邊即
司獻納某濫陪結綬莫獲稱觴霆聲發榮其擊洲
之宿莽星言夙駕願揔轡於扶桑

賀游提刑正

伯

九十春光稱霄漢繡衣之立三千夏辟補日月黃
道之明時哉泰內之亨天只咸中之慶恭惟某官

甄陶明允世叔討論發白獸之搏尚存諫紙拜碧
雞之使暫擁節旄對六龍回日之標奏四牡觀風
之最脩鱗赴壑已知夕避於長蛇召駟追鋒即作
朝來之走馬某一寒戍雪獨冷漕冰傍有一株檣
庇無言之苦李用兼庶獄惟依所爰之甘棠

賀林提舉正

行知

代衛參

六螭御日曆正義嵎四牡觀風春回楚澤其在皇
皇之轡宜膺嘒嘒之祺恭惟某官政得陽和氣排
冬凜周爰咨度使星已驗於回天胡不均弘卿月
無勞於閱歲與時偕極何福不臻某濫守竹符阻

持椒斝籩周一甲極知媿見於葦挑盤薦五辛尚
託味同之草木

賀趙提舉正

乙改談

春王三朝元加于歲使臣五善帝降之祥諒當道
長之辰即副公歸之望恭惟某官小宗繼別大雅
不羣氣貫斗牛久鬱長庚之焰星回奎壁即吹太
乙之燈行將繫麟趾之風詎止詠兔園之雪某密
依擬蔭又見挑符喧馬盍簪固已甘立仗之斥盡
雞貼戶詎更思失旦之鳴

賀薛知府正

乙師曰

冠漿得酒之占歲仍在酉轉璣窺衡之驗斗又建
寅幸惠仁侯永膺多福恭惟某官氣鍾溫厚政布
中和有脚陽春享人生五馬之貴細氍毹廣廈佇河
東三鳳之來暫凝畫戟之香即簇青旗之仗某陳
人何用新尹焉依舊綴笏班固已借天街之潤茲
鋤菜把詎敢忘地主之恩

賀趙婺州正

乙善下

玉律導和氣已諧於族連璇源襲慶祿益厚於瓜
綿與國同休哀時多祉恭惟某官飛英宗邸賦政
介藩近尺五之天旂旂有爛方千里之地襦袴已

溫其濫綴橐班阻趨戟衛三朝受四海之籍肇歲
上儀八荒轉一氣之鈞佇觀歸衮

賀永州陳守正

疇

戊巳日月之樞氣交離坎子丑天地之紀喜溢乾
坤况行湘水之春宜有魯人之頌恭惟某官令修
王正政播民和奉寬大書盡解東風之凍反離騷
賦遂開南嶽之雲攝提既正於孟陬耄老爭祈於
萬石某一來黔鄙再見青陽德不孤必有鄰願終
垂於樾蔭壽維祺介以福愧莫捧於椒花

賀史通判正

湜

歲臨赤奮日月初臨律動青陽地天交泰式對予
環之慶亟催鳴玉之班恭惟某官和與春融剛排
冬凜大君有命復進司棘寺之平天下無冤行即
報草麻之鞠不但簇青旗之仗又將開白獸之尊
某方竊隣光忽聞召節舉頭而見白日羨君即近
於長安側身而上青天笑我方趨於昧谷

賀黃制機正

惟

天地泰交乘少陽而出震雷霆振旅利長子之帥
師外健蓋內順之亨後勁亦中權之助恭惟某官
氣排冬凜德媲春融偕召伯以來旬贊流拒鬯共

阿戎而守歲盤頌椒花人知江夏之無雙我羨西
平之有子某潛居冰下身在雪邊聲聞于天請以
勉在陰之鶴稼豐於野庶或寬我輦之牛

代回畢安撫

再遇

正

天運璇璣又屆履端之始春生玉帳載迎善政之
祥恭惟某官豹略沈深虎符靜謐麥苗綠漲挽回
幾千萬戶之和柳葉青歸喚起二十四橋之夢三
陽爲泰百祿交升某方欲具箋猥勤委翰椒盤啓
節艾殫頌禱之私樺燭朝天願保功名之重

代回程監丞

準

正

重來及芳菲笑逢春之白傳誰能更拘束羨守歲
之杜陵三壽作朋百祿是總恭惟某官以道怡性
未老得閑攬馬盞替看破塞翁之馬畫雞貼戶望
成涓子之雞宜對新年益裒盛福某過勤尺牘更
枉五詩負三宜休愴歸日之已晚况四多懼何善
頌之敢當

代回淮西趙總領

不攬

正

轉洪鈞之一氣正月始和序王人於諸侯百祿是
總恭惟某官德儀震動道協泰交峙乃糗糧坐給
和門之衆分之寶玉行䟽中詔之溫駱馬遄歸蟄

蟲始振某已投西崦又見東風學舊桃符漸恐門
墻之遠築新沙路莫觀衮繡之來

代回福建趙運使善宣正

行夏之時撫辰熙績孟春之月視履考祥宜有休
祺以勞華使恭惟某官德儀震動道協泰交律轉
東風添旌旗之和氣杓回北斗聽綸綍之新除某
濫綴荷班阻稱椒斚雲鴻江鯉聊紆削櫝之私櫪
馬林鴉會遂盍簪之願

代回大理趙少卿師石正

履端於始茂迎鼎至之祥同官爲僚不對咸中之

慶恭惟某官邦之司直民以不寃凍解勾萌漸鞠
園扉之草日遲棘木益清訟舍之棠宜有天休相
時星聚某濫同秋紀又見春朝有椒北馨未遂稱
觴之慶如松之茂敢輸削櫝之私

代回趙節使正

曆起丁丑數合太初之元陬正庚寅慶在高陽之
裔齊旄整暇戩穀駢臻恭惟某官大雅不羣在宗
載考詠梁園之雪客至如雲鑿函國之水公歸有
日振振公子堪堪春祺某自笑陳人又逢新歲酌
九霞之醕莫陪璩瑒之賓對列仙之圖願介松喬

之壽

代回趙開府師垂正

玉曆授時日始和於象闕金支胙土天益厚於龍
光恭惟某官揆路崇勲宗藩令德棣華韡韡增光
伯仲之聯瓜瓞綿綿襲慶神明之胄宜從穀旦益
衍叢祥某濫綴荷班阻稱椒斚夏正人統已孚草
木之和周以宗強願介椿松之壽

代回周馬帥虎正

正月始和光轉崇蘭之畹元戎小隊暖生細柳之
營恭惟某官克壯其猶共武之服東風解凍知挾
纁於雲屯北斗回杓即出綸於天陛某濫持荷
莫捧椒觴玉漏聲長行或聯於朝著金印斗大願
益懋於勲名

代回建康莊都統松正

歲開端月頓回寒谷之溫春入和門益壯長江之
重恭惟某官戎昭果毅剛克沈潛千里運籌令肅
蟠花之甲三軍挾纁暖生細柳之營交泰大來在
師中吉某無由叙賀猥辱貽賤草木知其威名諒
深自愛葦桃穰夫惡氣願對殊休

代回浙東譙提刑令憲正

青帝執規屆始和之吉繡衣持斧哀滋至之仁恭
惟某官澄按日畿振揚風采刑者例也以待猾夏
之姦欲並生哉乃見先春之意君侯如此福祿綏
之某濫司白雲猶趨紫禁履端於始末諧杜老之
盍簪式遘其歸敢後臯陶之拜首

代回江東葉提刑簣正

青帝執規兆三陽之泰繡衣持斧賓百祿之升恭
惟某官德體冲和氣鍾溫厚勾萌畢出想茂鞠於
園麻揚柳方華應勞旋於牡轡一和所囿多祉是
宜某濫綴朝行阻陪賀列雲鴻江鯉輒傾削櫝之
恭極馬林鷗尤切盍簪之願

代回福建陳提舉鑄正

成罟於午肇新玉曆之頒物族乎寅密驗銅儀之
轉維時霄使不對蕃釐恭惟某官德稟惠和政先
仁恕六條奉漢父司廉察之權七聚維閩咸服清
平之教泰來既驗節召不遐某進旅莫陪鳴謙先
辱送土牛之寒氣願護衣篝喧握馬之盍簪即迎
詔綽

代回福建張提舉聲道正

陽春有脚驗正月之始和肆夏升歌肅使臣之拜

善車所矣百祿是適恭惟某官氣稟冲和詔行
寬大黃堂整暇新美蔭於甘棠繡節光華侈新榮
於苞栩有開燕喜會即鶯遷某縻身於朝莫面以
賀杓攜龍角蜜占星駕之旋氣轉鴻鈞會宅天機
之運

代回常州王宮教遇正

日出嵎夷曆紀孟陬之月春回陽羨祥開刺史之
天恭惟某官德體震亨道隨泰長將明振貸之議
猶已飢民奉行寬大之書自今有歲鴻鈞一轉駟
召載馳某久矣凋年見此芳歲變則通通則久願

體君子之四時仁者生生者園茂享太平之五福

代回史安豐天錫正

候一氣於葭莩曰爲改歲望八公之草木更與頌
春恭惟某官世濟壯猶躬行仁政地控壽陽之阻
莫重安豐天銷固陰之凝已成交泰宜屬始和之
吉益臻諸福之祥某欽承履端缺陪旅賀上林鴈
過先勤繫帛之書下蔡馬肥願懋扞城之績

代回魏湖州大中正

義仲授時日已賓於暘谷旬侯宣化春自滿於苕
溪恭惟某官奉寬大之書布中和之政水晶宮冷

何資桃梗之襍鸚鵡盃深蒲介椿松之祉某已投
西崦又見東風皂蓋晝行莫遂稱觴之賀白蘋日
莫會觀賜璽之來

代回王寧國補之正

三陽底日肇新正月之和五馬頒春茂介自天之
祐恭惟某官中和布政豈弟宜民椒盤已頌花歲
今始有澄江淨如練福莫不增某竊承獲端阻陪
旅賀信宣州主人之賢者益侈新榮忘翰林客卿
之輾然敢伸善禱

代回常台州建正

日在營室肇新太史之迎霞起天台茂介元侯之
祉恭惟某官布中和之政行寬大之書維斗攜龍
表少陽之用事俾民觀象驗正月之始和君子履
之天休萃止某退然厄閭見此芳辰道阻且長愧
長稱於椒筭年運而往只擬學於桃符

代回林嘉興正

揆三微於人統既屆始和牧千里之日畿宜哀多
祉恭惟某官道符泰長德體震亨賓賜谷之春湖
山目得作嘉禾之命朝夕以湏某竊承履端莫陪
旅賀雙魚中有尺素猥勤桃李之投五馬不受二

毛詩致椿松之祝

代回史蘄州正

日賓賜谷曆敬授於堯時天惠仁侯和先驅於楚
澤恭惟某官榮分半竹言懃甘棠淮水湯湯翦條
風而解凍周原膺膺生麥氣以烘晴宜在凝香益
裒流祉某監持荷橐莫捧椒觴遵渚之有歸鴻請
馳善頌去聲替而喧櫪馬佇慶端歸

代回趙徽州

希遠正

王正謹始肇新人統之頌侯度承休始自日畿之
近恭惟某官奉行寬大宣布中和凍解東風共詠
袴襦之煖杓回北斗茂迎綸綍之溫某仰辱先施
未由倏賀有椒有飮願儲滋至之休如竹如松益
介方來之慶

代回張建昌

尚正

正月始和少陽用事諒魯侯之燕喜受周祉之鴻
尾恭惟某官宣布中和奉行寬大東風解凍暫勤
南國之藩宣北斗回杓即接西樞之步武某未由
削櫝先辱嘘枯有椒其馨莫遂飛觴之慶如松之
茂願陪隆棟之休

代回建寧傅大諫

伯成正

王正紀月肇頒象魏之和侯度觀時不對龍光之
渥宜哀百祿以應三陽恭惟某官早伏諫蒲出分
符竹陽春布德已行寬大之書肆夏升歌即展論
思之蘊仁賢來止福履綏之某落日在簾浮雲出
岫憶爛柯之邂逅又見東風及焙茗之後先願歸
北闕

代回施温州城正

挾日觀治肇頒正月之和受地視侯丕介自天之
祐恭惟某官良二千石福十萬家將明寬大之書
昔無今有參酌陰陽之運小往大來與物爲春搏
風斯下某屬拘朝綴莫旅賀某綦櫜馬林烏但切盡
簪之願雲鴻江鯉聊傾削櫝之私

代回施温州城正

魯觀占雲周正紀月驗陽律鳳鳴之應符凝香燕
寢之祥恭惟某官政爲吏師學有家法召棠所舍
迎化日之舒長燕忝旣回揚仁風於黎庶宜哀多
祉以對休辰某濫綴朝行阻陪賓謁碧油紅旆願
加意於頒春紫詔綠綵猶傾心於賀夏

代回程慶元準正

夏正建寅三陽簇達東風拆甲萬物光輝等惟哲

人天錫純嘏恭惟某官氣鍾溫厚德稟中和化洽
甘棠接京師而蒙潤威行若木環瀚海以無波當
義仲之授時宜魯侯之燕祉某又觀新曆真是陳
人有極其馨莫遂搏麤之捧如松之茂姑伸竿牘
之恭

代回王廬州耨正

天回北斗新太史之授時地重南巢慶元侯之受
祉恭惟某官三槐襲組半竹分符虎豹之皮和戎
既寧諸夏鴻鴈之民安宅咸與爲春一氣始和三
靈錫美某無由捧爵還復烹魚分北果之甘芳又

勤實籠愧東華之塵土僅有空函

代回臨江洪寺簿仅正

夏正建寅三陽蒞達春風折甲萬物光輝天惠仁
侯日綏景福恭惟某官世濟其美政鼓以和擁朱
轡二千石之榮令行庭戶環清江十萬戶之衆家
有袴襦宜屈始和益哀多祉某監班朝綴莫旅賀
綦佩犢帶牛願懋循良之績林鷗櫪馬式諧會合
之期

代回史吉州定之正

陽春有脚又新象魏之頒函夏無塵正倚螺江之

重恭惟某官氣全溫厚政協中和息潢池之干戈
自溫襦袷厚晉陽之保障豈盡繭絲時惟泰亨坐
膺鼎吉某備貲朝綴莫遑賀某綦佩犢帶牛願挽河
而洗甲林鷁櫓馬會列炬以盍簪

代回李封州煥正

分符北闕宅牧南交騎竹交迎不問龍岡之吏驛
梅遠寄已知嶺表之春恭惟某官服襲典刑發舒
政術自爲單父技已敏於割雞及試海沂才益新
於展驥茲宣寬札出領臨封諒因報政之來即遂
立胡之願某凋零歲月點綴星辰遠方雙魚不盡
相酬之意人生五馬願收自養之功

代回孫衢州子直正

頒象魏之法仗簇春祺疑燕寢之香服先夏甸時
惟竹使天錫茨禧恭惟某官躬綰左符化行右翊
耆年而變莫不頌而歌之諸侯之風未有速於此
者有開鳳曆會出鶯喬某束縕力微盍簪願切建
牙開府阻斟勺於椒花上齒習鄉猶經從於棠蔭

代回紹興黃尚書由正

條風應節和生元帥之幢樺燭朝天光映尚書之
履恭惟某官德儀震動道協泰亨與物爲春久騰

歌於襦袴履端於始行促觀於冕旒某擬李桃符
阻稱椒斚杓攜龍角已旋北斗之魁身到鳳池即
解東風之凍

代回趙湖州正

歲行在午布帛方新斗指於寅棣通伊始是惟君
子之道長實應諸侯之化行恭惟某官材應時須
美全世濟水晶宮冷已回襦袴之溫金鑾殿高即
奉冕旒之對某濫竽幕掾竊蔭甸侯一紙十部之
肯臨已慚倒置四方六客之併至更尉俄空

代回鄰州守倅

龍杓回次協豐茂之嘉辰鳳曆紀元新隆平之美
號其在溫溫之德宜膺嚶嚶之祺恭惟某官剛體
震亨道偕泰長召棠蔽芾拓函夏以無塵湘芷芳
菲散陽春而有脚佇簇青旗之仗趣歸紫禁之朝
某賦分朱愚負丞黔鄙東風解凍不能消華髮之
霜南嶽焉依安得聽清談之露

代回教宗簿賀正

歲躔協洽仰參長烈之常月旅孟陬俯應大來之
泰恭惟某官溫溫秉德嚶嚶受祺九閔已驗於氣
衝三殿何求於風引佇對蒼龍之礎亟開白獸之

樽其甫欲修容已蒙惠翰

代回南康章僉判攀正

春回青陸正月之吉始和水泛紅蓮諸福之物畢
至恭惟某官器資溫厚政術融明畫諾雍容行趣
葵丘之戍笑談辨治飽尋廬阜之游當此履端宜
其鼎盛某未由削櫝猥辱貽緘列炬盍簪又見歲
華之換染雲翦水莫酬頌語之工

回史郡僉賀正文寄

庚寅孟陬協建寅之夏正甲子昧爽轉拆甲之春
風仁賢履之吉祥萃止伏惟某官德潛剛克和配
陽休正其所爲王道之端云爾惠而不費仁言之
利博哉官師無廢於相規福祿適觀於來下某幸
同聯事良感贈言兩鬢霜濃難望東風之解凍一
犁雨足願歸南畝以躬耕

回見任官賀正

羲和之賓春日復出嵎夷甘石之占歲星適臨益
部有如百祿之總是在同官之良恭惟某官德叶
陽休氣排冬凜笑於菟絕維之去迎玉兔以長生
對襪馬盍簪之喧依金鴉而高翥共餞梅邊之腊
亟催花底之朝某自顧陳人又看新曆但希善類

聯翩茅茹之征庶遂寒蹤退托桃符之換

回寄居鄉官正

太歲在辛令既先於三甲吉日維戊春豫撫於五
辰有如鄉大夫之賢宜介王正月之慶恭惟某官
氣鍾溫厚德備中和衷紱懷章暫養旦評之望票
纓澤笏行催元會之朝三陽茅拔以茹連百祿竹
苞而松茂某自慙政拙竊席里仁一榻延徐孺子
之來又勤銜袖五鼓推謝令尹之去所願歸田

回衆官袖啓賀正

庚寅孟陬度適符於皇覽甲子朔旦壽將邁於終

人惟言行得雷風之常則吉亨應地天之泰伏惟
某官氣排冬凜仁叶春融從容以和體東風之解
凍洵美且直契北斗之回杓宜裒湛湛之祺式對
溫溫之德某幸同僚案過辱頌言老我陳陳但願
學桃符之退諸公衮衮幸早從樺燭之朝

代回諸縣賀正

歲躔協洽曆稽長烈之常月旅孟陬卦應大來之
泰時維茂宰坐擁湛湛恭惟某官德並陽休氣排
冬凜藹然政奢續花縣之風流籍甚除音漏柳條
之消息亟飛鳧舄進簪駕行某自是陳人又逢新

曆尺書寄鯉愧淮記之不先列炬散鴉尚餘光之
見及

回外縣官賀正

葦桃倚戶正月之吉始和椒栢浮觴賢人之德可
久凡吾同志即日異除恭惟某官氣協陽休功多
陰隲培溫植厚夙存有孚惠之心噓枯吹生共勉
不忍人之政撫辰凝績視履考祥某辱託爲僚又
逢改歲所使承流宣化也尤謹履端同寅協恭和
衷哉當蒙終惠

回學職士人賀正

杓攜龍角魁枕參維氣轉鴻鈞歲躔益部其在藻
芹之秀聿觀茅茹之連恭惟某人文艷春葩香浮
秋桂百步楊葉不難鵬鷁之穿三月桃花即看鯉
鵬之化不負旦評之望即先天老之題某方欲修
辭先勤委贄習鄉上齒何幸陪庠序之申重席說
經尚幾見賢能之獻

回學職賀正

庚寅孟陬適合靈均之初度甲子朔旦共希絳縣
之老人未被賀牋已勤慶語伏惟某官陽休山立
陰隲天通列炬盍簪不但習鄉而上齒鳴佩澤笏

行當重席以講經亟看紫禁之鶯花何羨元都之
燕麥某又看新曆真是陳人聽櫪馬之喧真難立
仗觀土牛之送但願歸耕

回李秘校

叔璋

元日之至人日未果修辭新年之勝故年反勤善
頌味雙鱗之佳甚抽獨繭而報之伏惟某官胄出
兩河僑游四蜀謫仙零佩飄然春樹之天長吉錦
囊亂若桃花之雨琢句宜供於帖子袖戔猥及於
衰翁某閱歲又新守藩亡狀同姓也同業也何必
勤五朶之雲勿勞乎勿誨乎所願拜一盃之水

謝蹇校正賀正

伏以丹鉛點勘借重良多朱墨縱橫遣書未暇有
勤謙施見賀履端八千歲之爲春何敢當噓枯之
意斗升水之活涸所祈廣貸粟之仁

梅亭先生四六標準卷之三十九

梅亭先生四六標準卷之四十

賀冬

賀楊尚書冬

汝明

貢禹舉冬式敬人時之授伯趙司至肇迎天統之
長相維玉帙之壽歸幹旋璣之柄恭惟某官望隆
星履清湛冰壺仁風舒柳以放梅和氣生芸而挺
荔侯伯以七爲節教民旣閱於七年天下有三達
尊論道亟登於三事某寸材線短一障灰寒困窮
井遷要匪井遷而射鮒剥爛復反但希復反於暑
羊尚憐九地之微芒曲借五雲之終蔭

賀桂制置冬

如淵
庚寅

舉責禹之冬人時敬授司伯趙之至天正踐長有
如元帥之詩書庸介宜民之福祿恭惟某官德潛
剛克道配陽休前茅中權威已肅武功之草采薇
遣戍人期聽文德之麻諒由於菟顧兔之交遂趣
孔雀麒麟之覲椿齡彌永槐蔭益高某竊詫五雲
苟容再歲井勿幕於元吉在上猶冀有孚復閉關
而商旅不行尚何祗悔

賀黃制置冬

伯固

暢月建子觀復見兩儀之心至日得壬帥師應三

錫之命時維玉帳妙合璇璣恭惟某官濟北一編
汝南千頃和門晝靜士知挾纊之溫候析宵沉民
謝閉關之樂頌恐六日四分之鳳律將催五更三
點之駕行獻履徑上於星辰合璧長依於日月某
身依雲屯心實灰寒雷在地中想魏博三軍之喜
冰解漕下乏營平一線之功

賀曾安撫冬

從龍

任武岡倅作

長至之逢辛日允符雲觀之書南極之次丁躔正
應星沙之壽維時玉帳昭對璇璣恭惟某官德配
陽休道偕剛長地中雷復豈容小袖之回旋魁下

台明即播大鈞之塊北仁等沅湘之永福盛
之高某半刺灰寒寸材綫短碧油元帥繡歸即相
於西周白脚門生襪貢尚怜於東郭

賀安撫提刑都大

壽考維祺介以福福豈待祈至朔同日謂之章章
必有慶輒修魚繭仰頌鴻庥恭惟某官德合陽休
氣排冬凜五雉五工之正帝有絲絢一龜一琴之
回民皆襦袴茲對五雲之瑞密回九地之春某竊
伏墓顧阻瞻龍節天隅把繡自知無一線之長月
培吹葭更願假重緹之庇

都大

恭惟某官德合陽休氣排冬凜萬馬並馳而獨立
恪秉素絲四牡有功而遄歸亟登紫橐茲對五雲
之瑞密回九地之春

首末同前

提刑

恭惟某官德合陽休氣排冬凜合東西而瞻使節
載駕星輶審簡孚以嚴天威益揚風采茲對五雲
之瑞密回九地之春

首末同前

賀黃總領冬

申

律諧鳳應日迎天統之長士飽馬騰雷動雲屯之

喜王人序諸侯之上小人腓君子之依恭惟某官
道配陽休德存陰騭總領甚稱豈惟足戊巳之營
留屯並行諒已得甲寅之報茂對丈三之景亟膺
尺一之褒某自分灰寒仍逢澤竭所見者今我也
無有一線之長非吾之故人耶更望垂五雲之庇
賀王總領冬

天復一陽滋萌帝澤星連五緯密應使躔恭惟某
官望重握蘭功高輓粟樵蘇宿飽暖生細柳之營
繡斧晝行歸近瑞真之陞自今以始何福不臻
限以守符阻陪賀履錢流地上煩坐運於木牛人

自口邊即召還於金馬

賀某總領冬

奎

占七日之來道漸通於君子序諸侯之上權莫重
於王人與時偕行何福不至恭惟某官氣排冬凜
德配陽和灰動重緹撫三軍於挾纊日長一綫總
六轡以如絲諒從獸履之辰行拜予環之命某甚
慚玩歲又見書雲涸轍西江愧難辦青雀之舸挹
漿北斗何因追黃鶴之樓

賀安總領冬

癸仲

雷在地復君子占七日之來雪應年豐王人序諸

侯之上自今以始何福不臻恭惟某官德並春融
氣排冬凜糴漙中之粟未易斗量流地上之錢端
如雲滂伯趙聿司於短至安期遠迓於長年某百
念灰寒單車冰冷繭絲已竭何由沃六轡之絲襪
線非長更願寬五雲之綫

賀牛茶馬冬

大年

端策拂龜地雷之復攸往摘茗市駿山澤之節遄
歸與時偕行有秩斯祐恭惟某官陽休山立神動
天隨獨鶴整江海之毛雲程駿步萬牛立丘山之
首風節自高諒當伯趙司至之辰益對顏氏庶幾
之吉某真成浪出久侯汰歸紛紜蒲眼趨走傷心
良厭看於新曆風物相親形容獨老儻尚念於故
人

賀黃運使冬

桂

斗北中而建子曆肇應於周郊日南至而逢辛書
允符於魯觀維時英節茂擁堪祺恭惟某官德配
陽剛氣排冬凜冰解潛下旣曉行湘水之春雷復
地中即夜對宣室之席諒應四分之牛畧坐齊七
政於龍魁某材乏綫長分甘車副儻怜紫陌看花
曾綴於馬蹄雖在黔山吹黍固希於鳳律

賀李運使冬鼎

化日舒長共紀魯臺之至卿雲紛郁重行湘水之
春况兼熊旂龍節之華宜介羔酒兕觥之壽恭惟
某官仁排冬凜德配陽休物換星移又復濯滄浪
之水漕下水解便當登碧落之天仁風梅放以柳
舒和氣竹苞而松茂某寸材綫短半刺冰寒飯蔬
飲水而曲肱將歸尋於舊物衣繡觀風之直指諒
未按於故人

賀呂提刑冬祖烈

六雄召律觀象見天地之心四牡周咨用龍在山

澤之節矧佩纍纍之重宜膺簡簡之祥恭惟某官
道與時偕德隨剛長二節三節之趨走詎鬱鬱於
岷峨八命九命之朝宗即浮浮於江漢諒對一陽
之復益臻百祿之適某席芘雲深效官冰冷嘆至
日之長爲客但切懷歸因風物而暗相親敢伸善
頌

賀樂提刑冬

代衛參政

緹陽襲莞綫畧延圭明謹用刑克廣好生之德情
共介福諒裒滋至之休恭惟某官清徹冰壺和鍾
玉律棠陰晝永訟已息於楚氛葭室及浮暖自回

於嶰谷某偶叨分閫正阻造門端策拂龜七日已
占於不遠聽箎鳴鳳九成更佇於來儀

賀陳提刑冬

天宜

黃鍾協律可推復見之心繡斧詳刑茂對咸中之
慶惟明克允何福不臻恭惟某官德配陽休氣排
冬凜周原苞栩久勞六轡之驅馳漢節梅花已報
一枝之消息風雲之會日月以需某有幸同寮惟
深善頌旨且多多且旨莫遂稱觴昌而熾熾而昌
願加視履

賀劉提刑

原冬

鳳簫回律肇倡應於六雄龍節詳刑方驅馳於四
牡勞行邁之靡靡宜降福之穰穰恭惟某官德本
剛潛道偕陽長綉衣持斧曉行湘水之春縞帶隨
車暮對江天之雪所虞駟召靡俟鴈回某佐此斗
州微哉星屏託刺史二天之庇聊復編茅占夫子
七日之爻敢希拔茹

賀游提刑冬

侶

雷在地而復古實開泰丙之亨天違水而訟清宜
介咸中之慶矧壬公之司至趣辰告之遠猶恭惟某
官德與氣游道偕剛長昔時諫草懶看省砌之花

今日判花聊鞠園扉之草柳舒梅放松茂竹苞知
幾其神何福不除某身依雲庇心實蕊寒乃積乃
倉吹鳳尚希於生忝我任我輦牽牛何補於服箱
賀提刑提舉冬

律動黃鍾倡六雄而叶氣風生畫蕩歌四牡之有
功其在皇皇之華宜膺簡簡之福恭惟某官德潛
剛克功播民和星駕回天又見一陽之復雲書占
歲載忻五穀之豐諒策持斧綉衣之庸即詠鳴玉
紫宸之句某心如灰冷材乏線長使者汝容固足
回春於黍谷丞哉余負行歸曝日於茅簷

賀趙提舉冬

甲申

魯雲書至寶呈紛郁之祥趙日御冬益顯光華之
遠錫公純嘏又我蒸民恭惟某官德配陽休氣排
霜凜舊游天祿飽看芸草之生今使江南尚作梅
花之寄驗刺綉五紋之永知衮衣九斿之歸某材
乏綫長心尤灰冷負暄炙背詎敢輸畎畝之忠安
性掩身尚或備輜軒之訪

賀林提舉冬

清臺課曆肇新三統之元綉節觀風順應一陽之
動恭惟某官剛大養氣豈弟近民歛散得宜粟若

原泉之混中和誕布黍回寒谷之溫諒對休辰益
裒純嘏某適拘分閫良阻造門視履考祥願觀不
遠之復仁民愛物無忘自養之頤

賀趙提舉冬

汝諧

按緹候氣律已兆於六雄衣綉觀風功益高於四
牡道隨剛長德與福崇恭惟某官清湛冰壺和鍾
玉琯趙日可愛既開南岳之雲幽雨其濛更激西
江之水慨然攬轡行矣賜環某濫長十連又逢亞
歲江湖兩地幸再同君子之寮原隰五章請重拜
使臣之喜

賀王提舉冬

與權

身為國史自當書辛日之雲君遣使臣顧使餐丁
年之雪有功則悅何福不臻恭惟某官致孝卧冰
移忠叱馭生芸挺荔厭夜直於承明舒柳放梅甘
曉行於湘水花甲方周於六十椿齡正衍於八千
某雌伏負丞鳳鳴倚岳綉衣持斧儻忝同三黜之
鴛行黃鍾為宮尚或收一聲之牛鐸

賀薛知府冬

師旦
甲申

歲籥在申驗乞漿之踰願斗柄插子盍挹酒以迎
年時維二千石之良敷錫十萬戶之福恭惟某官

功參陰騭德配陽休襦袴溫然適應重緹之暖絲
綸近只適隨一線之添諒經伯趙司至之餘即有
薛侯來朝之命某身棲棠蔭心委葭灰陪五更三
點之鴛行敢論交於結綬依一寸四分之半晷或
委照於受塵

賀趙全州冬必原

魯雲必晝暮映衡山之月趙日可愛曉行湘水之
春時惟大雅之英茂對細書之札恭惟某官道隨
長德配陽休字民之仁溫若重緹之律噓物以
氣煖然五袴之歌諒觀荔挺以芸生益慶竹苞而
萬千之祝七日來復幸觀義爻六二之辭

賀寶慶趙知府冬善湛

魯雲必晝將召和於嶰竹趙日可愛况小憇於甘
棠維時循良茂介福祿恭惟某官以佳公子繼古
諸侯報政龍藩驗龍杓之回次潛心鴻寶佇鴻羽
之來儀履芸生荔挺之辰萃松茂竹苞之慶即歸
北闕遂冠南班某半刺灰寒寸材線短空睨牽牛
之景了無展驥之能楚波有餘自足回春於燕谷
魯酒甚薄不堪賦雪於梁園

賀胡通判冬

衍

甲申

歲在申而得酒已回葭室之溫斗建子以挹漿正
作菊潭之壽星屏所舍雲氣可占恭惟某官德與
時偕道隨剛長千里分風月之半邦國不空六爻
見天地之心公侯必復諒哀純嘏即上清班某百
念灰寒寸材綫短窮簷日短不堪輸炙背之忠別
駕水清詎敢作持杯之祝

賀史通判冬

溫

葭律浮灰候臨小至棘評佐獄慶叶大來遠莫捧
於兕觥誠敢輸於魚素恭惟某官氣鍾溫厚德迪
中和傑然驥展之材監此龍潛之邸鸚鵡武孟鸚鵡
杓滿介壽祺孔雀扇麒麟爐即儀禁甬某襍材綫
短泥軼冰寒乃分之宜詎敢耻孤貉之側惟鄰是
卜尚祈分燈燭之光

代回大理少卿

師石冬

緹陽襲筦綫景延圭候六律而合八能既滋羣動
敬五刑以成三德宜介百祥恭惟某官同寅協恭
分職率屬各抱黃鍾之器韻共司丹筆之簡書佇
積平反入儀華要其濫因聯事獲慶踐長一道冰
銜猥辱先施之寵五色雲物願迎方至之休

代回程監丞准冬

灰浮緹縵新北臺太史之占雲卧衣裳添南極老
人之壽恭惟某官襟懷霜潔談笑春溫未老得閑
飽味桑榆之暖久靜思動佇儀槐棘之班某莫捧
兕觥過勤魚素蒲萄一斛知公不爲於涼州嶰竹
數聲在我頓忘其寒谷

代回王寺丞庭芝冬

陽德由子而孳地氣上騰善類觀復之亨天休滋
至恭惟某官沉潜剛克消息時偕手縮袖間復添
補袞之線春回井底已驗浮緹之灰對此令辰宜
其遐福某適拘旅瑣莫綴賀某鳴鳳聽笳應九天
之詔下拂龜端策驗七日之朋來

代回江東李制帥大東冬

七日來復可知天地之心千里折衝實賴詩書之
帥道隨剛長政與和俱恭惟某官德配陽休氣排
冬凜名播江淮之草木識通河洛之圖書緩帶輕
裘方靜觀於雲祲獻履貢襪佇直上於星辰會由
五更三點之行益近一寸四分之景某材如綫短
心亦灰寒倚棠棣之華猶書紙尾曝茅簷之煖但
夢刀頭

代回楊州崔安撫与之冬

三微肇始萬彙滋亨集康寧富壽之疇在禮樂詩
書之帥恭惟某官克壯其猶久勞于外斗牛有耀
坐觀推策之長淮海無波自適觀梅之興卦已占
於七日班即近於五雲某託契惟深修辭不敢拜
長牋之委重搔短髮以真慚報不成章永以為好

代回淮西王安撫捕冬

一陽來復既見天地之心十國為連共戴詩書之
帥宜從穀旦茂介叢休恭惟某官肅括弘深靖共
正直圖書中秘星連五緯之光樽俎邊城雷動三
軍之喜佇應葭莩之動歸儀槐棘之班某猥辱手
書無由面賀維藩維翰願歸疆理之功如阜如岡
共享國家之福

代回淮東畢安撫再遇冬

緹灰候氣一新太史之占葦蕕宣風載重元戎之
寄宜從亞歲茂擁百祺恭惟某官識遠且明材沉
而毅輕裘緩帶備觀雲祲之祥堅甲利兵孰測霜
威之勁佇寧邊鑰入摠中權徑從魯觀之登即見
漢壇之築某屬紆朝組莫捧賀觴玉律和聲既屆
朋來之慶金印如斗願迎方至之休

代回宋總領

冬

日轂回輶舒永五紋之線星昭給餉光華六轡之
絲諒對剛辰之綏純嘏恭惟某官盛名晝永清德
氷明弩矢前驅見流錢於地上推蘇後疑如挾纊
於軍中底績懋哉歸班近只某濫聯筆橐阻奉椒
觴君子占一陽之來當體復亨之動王人序諸侯
之上即膺晉錫之蕃

代回林總領

祖洽冬

陽月終更慶一陽之亨復福星出使符五福之照
臨宜對令辰茂膺純嘏恭惟某官剛隨天運和本
時中養九德於黃鍾鳳鳴解合持貳卿之紫臺
卧長江衮繡晝行推蘇宿飽牽牛極畧既占侯於
漢臺駱馬懷歸寧倭遲於周道某濫塵朝綴莫旅
賀綦烹鯉得書先辱五雲之墜拂龜占易惟期七
日之來

代回趙總領

不悛冬

化日迎長卿雲紀瑞諸侯之上序莫重於王人一
陽之來道益亨於君子茂綏福履請致頌言恭惟
某官秉德忱恂凝姿信厚峙糧天塹星夙駕以載
驅給餽雲屯雷歡聲而四起暫司留鑰坐鎮陪京

宜對南至之書即後東歸之詠某材如線短心亦
灰寒刺繡吹葭空覺杜陵之老大獸獲貢機但觀
曹植之文章

代回輩都大嶠冬

天復一陽滋萌帝澤星連五緯照映使華維時也
立之休翕受川增之祉恭惟某官和鍾玉律清徹
氷壺方今之務孔殷孰堪經濟圜法之司尤急政
藉阜通會當錢流地上之餘即有人自日邊之召
某心隨灰冷技蔑線長賦問大鈞將爲天下而實
賀詩成小至亦驚人事之相催

代回喬運使

行簡冬

短日舒長益永六螭之馭長淮清晏遙知四牡之
功對此令辰宜其遐福恭惟某官和鍾玉律清徹
氷壺聚人曰財坐斡流泉之運靈物以氣潛回寒
谷之溫式遄其歸可拱而俟某濫持荷橐阻捧栢
觴占卦六日七分是爲道長修身千二百歲請致
祝規

代回淮西徐運使

燁冬

緹灰襲候肇基來復之祥繡節臨邊茂介踐長之
慶恭惟某官身兼數器夙駕單車招來鴻鴈之民

衆如雲集餽給貔貅之旅令若霜嚴宜對天統之
辰丕擁日來之福某屬拘朝綴莫旅賀約鳴鳳律
和知己宣於九德牽牛處遠聊具報以七襄

回永州知府陳提刑謝冬

竊潁川之河潤亦飽聞新尹之誇隔巫水之山嶺
木果賀中丞之泣蒙以義交之七日貢然邵翰之
五雲遂令寒灰頓有生氣恭惟某官仁排冬凜義
配陽剛英蕩繡衣固已淹五色之線朱轡皂蓋聊
復壯萬石之亭重緹回襦袴之溫一札趣絲綸之
召某覩先未快禮後知慙陳遵之尺牘可藏詎止
榮從事之十部李膺之別駕非昔正足辱太學之
諸生惟依湘水之深當借楚波之及

代回浙東譙提刑今憲冬

清臺占候肇推三統之元繡斧馳驅茂應一陽之
動恭惟某官清標範俗雅度鎮浮望蓬萊之雲已
青五色吹孤竹之管即造九階某濫綴朝紳阻陪
賀履驗丈三尺餘之日畧旣麗牽牛列五六百炬
之火城更觀仗馬

代回江東葉提刑賀冬

魯雲紀瑞堯日迎長黃鍾倡應於六雄繡斧光華

於四牡恭惟某官氣養剛大德合中和慷慨澄清
節凜氷霜之操將明欽恤復見天地之心茂對令
辰宜哀蕃祉某才如線短心亦灰寒對五更三點
之御床無由陪賀布一札十行於方國佇見端歸

代回浙西王提舉某冬

和叔正冬伯趙司至儀圖道長之慶允屬陽休之
賢伏惟某官清徹氷壺和鍾玉琯送之禮樂不離
尺五之天任以公卿即近丈三之日某無由面賀
例辱手箋喜魚得書莫報五雲之體拂龜端策但
占七日之交

代回福建陳提舉某冬

日官候氣書嚴魯觀之某冬星使觀風福等閩山之
厚恭惟某官器資凝遠業履端宏平糴有方粟若
源泉之混廉車所部忝回寒谷之溫且對亨辰茂
綏純嘏某贅員籍隸辱賜函牋視履若祥願觀不
遠之復裕民足國無忘自養之願

代回周馬帥某冬

星轉璇璣一陽既復霜嚴玉帳百福交升恭惟某
官肅振戎昭恪共武服馬騰士飽力夸洪鼎之扛
鳳應律諧氣協黃鍾之動佇寧邊鑰入總中權某

謀慶踐長先勤委重仰觀雲後既符登觀之書歸
扈日營即見築壇之拜

代回全州趙守

必愿

懷五更三點之駕行舊同班於吳下驗一寸四分
之牛匙今假陰於黔中方圖修獻履之辭已先拜
鳴謙之寵故情未歉弱念易盈恭惟某官禮樂宗
英侯王相種決科唐殿肯吟麗日之煌煌宅牧湘
源聊和舞風之潯潯對此重緹之候諒然五袴之
歌魯雲必書翻手足看於短至趙日可愛舉頭即
近於長安某比德微茫甘心半刺地爐煨芋已漸

參南岳之禪山意放梅儻尚憶西湖之飲

代回王發州

補之冬

鳳簫候氣律中黃鍾燕寢凝香衛森畫戟屆新陽
之漸進知純嘏之鼎來恭惟某官平易近民中和
布政溫其五袴不惟田里之安清在一盂可作京
師之潤履長之後晉接何疑某濫綴周行又逢趙
至旨且多多且百莫捧蒲匭之觴昌而熾熾而昌
請祝喬松之壽

代回韓慶元

元禮冬

堯曆正冬魯臺書呈其在惟良之牧宜膺滋至之

休恭惟某官明冰其相愛日之政民無遺便已歌
襦袴之功帝有恩言即布絲綸之命諒對復來之
慶即膺晉接之榮某濫次近班無從旅賀猥勤謙
德持畀問緘餘同前回王掇率啓

代回鄭吉州寅冬

天復一陽氣陶萬彙其在惟良之牧宜膺可致之
祥恭惟某官清德猶冰盛名如晝白鷺青原之山
水暫屈外庸黃龍五鳳之詔書即膺表選會從亞
歲入覲書雲某濫綴紫囊阻趨畫戟先辱飛緘之
况惟深藏龍襲之榮

代回趙信陽善張冬

周主測日魯觀書雲諒惟牧御之賢宜介康寧之
福恭惟某官秉姿剛大賦政中和洞明固圉之方
茂著扞城之績若時道長行有詔追某濫綴荷囊
阻持椒斚謹憑手畢略布衷忱

代回諸州賀冬

璿杓建子觀仍驗於五雲綺甸選侯復聿來於七
日仁賢所爰弗祿其穰恭惟某官德與時偕道隨
剛長絲綸邇只祥催宮線之添襦袴煖然聲協律
湜之應諒對四分之鳳曆趣歸三點之鴛行某百

念灰寒寸材襪短歸吾視諸故府漫見新陽蹇誰
留芳中洲願膺表選

代回紹興黃尚書

由冬

陽生於子曆嚴伯趙之司星拱乎辰光粲文昌之
座宜從亞歲茂介新祺恭惟某官德稟中和氣全
剛大給符鳴履早儀喉舌之司均佚偃藩暫鎮股
肱之邵南至既書於魯史東歸宜詠於周詩某才
無線長心亦灰冷紫宸朝散空驚獨老之形容盡
戟畫森願謹凝香之寢衛

代回廣德余守

嶧冬

緹灰應律圭綫迎長諒畫戟之凝香叶黃鍾而宣
德恭惟某官溫恭爲政平易近民善頌洋溢於內
畿和氣周流於寒谷茲一陽之既復諒百祿之交
升某偶綴朝參莫陪賀旅五雲下墜如瞻魯觀之
書七日明來會見潁川之璽

代回台州常守

建冬

斗柄北攜日躔南至驗侯伯化行之美應君子道
長之休恭惟某官江海把麾京師蒙潤擁碧油之
旆歛惠一州標赤城之雲載書五色宜從穀旦即
覲楓宸某偶綴顏行無從面慶頌魯侯之受祉益

熾而昌問顏子之爲邦不遠而復

代回平江李大諫 大異冬

黃鍾律應地回燕谷之春畫戟凝香人詠蘇州之
守宜從亞歲益介繁禧恭惟某官以猷承明而試
馮翊獻履貢襪益深旒宸之思今袴昔襦聊借京
師之潤布緹密驗召綽顯頒某縻身於朝莫面以
賀靈臺歛竹已默應於殿中山意放梅更相期於
鼎寶

代回處州林守 孔昭冬

化日迎長卿雲紀瑞黃鍾動地叶陽律六鳳之鳴

紅旆行春驗人生五馬之貴恭惟某官剛全天運
和協時中言從古括之邦暫布甘棠之教三重緹
縵旣觀葭律之浮一扎絲綸即趣楓宸之侍某無
由旅賀猥辱謙施問顏子之爲邦不遠而復願魯
侯之受祉俾熾而昌

代回常州王守 遇冬

氣動黃鍾潛應一陽之復香凝畫戟孰如千里之
常宜對休辰茂膺蕃祉恭惟某官心焉禹稷政則
龍黃似聞十萬戶之民各安汝止咸頌二千石之
福以莫不增緹縵灰浮絲綸鼎至某末由望履莫

獲稱觴山意放梅試問和羹之信靈臺歛竹盡回
寒谷之溫

代回建寧傳大諫

伯成冬

魯臺觀象肇新五物之書漢殿陳儀爰合八能之
奏惟良作牧与國同休恭惟某官節稟氷霜氣塞
天地一麾出守績已茂於循良千里見王道豈忘
於仁義當陽德彙進之始非君子道長而何宜對
熙辰茂綏純嘏某無由稱慶輒致頌言攜角斗杓
曆已開於周正植鰭箕尾夢即兆於商巖

代回慶元程守

準冬

籥寸全中黃鍾之律虎符分握凝畫戟之香履
休辰宜其遐福恭惟某官氣全剛大德稟中和
卧治於潛藩迄坐寧於瀚海六宮一線添樂國
之棠陰五緯連珠接故家之樞柄何天之寵不日
而還某濫司秋雲莫捧春酒段添六館足知君子
之亨麥熟兩岐請副輿人之禱

代回湖州魏守

大中冬

杓攜龍而建子象自天旋甬吹鳳以及辰陽從地
復諸侯之應百祿是宜恭惟某官坐分左符卧治
右翊三微統正知顧渚之春回一線影舒覺長安

之日近道隨剛長福与時升某茲辱朋絨無回旅
賀葭葭六琯是爲神策朔復朔之祥麥熟兩岐莫
陪太守樂其樂之宴

代回林嘉興良冬

鳳曆起黃鍾之籥地氣上騰燕寢凝畫戟之香天
休滋至恭惟某官謹身帥下善政致和魯觀雲開
接吳王之攜李周畿日永懋召伯之甘棠緹氣旣
溫綸音必渙某濫塵豹尾莫捧兕觥諧秬黍之和
旣知谷暖作嘉禾之命即聽庭揚

代回李通州直養冬

初陽見天地之心三微旣兆太守爲吏民之本百
祿是適恭惟某官和而不流剛而旡虐森凝畫戟
共稱二千石之良顧瞻白雲遙上九十親之壽勞
謙有吉視履考祥某方具賀緘先承慶牘五袴旣
戢共瞻刺史之天一線已添請近長安之日

代回胡嚴州以采冬

旣管灰浮肇正三微之統棠陰日永况親千里之
畿百祿是適諸侯之應恭惟某官敷華緯國歛惠
等城嶰谷冬寒旣協鳳鳴之律桐江春滿足凝燕
寢之香雲物一新天休滋至某未由旅賀猥辱謙

危氣有推移願體璇璣之運民無愁嘆佇調玉燭之和

代回趙婺州

善下冬

月臨周正肇書魯觀之雲天昨漢宗佇賦梁園之雪宜裒茨福以厚桐封恭惟某官德稟忱恂才無譎吝天子有命俾司玉葉之盟价人維藩暫試金華之牧不遠之復未占已孚某濫綴秋官阻陪夏賀獻履貢襪既書南至之祥衮衣繡裳願副東歸之詠

代回邵武周知軍

章冬

維斗建子既復一陽受地視侯懋綏百祿恭惟某官中和布政抚字勞心今五袴之載歌紛迎騎竹線之徙蔭聊復酣棠諒當凝燕之香丕介厖之祉某未遑旅賀先辱謙施鳴鳳召和想二天之獨有拂龜端策驗七日之朋來

代回無爲趙知軍

善湘冬

雷既復星昴初臨州牧之政惟和君子之道斯祉恭惟某官名駒千里分雉列城淮水湯湯遠借維之重周原膺膺近觀還定之功宜對剛辰茂紀嘏某無由陪賀茲辱飛緘憇甘棠之陰益舒

樂音奏孤竹之管即聽鈞天

代回寧國王知府補之冬

魯觀臺而書雲物載叶剛辰頌宣州之賢主人宜
裒景貺恭惟某官氣鍾高厚德備中和昔華貫之
通儀今大邦之爲殿何天之寵如日之升某莫捧
兕觥過勤魚素反復其道公宜歸槐棘之班支離
其形我欲息桑榆之影

代回池州陳知府奕冬

月律浮葭既迎日至虎符分竹茂擁天休恭惟某
官克壯其猷共武之服甘棠教洽樂晝默之移陰

細柳營堅新岸容之待臘宜裒多祉以對休期某
濫綴朝行阻陪賀旅雙旌風動熟觀雲綬之祥六
毒縣霜嚴佇應霆聲之震

代回安豐史知軍天錫冬

魯臺南至卦占七日之來淮水東馳人詠二天之
可宜裒多祉以錫諸侯恭惟某官風調不羣器資
甚茂承師旅飢饉之後力撫瘡痍收愁恨嘆息之
聲復堅保障屬當勍挺宜介椿祺某莫獲飛觴猥
勤染翰惟君子之道既長如川之增願方伯之政
惟和何天之寵

代回信州李寺丞

昌冬

律中黃鍾日運躔於斗北香凝畫戟雲紀瑞於江
東肇對剛辰宜哀蕃祉恭惟某官器資永潔德政
川流盤仙李之根豈假葭莩之援甜甘棠之蔭茂
騰桑麥之歌來復之交既占視履之祥可考某濫
班朝綴莫履賀約問微陽之回未回誰汲無波之
井知太守之樂其樂賸盼有脚之春

代回濠州何都統

汝霖冬

新陽浮瑄寅賓化日之長元帥開藩茂介自天之
佑恭惟某官深沉而能勇果毅而善謀鶴唳淮淝

草立鼓鼙之績魚游濠上今宜保障之勞茂對
辰宜哀多祉某未遑馳慶猥辱貽箋登觀書雲密
已觀於道長築壇擇日佇益振於戎昭

代回趙無爲

善鼎

冬

密緹布室地氣上騰緩帶專城天休滋至恭惟某
官飛英屬籍欽惠介藩草木知名威肅江淮之遠
葭莩候律春回嶰谷之溫燕喜惟新龍光有渥某
無由稱慶過辱屬辭梅放柳舒既密回於一氣竹
苞松茂願益對於百祺

代回孫衢州

子直

冬

孤竹之管雲和之琴律諧冬至太末之城姑蔑之
里和共春回時惟旬侯趨綏疇祉恭惟某官器資
水繁政術泉流桑蔭在庭認憩棠之勿翦黍生千
盛笑刻楮之不成佇即從日邊而來斯可後天下
而樂某漫聯粉社阻捧栢觴畫戟香凝已不殊於
雲物紫宸朝散猶及見於風標

代回南安趙知軍師傳冬

曾雲旣書陽從地復趙日可愛福与时升恭惟某
官信厚存心中和布政灰浮緹室民知襦袴之溫
線永繡文公豈爾絲之急佇息潢池之盜益凝畫
戟之香某未果馳箋猥勤飛翰軍聲破竹會清洞
口之塵埃山意放梅試問嶺頭之消息

代回史吉州定之冬

律中黃鍾謹書雲於太史香凝畫戟歌湛露之諸
侯茂對休辰宜膺純嘏恭惟某官榮分漢竹式憩
召棠執樂三千俯就專城之樂提兵數萬更書擊
賊之功福与时升道隨剛長某未由叙賀猥辱馳
箋敢因勒復之間輒致鳴謙之謝

代回江州陳守卓冬

十日來復聖人見天地之心九江孔殷太守宅生

靈之命致和以政均福于民恭惟某官喜氣排冬
盛名如晝日長一線賦豈急於繭絲氣煖重緹香
自凝於燕寢佇盼褒璽遂秉觀圭某辱託爲寮過
勤示問修戶庭之令有愧頌言寬田里之愁無忘
愛助

代回新順慶李知府鏗冬

言雲登觀願面慶於考祥至日閉閤辱手箋之却
詢敢憑尺牘就布寸局恭惟某官心與氣游德隨
剛長出守數已六遠邁鄴侯之行年近古俗有三
喜見坡仙之歸里旣新鳳律宜筮駕行至朔同日
謂之章章有慶矣壽考維祺介以福福履綏之某
欲旅賓綦先塵旅拒靜以待陰陽之定願致頌言
復其見天地之心即觀征吉

代回前權萬州趙守

昴星正冬式應堯時之授辛日書至允符魯觀之
占維時元帥之詩書茂介宜民之福祿恭惟某官
德潛剛克道配陽休雷在地中古旣亨於七日風
行水上身即近於五雲押駕行三點之班轉鴻鈞
八荒之氣某寸材線短一障冰寒牽牛之景丈三
實窘蹊田之奪鳴鳳之簫七寸誰回嶮谷之溫

回寶慶陳通判

冲冬

清水出壑未皇瞻仲舉之興至日閉閤乃倏領孟公之牘既先施之不敏復倒置之可慙感君子之鳴謙增小人之自訟恭惟某官德星維夏喜氣排冬汗漫九垓共佇舊氈之後翱翔半刺暫增新府之雄召棠之蔭既成漢竹之符孔邇將恐合八能於鸞鳥殿徑當歸三黜之鵷行某未遂披雲已深蒙霧無蟹徒名於監郡不龜敢望於封侯蒙篤二郡三武岡之情特有一紙十從事之况公歸無所亟觀孔雀扇影之還德必有鄰尚憶狐貉緼袍之立

代回嘉興楊倅

祖堯冬

圭日舒長頓覺牽牛之遠屏星絢彩益知展驥之長諒當來復之辰不擁疇離之祉伏惟某官稟姿溫厚賦政和明題別駕之輿流聲籍甚懷刺史之綬闔境安之幸為嘉禾之民益廣甘棠之蔭某無由面賀猥辱手書感佩高情藏但深於十襲噓呵凍筆報有愧於七襄

代回華亭錢宰

德謙冬

律中黃鍾之宮是名天統身為赤縣之令蓋近日畿動惟厥時利有攸往恭惟某官用儒飭吏以政

疑民一線初長技可伸於刀錦重緹方暖政肯急
於繭絲亟諧六鳳之簫遂振雙鳧之舄某濫紆朝
紱特辱賀緘烹魚得書莫報五雲之體拂龜端策
但占七日之爻

代回黃巖楊宰

圭冬

魯臺紀瑞肇新太史之占楚縣分封宜爲令尹之
喜恭惟某官天朝儀羽巖邑絃歌地氣浮葭新漢
庭之律呂岸容舒柳認陶令之風流屆此令辰宜
其遐福某寵勤下問愧未先施紅蠟塗金良照形
容之獨老黃柑噉玉仍慙口腹之累人

代回趙知縣

冬

天運回壬萬物以之姪育斗柄插子一陽於是孳
生時維字民之官坐膺善治之福恭惟某官仁風
破臘喜氣排冬舒柳放梅散作河陽之煖吹竹生
黍薰爲嶰谷之和趙日之愛旣深堯雲之就何遠
某寸材綫短百念灰寒

爐固已重拜其細

更得三復之藏

回外縣賀冬

復其見天地之心小人恐矣誠者合內外之道君
子觀焉宜有陰騭之祥式介陽休之德伏惟某官

氣排冬凜政體春和坎維心亨既生芸而挺荔泰
交征吉將連茹以拔茅對柳舒梅放之辰擁松茂
竹苞之慶某幸叨聯事辱畀屬辭於我如浮雲臺
空登於魯觀其志在流水琴孰聽於園丘

普回州縣官賀冬

視朔登觀又逢十九歲之章測日候圭可愛一丈
三之日因微芒之陽德賀方穀之正人伏惟某官
毓秀昂躔垂光井絡噓物以氣旣挺荔以生芸贈
人以言亦連珠而合璧其考六日四分之鳳曆入
陪五更三點之駕行某睨彼牽牛眇焉負鶴天囑
把綉自知無一線之長漢女支機聊復效七襄之
報

謝寄居鄉官賀冬

杓攜龍角天正肇新律轉鳳甯人時敬授有如是
邦大夫之賢者宜曰予攸好德而錫之恭惟某官
和氣融冰脩名揭日放梅舒柳不妨泛栢以浮椒
挺荔生芸行即拔茅而連茹七日來復百祿是遒
某假守鄭鄉又登魯觀按箇旅不行之卦敬已閑
閑味形容獨老之時更思專壑徒拜嘉於錦綉莫
效報於檐楹

謝同官賀冬

杓躔建子又屆新陽斗壘同寅有勤善頌惠而好
我更以贈君恭惟某官明冰其相愛日之政靜以
待陰陽之定盈則有孚復其見天地之心受之無
妄式哀庀祉不對龍光某獲託爲寮又逢亞歲十
年之閱凋謝詎更思三黜之朝萬物之隨開張惟當
勉一箱之讀

回鄉官學職賀冬

聽六日四分之鳳律又見新陽詠五更三點之駕
行已迷舊夢茲勤善頌但愧過情恭惟某官語染

芸香氣薰葭葭瑄登觀以望目堪織雲漢之章閑閑
而居亦足驗地雷之卦某寸材線短百念冰寒井
底之陽未回若爲觀復江上之容獨老良感相親
回學職賀冬

杓綱建子歷新五鳳之書魁首枕參祥應六龍之
邸對時道長即日言揚伏惟某人心醉六經志在
千里文史三冬之用旣足三餘雲霄一握之程亟
觀一躍天葩旣茂地芥坐收某一障灰寒百懷冰
冷不遠之復願歸飲顏子之瓢論秀而升尚或勸
漢人之駕

梅亭先生四六標準卷之四十



